

## Eveniments tuatschins

(1) **La Gasetta Romontscha ch'ei cumparida per l'emprema gada igl onn 1857, ei ina fontauna preciosa per la historia dalla val.**

### Tissi da mustgas

Ins ha schon legiu vi e neu da sventiras daventadas cun affons tras tissis da mustgas. Quels dis vess era gleiti in affon da **Tujetsch** saviu vegnir per la veta sin quella moda. Ses geniturs vevan rasau ora en stiva pupi da mustgas che cuntegn era arsenic e per giavinar las mustgas pli fetg vevan els bess empau zucher sissu. Fertion ch'els eran occupai, va la buobetta vid il pupi, pren quel en bucca, il gust dultsch plai, ed ella maglia in ton. Per ventira ha ella cuninaga stuiu render ed entras spert agid medicinal eis ella mitschada dalla mort ed ils geniturs culla tema. In niev exempel ch'ins sa mai esser precauts avunda el survegilar ils affons.

Nova Gasetta Romontscha, 1857, nr. 30, 24 da fenadur

### Fautor dil pauperesser

Signur assistent Gion Ludwig Bèr *Beer* da **Tujetsch** ch'ei morts la jamna vargada, ha fatg si als paupers dalla vischnaunca in legat da 1000 frs. Milsanavon duei ei vegnir partiu ora ad els ina buot sal. Per rugalar si ina baselgia ch'era en decadenza ha el per plirs onns testamentau il tscheins d'ina acla. Ultra da quei ha el era seregurdau da dus paupers orfens da siu vischinadi per ton pli tgunsch gidar quels tier in mistregn. *Il cudisch da mortoris noda: 17-9-1857 D. Assistentes Joannes Ludovic Beer, fegl da statalter Jacob Martin Beer e Maria Margarita Rueras e la remarca: Fautor pauperum, 37 onns.*

Nova Gasetta Romontscha, 1857, nr. 39, 25 da settember

### Baghegiar cun crappa e destruir Putnengia

La vischnaunca da **Tujetsch** survescha per muster d'in bien uorden d'uauls e baghegiar si spirontamein clavaus da crap. Igl ei aschia da capir, che gliued sedattan ora per biala crappa, denton fuss ei tuttina da giavischar, ch'ins schanegiass las venerablas reliquias dil bien temps vegl. Ei fa mal d'udir, che las cantunadas dalla biala ruina dil casti da **Putnengia**, ch'ornescha l'entira val, vegnan disfatgas per duvrar la crappa vid in clavau. Igl ei memia prosaic, gie empau barbaric d'applicar las cantunadas dil casti dil fundatur da nossa Ligia Grischa vid in nuegl! Videant consules ne queid detrimenti capiat res sacra!

GR 13.3.58 nr. 5

### Disfar la ruina dil casti da Putnengia.

Nossa critica sul disfar la biala ruina da **Putnengia** ni **Pontaningen** ha provocau reclamaziuns. Buca ch'ins hagi astgau snegar la barbarica commessa, na nus vein cun nos agens egls saviu seperschuader da quella, cun profunda indignaziun observau, che la tuor porscha tuttaviva buca pli il romantic aspect da vivon. Bein aber eis ei vegniu pretendiu, che quella ruina derivi dil temps dils Romans, seigi buca stada ina possessiun da Pieder de Putnengia, ed in secreigi buca da meritar il num da barbars per disfar las ruinas, nua che tirans habitavan vivon. Nus dein tier, ch'ils Romans hagian baghiau bein enqual casti per lur garnischuns e per segirezia dallas vias, sco il Spinöl e Maretiöl a **Cuera**, mo paucs han surviviü l'emigraziun dils pievels ed umens savieivels declaran da bunamein negliu saver observar il stil roman vid nossas ruinas. Nus dumbrein en nies cantun circa 170 castials ni ruinas ed ins po dir, che quels tuts seigien cun pintg'excepziun vegni fundai en differentas periodas dil temps miez, pli tard vegni construi autruisa e biars puspei alzai ord lur ruinas. Muort sia situaziun denter igl imperi **German** e l'**Italia** veva **Rezia** da gliez temps in gronda impurtonza militara e buca mo mercantila e schon per quella raschun eis ei vegniu menau si bia castials.

Ins sto buca tertgar, che tut quels castials seigien stai ignivs da tirans che mudergiavan il pievel. En biars habitavan nobels signurs ch'eran en temps da pasch ed uiara babs e menaders dil pievel. Bein enqual niebel baghegiava si da quels forts per porscher alla glied in asil en temps d'uiara ni invasiuns. Aschia han era plirs uestgs da **Cuera** cumprau ni baghegiav castials per protecziun da lur subdits. Auters ein vegni baghegiai per schurmetg dallas vias e dil traffic, en in temps nua che perfin cavaliers sedevan giu cun engular e sblundergiar, aschia anfl'ins tals monuments en aultas cuntradas, nua che negina noblezia fuss schiglioc sedomiciliada, sco en **Stussavia, Avers** etc.

Las famiglias noblas che vivevan en quellas tuors ein pella gronda part mortas giu ni emigradas. Aschia eis ei era iu culla respectada famiglia de Putnengia. L'**Acla Putnengia** ch'ei damaneivel dil „casti“, sco ils Tuatschiners numnan la ruina e segiramein porta era quel il num **Putnengia**. Per motiv ch'el era il sulet casti ella val, sche vegnev'el per ordinari numnaus cuortamein mo „casti“, gest sco quei ch'ils habitonts da **Mustér** e **Sumvitg** numnan aunc ozildi lur capitalas mo „vitg“. Sch'ei exista en **Tujetsch** in casti de Putnengia e sch'il fundatur dalla Ligia Grischa senumnava Pieder de Putnengia, avat da **Mustér** ed oriunds da **Tujetsch**, sche pon ins tuttina concluder cun buna raschun che quella tuor udevi a sia parentella. Nus pretendin mo quei, che Röder e Tscharner dian, dus umens che han legiu atras tuttas cronicas grischunas. Era Mohr numna en siu archiv quella tuor **Putnengia** ni **Pontaningen**.

Tuts viandonts che passan tras **Tujetsch** considereschan cun veseivel plascher la ruina da **Putnengia**, igl ei la pli gronda remarcablada historica, che l'entira val posseda e tier quei pitoresc ornament da quella cuntarda. Legian ils viandonts en lur viadès da quella renomada tuor, duessen ei aber buc anflar pli ella ed udir tgei tresta sort che sia miraglia hagi giu, sche vegnan els segiramein a far curvien sur in tal barbarissem. Il ministeri da **Württemberg** ha dacuort relaschau in avis allas suprastonzas, als plevons e scolasts, ch'els dueien haver quitau che tuttas antiquitads vegnien bein reservadas e sin quei lessan era nus haver fatg attents las valladas romontschas. Denton schein nus suandar cheu in inserat tarmess tier a nus ord la capitala cantunala.

Ils da **Tujetsch** vulan ornar lur val cun bials clavaus da crap e destrueschan denton lur pli bi e renomau ornament – il casti da **Putnengia** ni **Pontaningen**. Tgei nova revolta eis ei rut ora encunter las tuors e castials ella **Rezia**? Il temps dils tirans ei vargaus! En nies temps eis ei pintga honor pli da ragischar ora las veglias ruinas, quels monuments sepulerals, che fan memoria dalla decadenza da tuttas forzas humanas; sunder plitost da mantener e schanegiar ellas schi ditg sco pusseivel. Era en lur decadenza ein ellas aunc adina remarcablas pils historiografs, viandonts e habitonts dil liug, nua ch'ellas existan. Igl ei pia ina enzenza da pauca stema ed honor encunter venerablas antiquitads, sche habitonts dalla tgina dil **Rein** entscheivan en moda vandalica a sespogliar sesez da lur veglias reliquias! Ins duess buca crer d'anflar schi freid patriotissem sco la glatscha dil **Badus**. Ei tutta simpatia per nies renomau avat Pieder de Putnengia svanida? Nus tertgassen, ch'ei fuss adual schi cunvegnent als Tuatschiners d'esser empau loschs silla miraglia da quei um gigantic per l'entira **Surselva**, che sin in bi clavauet niev, fabricaus da mauns temeraris, che schanegian gnanc las trestas ruinas dil fundatur dalla libertad sursilvana! La glienda sper **Trun** ha tiegl engirament digl onn 1424 viu gl'avat Pieder de Putnengia sco cau dil pievel. Fuss ei pia buca dueivel da tener en honor las davosas reliquias da quei um meriteivel per nossa patria, sch'ins posseda aunc zanza ina sbrenzla senn patriotic e senn d'engraziament; pertgei quel san ins mussar encunter las meffas ruinas da quei romantic casti **Putnengia**.

GR 27-03-1858 nr. 13.

### **Entschatta matg neviu 55 uras**

Strusch ha ei giu dau la davos'ura digl avrel, sche ha il matg spert bess anavos nus el pli sgarscheivel unviern. Quels che tegnan sin striegn sesmarveglian buca giud la sgarscheivla nevada. L'aura ei gie secavestrada la notg da Walburga, dils 30 d'avrel sigl 1. da matg, nua che las strias tegnan da vegl enneu in solemn barlot cul demuni ... sche ha ei entschiet a never e neviu 55 uras, bunamein treis dis e duas notgs! A **Mustér, Medel e Tujetsch** seregordan umens da siatonta onns e varga onns buca da quellas nevas. Egl emprem liug er'ei 9 – 10 quartas neiv, ella **Val Medel e Tujetsch** 11 – 12 quartas. Ellas vischnauncas da **Sursassiala** ei tutta communicaziun stada interrutta per treis dis, als perveseders er'ei in grond sforz per arrivar en nuegl e tiella scartezia da fein, stuevan ei aunc semudergiar per survegnir aua. Per ventira ha igl Altissim pertgirau da grondas disgrazias. Ils habitonts da **Selva** ein fugi a dretg temps en **Novaselva**, la lavina da cauld ei vegnida giu, mo senza far donn al vitget. La bun'aura luenta la neiv cun ualti bien ried ed aschia eis ei da sperar ch'ins possi scappentar ils tiers.

GR 08-05-1858 nr. 19.

### **Trest'aura il davos uost**

Dumengia vargada eran las muntognas vestgidas en alv, ed ella **Cadi** era la neiv tschentada tochen viers **Trun**. Tras quei ein ils èrs vegni terrai aschizun sco sch'ins vess zulau els. Tier tutta sventira han ins silmeins giu la ventira, ch'igl ei vegniu neginas scheltiras sissu, sco ins vess pudiu temer silla serenezia da dumengia sera. Oz venderdis, ein ils cuolms puspei nevi giu e silla dracca da quels dus dis eis ei strusch da sperar pli, ch'ils èrs levien puspei si. Igl ei da temer ch'els encaglien e ch'en bia loghens vegn ins a far pauc graun ni nuot diltut, tonpli ch'ei sedi: „Gl'uost mett'il paun en canaster“. Ils truffels vevan aunc biala paretta, mo ins auda tscheu e leu, principalemin a **Trun**, a selamentond sulla veglia malsogna. Ellas alps, nua ch'ei flessegiava uonn tschelluisa pauca latgira, pon ins cumprender ch'en tala ruha aura „mondi il latg els corns“. Schi grondas ruhas egl uost han ins da bia onns enneu mai giu; duess aunc la biestga buca trer bein, sche vein nus in onn da miseria avon esch, ed il stupent avrel ha menau nus egl avrel.

GR 28-08-1858 nr. 35

### **Dus camutschs cun in siet**

Era dus catschadurs da **Tujetsch** han sittau igl emprem di da catscha quater camutschs e zuar era dus cun in siet. Ei vegn selamentau, ch'ils catschadurs dil **Tessin** ed er'enqual d'**Uri**, hagian fatg catscha da camutschs sin territori grischun e lu aunc d'in temps scumandau. Il meglier fuss ei, sch'ei vegness dalla Confederaziun anora scumandau diltut la catscha per entgins onns.

GR 11-9-1858 nr. 37

### **Il mèl da Tujetsch**

... En **Surselva** vegn la tratga d'aviuls pli e pli impurtonta e rendabla; il renomau mèl da **Tujetsch** e **Medel** vegn da fetg biars viandonts prius egl jester sco per ina raritad. ...

GR 25-09-1858 nr. 39

**(2) Quels onns era ei la normalitad da numnar, ton ils Medelins sco Tuatschins, ils selvadis. - Da l'otra vart vegn il mèl d'aviuls ludaus pir che mai sco era l'innovativitad dils Tuatschin cul meglier uorden forestal.**

### Collectau pil Ritli

Ellas scolas dil district Reinsu:

<b>Rueras</b>	contribuents 21	1.71 frs.
<b>Selva</b>	18	2.85 frs.
<b>Cavorgia</b>	13	0.95 frs.
<b>Sedrun</b>	45	1.90 frs.

GR 1859

### Spigias salin

Sco remarcablada dalla presenta vegetaziun remarchein nus, ch'ei duei da S. Antoni, ils 13 da quest, esser vegniu anflau spigias salin a **Tujetsch**. (?)  
GR nr. 25, 1859

### Ils selvadis cun buna raccolta

Nus havein schon relatau ch'ils selvadis secuntentien zun fetg culla raccolta dils fretgs. Denter quels ventireivels ei era la **Val Tujetsch**, che seregorda darar d'in aschi fritgeivel onn. Siu glin, renomau ell'entira **Surselva**, para da dar ina splendida rendita. In particular ha giu semnau ina curtauna semglin e fatg 27 curtaunas e mesa. El ha giu mess stubla e fretg suravia cultem da tiers manedels. Tiella reha fenada e risdivada han ils Tuatschiners aunc fatg – sco ei vegn segirau – da mellis buordis fein a pastg ellas muntognas, ed aschia pon ins spitgar, ch'ils stiarls vegnan quest unviern ad esser tschercai sils marcaus da **Glion**. – Tuccont tier la fiera da **Ligiaun** vulan ei pretender, ch'ei seigi ussa buca pli schi bunas tunas.

GR nr. 38, 1859

### 137 borlas sin ina spigia

Nus vein en in da nos davos numers giu fatg menziun dil destinguuu glin da **Tujetsch**. In um da fei ord quella vischnaunca ha ussa raquintau a nus ina secunda raritad sur da quei fretg. El hagi giu en siu iert ina teglia ni plonta da glin che vevi 137 borlas! Da quintar sco solit per ina borla 11 cauls, vess pia quella teglia purtau ina raccolta dils 1507 dubels.

GR, nr 40, 1859

### Altezia dils divers vitgs ed uclauns

En pign temps vegn ei puspei a cumparer in niev blatt dalla gronda carta federala da general Dufour; quel cuntegn l'entira **Surselva** cun pliras parts cunfinontas. Sco nus vein schon remarcu inaga, ei quei la pli gronda, bial'ed exacta carta, ch'exista sulla **Svizra**, gie neginas autras tiaras han da mussar si ina semeglionta. Quei stupent blatt vegn a far plascher a scadin Sursilvan. Nus vein denton copiau giu las altezias dallas vischnauncas sursilvanas, per far veser il successiv sbassament da nossa vallada. L'altezia ei dada en meters sulla mar, in meter ei 3 ½ peis ni 5 bratscha nova.

<b>Pass d'Ursera:</b>	sur <b>Tiarms</b>	2154 meters
	sur <b>Tschamut</b>	2052 meters
<b>Pass sul Crizli</b>		2350 meters
<b>Tschamut</b>		1660 meters
<b>Selva</b>		1540 meters
<b>Rueras</b>		1360 meters
<b>Camischolas</b>		1424 meters
<b>Sedrun</b>		1398 meters

GR, nr. 49, 1859

### Pastira als paupers

**Tujetsch**, nua ch'ils paupers pudevan vivon mirar tier co il terment muvel dils beinstonts sbutlava giu las stupentas pastiras ed alps cuminas, ha ussa encuretga da

bonificar ils „murdius“ cun dar ora ad els tocs pastira per schar semnar truffels e graun. Cun quellas sorts han gia bia vischnauncas segidau, ed aunc biaras savessen far il medem.

Nova Gasetta Romontscha nr. 1, 1860

### **Probabel la pli veglia lètg**

Quels dis ha la nunmisericurdeivla mort separau a **Tujetsch** ina letg da 62 onns, 2 meins e 2 dis. Probabel la pli veglia letg dall'entira **Cadi**, sche buca dall'entira **Surselva**. Igl um ch'ei ussa morts, veva varga 88 onns e la dunna che viva aunc, ha cumpleniu ils 93 onns. Sch'enzatgi duess dumandar co quels seigien vegni vegls, sche san ins rispunder: cun viver en pasch e buna veglia, esser activs, setener vid la broda e tschagrun fiers e buca cun tudi sevilar, esser lischents e slavidrar caffè. *Ei setracta da Simon Fidel Decurtins fegl da Gion Antoni e Riedi Margreta Catrina, Rueras, remarca: Senilites, vegliadetgna: 88 onns; naschius 1773; maridau 1798 Maria Catrina Berther (1767-1960)*

Nova Gasetta Romontscha nr. 1, 5 da schaner

### **Il meglier uorden forestal**

Per ina emprova, che nos meinis cheu allegai selaschien tgunschamein exequir, alleghein nus igl exempel dalla vischnaunca da **Tujetsch**, che ha segiramein in dils megliers uordens forestals, ch'ei dat tier nus e nua ch'il quitau e l'energia dalla suprastanza spargna tut cumandar e dictar dils bostgers. En quella vischnaunca vegn ei pagau per in lenn tochen 20 francs. Quels onns eis ei vegniu baghegiu leu in grond diember da stupents clavaus da crap e vid sias classenas vesan ins spirontamein lenna fendida enstagl lattas. Persuenter aber ei la cassa da vischnaunca en bien stan ed ils uauls serefan ch'igl ei in plascher.

Nova Gasetta Romontscha nr. 2, 1860

### **Promoziun dil mèl**

Ils 23 d. q. eis ei serimnau a **Mustér** 22 amatars d'aviuls, spirituals e seculars ord las vischnauncas da **Tujetsch**, **Mustér**, **Medel**, **Sumvitg** e **Trun** ed han concludiu da constituer ina societad per promover la cultivaziun d'aviuls. Sco president ei signur farrer Durgiai da **Sedrun** vegnius numnaus. ...

Nova Gasetta Romontscha nr. 8, 25 da fevrer 1860

### **Il fevrer ha ballistrau**

Il fevrer ei vargaus e satraus. El ei buca mo staus pli liungs ch'igl ordinari sonder era pli ruhs. El ha entschiet cun cufla ed ha ballistrau tochen il davos di. Gie, bia casas e clavaus vessen negin tetg pli, sche quel fuss buca staus fermaus giu entras ina brava neiv. El ha fatg siu duer compleinamein e tonaton parev'ei ch'el lessi aunc far bien ils davos dis, sch'el vess giu schau muncar enzatgei. Da plirs mauns aud'ins da sgarscheivels suffels dils 27 e 28. Enta **Medel** ha el buca mo rut en l'escha e bess las grundas da tetgs-londas pli lunsch, sonder perfin ruinau ina grunda da tetg cun plattas. .... Calonda mars ha purtau stupenta serenezia da 4 grads calira e favugn.

Nova Gasetta Romontscha nr. 9, 3 da mars

### **94 onns veglia**

Questa jamna ei vegniu satrau a **Tujetsch** ina femna da 94 onns e 3 meins. Ella gudeva tochen il davos buna sanadad corporala e bien appetit, era aber totalmein sespiarsa dil spért e mava fetg en fanzegna. Veva ella per exempel gentau bravamein, sche era ella suenter in'ura puspei el stan da dumandar il gentar e sesmarvegliava, cura ch'ins scheva ch'ella hagi schon gentau. Essend siu um morts quest unviern, vegn ei in temps suenter fatg ad ella la damonda dad ina femna jastra, sche siu um seigi morts ed ella rispunda sissu: "Po schon esser, ch'el seigi morts." *Il cudisch da*

morts nota: 29-6-1860 Maria Catrina Berther, feglia da Gion Giachen e Berther Maria Elisabeth, **Rueras**, remarca: senilites, 93 onns,  
Nova Gasetta Romontscha nr. 27, 6 da fenadur 1860

### **Cargau ils 25 da fenadur**

Il fenadur ei staus in ruh gast, pli adattaus pigl unviern che per la stad. In'alp da **Tujetsch** ei vegnida cargada da s. Giachen, *ils 25 da fenadur*, ed ha ils emprems otg dis mintga damaun giu la neiv el stavel. Fein vess ei dau pli bia che quei ch'ins manegiava, mo igl ei gleiti da temer ch'el fetschi catschar pauc latg igl unviern.  
Nova Gasetta Romontscha, nr. 31, ils 4 d'uost 1860

### **Sedustai sco liuns**

Il pugn da recapitulaziun pervia da sminuir il temps dalla catscha sin camutschs ei ella **Cadi** vegnius enviaus anavos cun in grond pli e zuar a **Tujetsch**, **Medel** e **Trun** unanimamein. Ils catschadurs ein sedustai sco liuns e declarau per ina malgiustia da vuler scursanir ad els il temps da catscha per schar vegnir neu ils Tudestgs e Talians e sittar naven nos camutschs. Ins vesa denton con necessari ch'igl ei da sentelgir cun nossas vischinontas tiaras sur dad ina generala fermada dalla catscha per enzacons onns. ...

Nova Gasetta Romontscha nr. 31, 4 d'uost 1860

### **La tema dil Run**

La gronda malaura dils 17 d.q. ha caschunau gronds donns ella **Cadi** ed egl **Uri**. Sil **Lucmagn** ein treis armauls vegni pella veta, denter auter ei in bov vegnius menaus leu dil **Rein** giu e satraus enzanua en ina buola. Las punts da **Perdomat** e **Surrein-Sumvitg** ein dadas pell'aua ora. A **Sedrun** savevan ei buca qual'ura ch'il **Run** menassi naven ils morts en santeri. ...

Nova Gasetta Romontscha nr. 34, 25 d'uost 1860

### **Bulius sil ladretsch**

Ina vegetaziun mai sudida! Ins temeava schon ch'il fein, ch'ins ha mess en uonn pudessi selevagar, mo dil sequent cass daventaus en **Tujetsch** vess negin semiau. Sin tut ils ladretschs dil **Dulezi** eis ei carschiu ord il fein bulius (parisols) dua, trei detta liungs! Il fein era suren ell'altezia d'ina mesas quarta tut bletschs e marschs.

Nova Gasetta Romontscha, nr. 37, ils 15 da settember 1860

### **Aua gronda**

... Las auas ein carschidas, cunzun ils reins da **Tujetsch** e d'**Acletta**. ...

Nova Gasetta Romontscha nr. 39, 29 da settember 1860

### **Far baselimann**

Tenor novas metereologicas da **Medel** eis ei stau leu 8 grads ferdaglia ed oz 8 zolls neiv, mo per ventira fan ils selvadis da **Medel** e **Tujetsch**, inaga ch'il temps ei neutier, buca aschi ditg baselimann (*far circumstanziass*) culs fretgs, sco ils da **Mustér**.

Nova Gasetta Romontscha nr. 42, 18 d'october 1860

(3) **Ils habitonts digl onn 1861 vulan buca la via, mo els han igl aspect da survegnir in "bahnhof" sut Sedrun. - Il manteniment dalla via Alpsu vegn aunc a fatschentar ils Tuatschins per entgins decennis e setschentar in di tochen a Losanna. - Ils 3868 animals ella val drovan in brav mantun fein e la munconza da fein sforza dad ir culs animals ord la val.**

### Tujetsch vul ni viafier nia via

Il resultat definitiv dalla votaziun sul pugn da recapitulaziun ariguard la viafier e las vias da communicaziun ei a nus aunc buc enconuschents, mo carteivel vegn el ad esser acceptaus tras la maioritad dils votants. ... Ella **Cadi** han **Medel**, **Mustér**, **Sumvitg**, **Breil** e **Schlans** acceptau el, **Tujetsch** (muort il manteniment) e **Trun** refusau. En tut en quei circuit 484 vuschs persunter e 187 encunter.  
Nova Gasetta Romontscha, nr. 50, ils 15 da december

### Tujetsch cun 863 habitonts

Ord la dumbraziun dalla populaziun grischuna. **Cadi**.

	casas	casadas	habitonts	umens	femnas	burgheis
<b>Tujetsch</b>	132	206	863	417	446	827

Nova Gasetta Romontscha, nr. 1, ils 5 da schaner 1861

### In "bahnhof els Plauns Sedrun

El novissim temps eis ei vegniu alla glisch in project per ina fusiun dallas rivalisontas viafier sul **Gottard** e **Lucmagn**. Tenor quel duessen ins menar la viafier alpina naven dil **Lag da Lucerna** tochen sur **Amsteg**, da leu ella **Val Maderana** e tras in tunnel da 7-8 kilometers, circa in'ura e mesa, sut il **Pass Krüzli** a **Sedrun** e da leu sul **Pass Lucmagn**. Sin quella moda savessi ins unir la **Svizra Meridiunala** e **Centrala** cull'**Italia** tras ina viafier che custassi 14 milliuns pli pauc che quella sul **Gottard**. Ei para ch'ils Tuatschins, che vulan „nuet“ survegnan tut: la via sul **Cuolm d'Ursera** e la viafier cun in stupent „bahnhof“ el **Plaun Sedrun**.

(GR 1861, nr. 1)

### Gia suttascret duas gadas

Ina gasetta raquenta, che la regenza hagi era tarmess tier a nossa vischnaunca in formular per far suttascriber da surprender l'expropriaziun dil sulom ed il manteniment della via ad **Ursera**. Ella segirescha che quei segi per nus bluttamein ina formalitad, per raschun che nus hagian schon duas gadas suttascret claramain e noncondiziunadamain da surprender il mateniment tochen sil cuolm e di alla fin: Quei ei lu aschia!

Bien, sche quei ei aschia, sche drov'ei buca da suttascriber quater gadas la medema caussa; ins laschi cun quei che ei schon suttascret, ni ei quei buc avunda? Al gasettist cussegliaassen nus da far suttascriber igl emprem a **Berna** ils 12 tschien melli francs, ch'el manegiava da ver enta pugn, suenter duei el vegnir tiels da **Mustér** e pér il davos tiels Tuatschiners, che han fatg nuot e teman nuot. Capeschas. Denton nuota per mal.

**Tujetsch** a **Sumsassi**, nua che las uolps dattan ina l'otra la buna notg.

Giachen dallas Stgellas

Nova Gasetta Romontscha, nr. 1, ils 5 da schaner 1861

### 3868 animals ella val

Dumbrada dalla biestga ella **Cadi**:

	<b>Tujetsch</b>
Vaccas	401
Genetschas	191
Stiarlas e muias	72
Bos	-
Stiarls	236
Taurs	4
Vadials	190
Cavals	35

Cauras	1420
Nuorsas	1060
Pors	259

Nova Gasetta Romontscha, nr. 6, ils 9 da fevrer 1861

### Tagliau giu dus dets

En **Tujetsch** seglian dus umens vid ina buora per retener ella. In carga cul maun, l'auter vul fitgar en la sigir e taglia giu dus dets agl empren.

Nova Gasetta Romontscha, nr. 8, ils 23 da fevrer 1861

### Tujetsch dumbra 149 votants.

Nova Gasetta Romontscha, nr. 11, ils 14 da mars 1861

### Emigraziun dalla biestga

Ella **Val Tujetsch** eis ei rut ora ina gronda emigraziun – aber mo denter la biestga armentiva. Per munconza da fein han ei leu stuiu tarmetter tschiens armauls pella **Cadi** giu “ell’ustria”. Il pli frequentau ei il grond hotel da **Laus**, nua ch’in brav pur ha vendiu fein per varga 800 frs. e zuar mo per 7 frs. il fiertel, ferton ch’ei vegn pagau en auters loghens tochen 10 frs. ... Malgrad tutta bun’aura va ei aunc in per gievias avon ch’ils stiarls sappien pastgar en **Tujetsch**. Ei era leu avon 8 dis ina nevada da varga 10 quartas altezia, gie ina part pretendan ch’ei eri ual aschi bia neiv sco il matg 1858. Per ventira han neginas lavinas fatg donn. Denton san ils Tuatschiners seconsolar cul vegl proverbi: “Dad ina gronda nevada e numerusa casada duei negin sestermentar”.

Nova Gasetta Romontscha, nr. 13, ils 30 da mars 1861

### Premiaziun dils bos

Pertuccont ils bos. ... Ils da **Sursassiala** vessen pli bugen che l’urentada dils bos daventassi amiez liug dalla **Cadi**, a **Sunvitg**, buc a **Trun**. Tschelluisa ston ils bos da **Tujetsch** e **Medel** far in viadi da 5 uras, ch’ei per els in pregiudezi da trer premi. ...

Nova Gasetta Romontscha, nr. 15, ils 13 d’avrel 1861

### Las tschereschas tostas da Tujetsch

Il Tagblatt cusseglia allas femnas da tener en honor la pera tosta, las sneclas e zuescas, essend ch’ei selaschi spitgar pauca puma uonn. Bia pumera veglien buca flurir ed il matg vegnien ils baus a far grond donn vi dad ella. – Nus stuein denton remarcar, ch’il tscherscher da **Tujetsch** fetschi ina ludeivla excepziun, quel ei ussa decoraus cun tschereschas e zuar – tostas!

Nova Gasetta Romontscha, nr. 15, ils 20 d’avrel 1861

### Tujetsch ha refusau la damonda

Sco ei tuna ha il pievel dalla **Surselva** buca grond tschaffen da separticipar vid la viafier cun in milliun francs, schegie ch’el ha cun resalva da tschun vischnauncas giu offeriu 1853 da schenghegiar tut ils funs e pastiras, ch’il sulom dalla viafier drovi! Ferton che **Tujetsch** ha secartiu da nuot entrar en quella damonda, ha la vischnaunca da **Mustér** concludiu da prender aczias pellas pastiras, pil material ch’ella sa dar e pella indemnisaziun dils donns ch’ella sco tala savess pigliar. Sco ins auda eis ei pliras vischnauncas che vulan far las medemas offertas.

Nova Gasetta Romontscha, nr. 22, igl 1. da zercladur 1861

### Collecta

Per il barschament dil marcau da Glaruna, l’emprema dumengia da matg 1861, ha la vischnaunca da **Tujetsch** dau 105 frs. en daner.



Nova Gasetta Romontscha, nr. 23, ils 8 da zercladur 1861

### **In Run vehement**

... A Sedrun ei il **Drun** da biars onns enneu mai staus aschi vehements sco quei di, numnadamein ils 13 d'uost 1861.

(GR, 1861, nr. 33)

### **Bia fein els cuolms**

... Ils mises ni cuolms han dau bia fein ed ultra da quei han las vischnauncas sco **Tujetsch** e **Medel** fatg ina gronda quantitat fein a pastg, taluisa ch'ils avdents da leu ston speronza igl unviern proxim buc ir ord vischnaunca cun lur muvels. Ei vegn quintau ch'in um pudevi far in fiertel fein a pastg a di e che sia schurnada purtavi aschia in taler. ...

Nova Gasetta Romontscha, nr. 36, ils 6 da settember 1861

### **Bunas cundiziuns pil spazzatgamin**

La ludeivla vischnaunca da **Tujetsch** tscherca in **spazzatgamin** sut fetg favoreivlas cundiziuns per el. Da s'adressar tier la suprastanza.

Nova Gasetta Romontscha, nr. 39, ils 27 da settember 1861

### **Nevada il davos settember**

La neiv dil davos settember ha tut anetgamein dau a nossa tiara gl'aspect d'unviern. Igl ei stau ina nevada da quei temps mai sudida da regurdientschas da gliעד. ...

Nova Gasetta Romontscha, nr. 40, ils 4 d'october 1861

### **Ei quei giustia e dueivladad?**

Nossa Wochenzeitung setegn si sul pareri dalla cumissiun dil stan pervia dil manteniment dallas vias. Ella sa denter auter buca capir, co il cantun selaschi en da mantener il **Cuolm d'Ursera** schon naven da **Sedrun**. Mo nus savein capir aunc bia meins, cun tgei dretg ch'il cantun vul far pagar **Mustér** e **Tujetsch** l'entira expropriaziun ed el lu metter en sac las duas tiarzas che la Confederaziun paga da quella summa, sco da tuts auters cuosts che van si per quella via.

Nova Gasetta Romontscha, nr. 42, ils 19 d'october 1861

### **Quasi in milliun facultad**

Il november 1861 figurescha **Tujetsch** cun ina facultad da 941 300 frs. ... Cun dar en igl avanzament da quels 5 onns eis ei generalmein iu vess, tuttina dat ei bravs purs a **Tujetsch** e **Medel** che han en quels onns recaltgau lur facultad per 4 – 10 000 frs.

Respect da tals casarins!

Nova Gasetta Romontscha, nr. 44, igl 1. da november 1861

### **Stagiada dalla via**

La projectada via sul **Cuolm d'Ursera** vegn da miez october enneu stagiada giu e prida si da plirs inschigniers sut direcziun da signur Depuoz; ella survegn ina munta da 5 procent.

Nova Gasetta Romontscha, nr. 44, igl 1. da november 1861

### **(4) La mercanzia da biestga, cauras e nuorsas**

La fiera da Ligiaun era la fiera la pli impurtonta per la tratga da biestga ella val. Ella fuva era la gronda fontauna da daners. Dasperas deva ei numerusas fieras ella regiun e lu quella en Tujetsch, alternond in onn a Rueras e l'auter onn a Sedrun. La fiera da Ligiaun era adina empau dubiusa ton ch'il proverbi scheva che treis

caussas seigien grevas da lignar: “L’aura, la fiera da Ligiaun e la luna dil pievel sin cumin”.

### **La mendra caura per in marenghin**

La fiera da **Trun** ei stada frequentada da bia gliעד e tiers. Vaccas, stiarls e vadials eis ei vegniu vendiu e zuar per bials prezis. Era la mendra caura ei vegnida sin in marenghin. La dretga fiera da cauras vegn denton tenuta mardis proxim a **Tujetsch**, nua ch’in sulet pur ha quest matg vendiu cauras per 340 frs. Silla fiera d’**Ursera** eis ei uonn catschau zun paucas vaccas. Ils purs fussen bein narradira, sch’els massen cun lur tiers sur cuolm, cura ch’els san vender quels en nuegl per stupents prezis. Nova Gasetta Romontscha, nr. 23, 5 da zercladur 1857

### **Ils capomarcadonts muncavan**

Il marcau da **Glion** ei quellaga buca staus frequentaus sco quel dil december. Ils capomarcadonts da stiarls muncavan, ed aschia eis ei aunc restau dabia da quels tiers sin piazzafiera. Cun quella marcanzia „dalla cua“ ei lura in da **Trin** serendus a **Tujetsch** per vegnir sura da quels tiers – in cass aunc mai s’udius! GR nr. 4, 23.1.1958

### **Cumprau in taur per 14 marenghins**

La tratga da biestga ha el novissim temps fatg bials progress, schegie ch’ils premis cantunals per s.v. bos han calau si e ch’ils geraus da vischnaunca han buca pli in bov per lur honorific uoppen da dignitad. Sco ins auda vegn ei ussa teniu pli e pli bials bos e la razza da biestga vegn pli e pli biala. – Era **Tujetsch** ha uonn vuliu far in’emprova e cumprau in per 14 marenghins. Sch’igl ei uonn vegniu vendiu a **Mustér** in vadi da siat jamnas per 85 frs. – in cass aunc mai s’udius en quella vischnaunca – sch’ei quei era da perscriver tier al meglier indrez da bos. Tgei grir e selamentar, cura ch’ils geraus han tenor lescha cantunala stuiu vegnir liberai da tener bov, sco sch’igl entir mund bestial stuess cheutras ir sutsura! Ed ussa vesa tut en, che quei ei stau in grond avantatg pella tratga da biestga. GR 1858

### **Fiera a Sedrun**

La fiera da **Tujetsch** vegn tenuta mardis proxim, ils 15 da quest e zuar a **Sedrun**. **Tujetsch**, ils 10 da zercladur 1858  
Igl actuaritad da vischnaunca  
GR nr. 24, 12.6.1858

### **La pli viva fiera**

La fiera da **Tujetsch** ei stada la pli viva da tuttas fieras ch’ein vegnidadas tenidas questa primavera en **Surselva**. Dil cumin da **Rueun** e dalla **Cadi** eis ei vegniu catschau bia biestga, ch’ei vegnida vendida per bials prezis, schegie ch’ils d’**Uri** fagevan la fiera d’**Ursera** mo beffas cun quellas. Igl ei era vegniu schau via da bia cavals per tscheins als Tudestgs. Els han pagau 24 – 30 talers per cavagl, aber enviau anavos il rufid. Il bia han ils numerus Tudestgs marcadau, ils marcadonts da **Tujetsch**, ch’ein schiglioc plein fiug, miravan mo tier, sulet el consum dil gustus bier da **Glion**, han ils Tuatschiners fatg concorrenza culs jasters. – Las nuorsas da piazas (*nuorsas da maz*) han uonn tratg mal e biars manegian perquei tenor in vegl proverbi, ch’era ils stiarls vegnien d’atun buc a trer bein. GR nr. 25, 19-6-1858

### **Fiera 1859 a Rueras**

Ei vegn cheutras fatg da saver che la fiera da **Tujetsch** vegni tenuta gievgia proxima, ils 16 da quest e zuar a **Rueras**.  
La suprastonza da **Tujetsch**.

GR nr.24, 1859

### **Bia glied e tiers**

La fiera da **Tujetsch** ei uonn stada frequentada da bia glied e tiers. Digl **Uri** era ei vegniu neu ina massa umens e femnas. Las cauras – il capoartechel da quella fiera – mavan l'entschatta tut el luft per aults prezis, mo cura ch'il caver da **Medel** ei arrivaus sin piazzafiera, han ei entschiet a dar sut en e tgi che ha buca vuliu turnentar, ha stuiu vender in taler pli bienmarcau ch'avon. Era da bia vaccas eis ei vegniu marcadau per fetg andants prezis. – Il davos han Tudestgs perfin giu commiseraziun culs cavals e priu si enzacons a tscheins, bein aber per pauc pli che pella mesadad dils prezis d'onn.

GR nr. 25, 1859.

### **Tochen a Meiringen, Altdorf e Lucerna**

Marcadonts da Tujetsch ein i cun vaccas silla fiera da **Meiringen** e cun quellas, che els han buca saviu vender ad **Altdorf**, ein els sembarcai pil cantun **Lucerna**. Beinenqual renconuschiu pretenda ch'ei seigi buca schi grond gudogn, sco ins manegi, da vender ora tontas dallas bialas vaccas, schegie ch'ellas paghien bein, per motiv che la razza piteschi memia fetg cheutras; mo speronza che las vaccas, che restan anavos, vegnien tenidas ton meglier e ch'ins hagi da quellas la dubla rendita.

GR, nr. 43, 1859

### **Ei ha caztgau da vender**

Questa jamna eis ei stau per la **Surselva** si marcadonts da vaccas tochen **Medel** e **Tujetsch**. Ei han cumprau si dabia tiers e pagau fetg bein. Vaccas danvons eis ei zuar fetg paucas, mo ils bials prezis caztgan da vender.

Nova Gasetta Romontscha nr. 5, 4 da fevrer 1860

### **Gudignau pauc ni nuot**

Ils 12 e 13 d. q. ei stada la fiera d'**Ursera**. Cumpraders eis ei stau zun negins auters che Uranès. Sin las vaccas ha nossa glied gudignau pauc. Era cun las nuorsas han ei fatg pintgas fatschentas, schegie ch'ins sa dir che 22 – 23 frs. il pèr seigi pagau pial e quagl dallas nuorsas, sche han ils marcadonts gudignau nuot. Il pli fetg eran ils cavals tschercai. In da **Tujetsch** dueigi ver vendiu in cavagl da siu tratg per 35 marenghins, per da nos cavals in prezi maisudiu. A tscheins per treis meins prendevien ei si cavals per 30 – 35 talers. – Ils 19 ei la fiera da **Tujetsch**, la davosa tier nus avon cargar ad alp.

Nova Gasetta Romontscha nr. 24, 16 da zercladur 1860

### **Moviment da marcadonts**

... Per quella gada han ei aunc segidau cun brevs, che han lu mess ella **Cadi** en grond moviment ils marcadonts dalla secunda classa; perfin Tudestgs ein vegni neu da **Ursera** e han cumprau si stiarls a **Tujetsch** e **Medel**. ...

Nova Gasetta Romontscha nr. 40, 6 d'october 1860

### **Catschau tochen giu la Baviera**

Posteriuramein remarchein nus ch'ei seigi quest atun tras Tuatschiners vegniu catschau en duas gadas circa 130 vaccas sursilvanas ella **Baviera Bassa**. Schon avon in per onns vevan ei catschau giu leu dabia vaccas ord la **Partsura**, ils cumpraders ein fetg cuntents da quellas e laudan ch'ellas dettien bia latg inaga ch'ellas hagian tuchiau il strom grischun.

Nova Gasetta Romontscha nr. 49, 8 da december 1860

### **Nus mein buca pli lunsch!**

Fuss ei buca pli adattau da destinar la fiera da **Tujetsch** sin in di fix che da mintg'onn

stuer leger el calender, ch'ella crodi 8 dis sunter quella dad **Ursera**, dalla quala negin sa cura ch'ella vegn tenuta tochen ch'ella ei buca neutier? Era l'alteraziun da quella fiera denter **Sedrun** e **Rueras** savess calar si senza che la **Val Tujetsch** pitess cheutras il minim donn. Ins duei mirar sin la cunvegnientscha dils biars jasters che vegnan sin fiera e cheu sa scadin seperschuader che **Medel**, **Mustér** e **Sumvitg** furneschan pli bia glioud e tiers ch'ils Tudestgs e per quella raschun duess la fiera vegnir tenuta a **Sedrun**. Tgei lessan ils Tuatschiners far encunter, sch'ils vischins da quellas treis vischnauncas declarassen, nus mein buca pli lunsch che **Sedrun**. Nus lessen lu uardar, nua che la gronda fiera vegness tenuta, schebein ils da **Rueras** vegnessen buc o **Sedrun**, ni silmeins tochen **Camischolas**, nua ch'ins vess ina pulita piazza-fiera, ustrias e caffès en abundonza. Denton veies nuota per mal vus da **Rueras**.

Nova Gasetta Romontscha, nr. 23, ils 8 da zercladur 1861

### **Fira 1861 a Rueras**

Ei vegn cheutras fatg da saver al respectiv publicum che la **fiera da Tujetsch** vegni tenuta ils 18 d.q. a **Rueras**.

La suprastonza da **Tujetsch**

Nova Gasetta Romontscha, nr. 23, ils 8 da zercladur 1861

### **Vaccas e cauras per bials prezis**

La fiera da **Tujetsch** ei stada frequentada ualti bein da glioud e tiers ed igl ei vegniu marcadau pli bia vaccas e cauras per pli bials prezis che la fiera da **Trun**. Tudestgs eis ei stau neu da biars ed ein turnai envi cun ina roscha cauras, muias e da bia cavals pri si per tscheins. Els han cheu pagau meglier che sch'ins fuss ius leuora culs tiers. Al scribingent che ha giu fatg tscheidi beinfundadas remarclas en nossa gasetta sur da quella fiera, stuein nus rapportar la legreibla nova, che siu giavisch pervia da tener inaga e per adina quella fiera a **Sedrun** vegni fetg probabel ademplus. Ils Romontschs eran malidis da stuer ir a catschergnond lur tiers en tutta calira pli lunsch che necessari. Ils Tudestgs han medemamein declarau, ch'els seigien fetg cuntents da vegnir a **Sedrun**. In Romontsch ha a nus expressivamein supplicau da notificar, ch'el hagi spendiu 4 frs. dapli cun ir pli lunsch e sper pli bia ustrias ora, che sch'el vessi stuiu ir mo tochen **Sedrun**. Sco ei vegn detg vulan ils da **Rueras** sez semussar generus e meriteivels pil publicum e sill'emprema vischnaunca voluntariamein resignar sin lur piazza-fiera.

Nova Gasetta Romontscha, nr. 25, ils 22 da zercladur

### **Fiera da Ligiun**

Ils 22 d.q. ein nos marcadonts da **Tujetsch** e **Medel** semess sin via pella fiera da **Ligiun** cun lur tiers cumprai si la primavera. Els han per ventira pintgas roschas e buca sefidau da cumprar si enzatgei da num. Ils Glarunes ch'ein uonn stai sentardai per 2 dis muort il sbagl dil calender culla fiera da **Glaruna**, han passau il **Lucmagn** ils 25 d. q. cun circa 400 tgaus, era cumprai si il bia la primavera. Plirs famus marcadonts dalla **Cadi** prefereschan uonn da star a casa enstagl frequentar l'emperma fiera da **Ligiun**. Ils mulissiers han aunc mai tarmess aschi schliatas novas sco uonn. In da quels ha giu scret, ch'ins dueigi nuota vegnir uonn cun tiers, ni cun biars ni cun paucs. Speranza che la pintga catschada seigi empau scompa.

Nova Gasetta Romontscha, nr. 39, ils 27 da settember 1861

### **1861**

Sco ins auda ei la fiera da s. Andriu, *dils 30 da november*, a Ligiun buc ida bein. Ei seigi stau fetg bia tiers, mo vegniu vendiu pauc, perquei han plirs stuiu vargar giu. Tuttina han dus stiarls da **Tujetsch**, ils pli bials ch'ein i sul **Lucmagn**, in favega 7 quartas en massa m. v. pagau 8 dublas in sur tuttas spesas.

Nova Gasetta Romontscha, nr. 49, ils 6 da december

**1861**

Havend in marcadont da **Tujetsch** ed in da **Medel** instradau la jamna vargada ina roscha vaccas da maz per passar il **Lucmagn**, han ei dadens **Varghera**, il cuolm denter **Mustér** e **Medel**, schau ir surengiu duas da quellas, ina ei stada ventschida cun inaga, l'otra han ins l'auter di stuiu far giu. Il miserabel pass denter **Mustér** e **Medel** ha schon laguttu bia unfrendas ed igl ei bien ch'igl onn 1864 ei gleiti neutier, nua ch'ei sto vegnir baghegiu ina viafier sul **Lucmagn** ni in stradun che vegn baghegiu e mantenius sin quen cantunal. L'expropriaziun vegn cheu franc buc a dar tontas difficultads sco igl ei il cass tiel **Cuolm d'Ursera**.

Nova Gasetta Romontscha, nr. 51, ils 20 da december

### **La fiera da Tujetsch**

vegn tenuta gievgia, ils 12 da zercladur a **Sedrun**

La suprastonza

Nova Gasetta Romontscha nr. 23, ils 7 da zercladur

**(5) Per la via nova sto la vischnaunca surpender ils cuosts dalla expropriaziun. Quei fa mal, munta la summa rodund 20'000 francs. Vid quella damonda penda l'acceptanza dalla via entras ils Tuatschins. – Ina radunonza drammatica cun la preschientscha digl avat dalla calustra decida finalmein per la via. – Il schaner 1862 ha ei dau in suffel che derscheva femnas.**

### **Quater uras e vegn minutas munta la distanza denter Mustér ed Andermatt**

La nova via sul **Cuolm d'Ursera** vegn naven dil vitg da **Mustér** tochen sils cunfins d'**Uri** 20'926 meters liunga ni 4 uras e 20 minutas. Da **Tschamut** munta ella sil cuolm mo cun 8 procent.

Nova Gasetta Romontscha, nr. 46, ils 22 da november 1861

### **Expropriaziun e manteniment?**

In per plaid a **Mustér** e **Tujetsch** ariguard la via sull'**Alpsu**.

Silla fin december sto nossa Regenza declarar al Cussegl Federal, schebein nus laien surpender da baghegiar la via sull'**Alpsu** ni **Cuolm d'Ursera** encunter ina bonificaziun federala da 200'000 frs. Nies Cussegl Grond ha da sia vart acceptau quella generusa offerta e per levgiar ed animar las vischnauncas da **Mustér** e **Tujetsch**, ha el aunc concludiu, che quella nova via dueigi en sia entira extensiu dil vitg **Mustér** tochen sils cunfins d'**Uri** vegnir mantenida dil cantun anora. Essend che quei cuolm sto buca vegnir tenius aviarts gl'unviern, sche han las duas vischnauncas mo da menar la galera (*chisa*), che vegn preparada e bess ora sin quen cantunal. Il manteniment dalla via – la pli gronda grevezia – ei aschia prida giu ad ella ed ei resta mo aunc l'expropriaziun, quei ei il pagament pils beins, ch'ins drova tiel sulom dalla via. Ellas han ussa en cuort da rispunder al ludeivel Cussegl Pign, sche era ellas veglien da lur vart ir en la cunvenziun ni buc.

Aunc buca daditg vegneva ei insinuau da far surpender **Mustér** e **Tujetsch** duas grevezias: L'expropriaziun ed il manteniment. Sut quellas cundiziuns vessen nus buca saviu cussegljar da retscheiver la via, dapi aber che la pli greva cundiziun ei curdada naven, essan nus decisivamein per l'acceptaziun da quella biala offerta.

Ei sedamonda ussa mo: *Vus da Mustér e Tujetsch leis surpender l'expropriaziun, sch'ei vegn baghegiu e manteniü a Vus ina stupenta via che porscha a Vus ina tut pli avantagiusa communicaziun denter Vossas duas vischnauncas e la Svizra Interiura?* Sch'ins ponderscha ils avantatgs ch'in stradun porta als vivents ed allas suandontas generaziuns: **gie**. En mintga cass ponderai e turnei a ponderar avon che dir na,

pertgei quella favoreivla occasiun vegn forse mai a turnar pli e gronda ei en quei risguard Vossa responsablada visavi a vos vegnentsuenter.

...

Vus da **Tujetsch** aber che smuldis ton sulla schliata via sil territori dils da **Mustér** e smanatscheis da tgisar els alla Regenza, patertgei ch'ei seigi il mument da survegnir ina oreifra via. Patertgei ch'il cantun stoppi baghegiar e mantener las punts e vias sur vos prigulus druns e che vegnan a tener quels empau meglier a frein, duront ch'els smanatschan ussa d'ir cun vossa baselgia e vos morts. Vus che scheis adina, che vus survegnessies ad **Ursera** la rauba bia pli bienmarcau ch'ensi, sch'ei custassi mo buca ton da purtar neu. Bien, quellaga vegn ei fatg a vus ina via che vus saveis menar neu ella cun pintga spesa. Co sa l'expropriaziun tementar giu vus che saveis dar ora pastira per in grond capital e senza pregiudezi. Contas muschnas vegnan a vegnir schubergiadadas giud ils praus denter **Mustér** e **Tschamut**; tgei reha resursa da fadigias arva la construcziun dalla via nova?

Visavi aschi considerabels avantatgs svanescha la summa da 30 – 40 000 frs. che l'expropriaziun po custar a **Mustér** e **Tujetsch**. Quella tucca ei da pagar mo inaga, ferton ch'ils avantatgs cuozan adina. Meditei madiramein la caussa senza pissiuns e pregiudezis, patertgei buca mo vi da vus, sonder era vid vos affons, beadis e sutbeadis; reflectei che l'entira **Surselva** giavischa l'avertura dil **Cuolm d'Ursera** e seigi spanegiada sin vossa decisiun e prende lu vossas conclusiuns vengonzas ad in liber e savieivel pievel.

Sco ins auda duei il niev prelat *avat* da **Mustér** esser fetg importaus per la via dall'**Alpsu** e la claustra prompta da purtar tuttas dueivlas unfrendas.

Gasetta Romontscha, nr. 48, ils 29 da november 1861

### **Radunonza drammatica**

La via sill'**Alpsu** avon la vischnaunca a **Mustér** e **Tujetsch**.

Allegrai tras il bien success a **Mustér** ein ils signurs cumissaris aunc il medem di serendi a Tujetsch. Essend pli datier dils glatschers e la contrada, priu ora las suleglivas spundas da **Sedrun** e **Camischolas**, aunc cuvretgas cun neiv, han ei gleiti sentiu ch'ei seigi cheu in pli ruh clima che a **Mustér** e ch'ei drovi perquei gronda forza per sgargliantar ils pregiudezis e che lur vuschs vegnien bia pli tgunsch raucas che quellas dils Tuatschins. Gliendisdis – nua che l'entira val ei vegnida inundada da bulletins che purtavan igl unanim conclus da **Mustér** ed il plaid da monsignur avat, - eis ei vegniu tier fermas debattas en repetidas conferenzas. Ferton che plirs respectai vischins han cheu plidau e luvrau en favur dalla via ed in per perfin offeriu da garegiar negina indennisaziun pils Orts ni funs che quella prendi naven ad els, era ei denteren da quels che levan saver nuot dil grond schenghetg ch'ins offereva ad els. Il success era aunc dubius e buca senza tema e passadetgna han ils signurs delegai spitgau silla vischnaunca fixada sin s. Leci, 2 da december.

Igl impurtont e decisiv mument ei arrivaus. Ils umens da **Tujetsch** ein serimnai sin publica piazza, serrada en dil prigulus **Drun**, dalla periclitada baselgia cun santeri, dalla casa da scola e dalla via imperiala ed ual en fatscha al bi **Cuolm d'Ursera** – tut facturs che plidavan cun aulta vusch en favur dalla via. Dentuorn era ei plirs vischins da **Mustér**, ch'eran oz ual aschi plein marveglias sco las feglias dad Eva che formavan in bi rudi entuorn la radunonza. Il president arva la vischnaunca cun relatar l'impurtonta questiu pella quala ei setracti oz e cun recumandar ruaus e prudientscha, senza aber cheutras vuler pregiudicar il liber votum. Sin formala invitaziun dalla vischnaunca cumparan ils cumissaris dalla regenza, dalla **Surselva** e dalla **Cadi** enamiez il pievel, buca senza grevadetgna che lur aulta missiun vegni oz buc a reussir. Il cumissari guvernativ, signur Latour pren il plaid. El fa attents il pievel sil legreivel resultat a **Mustér**, co il niev monsignur avat hagi leu cooperau cun el, tgei la harmonia denter spiritual e secular vegli dir, el vegni a far il pusseivel pil manteniment da quella e dalla claustra. El hagi cheu encunter era speranza che

**Tujetsch** vegni oz tras siu conclus a consolidar quella biala harmonia. Il Cussegl Grond hagi fatg tut pusseivel per levgiar la vischnaunca da **Tujetsch** cun prender giu il manteniment. El alleghescha ils gronds avantatgs che la via sull'**Alpsu** porti e per ton pli tgunsch gudignar il pievel per quella idea lai igl oratur aunc leger avon il plaid da monsignur avat.

Tut nunspitgadamein e senza ch'enzatgi a **Mustér** e **Tujetsch** vessi saviu, arriva cheu monsignur avat, *Paul Birker (1861-1877)* el vitg da **Sedrun**. Ina honorifica deputaziun envida en el da prender part dalla deliberaziun. Sia cumparsa e siu discuors han fatg buna impressiun: „Jeu vevel questa damaun negin ruaus a **Mustér**,“ di el denter auter, „tochen che jeu sun buca seresolvius da vegnir tier Vus en Vossas bialas muntognas e da dir a Vus ch'ei setracti cheu d'ina impurtonta questiun per quella vallada.“ El fa attents sin lur responsablada visavi agl avegnir e di lu, ch'el vegli aunc dir in per plaids en romontsch, essend ch'ils biars capeschien buca siu lungatg. „Jeu prendel la libertad da vegnir tier Vus e supplicar Vus, da ariguard il generalbeinstar purtar ina unfrenda pella realisaziun dalla projectada via. Il tschiel benedeschi vus persuerter!“

Il plevon ed il conventual che veva accumpignau gl'avat, sustegnan ils plaids da quel e sin quei plaidan ditg e bein signur cusseglier naziunal Toggenburg e bundsstalter Seeli. Els fan attents che las vischnauncas da sut hagian suttascet da surprender il manteniment e la expropriaziun sin lur territori mo cun la speranza, che ils cuolms vegnien aviarts. Il mument seigi ussa cheu ed ins spetgi che **Tujetsch** vegni buc a resister al general giavisch – **Tujetsch** che hagi quels onns tras sias bialas reperaziuns da vias mussau, ch'el sappi preziar tgei ch'ina buna comunicaziun vegli dir.

Suenter ch'il signur president dalla **Cadi** ha aunc giu fatg attents sillas ligiontas cunvenziuns, vegnan ils officials dalla vischnaunca dumandai si per lur meinis. Gl'emprem gerau, *Hans Giachen Beer, Gonda*, e secund gerau, *Gion Andriu Berther, Camischolas (1805 - 1887)*, recamondan al pievel da prender si la via; il tierz, *statalter Duri Venzin, Rueras*, – gl'um dalla buorsa – vul saver nuot da quella. Ils purs dueien mirar bein tgei ch'ei fetschien, las taglias seigien schon ussa grevas e vegnien tras la via nova a vegnir nunsuportablas, il sulegl, che seigi oz levas bials, pudessi ir giu stgirs. Quels plaids han dau anim alla opposiziun che sereghegliava pir che mai. Mo suenter quei feagl dat siu bab, *statalter Paul Wenzin, Rueras*, giu il meini – in respectau um da 68 onns – „Jeu sun pella via, mo buca tonta tema per quei deivet, ei va schon, mo curascha, curascha ed uniun!“

Quels plaids ein pli u meins vegni susteni dils suandonts votums, priu ora in exgerau, che ha bugen ses meinis aparti. Suenter ditg haver plidau vi e neu e segirau ch'ins vegni a far tut pusseivel per vegnir culla via giu el vitg da **Rueras**, vegni ei finalmein priu si il pli – circa duas tiarzas han votau pella via ed ina tiarza encunter. Deplorabel eis ei stau d'observar ch'ils mats che han il pli grond avantatg dalla via, eran fetg biars encunter e remarcabel ch'era las bia femnas, che van tschelluisa buca nuidis per las vias, eran cun peis e mauns encunter la via, gie ina feglia ha cun sia malaveglia declarau da buca dar tscheina al bab che veva plidau en favur dalla via. – Speranza che quellas antipatas vegnan tuttas a svanir cul temps.

Nova Gasetta Romontscha, nr. 49, ils 6 da december 1861

### **Il buf ha pudiu derscher femnas**

Culla vegnida dil tscheiver ha era gl'unviern vuliu dar in segn da veta. La cuffla dils 6 da schaner ha interrut il regular cuors da posta ed era enviau bia cauras en nuegl, ch'eran digl atun naven manidas ora. En **Tujetsch** eran ils bufs schi stermentus ch'els han pudiu fierer entuorn femnas, per ventira purtavan ellas neginas crinolinas, tschelluisa havess ei pudiu dar tut pli grondas sventiras.

Nova Gasetta Romontscha, nr. 2, ils 6 da schaner 1862

## Publicaziun

Ei vegn cheutras fatg da saver ad in ludeivel publicum ch'ei vegni ils 15 dil meins current mess egl ingant a **Rueras** la casa, ils funs e baghetg, sco era igl entir mobiliar digl ustier Hans Giachen Berther. Tuts che han plascher d'in ni l'auter da quels effects, ein envidai en da cumparer sin quei di a **Rueras**.

**Tujetsch**, ils 4 da schaner 1862

## Morts a Buffalo

Tenor novas d'ina gasetta dall'America ei ils 27 da schaner spartius el Segner igl aultreveriu pader Lucas Cavegn, gesuit, el marcau **Buffalo** ell'**America**. Tuts catolics da quei grond marcau, cunzun la vischnaunca da s.Michael, fundatur dalla quala el ei staus, condoleschan zun fetg la sperdita da lur carezau pastur. El ruaussi en pasch. – Pader Lucas Cavegn ei naschius a **Tujetsch** igl onn 1806 ed igl onn 1830 intraus egl uorden dils Gesuits, nua ch'el ha operau gl'emprem el cantun **Sviz** e lura el cantun **Valeis** cun gronda premura ed era perquei zun carezaus. Igl onn 1847 eis el vegnius tarmess ell'**America** sco missiunari, ha operau leu cun premura quater onns en **Canada Su** ed igl auter temps eis el sin desideri digl uestg staus a **Buffalo** sco missiunari. Cheu ein duas bialas baselgias (s.Michael e s.Onna) sco permanents mussaments da sia premura apostolica.

Nova Gasetta Romontscha, nr. 11, ils 14 da mars 1862

## (6) Ina tragedia, la via e la zoppina fatschentan la val igl onn 1862

Ils da **Rueras** vulan buca la via sul vitg ora. – Cass targic a Seiva: In mat ha mazzau siu agen frar. – La maslogna "bestiala" dils peis tiella biestga ei rutta ora a Selva ed ils cunfins viesr uri ston vegnir serrai. Il zercladur ei la malsogna dalla zoppina sederasada ell'entira Surselva. – Il fenadur lavura 300 luvriers vid la nova via. – Pauc mèl d'aviuls ed ils Tuatschins selamentan d'esser vegni menai davos la cazzola

## La via mondi sul vitg ora

Ils vischins da **Rueras** – la residenza dils vegls diplomats tuatschins – ein era malcuntents che la via mondi sul vitg ora. Sin lur istanza ha la vischnaunca da **Tujetsch** medemamein concludiu da far da quellas varts novs pass tier las autoritads. Ella ha semussau aber pli mala e pli carina ch'ils da **Mustér**; ella vul ch'ei vegni midau giu quella direcziun senza che la cumissiun vegni sin in'uatga e caschunassi considerabels cuosts alla vischnaunca. Ch'ei va vess da vegnir ora culla buorsa per da quels fatgs, ei da capir, denton manegein nus, ch'ils Tuatschins vegnien ad envidar en tier els la cumissiun dil stan, inaga ch'ella ei tochen a **Mustér**, per schar ver quels signurs lur stupenta vallada e schigiar lur gustus magnuc caura e lur famus mèl alpin. Ne betg? Gie, lu pon las bialas da **Rueras** sefar si e clamar tier a quels signurs sisum il vitg: „Vegnien giu tscho, tscho ei nairas!“ Nus agurein bien success e ventira als da **Rueras**, mo ei para bunamein sco sch'ei smanatschass in castitg ad els, perquei ch'els han vertiu da schar metter maun vid il venerabel monument da lur renomau convischin, dil fundatur dalla Ligia Grischa, Pieder de Putnengia, e schau menar si nuegls e clavaus cul material da quella respectabla antiquitad.

Nova Gasetta Romontscha, nr. 17, ils 25 d'avrel 1862

## Ina nova lingia per Rueras

... Ils da **Rueras** eran vegni cuntentai tras ina nova lingia e levan perquei schar quels signurs mo als da **Mustér**.

Nova Gasetta Romontscha, nr. 19, ils 9 da matg 1862



### **Ina vera tragedia a Selva**

Gliendisdis eis ei succediu a **Selva** in trest cass. In mat carschiu ch'ei avon entgins onns vegnius menaus anavos ord la **Germania** sco in stuorn, e semussava era a casa beinduras sco tal, schegie ch'el saveva leu luvrar dis ora sco in um da giudezi, ha mazzau siu agen frar – in affon en tgina, ch'el veva tschelluisa il pli bugen da tuts ils auters fargliuns. Suentar haver fatg ora lenna, fa el dar la mumma ina cut per mular la sigir, lu va el en stiva, nua ch'ei era negin perpeis, priu ora in affon en tgina che durmeva. Cun siu uaffen mulau dat el a quel in tribel tagl tral culiez, che quel sto esser morts agradgiu. Il stuorn tuorna lu ora tiella mumma cun ina fatscha pleina suadetsch e di ad ella, ch'ella dueigi i en stiva e mirar co il pop mieri. La mumma va dabot ed ins po cumprender cun tgei dolorus sentiment ch'ella anfla siu carin affon en ina sanganada. Sin siu grir e bargir dat ei neutier glied, il stuorn vegn ligiaus e serraus en. El lai far quei senza sedustar e silla damonda, pertgei ch'el hagi commess quei terribel mazzament, rispunda el cun saung freid: „Sinaquei ch'il car frar vegni enta parvis e daventi buc in schliet prè, sco quei che jeu sun.“ Dus umens ein silsuenter vegni cun el a **Mustér** en casa cumin. Schigleiti sco el vesa leu il schendarm di el a quel: „Jeu vess cheu dus umens da schar metter en perschun.“ – Quei deplorabel schabetg ei in serius avis, ch'ins dueigi haver precauziun cun glied stuorna. *Cudisch da morts sut il datum dils 5 da matg 1862: Vigeli Venzin, 1 onn, da statalter Giachen Fidel Venzin e Maria Monica Condrau; remarca: necatus a fratre suo fatuo.* Nova Gasetta Romontscha, nr. 19, ils 9 da matg 1862

### **Alp da cavals**

La vischnaunca da Tujetsch pren si la stad 5 cavals jasters sin pastira u alp da cavals. Pella jarva vegn ei pagau 20 frs. per cavagl e lu aunc ina indemnisaziun pil pustretsch ed auter. Tgi che vul tarmetter cheu cavals, duei schar saver sigl emprem da zercladur.

### **La suprastonza da Tujetsch**

Nova Gasetta Romontscha, nr. 21, ils 25 da matg 1962

### **Offertas per la via principala**

Finalmein ei la via sul **Cuolm d'Ursera** scretta ora cun quella sulla **Bernina**. Quei che vegn baghegiu uonn, ei partiu en duas secziuns, l'emprema dil vitg **Mustér** tochen sils cunfins da quella vischnaunca, ina lunghezia da 6400 meters ni 21 333 peis svizzers. La secunda secziun va dils cunfins da **Tujetsch** tochen en **S. Brida**, dador **Selva**, 6500 meters, ni 21 800 peis. Tochen ils 10 da zercladur ston quels, ch'han tschaffen da sorprender da baghegiar quella via dar en lur ofertas al signur capoinschigner Salis.

Nova Gasetta Romontscha nr. 22, 29 da matg 1862

### **Malsogna da tiers**

La malsogna bestiala dils peis e dalla bucca ei ussa era rutta ora a **Selva** e perquei ha **Uri** serrau encunter **Tujetsch**, il qual ei in grond donn per l'entira **Cadi** e fa ir en nuot la fiera da **Tujetsch**, nua ch'ei vegneva tschelluisa cumprau si bia tiers dils Tudestgs. ... Cun ina part vegn ei meglier en 4 – 5 dis, cun auters pér en 8 – 10 dis. Las vaccas dattan pauc e schliet latg. Denton eis ei tuttina meglier che la malsogna grasseschi ussa e buca per d'atun.

Nova Gasetta Romontscha nr. 22, ils 13 da zercladur 1862

### **Interpresas talianas baghegian la via**

... l'emprema secziun dalla via sull'**Alpsu**, naven da **Mustér** tochen tiels cunfins da **Tujetsch**, baghegia Leon. Frik da **Cazas** e Giovanni Pattista Ghilmetti dalla **Lombardia**, la secunda secziun, che va tochen **S. Brida** han ils frars Berther da **Tujetsch** e comp. da baghegiar. Gl'uost 1863 dueien quellas duas secziuns esser

finidas. Las lavurs vegnan ad entscheiver aunc quest meins; per direger e survegilar quellas ei signur inschigner Depuoz destinaus.

Nova Gasetta Romontscha nr. 25, 18 da zercladur 1862

### **La zoppina**

La zoppina serasa ora pli e pli ella **Cadi** e grassescha ussa ell'entira **Sursassiala**, **Mustér**, **Tujetsch** e **Medel**. Il mender eis ei per las alps, nua ch'ei deva uonn fetg bia latg.

Nova Gasetta Romontscha nr. 26, ils 27 da zercladur 1862

### **300 luvriers vid la via nova**

Vid la via nova sull'**Alpsu** ein ussa circa 300 luvriers occupai, bunamein tut Talians. Schigleiti sco quels han udiu da quell'interpresa, ein els dai neutier sin tuts mauns; ins ves'aschia ch'ei maunca nuota luvriers, mo donn ch'ils Romontschs fan pintga concorrenza ed ein ella cuntentientscha cullas tschaveras ed ella perseveranza da luvrar fetg anavos als Tessines e Lombards. Fertion che la via en **Surselva** vegneva ils davos onns baghegiada digl interpretider cun parders e buca tras sutaccordants, han ils impressaris dalla via sull'**Alpsu** dau vi quasi tuttas lavurs en accords. Denter ils sutaccordants eis ei mo ina cumpignia romontscha.

Nova Gasetta Romontscha nr. 28, 10 da fenadur 1862

### **Senza medischnas**

Ferton ch'ins ha a **Mustér**, **Tujetsch** e **Medel** tenuu ils tiers malsauns mo schuber e cauld ed applicau pauc ni neginas medischnas per quella malsogna, ha **Sumvitg**, aschigleiti che la zoppina ei leu passada si, spert telegrafau pil miedi da biestga a **Glion**. Vedremo la differenza digl effect.

Nova Gasetta Romontscha nr. 29, ils 18 da fenadur 1862

### **Pauc mèl**

Cul mèl alpin, che vegn tschercaus pli e pli fetg, stat ei uonn mal; sez las principalas cuntradas da quei dultsch product, **Tujetsch** e **Medel**, nua che latg e mèl flessegian tschelluisa en abundanza, survegnan uonn zun pauc mèl. La schliat'aura dil zercladur e las purginas dil fenadur han ruinau la biala speranza ch'ins veva aunc il davos dil matg sils aviuls.

Nova Gasetta Romontscha nr. 34, ils 23 d'uost 1862

### **Vegni menai miserablamein davos la cazzola**

(Tarmess en) Las lavurs vid la via nova a **Tujetsch** van spert vinavon ed ein schon avanzadas aschi lunsch, che nus purs pudein era enconuscher tgei figura, che quella nova signura vegni a far. Enstagl aber che quella biala dama fetschi sin nus purs ina emperneivla sensaziun, (*Tedlei tscho. Remarca dalla redacziun.*) sch'eis ella per nus in trest mussament, co nus essan puspei vegni menai miserablamein davos la cazzola. (*Betga la verdad!*) Patertgein nus anavos sur da nossa vischnaunca fatga quest atun davart il surprendre l'expropriaziun vid questa via, sch'eis ei vegniu figurau e perdegau, ch'ils praus che mondien vid questa via, sco era las lennas, cuostien pressapauc 15 tochen 20 melli francs, dapli eis ei vegniu segirau als purs, ch'ella mondi ton sco pusseivel per la via vedra ed era atras ils vitgs e cheutras era spargnau bia praus ed auters cuosts dalla vischnaunca. Entras quei ed aunc bia auter figurem havein nus tras il pli dalla vischnaunca surpriu sin nossas costas l'expropriaziun e dar la lenna e crappa leutier. -

Aber co va ei ora ussa? Ei vegn fatg ina via bunamein 8 quartas (*lu han ils da Tujetsch buca aschi liunga detta sco ils Svizzers*) pli lada che quella naven da **Mustér** engiu, ella va per esser biala atras ils megliers funs (*cheu dat ei gie da menar la pli biala grascha ed il pli bia fretg*), enstagl mirs vegn ei fatg scarpas sco las pli grondas crinolinas (*quei ei ussa halt la moda, la scarpa ei mai aschi scuada sco ils mirs e sa aschia survir per moda-*

*schurnal allas finas mattauns da Tujetsch*), tras il qual ei vegn priu ina tiarza, sche buc aunc dapli terren. Cuort, scadin vesa, scadin sto palpar, ch'ei vegni zuar fatg ina biala, mo era ina via da luschezia e cheutras mirau memia pauc sin donn dalla vischnaunca. Eis ei aber stau dueivel da dir a nus: Ei vegn aschia, ei va aschia ed ussa tut autruisa. (*Era la via buca schon stigiada, che tut veseva nua ella massi?*). Nua eis ei pusseivel ad ina paupra vischnaunca da pagar in deivet da 30 entochen 40 melli francs (*ils Tuatschins teman buc ils deivets, ed han en sac pli bia marenghins, che quei ch'auters han centims*), sco quei che la via vegn a custar, sche buc aunc dapli. Entras questas gestas lamentaschuns lessen nus mo refrestgentar empau la memoria als nos babs dalla patria (*gliez fa nuet*) e cun quei aunc enzatgei dapli, essend che lur ureglias han udiu e lur lieunga ha plidau. Denton vegn ei matei ad ir cun nus paupers purs sco cun tut quels, che ein enzacuras stai ella falla – els han stuiu mirar co mitschar ord quella ed aschia era nus – leu gida nuota pli schemer e plirar, aunc bia meins smuldir e zachergiar (*Bravo!*), ei muossa a nus, bugen ni nuidis, da patertgar co saver pagar e sur da quella dira nus ch'lessel era schar sentir mes sentiments mes cars vischins e purs e quei ina outra gada. (*Gliez ben!, gliez plai a nus meglia*)

In sempel pur da **Tujetsch**

Nova Gasetta Romontscha nr. 37, ils 12 da settember 1862

### **(7) Ils da Tujetsch che han tuts 5 senns vegnan lu a dir: Mai e pli mai desister dalla via**

**Buns cussegls als Tuatschins d'in sempel pur e la redacziun dalla gasetta publichescha buca ina brev nunsuttascretta e commentescha la malsimpatia dils Tuatschins pertuccont la via nova. - In clavau ed ils tetgs da duas casas barschavan gia. - La zoppina serepeteva cun regularitad e tuccava sil viv ils possessurs da tiers. - Per suenter la curontina astgava il pass puspei vegnir aviarts. - Ils maradonts da Sursassiala catschan rodund 800 tgaus sul Lucmagn, ils biars da Tujetsch che vevan aunc buca giu la malsogna. - Las nuorsas vanzadas dalla zavrada vegnan publicadas ella gasetta.**

### **La scuidonza e l'engurdientscha - dus schliats vischins**

(Tarmess en) Per far si deivets dat ei a nus purs buca grond studi, vein era per ordinari en nies tenercasa pign quitau da sepertgirar da quels, pertgei che nossas femnas han da tuttas sorts basegns, inaga in bi scussal merino, l'autra gada in bi fazalet, lura pézs da seida sin ina schlappa e suren in mantel alla moda pendius vid franzlas, la bucca, sinaquei ch'ella schiri buc, sto ver in bien caffè, ed il nas bein pervesius cun ina presa tubac holender etc. etc. Era nus purs havein sco nossas femnas nossas cusseidas e nos gronds basegns senza basegns per era vuler far sco ils auters e cun quei crescha nies cudisch da quen, sche nus havein in, aber buca silla posta dil dabien, sunder dil daschliet. Cheu dat ei lura a nus pli grond studi, cheu panzein nus ed entschavein a selamentar sur da discletgs, sur da schliats onns e carischias, pertgei che nus temin s. Martin cun siu scalin, nus stuein lu patertgar bugen ni nuidis vid il co pagar, pertgei ch'ils cumpars deivets van buc ord stiva mo cun lamentaschuns, sunder vulan marenghins. Aschia stuein nus era far cun nossa signura spusa, la via nova. Nus havein cun ella teniu casa senza quitau ed ussa splunta ella en nossas costas cun 30 – 40'000 frs., co lein nus cuntentar ella?

Vus, mes cars vischins e purs, vegnesses, sche jeu savess a vus mussar ina **California** en **Tujetsch**, nua ch'ei fuss buca mo d'anflar sablun dad aur, mobein bials sitgets marenghins, mo quei, quei per donn sai jeu buca far, ni per vus ni per mei ed aschia tucca ei d'encurir ensemen las miulas d'aur sternidas ora per nies **Tujetsch** entuorn. Gie per grazia da Diu savein nus dir, che nus havessen aunc enqual graun d'aur, sche nus mo vegnessen perina d'encurir ensemen quels. Havessen nus il spért da nos buns vegls, sche anflansen nus era; pertgei che cura che quels havevan da basegns da

daners per basegns generals, sco per exempel cura ch'ei han cumprau ora la dieschma dalla claustra, sche han els giu priu ord ils interess generals, e zuar senza allienar quels. Els han aschia pagau il deivet ed aunc schau artar nus ils beins generals. Lein pia era setener vid quella regla dils vegls, ed encurir da pagar il deivet dalla via primarmein culs beins generals.

Fuss ei buca pusseivel, gie buca mo dueivel, mobein aunc gest, da metter sin tuts s.v. tiers che pasculeschan en nossa vischnaunca ina taxa a proporziun da qualitat da tiers. Cheutras pagassen tuts tuttina, reh e pauper il medem; il reh che ha tiers pagass e gudess pastiras ed alps, il pauper pagass pauc e schass guder sia purziun da gudiment, ch'el havess vid pastiras ed alps. Causa fetg gesta, sch'ins considerescha che alps e pastiras ein beins communal. Vegness ei pia mess si inton per scadin cavagl, che pasculescha en nossa vischnaunca, per scadina vacca, genetscha, stiarls e vadials, sco era cauras, nuorsas e tierscasa, mintgamai suenter proporziun, sche dess quei in bi capital sigl atun da trer en. Era duess ei vegnir fixau in cert temps cu schar ora ils tiers d'armal la primavera, sco per exempel ils 10 da matg; quel denton, che schass ora avon stuess era pagar in ton per tgau.

Lura sevensen nus era trer in bi avantatg ord nos feins a pastg, nua ch'il **Cuolm Bass** duess vegnir partius giu en sorts suenter fiugs e dau da guder 5 – 6 onns, pagond ina annuala taxa. Era quei fust buca mo gest, mobein era in remiedi encunter bia malveglia, scuidonza e dispetas. Il **Cuolm Ault** duess denton vegnir gudius sco tochen ussa. Finalmein duessen nus mintga onn metter en aucziun 50 – 60 lenns bein madirai ora ad onn, per ils quals ei vegness senza dubi fatg bials pagamenti. Ord quellus fontaunas secrei vies beinmanegiont convischin e pur da trer ora buca mo igl annual tscheins dil deivet dalla via, mobein era aunc in surpli entras il qual ins savess annualmein pagar giu in ton dil capital sez.

Alla fin stuein nus aunc far attents sin nies bien crap scalegl si **Calmut**. Quel ei datier dalla via nova e savess plaunsiu dar ina biala resursa alla vischnaunca. Considererei inaga l'enorma massa crappa che **Mustér** meina ora mintga onn ed il danerun ch'ei tilan en leu. Nus secartein che **Calmut** savessi plaunsiu dar ina pintga **California** per **Tujetsch** e gidar a finir a pagar giu il deivet dalla via nova.

Mettend pia quei en tutta carezia e buna veglia avon a vus, mes cars vischins, per schar reflectar, lessel aunc dar in cussegl duront che vus veis da sedecider da numnadamein sclauder ord vies miez dus fetg schliats vischins, ils quals ein la caschun da bia caneras, dispetas e malveglia e quels dus vischins fussen la *scuidonza* e la *engurdientscha*. Ein quels dus schliats vischins bandischai ord vies miez, sche vegn ei a reger denter nus pasch, carezia e bien spert per il beinstar communabel! Prendei en pasch per quellaga, in' autraga enzatgei per nossas caffetieras.

In sempel pur.

Nova Gasetta Romontscha nr. 39, ils 26 da settember 1862

### **Remarca dalla redacziun pertuccont ina contribuziun buca suttascretta**

Nus essan quels dis vegni honorai cun ina brev d'in Tuatschin che ha buca astgau suttascriver siu num e che manegia ch'il vegl proverbii „donn e gomias van ensemen“ severificheschi cumpleinamein ord il nummer 37 dalla Nova Gasetta Romontscha.

Mo co astga **Tujetsch** plidar sul donn caschunaus dalla via nova, sch'ins patratga vid ils gronds avantatgs che quella porta alla vallada. Sch'ins enconuschess buca la pussonza e tschoccadad dils pregiudecis, sche pudessen ins crer, ch'ei seigi nunpusseivel, ch'in sulet Tuatschin astgassi aunc selamentar, cura ch'ins di ad el: Nus fagein a vus ina oreifra via tras vossa biala mo isolada vallada, mettein vus d'ina vart en buna comunicaziun cun **Mustér**, respectiv cugl entir cantun e da l'otra vart cun vos buns vischins digl **Uri**, culs quals vus veis in onn ora in grond traffic, aunc dapli, nus lein sez mantener quella via e cheutras aunc dar fadigia a vossa glied, vus stueis far nuot auter che dar neu gratis il necessari sulom. Ei quei buc in'offerta, che meritass da bitschar il maun enstagl da grir e smuldir sur quels che



han cussegliau a vus d'acceptar quei grondius schenghetg. Sch'ei ventscher ora la via nova e cura che vus veis empruau ella inaga, lein nus lu dumandar vus: Schei inaga sinceramein, leis turnar a schar ir en il stradun, sche nus turnein a vus ils cuosts per vossa expropriaziun? Ils da **Tujetsch** che han tuts 5 senns vegnan lu a dir: Mai e pli mai; il diember dils suords e tschocs vegn ad esser pigns. Per far ver la malraschuneivladad da tals pregiudecis lein nus aunc allegar ina anecdota. Nus vein dacuort entupau a **Medel** in marcadont tuatschin cun sia biestga da fiera, in dils capoadversaris dalla via nova. Vegnend vitier el, ei stau siu emprem salid, ch'el ha smuldiu sullas schliatas vias da **Medel**. Nus vein pudiu rir e detg: „En **Tujetsch** smuldis vus sulla buna via e cheu sullas schliatas vias.“ Mo nies bien um veva raschun da zachergiar sullas schliatas vias, pertgei cu la via nova, sull'**Alpsu** ei fatga, sche sa quei marcadont far dus cuolms en in di cun sia biestga, l'**Alpsu** ed il **Gottard**. Avunda per glied raschuneivla; culs malraschuneivels e malcuntents ston ins haver pazienza, tochen ch'els san inaga palpar lur avantatgs.  
Nova Gasetta Romontscha nr. 39, ils 26 da settember 1862

### **Notizias sul commers da biestga**

Ils marcadonts dalla **Cadi** han aunc cumprau si dabia biestga e pagau biebein, per vadials entuorn 4 marenghins in e per mutgs 6 – 7 marenghins. Questa jamna ein ils marcadonts da **Sursassiala** i cun lur biestga sul **Lucmagn**, en tut circa 7 – 800 tgaus, la flur da quella formavan ils mutgs da **Tujetsch**, che han aunc buca giu la malsogna. La fiera da **Mustér** ei per denton vegnida refretga sigl october, nua che las serradas pervia dalla malsogna tschessan speranza e vegnan cullas bunas novas da **Ligiaun** a dar pli gronda impurtonza e vivacitad alla fiera da **Mustér**, che veva quels onns da muntar pauc, essend ch'ei era cheu negins marcadonts da fiera pli.  
Nova Gasetta Romontscha nr. 39, ils 26 da settember 1862

### **Barschament d'in clavau a Sedrun**

El vitg **Sedrun** eis ei ussen sonda barschau giu in clavau; gia eran ils tetgs da duas casas pigliai fiug, mo ils umens da leu ed ils numerus luvriers dalla via, ch'ein spert dai neutier, han pudiu far resistenza al serasar dil fiug ed aschia prevegnir ad ina terribla sventira. Per sanadeivla admoniziun da geniturs remarchein nus, ch'il fiug seigi ruts ora entras affons, che fagevan tremagls cun zulprins.  
Nova Gasetta Romontscha nr. 40, ils 9 d'october 1862

### **Puspei arver il pass**

Questa jamna eis ei puspei vegniu fatg pass per far arver il **Cuolm d'Ursera** ed ins ha speranza che la serrada vegni a calar si aschigleiti sco las vischnauncas dalla **Cadi** han varghentau la curontina.  
Nova Gasetta Romontscha nr. 41, ils 10 d'october 1862

### **Tiers jasters a Tujetsch**

Suenter la zavrada fuva ei usit che nuorsas jastras vegnevan publicadas cun l'indicaziun dalla noda ellas ureglias ella Gasetta Romontscha.

1. In barbaisch ner (tschanc) cun corna che ha ell'ureglia dretga tagliau giu da sum, ina furcletta davon en, ed in snez davos en.
2. In tschut gagl, ureglia dretga onsum ina furcletta ed in snez davos en.
3. Ina tgigisch alva (nuorsa d'in onn che ha aunc buca fatg tschut), ureglia dretga in mugrin davon en ed ella seniastra giu dasum e fess.

Ils proprietaris da quellas san en termin da 10 dis retrer ellas tier  
Duri Wenzin, gerau

Nova Gasetta Romontscha nr. 41, ils 10 d'october 1862

### **La malsogna dils peis e dalla bucca**

denter il s.h. muvel ha gia cugl uost giu sia fin ellas vischnauncas da **Medel**, **Tujetsch** e **Mustér**, essend che da quei temps naven han negins tiers pigliau la malsogna, quei ch'era aunc bucca saun, era mo consequenzas dalla malsogna. Aschia han quellas vischnauncas finiu la curontina avon ils 20 da settember. ...  
Nova Gasetta Romontscha nr. 43, ils 14 d'october 1862

### **(8) Nossa glied han halt bucca la premura e perseveronza da fadigiar sco ils Talians.**

**Ins veseva duront la lavur mai a fimond tubac ils luvriers talians, bein aber ils romontschs. - Essend serrau tutta communicaziun han ils da Selva stuiu salvar si plirs dis ina bara en baselgia. - Il schaner 1863 cun bia malsauns. - Anflau il fevrer quater nuorsas en Curnera. - Fundau igl onn 1847 treis scolas cun in fondo da 3400 frs.**

### **La via sull'Alpsu**

ei schon uonn en sia construcziun s'avanzada bucca mal. Vid las duas secziuns pridas a mauns en ina lunghezia da circa 13 000 m da **Mustér** tochen **S.Brida**, pon ins dir che varga la mesadad dalla lavur seigi fatga, cunzun sil territori da **Mustér**; entirs tocs via ein fini diltut. Tenor tuts aspects selai ei spitgar che sigl uost 1864 seigi la via ventschida sin nies territori, sco igl ei fixau dalla Confederaziun. In'autra damonda eisi denton, schebein **Uri**, che ha aunc ussa fatg nuot ed ha tier quei da baghegiar la via da **Flüela** a **Brunnen** e sulla **Furca**, seigi sin lu era sin siu territori alla fin culla via sull'**Alpsu**, duess quei bucca esser il cass, sche vegn il cantun **Grischun** bein ad haver regress tiella Confederaziun, per far pagar ella in ton tscheins pils daners applicai vid la via, entochen che **Uri** ha finiu siu toc via. Tschelluisa vess nies cantun in schliet engraziament per sia gronda premura e stenta el catschar vinavon las lavurs per vegnir suenter allas ordinaziuns dallas autoritads federalas.

Las lavurs vid la via ein ussa caladas si ed ils luvriers sbrigai. Il maximum dil diember dils luvriers ei stau circa 420, en quei 60 Romontschs. Ins ha danovamein saviu seperschuader, che senza agid dils Talians savessen nus mo cun nossa glied bucca baghegiar vias. Bucca per nuot sesanflan en nies cantun ina aschi gronda quantiad luvriers jasters, vid vias circa 1000, parders (sitgurs) 100, fumegls e fumitgasas 700, brischacotgla 380, luvriers da lenna 360, pasturs 350, melli mistergners, insumma en tut circa 7000 luvriers jasters.

Nossa glied han halt bucca la premura e perseveronza da fadigiar sco ils Talians; mo ils davos ein era bucca aschi custeivels el viver e sevestgir. Sch'ins considerescha il sempel cuost da quels activs luvriers talians, che magliavan la damaun in toc paun, da miezdi ina pulenta cun empau caschiel e la sera mo ina minestra, sche pon ins bein dir, ch'il magliar bia seigi in ton mo disa. -

Characteristic eis ei era ch'ins veseva duront la lavur mai a fimond tubac ils luvriers talians, bein aber ils romontschs. - Sch'ils umens romontschs han bucca fatg stretg cun lur lavurs vid la via nova, sch'eis ei era bucca da far curvien, che las femnas han nuota vuliu saver da quellas. Fertion ch'ins veseva vid la viafier roschada luvreras, han ins viu mo ina vid la via dall'**Alpsu**; mo quei era ina ton pli activa che luvrava stediamein ed en tutta aura per sustener ses vegls geniturs. - Malgrad il grond diember da luvriers ha ei dau neginas sventiras, priu ora in che ha fatg mal in egl cun sittar crappa.

Sche la primavera ei biala, sco ina part vulan cumprender ord il bi atun, sche vegnan ils interprendiders gl'avrel puspei a schar entscheiver cullas lavurs per finir ellas il zercladur sil territori da **Mustér**. La principala lavur ei lu las 7 punts, il fundament

dallas qualas ei per part schon mess. Nus vein giu relatau, ch'ìl departement militar a **Berna** hagi ordinau ch'ei duei vegnir construiu cumahs da puorla tier quellas punts, per en cass da basegns siglentar ellas ell'aria ed impedir il pass agl inimitg. Mo silla inspeziun fatga quest october digl expert federal vegnan ins a desister da quels cumahs da puorla, essend che per siglentar quellas punts pudess gl'inimitg aunc adina maneivlamein passar las respectivas auas. Ils avdents da quellas punts pon aschia durmir ton pli ruasseivlamein. Plidond digl expert federal, remarchein nus aunc posteriuramein, ch'el hagi schau plascher zun pauc, che la cumissiun dil stan hagi saviu concluder dad el vitg da **Mustér** ir naven mo cun ina casa e far ina aschi macorta stretga storta. Denton savess quei tut vegnir midau ed embelliu, sche quei signur expert procurass per in credit supplementar, ils quals ein tschelluisa fetg en moda tier nossas autoritads federalas. Daventa quei buc, sche stat ei tiel conclus dalla cumissiun dil stan, che ha custau alla vischnaunca 956 frs.

Tuts ils jasters ch'ei uonn passai sull'**Alpsu** han declarau, che quei pass vegni a vegnir frequentaus tut autruisa dils viadents inaga che la via seigi finida. Mo ei vegn aunc a semussar auters avantatgs, cunzun per **Tujetsch**; en scadin cass san ins pretender, ch'ìls funs, tras ils quals la via nova va, seigien schon ussa tenor las damondas dils proprietaris carschidas bia en valeta.

Artechel en nr. 45, ils 8 da november 1862

### Da Tujetsch 150 pors sur Cuera ad Altdorf

Finalmein ha il cantun **Uri** tenor in telegram arrivaus a **Mustér** aviert il **Cuolm d'Ursera**, mo ils pors tuatschins vevan schon anflau ina via egl **Uri** senza passar il **Cuolm d'Ursera**. Schon avon 15 dis era ei las tunas ch'ei vegnessi aviert e sin quei han marcadents uranès e tuatschins giu cumprau si en **Tujetsch** circa 150 pors. Quels ein lu avon entgins dis marschai pella **Surselva** giu, han priu a **Cuera** la viafier tochen **Lucerna** e vegnan ussa ad haver passau il lag ed esser debarcai a **Flüela** e serendi ella capitala **Altdorf** per far giu pil nas alla regenza. L'avertura dall'**Alpsu** vegn denton ad alzar ils prezis dils tiers casa ella **Cadi**, sils quals ils Uranès spitgavan fetg vess.

Nova Gasetta Romontscha nr. 47, ils 21 da november 1862

### Il „selvadis“

La stad s. Martin para da seprolunghir. Priu ora ils selvadis **Tujetsch** e **Medel** eis ei en **Surselva** tochen si encunter la regiun alpina bi schetg terren ...

Nova Gasetta Romontscha nr. 49, ils 5 da december 1862

### Pors en perschun

Posteriuramein remarchein nus aunc ch'ei seigi buca iu bein culla gronda roscha s.h. pors che seigi per far giu pil nas alla regenza d'**Uri**, che leva mai arver il **Cuolm d'Ursera**, ida dalla **Surselva** giu, priu a **Cuera** la viafier tochen **Lucerna** e da leu navigada vi egl **Uri**. Ad **Altdorf** – la veglia residenza da Gessler – ei l'entira roscha vegnida messa en perschun per 8 dis; ils perschuniers ein sinquei vegni vendi cun ina gronda sperdita; ils cumpraders han lu dau buns plaids als signurs d'**Altdorf** e quels han suenter 3 dis dau amnestia als s.h. tierscasa. – Cun in'otra roscha da quels tschins instradada egl **Uri** sul **Cuolm d'Ursera**, che ha suenter gronds strapazs piars 10 tgaus sil cuolm, eis ei era vegniu fatg pign profit, ed aschia eis ei da capir ch'ìl traffic da pors ruaussa empau ella **Cadi**. Mo ton pli tschercai ein ils vadials giuvens; pils mas-chels grad naschi vegn ei pagau 30 frs.

Nova Gasetta Romontscha nr. 50, ils 11 da december 1862

### Vadials ventschan

... Era denter il s.h. muvel para ei da buca reger la dretga sanadad, ella **Cadi**

ventschan bia vadials giuvens, mo il vitg da **Camischolas** ha piars uonn circa 15 da quels.

Nova Gasetta Romontscha nr. 2, 10 da schaner 1863

### **Lavina a Selva**

Era a **Selva** eis ei vegniu giu la lavina ed ha priu dus clavaus; en in, nua ch'ei era en animals, ha ella per ventira mo splanau surora il clavau e schanegiau il nuegl. Essend serrau giu tutta communicaziun han ils da **Selva** stuii salvar si plirs dis ina bara en baselgia.

Nova Gasetta Romontscha nr. 3, 17 da schaner 1863

### **Quater baras e biars malsaus**

En **Tujetsch** era ei gievgia 4 baras e plirs malmalsaus. *Numnadamein: Onna Maria Scolastica Monn, Surrein, 77 onns; Cresenzia Riedi, Selva, 39 onns; Barclamiu Gieronimo, Selva, 1 onn; Onna Maria Peder, Selva, 1 onn.*

Nova Gasetta Romontscha nr. 5, 31 da schaner 1863

### **Remarcablada**

Sco remarcablada ed emprova dalla veta dallas nuorsas, relatein nus ch'ei seigi miez fevrer vegniu anflau ell'alp **Curnera a Tujetsch** quater nuorsas. Malgrad la gronda nevada e las cuflas, ch'ellas han stuii star ora quest unviern sesanflan ellas en bien stan, e muort la liunga launa semeglian ellas gest quater uors pigns, vegn ei scret a nus.

Nova Gasetta Romontscha nr. 9 ils 28 da fevrer 1863

### **Ils fondos da scola ella Surselva catolica Vischnaunca da Tujetsch cun 3 scolas**

Igl onn 1847 ha la vischnaunca fundau tras arvers ellas alps e fein

a pastg 3400 frs.

Premi cantunal pella sura fundaziun 680 frs.

Priu cun lubientscha episcopala ord la facultad

dallas capluttas, capitals, che vegnan aunc  
administrai dils respectivs ugaus da quels 6596 frs.

Premi cantunal per 3 casas da scola, a **Sedrun,**  
**Rueras e Cavorgia** 425 frs.

(**Camischolas** ha ussa era sia atgna casa da scola ed a **Selva** vegn uonn medemamein baghegiu ina.)

La caplania da **Sedrun** paga annual alla scola 51 frs. che representa  
in capital da 1020 frs.

En bonis dalla scola ha il ludeivel obercheit resignau

Sin ina annuala usitada gastaria tiel  
signur plevon, persunter paga quel annuala alla  
scola 11. 90 frs. che representa in capital da 238 frs.

Igl onn 1863, schaner, purtava aschia l'entira facultad 12 279 frs.

Ultra da quei fondo general ha il vischninadi da **Camischolas** e **Zarcuns** mess ina entschatta tier in fondo per lur atgna scola tras ina voluntaria collecta, che ha purtau en 393.63 frs.

Nova Gasetta Romontscha nr. 11, 12 da mars 1863

### **(9) In memorial pella Cadi ord l'uiara dils Franzos**

Tras in buntadeivel maun ei a nus vegniu communicau ord igl archiv da **Tujetsch**



sequenta scartira:

Cuorta memoria tgei nies ludeivel cumin dalla **Cadi** hagi pitiu entras la uaira ed entras las potenzas, ton Keisers, Russers e Franzos igl onn 1799, ton cun engular, barschar ed auters donns generals da tuttas sorts etc., sco era tut il furniu, il qual suonda primarmein specificadamein en numer e suenter fatg en pagament, tut en sia valur e buc alterau il prezi.

### **Furniu**

Quantum		flurins e kr.
1'160	centners fein	2'320.04
258	vaccas	23'220.00
66	tgaus tiers manedels	396.00
139'323	quatiers	6956.05
15'000	pauns	3'000.00
660	crenas pischada	330.00
13'023	crenas caschiel	2'472.48
940	crenas carn	470.04
5'326	stèra truffels	5'681.00
142	stèra graun	568.00
	vin e vinars	623.00
	autras expensas ch'il cumin ha giu per speias, landsturm, Kriegsraith, express etc.	17'000.00
	Porta flurins e krizzers	63'037.01

### **Suonda igl engulau**

184	vaccas	16'560.00
2'297	tgaus tiers manedels	13'782.00
15'000	pauns	3'000.00
80'400	crenas pischada	40'050.00
20'000	crenas caschiel	1'333.20
28'000	crenas carn	14'000.00
12'000	stèra truffels	12'080.00
10'000	centners fein	25'000.00
12'068	stèra graun	18'272.00
	mobalias per	10'800.00
	barschau per	668,243.00
	donns generals	6'000.00
	per muniziun als Franzos	5'780.00
	purtau sur cuolm 12 000 buordis	8'000.00
	menau fuor 5000 vaultas	5'000.00
	daner blut cumpigliau vin e vinars	3'000.00
	dau contribuziun als Franzos	23'000.00
	32 cavals per	6'000.00
	Summa totala	962'936.11

**Tujetsch**, ils 14 da fevrer 1800

Da mei Ulrich Battesta Monn, mp. p. gerau

Nova Gasetta Romontscha nr. 12, 19 da mars

### **Biala vegliadetgna**

A **Tujetsch** ei miert tshella jamna in um da 91 onn. *Statalter Gion Andriu Berther*,

*Camischolas, fegl da statalter Andreas Berther e Margarita Caschalk.*  
Nova Gasetta Romontscha nr. 13, 27 da mars 1863

### **Bia neiv**

A **Medel** e **Tujetsch** ei aunc 6 quartas neiv els plauns, a **Mustér** 3 ed els cuolms 12 quartas, aschia ch'ei vegn uonn buca d'ir baul a cuolm, schegie ch'ei semuossa els bia loghens scartezia da fein.

Nova Gasetta Romontscha nr. 13, 27 da mars 1863

### **Brevs per l'America**

Il suttascret ha giu empermess da clamar en plirs loghens avon che turnar ell' **America**, mo stuend el da gleiti semetter sin viadi, fa el cheutras da saver a tuts enconuschents, che han da surdar brevs ni commissiuns per l' **America** da schar vegnir tier quellas sin Pastgas a **Tujetsch** a signur gerau Gion Andriu Berther, a **Mustér** all'ustria dalla Cruna, a **Sumvitg** a signur bannerherr Cajacob, a **Glion** all'ustria digl Oberalp ed a **Cuera** a bundsveibel Berther. Prendend comiau dalla **Surselva** offerescha cun quella caschun a tuts enconuschents siu cordial salid.

**Tujetsch**, 26 da mars 1863

J. Gieriet

Nova Gasetta Romontscha nr. 13, 27 da mars 1863

### **Clamau ora tschun pera nozzas**

La via nova para schon ussa da promover la communicaziun ed il commers denter la gliud a **Tujetsch**. Ils firaus Pastgas eis ei vegniu clamau ora 5 pera nozzas en inaga – enzatgei mai s'udiu en quella val, nau che latg e mèl flessegia en abundonza. En tut quellas sontgas alianzas ein vegnidas serradas giu cun bien giudezi, essend che tuttas 5 spusas dumbran intrasglauter 35 onns. Salit e liunga veta a quels ventireivels. *Ils 5 pèrs: Gion Antoni Beer e Maria Turtè Monn, **Camischolas**; Giachen Antoni Berther e Naria Barbara Catrina Beer, **Gonda**; Giachen Adalgott Monn e Rosina Monn, **Rueras**; Gion Giachen Caduff e Maria Barbara Monn, **Rueras**; Nicolaus Thomas Deflorin e Maria Dominica Monn, **Rueras**; tuts sur 30 onns!*

Nova Gasetta Romontscha nr. 15, 11 d'avrel 1863

### **Tujetsch ha quellaga giu cletg**

Finalmein ha il ludeivel Cussegl Pign relaschau sia sentenza da castitg allas vischnaucas dalla **Cadi** che han quest atun tiella malsogna dalla bucca e dils peis buca observau sco s'auda gl'uorden sanitaric ... **Medel**, **Tujetsch** e **Schlans** ein mitschai senza castitg.

1863

### **Entschatta dallas lavurs**

Las lavurs vid la via dall' **Alpsu** han puspei entschiet en **Tujetsch**; a **Mustér** vegn ei per il matg dau sia entschatta.

Nova Gasetta Romontscha nr. 17, 24 d'avrel 1863

### **Paun zart**

fatg alla moda talianera san ins da tut temps cumprar tier Felix Huonder a **Segnas** (**Mustér**) e tier Vigieli Mon a **Sedrun**.

Nova Gasetta Romontscha nr. 19, 8 da matg, nr. 21, 22 da matg 1863

### **Tresta nova!**

A **Tujetsch**, **Zarcuns** ei puspei rut ora la malsogna dalla bucca e dils peis. En consequenza da quei ei la vischnaunca da **Tujetsch** serrada giu.

Nova Gasetta Romontscha nr. 21, 22 da matg 1863

### **Zoppina**

La zoppina en **Tujetsch** para da buca serasar pli lunsch, aunc ussa eis ella rutta ora mo en in nuegl a **Zarcuns**, ch'ei serraus giu da tutta communicaziun cun auters tiers. .... **Uri** ha serrau ferm encunter il **Grischun** e quei ei ina mala pella proxima fiera da **Trun** e da **Tujetsch**, nua ch'ils Tudestgs vegnevan neu e cumpravan si ina massa cauras e da bia vaccas.

Nova Gasetta Romontscha nr. 22, 29 da matg 1863

### **Alp da cavals**

Cheutras vegn ei fatg da saver ch'ei vegni priu si ella alp da cavals a **Tujetsch** 10 cavals jasters per in arvè da 20 frs. Igl ei da remarcar che en quella alp seigi ei era in grond e bi cavagl mascial per cavallas, ch'ins vul schar curclar; per quei e pli pustretsch vegn ei lu da pagar circa 5 frs. Ina cavalla cun pulein paga mo per in cavagl. Ils 8 da zercladur vegnan ils cavals pri si. Ulteriur sclariment dat Giusep Antoni Mucli, gerau

Nova Gasetta Romontscha nr. 22, 29 da matg 1863

### **Zoppina sederasa**

La zoppina en **Tujetsch** – ch'era gl'emprem rutta ora mo en in nuegl e sco ei vegn pretendiu cun dar als tiers flucs stai anavos onn dallas vaccas malsaunas, serasa nunspitgadamein pli fetg. Els cuolms ni mises ein plirs muvels infectai ed essend che varga la mesadad dils armauls en **Tujetsch** han onn buca giu la malsogna, sche desiderassen ils Tuatschiners che tuts quels survegnessen ella ton pli spert.

Nova Gasetta Romontscha nr. 24, 12 da zercladur 1863

### **Stradun**

La davosa secziun dalla via sulla **Alpsu**, da **S. Brida** tochen si tiels cunfins uranes ei surdada da baghegiar a signur Plattner da **Cuera**, che ha construiu la via da **Trun** tochen **Mustér**. Finalmein han era ils Uranès dau ina entschatta culla via da lur maun. (8100 meters liunga)

Nova Gasetta Romontscha nr. 25, 19 da zercladur 1863

### **Fiera**

La fiera da **Tujetsch** ch'ei muort la zoppina vegnida tenuta uonn a **Mustér**, eis ei vegniu catschau bia cauras, mo paucs e schliats armauls. Ils prezis vegnevan teni ault e perquei eis ei vegniu marcadau pauc, schegie ch'ei era dabia glieud. Ils numerus cavals pri si uonn en **Surselva** dils Uarnès a tscheins, ein puspei vegni pagai ualti bein.

Nova Gasetta Romontscha nr. 25, 19 da zercladur 1863

## **(10) Il stupent mèl da ses aviuls ei tiell'exposiziun agricolana a Paris vegnius premiaus cun ina medaglia d'argien.**

Ina vacca stauscha in buob ell'aua dil Rein. – En discussiun stat ina transversala viafierila atras Tujetsch. - Nus vein cumpignau bia trestas baras, mo aunc mai ina da schi gronda e generala tristezia e condolenza, da schi profunda impressiun sco questa digl aultreveri signur plevon Joseph Antoni Durgiai. – La malsogna dalla zoppina mudregia danovamein il puresser.

1863

Sventira a Rueras

En **Tujetsch** ei sonda vargada, ils 20 da zercladur, succediu ina sventira. In buobet da 9 onns, *Casper Giusep Antoni Muggli*, che mava cun duas vaccas sulla punt da **Rueras** vi, ha tras ina da quellas survegniu in stausch, ch'el ei daus giu ell'aua. Spert ein curri neutier glied, mo per sut **Sedrun** giu eis ei reussiu da trer igl affon miert ord il **Rein**. Ei era in affon d'admirabels dunns, sia spiritusa soretta dad endisch onns funcziunescha sco telegrafista a **Mustér** - dus orfans dil defunct secretari guvernativ Mucli.

Nova Gasetta Romontscha nr. 26, 26 da zercladur

**1863**

... Per unir las respectivas tendenzas dalla **Svizra Centrala** cun quellas dalla **Svizra Orientala**, manegia era el (La Nicca) ch'ei seschassi menar la viafier naven dil **Lag da Lucerna** tochen ad **Amsteg**, da leu tras la **Val Maderana** cun in tunnel dad ina ura e mesa sut il **Crizli** ella **Val Mila** tochen tiel venerabel casti **de Putnengia** sper **Rueras**, nua che la viafier da **Cuera** suness cun ella per comunablamein formar la viafier sul **Lucmagn**.

Nova Gasetta Romontscha nr. 27, 3 da fenadur

**1863**

Sillas reclamaziuns fatgas tiel Cussegl federal pervia dil scamond da frequentar la fiera tessinesa a **Quint**, ha quella autoritad rispundiu, ch'il **Tessin** hagi giu raschun da serrar il pass, sch'ei seigi ver, che la zoppina grasseschi en **Tujetsch** sco la regenza grischuna detti senza tier.

Nova Gasetta Romontscha nr. 29, 17 da fenadur

**1863**

#### **Annunzia da mort**

En profunda dolor e tristezia notifichein nus cheutras al venerabel clerus sursilvan, a tuts parents ed amitgs, ch'ei hagi plaschiu agl Altissim da clamar ord questa veta speranza tier ina megliera nies car sur feagl e frar, igl

**Aultreveriu signur Josef Anton Durgiai**  
plevon a **Tujetsch**

Provedius cun tuts ss. sacraments dils moribunds eis el spartius oz allas 3 dalla damaun suenter ina malsogna da mo 10 dis en ina vegliadetgna da 51 onn. Nus recumandein sia olma alla pia memoria da tut ses parents, amitgs ed enconuschents **Sedrun**, ils 30 da zercladur 1863

Lezi Anton Durgiai, bab

Era en num dallas feglias e dils schienders.

Nova Gasetta Romontscha nr. 31, 31 da fenadur

**1863**

#### **La sepultura d'in plevon**

**Sedrun**, 1. d'uost 1863.

Giud la aulta tuor cloman tut ils zenns tiella fossa, la baselgia porta malencurada, ed en santeri sesarva ina nova fossa, che para da clamar cun aulta vusch: "Patratga o carstgaun, che tiu tgierp ei formaus ord tiara e vegn puspei a semidar en quella!" L'entira vischnaunca, ils datier e damaneivel, umens e femnas, giuvens e vegls ein en gronda passadetgna e tristezia serimnai en ed avon casa parochiala – ina numerosa famiglia spirituala, che plira giud la dolorosa sperdita da siu car bab e spiritual. Cheu compara sia bara purtada da 4 spirituals e 4 geraus ed ornada si cun flurs e ghirlandas. Quei trest aspect rumpa il cor als parochians, dapertut flessegian larmas, biars lamentan e bragian. Sut il melanconic, mo edificont cant d'in numerus clerus,

vegn la bara purtada entuorn baselgia e tschentada sco unfrenda dalla mort avon gl'altar, leu nua ch'il pietus defunct veva sco secund mediatur denter Dieus ed ils fideivels purtau bia dis ed onns agl Altissim la pli aulta unfrenda ed a quel la pli plascheivla. Ei vegn intonau gl'uffeci da morts; las imposantas melodias dil Benedictus e Miserere mumentan bia cors tier novas larmas.

En solemna tgeudad cumpara lu in jester predicatur silla scantschala orfanila. Igl ei buca pli il vegl pastur, che schava cheu resonar sia migeivla vusch per instruir, admonir ed edificar sias caras nuorsas; na igl ei igl aultreveri decan dil venerabel Capetel Grond, che ha oz la tresta da surdar al stgir ravugl dalla tiara in dils pli stimai e premurai confrars. Cun eloquenza faviala sclarescha el si igl operar e l'impurtonza d'in bien plevon; el fa ver ora, ch'il defunct eri in amitg dils affons, pella giuventetgna in aungel Rafael sin viadi cun Tobias, in tgamun pils maridai, in miedi pils malsauens e la consolaziun dils moribunds. El consolescha la deprimida pleiv, animescha da tener il defunct en buna memoria cun era dacheudenvi suandar sias sontgas ductrinas e siu bien exempel, ed agurescha ad ella ladinamein in vengonz successur ella piazza dil defunct. En suffragi per quel vegn ei silsunter celebrau il pli ault sacrifici – la sontga messa. L'impressiun da quella vegn aunc engrondida tras il commuentond cant dil maiestus Requeim e Dies ire dies illa. Finalmein vegn la bara purtada ord baselgia tiella fossa sut il sun dalla orgla ed il cant coral, che vegnan gl'emprem accumpignai mo beingleiti totalmein interruts dil plirar e bargir dall'entira pleiv. Nus vein cumpignau bia trestas baras, mo aunc mai ina da schi gronda e generala tristezza e condolenza, da schi profunda impressiun sco questa digl aultreveri signur plevon Joseph Antoni Durgiai. Cheu han ins silla megliera moda saviu seperschuader tgei spiritual ch'el seigi staus e tgei ch'in vengonz plevon hagi da muntar.

Il defunct ei naschius a **Mustér** il fevver 1812 e tratgs si el ravugl d'ina pietusa famiglia ... Gl'onn 1846 vegn el numnaus plevon da **Tujetsch** sco successur digl erudit decan Hitz, ed anfla cheu ina nova e pli extensiva sfera d'operaziun. Muort sia edificonta pietad, sia exemplarica conduita, sia ludeivla premura per tuttas bunas caussas, muort siu real e sincer character, sia cordialitad e bien humor, era el generalmein stimaus e carezaus. Tut steva haver bugen el e perquei veva el negins inimitgs.

El era buca mo in premurau pastur dallas olmas, mobein era in amitg dil ver sclariment e progress. Perdetga da quei dat il considerabel fondo da scola e las treis casas da scola che ein vegnidas si sut siu presidi dil cussegl da scola. Stractond schebein ils vischins da **Tujetsch** veglien acceptar l'offerida via sull'**Alpsu**, ha el sin publica vischnaunca recumandau da prender si ella e mess avon ils avantatgs, che quella porschi. L'expropriaziun dils funs dattan presentamein empau da far alla vischnaunca, mo nus essan perschudi, che en paucs onns vegnien leu tuts ad esser bein cuntents culla via nova. Il grondius rempar e la punt da **Sedrun** formeschan schon ussa ina ferma ustonza per la baselgia e santeri, vivon pereclitai dalla furia dil nausch **Drun**. El ha era sedau gronda breigia da liberar ils vischins da **Selva** orasut il prighel da lavina cun instradar lur translocaziun a **Novaselva** tras baghegiar si leu ina nova baselgia e casa da caplania. Pil pauperesser eis el principalmein sefatgs meriteivels cun gidar els tiella cultivaziun d'in toc pastira, vesend che la megliera almosna seigi da procurar ad els lavur e fadigia. Insumma tuttas bunas ideas che semantifestaven per ameglieraziun en fatgs communalas, anflavan tier el susteniment entras plaid e cussegl. El era dasperas in grond amatur da biala lectura e senuspeva buca giud sias considerablas annualas expensas per quella. In da ses principals divertiments era l'apicultura, el capeva quella e veva bien detg, aschia ch'el ha schau anavos 50 schaumias aviuls. Il stupent mèl da ses aviuls ei tiell'exposiziun agricolana a Paris vegnius premiaus cun ina medaglia d'argien.

Varga 17 onns ha il defunct operau cun tut laud sco plevon a **Tujetsch** ed acquistau la stema ed affecziun da tut ses parochians. ...

Nova Gasetta Romontscha nr. 32, 7 d'uost

**1863**

Dacuort ha la vischnaunca da **Tujetsch** vendiu ora entgina lenna a ses vischins, che han pagau persuerter bials prezis, gie per in pèr lenns eis ei vegniu dau varga 40 frs. in. Cheu para ei ch'ins sappi stimar la lenna e trer ordlunder in grond profit pella vischnaunca, buca sco en bia auters loghens, nua ch'ei vegn ultra dallas sorts communalas aunc cuntinuadamein dau ora lenna a privats per pauc ni mo per cagnas. Nus vein repetidamein fatg attents, che sch'ins vegli far spargnar lenna e cultivar ils declinonts uauls, sche seigi ei il meglier mettel da schar pagar biebein per tutta lenna che vegn dada ora a parti.

Nova Gasetta Romontscha nr. 32, 7 d'uost

**1863**

La malsogna animalica dalla bucca e dils peis ei ussa totalmein svanida en **Tujetsch**. **Medel** e **Mustér** han retratg lur custeivlas gardas. ... Essend ella **Cadi** abundonza da s.h. pors, sch'eis ei culla avertura dil pass vegniu catschau ina brava roscha da quels egl **Uri** nua ch'ei eran tschercai.

Nova Gasetta Romontscha nr. 33, 14 d'uost

**1863**

La vischnaunca da **Tujetsch** ha unitamein legiu ora per plevon igl aultreveriu signur canoni Darms, presentamein plevon a **Breil**.

Nova Gasetta Romontscha nr. 33, 14 d'uost

**1863**

Nunspitgadamein survegn il vitg **Sedrun** in grond renomé ellas afferas dalla viafier alpina. Nus vein schon menziunau che nies signur colonel La Nicca hagi encuretg d'unir ils interess dalla **Svizra Centrala** e **Svizra Orientala** tras ina viafier naven da **Lucerna** ad **Amsteg** e da leu tras il **Crizli** a **Sedrun** per s'unir a **Tujetsch** culla viafier dil **Lucmagn**. La gasetta da **S.Gagl** porta ussa in artechel titulaus "Ina vusch da reconciliaziun" tras il qual ella recamonda cauldamein la lingia **Lucerna-Sedrun**; quella sligi si il nuv gordonic el present viriveri dalla viafier alpina; per quella lingia duei tut scriver e plidar, mo quella sappi puspei unir las partidas dalla **Svizra**, aschia che nos cars babuns vegnessien aunc en fossa a selegrar lundergiu etc.

Nova Gasetta Romontscha nr. 34, 21 d'uost

**(11) Sco ins auda ha ei dau in ferm cumbat, schebein la posta duei ir mo a Sedrun ni tochen Rueras, mo finalmein ha la capitala purtau la victoria.**

**La via nova ei pils Tuatschins u memia aulta ni memia bassa! – La secunda secziun dalla via dils cunfins a S.Brida va era encunter la fin. – Descargada pervia dalla nevada dils 22 da settember. – Tujetsch refusa la pascalaziun cumina. – L'emprema processsiun da s. Martin a Mustér sin via nova. – La val ha dad alimentar 4884 tiers. – Protesta tuatschina encunter la paga dils scolasts. -**

**La pli biala cuntrada**

Naven da **Mustér** meina in reschniev stradun en la **Val Tujetsch**, la pli biala cuntrada, che jeu hai viu en **Surselva**. Glied viva sco furmiclas, cun oreifras vuschs silmeins per far canera. Ils discuors, che jeu hai udiu, consistevan per la pli part ord lamentaziuns e lamentaschuns; ina observaziun che jeu hai fatg en l'entira **Surselva**.

**Tujetsch** selamenta presentamein encunter la via nova, cheu duei esser tscheu memia aulta, leu memia bassa. Quella malcontentientscha vegn a svanir aschigleiti sco **Mustér** fa la projectada carrotschada per celebrar festivamein l'avertura dalla via nova.

Cun il Segner ein ils da **Tujetsch** era buca cuntents, principalmein perquei ch'el ha ad els avon cuort temps priu naven lur signur plevon. Sche tuts plevons dalla **Surselva** ein en lur parochians aschi carezai sco signur Giusep Antoni Durgiai per miert, para d'esser staus a **Tujetsch**, sch'ei els fetg ventireivels. Dapresent eis ei buca gronda abundonza da plevons catolics en la **Surselva**, ei maunca tals a **Tujetsch**, a **Trun**, a **Glion** ed a **Val**. Sche quellas pleivs vegnessen provididas cun spir canonic, sche restass ei en la residenza episcopala grad aunc il necessari diember

Il Grischun nr 35 dils 28 d'uost 1863

### **Collaudaziun dalla via Mustér – cunfins Tujetsch**

Quels dis ei l'emprema secziun dalla via sull'**Alpsu**, numnadamein dil vitg **Mustér** tochen sils cunfins da **Tujetsch** e **Mustér** vegnida collaudada.

La construcziun dalla secunda secziun, ch'ei pli liunga e sestenda tochen **S.Brida**, va ussa era encunter la fin, mo ton pli plaun va ei culla davosa secziun, nua ch'igl impressari ha fatg plaunsiu da vegnir neutier cun bia luvriers ed ei pli tard vegnius impediud dalla schliata aura. Ils Uranès han catschau vinavon cun tutta forza, aschia ch'els fineschan uonn bunamein l'entira via sil cuolm e ch'il **Grischun** po in auter onn seduvrar da buca restar anavos ad els. – Cun quella caschun remarchein nus ch'igl inserat el Tagblatt hagi tschaffau si nies artechel sull' "estetica e matematica" dalla storta dalla via tral vitg **Mustér** tut autruisa, che quei che nus vein giu maniau. Quel cuntegn neginas malignas represchas visavi ad emploiai ni autoritads, nus vein mo detg che quella storta prendi ora mal – il qual tut vegn a stuer dar tier. La davosa remarca el respectiv inserat dil Tagblatt sa pia buca vegnir applicada sin nus. Era nossa metafra da schar ir il cavagl e tener il cavester ei vegnida tschaffada si autruisa. Nus vein mo vuliu dir, che cura ch'ins hagi buca temiu da decretar da bia mellis, dueien ins era buca senuspir da decretar enzacons tschiens; nus vein plidau e scret en favur da quella via e secartein ch'ella seigi profiteivla per **Mustér** e cunzun per **Tujetsch**. Nus supplicassen nies signur collega dil Tagblatt da prender notizia da quellas duas remarcas.

Nova Gasetta Romontscha nr. 38, 18 da settember 1863

### **Fiera da Ligiaun**

Schegie che la fiera da **Ligiaun** ei avon esch, sche fan nos marcadonts plaunsiu da cumprar si biestga. In pèr Uranès, che han schon la primavera giu cumprau si ina gronda roscha tiers, ein dacuort vegni sull'**Alpsu** e marcadau enzacons stiarls per bials prezis. Sch'ils marcadonts sedatan buc ora pli fetg, sche ston ins silmeins buca temer ina surcatschada e cheutras ina schliata fiera. Il magistrat da **Ligiaun** ha denton publicau ellas gasettas, ch'ei seigi semtgau leu tut tgei ch'ins sappi garegiar: oreifers pastgs, cumadeivlas stallas, bunas ustrias etc. e zuar tut per in fetg dueivel prezis. Sco ei vegn detg, lessan ils da **Ligiaun**, ch'ils marcadonts setenessen buca si aschi ditg a **Sebiastg Giubiasco** e sin via, mobein fagessen fiera a **Ligiaun** dils 4 – 15 d'october. Nos marcadonts han zuar gronda furtina da semetter sin viadi a **Ligiaun**, mo fan plaunsiu dad ir giu en quei marcau; la meglia fiera fan ei il bia a **Sebiastg**.

Nova Gasetta Romontscha nr. 38, 18 da settember 1863

### **Avon ils Glarunès**

Ils marcadonts da **Tujetsch** e **Medel** che han ils davos dis aunc cumprau si empau stiarls, ein en tut aura passai il cuolm avon ch'ils **Glarunès** ...

Nova Gasetta Romontscha nr. 39, 25 da settember 1863

### **Nevada ils 22 da settember**

Silla stupenta aura dalla jamna vargada eis ei suandau in ton pli macorta questa jamna. Mardis veva l'entira **Surselva** tratg en il vestgiu d'unviern, a **Glion** era ei tonta neiv sco a **Mustér** ed a **Tschamut** buca pli biara che a **Mustér**, mo ad **Ursera** negina neiv, persunter ha ei cuflau leu mesjamna suentermiezdi. En consequenza da quella neiv han tuttas alps stuiu vegnir descargadas ils 22 d.q.

Nova Gasetta Romontscha nr. 39, 25 da settember 1863

### **Ils Tuatschins bavarès promovon la marcanzia**

Ils Tuatschiners domiciliai en **Baviera** han puspei cumprau si circa 150 vaccas; e zuar il bia armauls da quella colur, stampa e vegliadetgna, che tilan pauc tiels auters marcadonts. Aschia ch'els ein in grond gudogn pella **Surselva**.

Nova Gasetta Romontscha nr. 43, 23 d'october 1863

### **Refusau la pasculaziun cumina**

Ferton che la vischnaunca da **Tujetsch** ha tochen sin duas vuschs unanimamein refusau il pugn da recapitulaziun pervia da dismetter la pasculaziun cumina, ha **Sursaissa** tudestga acceptau quel, aber mo encunter ina ferma minoritad.

Nova Gasetta Romontscha nr. 45, 8 da november 1863

### **Engulau ni piars?**

Damaneivel da **Ligiaun** anfla in marcadont da **Tujetsch** buca pli sia tschenta culs marenghins da marcanzia ed el tschapitschava buca mal per sia tschenta. Per cletg era in auter Tuatschin ius en secret beingleiti suenter el ed anflau leu ses daners.

Nova Gasetta Romontscha nr. 46, 14 da november 1863

### **Processiun a Mustér**

Da s. Martin han ils da **Tujetsch** cun crusch e cafanun benediu en la nova via en optima fuorma. Cun quei ch'els han giu da visitar neginas capluttas o pella via, han els tier lur processiun duvrau in'uretta meins ch'antruras. Sco solit han tut quels, ch'ein stai ina ga ni l'otra officials da vischnaunca survegniu il gentar en claustra per engrazonza memoria, pils buns survetschs ch'ils da **Tujetsch** han giu prestau all'abbazia en in cumbat cun ses renitents subdits dalla **Val d'Ursera**.

Nova Gasetta Romontscha nr. 46, 14 da november 1863

### **Protesta encunter la paga dils scolasts**

Las vischnauncas da **Mustér**, **Sumvitg**, **Tujetsch** e **Medel**, e sco ins auda era pliras dil district **Glogn**, han concludiu da protestar encunter il conclus dil Cussegl Grond, che perscriva il salari pils scolasts. **Mustér** ha da quellas varts tarmess al Cussegl d'educaziun ina protesta.

Nova Gasetta Romontscha nr. 48, 27 da november 1863

### **Armauls e pors sull'Alpsu**

Sull'**Alpsu** eis ei iu ils davos 15 dis 4 trops ord la **Cadi**, ils dus lunsch ora ils pli bials eran da **Breil**. - Era ils pors entscheivan ussa a trer sull'**Alpsu**, mo donn ch'igl unviern ei finalmein da s. Leci tenor vegl proverbi semess en sessel e serrau giu ils cuolms.

Nova Gasetta Romontscha nr. 49, 5 da december 1863



### **Bials prezis**

Il marcau da s. Andriu a **Glion** ei stau bia glied, mo buca ton bia tiers. Il caponegozi ei staus quel dils stiarls; Talians e marcadonts da **Tujetsch** e **Medel** han cumprau si biars e zuar per pli bials prezis che quei ch'ei vegniu vendiu a **Ligiaun**. ...

Nova Gasetta Romontscha nr. 50, 12 da december 1863

### **Posta tochen Sedrun**

Calonda mars va la posta sursilvana buca pli mo tochen **Mustér**, mobein direct a **Sedrun**, ed in auter onn sull' **Alpsu**. Sco ins auda ha ei dau in ferm cumbat, schebein la posta duei ir mo a **Sedrun** ni tochen **Rueras**, mo finalmein ha la capitala purtau la victoria.

Nova Gasetta Romontscha nr. 6, 5 da fevrer 1864

### **Statistica dils tiers en Tujetsch**

armauls	1131
vaccas/genetschas	477
stiarlas/mugias	240
stiarls	188
cavals	25
cauras	1413
nuorsas	1103
pors	307
Total	<b>4884</b>

Nova Gasetta Romontscha nr.11, 11 da mars 1864

### **In ferm favugn**

Il favugn ha quels dis scadenau ora la neiv taluisa, ch'igl ei ussa en **Surselva** terren tochen **Mustér** e ch'ins savess, sch'ei fuss buca da temer pli neiv e ferdaglia, schon ussa sillas spundas da **Selva** e **Tschamut** entscheiver cullas lavurs pella via sull' **Alpsu**.

Nova Gasetta Romontscha nr.11, 11 da mars 1864

### **Vaccas per la Baviera**

Il negozi da biestga ei ualti vivs en **Surselva**. Questa jamna ei in Tudestg, che ha varga 100 vaccas ad **Ebersberg** en **Baviera**, staus tochen **Tujetsch** per grondas e vaccas giuvnas che han aunc da far vadi, en tut ha el cumprau si 30 per bials prezis.

Nova Gasetta Romontscha nr.17, 22 d'avrel 1864

### **(12) Dus postigliuns, in conductur dall'emprema classa, cun ina representaziun dil biro postal e dil telegraf arrivan per l'emprema gada en Tujetsch.**

**La vischnaunca pren si cavals. - Vendiu ina mugia tumpriva sin d'atun per 277 francs. - La zoppina duei buca impedir il transport da carn frestga. - Il pauper telegraf seigi la cuolpa, ch'il tun detti ussa era giu ellas vals. -**

### **Ei vegn luvrau cun tutta forza**

Vid la via nova sull' **Alpsu** vegn ei presentamein luvrau cun tutta forza; sil territori grischun ein circa 400 luvrers ed ei vegn aunc adina novas roschas umens ord l'**Italia**. - La posta sursilvana ei uonn vegnida honorada cun ina nova, gronda biala crotscha, mo sche quella entaupa denter **Tavanasa** e **Zignau** ina menadira da cavals a per, sche resca ella da buca puder speras ora. Igl ei in conclus dil Cussegl Grond, che quellas

tendas vias da communicaziun, fatgas all'entschatta pli graschlas, dueien vegnir slargadas, schi gleiti sco il basegns semuossa.  
Nova Gasetta Romontscha nr.21, 20 da matg 1864

### **Alp da cavals**

La vischnaunca da **Tujetsch** pren si ad jarva 9 cavals à 17 francs in; in cavagl cun pulein paga aber cun quel 20 frs. Ultra da quei vegn ei aunc da bonificar il pastur. Per quei, sco per ulteriur sclariment, san ins s'adressar tier signur genau Sep Antoni Mucli a **Sedrun**.

Nova Gasetta Romontscha nr.23, 3 da zercladur 1864

### **Vaccas e mugias han pagau buns prezis**

Sillas fieras sursilvanas dil zercladur, tenidas a **Trun, Glion, Ursera e Tujetsch** ei generalmein buca stau biara e biala biestga, tuttina han las vaccas e mugias pagau andants prezis; sco raritad pella **Cadi** relatein nus, ch'ei seigi la fiera da **Tujetsch** vegniu vendiu ina mugia tumpriva sin d'atun per 277 francs e miez. Las cauras han pagau per miezvia, mo il mender ei iu ad **Ursera** cullas nuorsas dalla **Cadi**, ton pli che plirs marcadonts vevan cumprau si quellas caramein. Il meglier esit han ils cavals giu, che vegnan schai via la stad per tscheins egl **Uri**; igl ei vegniu pagau 8 – 13 marenghins per cavagl; mo ord la frequenza da viandonts, che semuossa schon ussa ad **Ursera**, pon ins concluder, ch'ils ustiers fetschien aunc cun quels lur bien gudogn.

Nova Gasetta Romontscha nr.25, 18 da zercladur 1864

### **Per l'emprema gada la crotscha atras Tujetsch**

Ils 27 da quest ei la crotscha gronda postala da 4 cavals, ornada cun matgs, ida per l'emprema gada a **Tujetsch** cun dus postigliuns, in conductur dall'emprema classa e cun ina representaziun dil biro postal, dil telegraf e dils hotels a **Mustér**. Remarcabel che la crotscha, respectiv ils cavals, levan buca passar l'enconuschenta storta, che meina ord il vitg **Mustér**, mo aunc pli remarcabel che quels herolds che han fatg da saver als Tuatschiners la vegnida d'in niev temps, ein damaneivel dalla classica ruina **de Putnengia** casualmein sentupai cun in tipus dil temps vegl – in vegl diplomat, che ha enamiez nies tschentaner, 1850, cun sias caultschas cuortas, priu cumiau dalla sala dil Cussegl Grond e viva ussa retratgamein en siu eremitasch. Quella sentupada dil temp niev e vegl vess dau caschun tier bein enqual seriusa reflexiun, mo ei era ina legra cumpignia, che ha els hotels da **Tujetsch** schau viver il temps niev ed il vegl e reconciliau las duas rivalas **Sedrun e Rueras**.

Nova Gasetta Romontscha nr.27, 1 da fenadur 1864

### **Buca iu bein**

La fiera leventine'sa da s. Pieder 29 da zercladur a **Quint**, che vegn era frequentada da **Medel e Tujetsch**, ei buc ida bein e zuar principalmein pellas tunas ch'ei seigi tras nuorsas pigurèras e vaccas talianas rut ora la malsogna ella **Val Blegno** ed ella **Leventina**. Ils aspects pil negozi da biestga ell'**Italia** munglassen semidar sin d'atun, tschelluisa pudessen las fieras buc ir ton bein.

Nova Gasetta Romontscha nr.27, 1 da fenadur 1864

### **Il pass vegn serraus**

La zoppina ei ussa era rutta ora denter la biestga d'**Ursera** sill'**Alpsu**, aschia che quei pass ei serraus per tiers che vulan vegnir digl **Uri**. Speranza ch'el vegni d'atun puspei aviarts, tschelluisa pudessen sin d'atun bia Sursilvans ir ad **Ursera** e mazzar lur engarschauns, ch'els han tenor il solit tarmess questa stad leu ell'alp. Sut tals aspects vegnan las patronas da quels s.h. tiers ad esser fetg engrazievlas alla

regenza, ch'ella ha ussa decretau, che la serrada pervia dalla zoppina duei buc impedir il transport da carn frestga. Speranza ch'ellas vegnan a mussar lur renconuschientscha cun far a nos treis caus cantunals in present da treis famus schambuns sursilvans, ch'ei buca mo beinvesi a **Cuera**, mobein perfin ell'**Italia**. Nova Gasetta Romontscha nr.29, 15 da fenadur 1864

### **Il viadi a pei vegn tier nossa declinada generaziun pli e pli ord moda.**

Schegie che la stagiun pils viandonts ella **Svizra** alpina ha schon daditg entschiet, sch'ei aunc ussa zun paucs jasters passai atras la **Surselva**. La posta arriva aunc adina il bia vita a **Mustér** e perfin ils conducturs, che han uonn entschiet a far lur tur tochen **Sedrun** enstagl mo a **Glion**, per dar cheutras empau pli gronda splendor alla ruta sursilvana, ein tutteninaga stulli. Ei para, ch'ils jasters veglien refierer da mirar giu la maiestusa **Surselva** entochen in auter onn, che l'**Alpsu** ei aviarta per crotschas. Il viadi a pei, che fuss schi avantagius pil spert e pil tgierp, vegn tier nossa declinada generaziun pli e pli ord moda. Dad in temps, nua ch'ins veseva aunc neginas crinolinas, vegnevan bia damas frestgamein sull'**Alpsu**, armadas cun in fest alpin, mo ussa ei quei ina gronda raritad.

Nova Gasetta Romontscha nr.30, 22 da fenadur 1864

### **Roscha da 45 camutschs**

Uonn pon ils catschadurs da camutschs spitgar ina biala catscha. Ella alp **Nalps** (**Tujetsch**) han ins viu ina roscha da 45 camutschs ed era dad auters mauns audan ins da bialas cumpignias; mo donn ch'ils Tessines pon dar a dies a quellas selvaschinas in meins avon che nos catschadurs.

Nova Gasetta Romontscha nr.33, 12 d'uost 1864

### **Gievgia, ils 11 d'uost 1864 neveva ei a Tujetsch tochen giu els vitgs**

La schitgira digl uost ha catschau vinavon ils èrs, mo anavos ein ils risdivs ch'eran serefatgs tras ils temporals dil fenadur. Remarcabla ei stada la midada dalla temperatura denter ils 9 e 10 d'uost. La steppadad da mardis vargau veva alzau il termometer a **Mustér** sin 23 grads, l'auter di era ei aber in suffel, che la gliעד schelavan e gievgia damaun neveva ei a **Tujetsch** e **Medel** ella bassa. Per entgins dis san aschia ils avdonts da **Surrein** esser senza tema pervia dil tun. Nus stuein mo mal, che bein enqualin vul aunc adina fierer sil pauper telegraf la cuolpa, ch'il tun detti ussa era giu ellas vals, enstagl mo sils cuolms e sch'in da quels ha detschartamein declarau, che pli da vegl seigi era stau fatg si in da quels telegrafs en **Surselva**, mo ins hagi muort il tun puspei stuiu dismetter el, sche stuein nus declarar, ch'el mondi empau en fanzegna.

Nova Gasetta Romontscha nr.33, 12 d'uost 1864

### **In cass dublamein tragic**

Denter ils luvrers lombards sill'**Alpsu** ei quels dis succediu in cass dublamein trest. Suententer haver buiu bravamein ensemen dumengia vargada a **Rueras**, ha in cert Mainetti, in um rabiau e temius da ses camerats, maltractau la notg sin gassa siu cusrin *Biaggio* Cantalupi taluisa, che quel ha piars la schientscha ed ei l'auter di morts. Tenor la secziun fatga veva el survegniu fridas mortals el tgau. Il tribunal dalla **Cadi** ha concludiu da surdar il delinquent alla dertgira cantunala e schau transportar el a **Cuera**. A mesavia ha el vuliu fugir dalla giusta humana, mo ha persuententer spert stuiu cumparer avon il suprem tribunal, la divina giusta. Arrivaus a **Glion** la sera dils 16 d.q. han ils schendarms serrau en el en ina combra si ault el Hotel Lucmagn e priu naven ad el la vestgadira, sinaquei ch'el sappi buca fugir. Mo il delinquent ha buca senuspiu da fugir sco sanscullottes, allas 11 dalla notg selai el ord finiastra, duvround ils batlinis per tretscha, mo in nuv da quels disnua, el dat giu,

scarpa il fildirom dil telegraf e rumpa en il tgau vid in baun crap spella casa. In vischin ha viu quei, fa canera, ils schendarms dattan neutier, cadeinan el miez morts, mo sias plagas eran mortals, aschia ch'el ei spartius la damaun. Il mazzau ed il sesturniu han in tschuppel petschens affons; la dunna da Mainetti ha aunc dacuort giu scret ad in enconuschent, ch'ei duessien pell'amur dar bein adatg sin siu um, sina quei che quel fetschi en sia gretta neginas disgrazias.  
Nova Gasetta Romontscha nr.34, 19 d'ust 1864

### **Piars la veta cun siglientar crappa**

Denter ils luvriers sill' **Alpsu** ei ils 19 d.q. daventau ina nova sventira; in Tiroles *Caspar Alexandri* ha piars la veta cun siglientar crappa. Nunvulend il "schutz" ir suenter haver mess fiug silla puorla, va el vi sul crap en cun in schuaun envidau, mo enaquella peglia la puorla spert fiug e siglienta um e crap en in'altezia d'ina casa. Il disgraziu era schizun plagaus, ch'el ei morts schi gleiti sco el ei staus purtaus en casa a **Tschamut**. Perfin siu cunti en sac era ius tut en tocs. Nova Gasetta Romontscha nr.35, 26 d'ust 1864

### **Examinaziun dalla lingia viafierila sul Lucmagn**

La cumissiun taliana pella viafier ei ils 26 d'ust arrivada a **Mustér** suenter haver fatg quei di in'excursiun ella **Val Sunvitg**, per mirar empau il terren dalla lingia sulla **Greina**. Ils 27 eis ella serendida sil **Lucmagn** tochen **S.Gion** ed ils 28 a **Tujetsch** per considerar con bein ch'ins sappi sviluppar da leu en la lingia dil **Lucmagn**. ...  
Nova Gasetta Romontscha nr.36, 2 da settember 1864

### **Victoria**

**Mustér**, ils 7 da settember, allas 3 suentermiezdi. Victoria! Ual quest mument arriva cheu l'emprema crotscha dad **Ursera**. Era en via sull' **Alpsu** ein oz ils signurs inschigniers Cuonz e Depuoz i per l'empremaga cun crotscha.  
Nova Gasetta Romontscha nr. 36, 2 da settember 1864

### **(13) Da fieras e la via**

Ils davos quater meus digl onn 1864 rapporta la Gasetta Romontscha ord vesta dalla **Val Tujetsch** mo davart las fieras e la via nova atras la val. Las fieras fuvan decisivas per l'economia dalla val e la via ha aunc da secumprovar pils Tuatschins.

### **Ils marcadonts stattan agrad eri**

Ferton ch'ils marcadonts da biestga mavan auters onns da quei temps sin tuts mauns a cumprond si tiers, stattan els uonn aunc ussa grad eri. Las schliatas tunas ord l'**Italia**, la zoppina el **Tessin**, la seida fallida, il pauc pavel ell'aulta **Italia** dattan pign anim da cumprar si stiarlamenta. Nus stuein denton remarcar, ch'il pavel seigi mo fallius ellas muntognas e buc ella bassa sco Talians han segirau a nus; la reha raccolta da graun ella **Italia** furnescha daners ed empau tiers drova l'**Italia** en scadin cass. Esser precauts ei endreg, mo buca memia temeletgs. Capito, "voi Croaron, che cacciate via la roba col baston?" (sco ils Talians dian dils marcadonts romontschs). Ils puleins paran denton da pagar bein. A **Tujetsch** eis ei vegniu Tudestgs, che han cumprau si ina roscha puleins da questa primavera per 8 e 9 marenghins in. Sco ins legia ellas gasettas, ein ils cavals era stai fetg tschercai sillas fieras bernesas. Per cavals giuvens d'in onn e miez seigi ei vegniu pagau 400 – 600 frs. il tgau.  
Nova Gasetta Romontscha nr.38, 16 da settember 1864

### **Il Cussegl Grond lubescha in fiera en Tujetsch**

Sco schon enconuschent ha il Cussegl Grond da quest onn, sin giavisch dalla

vischnaunca da **Tujetsch**, concediu a quella ina fiera sin ils 12 d'october, ch'ei a nies manegiar fetg nizeivel, principalmein pella **Cadi**, aber ina remarca fuss forsa adequata da metter el public ariguard quella fiera, per leutras sentir ils meinis dad auters bein manegionts burgheis. ... Ord las sura allegadas raschuns fagessen nus bugen la sequenta remarca sur dalla fiera da **Tujetsch** digl october. Fuss ei buca meglier per il general traffic da biestga da metter quella fiera sin ils 27 ni 28 d'october, aschia amiez temps denter quella da **Trun** e quella da s.Martin a **Mustér**. Ils tiers che fussen cumprai sin las fieras avon fussen mess giu damaun dils marcadonts e lura savessen ei aunc cumprar e dismetter ina gada avon quella da s.Martin. Quei ei nossa idea, nus havein vuliu metter quei el public ed havein speranza che persunas che capeschien quei pli bein, vegnien a schar udir lur meinis sur da quei impurtont fatg.

In pur ella **Cadi**

Nova Gasetta Romontscha nr.39, 23 da settember 1864

### **Nova crotscha cun tschun cavals**

En tutta aura ha la posta fatg dumengia vargada siu tur ad **Ursera** culla nova crotscha per quella rutta e cun 5 cavals, ella ei arrivada leu las 10 dallas sera e la damaun denter las 7 e las 8 eis ella en tutta neiv puspei vegnida a **Mustér**. En 4 uras selai ei tgunschamein far la crotschada da **Mustér** ad **Ursera**, aschia che la posta sa en in di ir cumadeivlamein da **Cuera** ad **Ursera**.

Nova Gasetta Romontscha nr.39, 23 da settember 1864

### **Collaudaziun dil tschancun via denter Mustér e Sontga Brida**

Ils 12 e 13 d.q. ha la collaudaziun federala dalla via sull'**Alpsu** naven da **Mustér** tochen **S.Brida** giu liug tras signur inspectur federal Cuonz ed il signur cusseglier guvernativ Wassali e capoinschignier Salis. El medem temps ha il cantun era collaudau la davosa secziun, la tenda naven da **S. Brida** tochen sils cunfins cantunals spel lag, la quala signur Plattner ha giu surpriu da baghegiar. Mo donn ch'igl ei ariguard la construcziun-su (Oberbau) buca vegniu observau la medema conformitad denter il **Grischun** ed **Uri**, cheutras vegn la pareta dalla via sigl intschess **Grischun** pregiudicada. Il **Grischun** ha baghegiu fetg solid, mo en consideraziun dils gronds cuosts ha el buca vuliu far ella pli luxuriosamein, che quei che la Confederaziun veva perscret. **Uri** encuntercomi ha viu en, ch'el seigi vegnius bein a part culla partiziun dil subsidi federal per l'**Alpsu** e sin siu territori era la construcziun ultra da quei buca schi custeivla, cun quei ch'ei era da far neginas punts etc., perquei ha il guvern uranès schau a siu inschignier Diethelm cumpleina libertad e quel ha lu vuliu far semussar ils Uranès renconuscheivels visavi la Confederaziun, cun construir la via pli lada e luxuriosa, che quei che quella veva perscret. **Uri** ha dils 350 000 frs. destinai dalla Ligia pell'**Alpsu** survegniu 150 000 e cun metter vitier mo aunc 30 000 cuviera el tut sias expensas, priu ora l'expropriaziun. Aschia vess il **Grischun** buca riscau bia d'era sorprendender la construcziun sigl intschess uranès sut las offertas fatgas a siu temps. La muntogna dall'**Alpsu** ha tras la via nova survegniu ina tut pli emperneivla vesta, ella ha piars empau da siu character selvadi e la nov'aveina da traffic denter la giganta pezza dil **Badus** e **Crispalt** vegn en paucs onns a purtar ad ella gronda vivacitad cunzun inaga che la via sulla **Furca** ei finida. Schegie scaffidas e battegiada sco straduns militars, lein tuttina sperar che quellas novas vias laschien buca schi spert encorscher lur character guerril, mobein surveschan per promover il traffic, la beinstonza, la concordia ed uniun denter avdonts dalla **Svizra Centralalpina**.

Nova Gasetta Romontscha nr.42, 14 d'october 1864

### **Ina genetscha tuatschina ha pagau 17 marenghins**

Nos marcadonts, returnai dalla fiera da **Ligiaun**, dattan aunc mendras novas da quella ch'ils Glarunès e zuar per raschun, ch'ils sez vevan bia vaccas, las qualas han pagau bein. Sco raritad remarchein nus, ch'ina genetscha tuatschina hagi pagau 17 marenghins, probabel la pli cara vacca ch'ils Tuatschins han vendiu enzacu. Ils stiarls e mutgs encuntercomi han tratg mal, 12 pulits stiarls ein vegni sgavignai per 6 marenghins il per! In auter marcadont ha dau via 5 mutgs ed in stierl per 23 marenghins, in tierz ha schau ir dus mutgs per 9 marenghins! Aschia eis ei buca da sesmarvegliar, che nos marcadonts vulan pagar pauc pils stiarls restai cheu anavos, e che bia purs tscherchan da vender vaccas ed envernar ils stiarls. A **Ligiaun** eis ei aunc restau anavos da quei da melli tgaus, ch'ei vargai ni restan sin l'otra fiera, en tut possi ei esser stau 4 – 5000 armauls. Ils cavals han buca pagau sco ei vegneva detg, perquei eis ei vegniu turnentau puleins. Il pastg era caraschia e tras quei las expensas pli grondas che ordinari. Cun tut ir mal vess ei aunc saviu ir mender, sch'ei vess muncau la bialaura. Conclusivamein aunc ina remarca. Sch'igl ei ver, quei ch'in marcadont ha a nus segirau, numnadamein ch'ils mutgs da **Medel** hagian uonn valiu silmeins miez marenghin dapli ch'ils da **Tujetsch** e zuar per raschun, ch'ils emprems hagian giu sust las ruhas dil settember, ferton che quels da **Tujetsch** hagian stuiu star ordaviert, sche duess quella circumstanza esser ina buna stimulaziun per ranschar suschnas ellas alps.

Nova Gasetta Romontscha nr.42, 14 d'october 1864

### **La fiera da Tujetsch ha muentau pauc**

La nova fiera da **Tujetsch** ha giu da muentar pauc, ei era empau biestga mo bunamein negins marcadonts cun quei ch'ils Uranès e biars da **Tujetsch** eran schon sin viadi ad **Altorf**. Duei la fiera da **Camischolas** prosperar, sche sto ella vegnir fixada sin gliendisdis avon la fiera d'**Altorf**, che croda silla gievgia avon s.Gagl. Ins ei spanegiaus co ei vegn ad ir silla frequentada fiera ad **Altorf**, nua ch'igl ei vegniu catschau grond muagl, cunzun ord il **Tessin**. Ins tema che quella surcatschada pudessi efectuar ina sbassada dils bials prezis dallas vaccas.

Nova Gasetta Romontscha nr.42, 14 d'october 1864

### **La direziun postala ha scret ora en libra concorrenza,**

tgi che vegli menar dil zercladur 1865 naven la posta sursilvana sillas staziuns **Cuera-Rehanau, Rehanau-Flem, Flem-Glion, Glion-Trun, Trun-Mustér** e pils treis meins da stad fenadur, uost e settember la posta dall'**Alpsu** sillas satziuns **Mustér-Tschamut** e **Tschamut-Ursera**. Las cundiziuns san ils aspirants mirar suenter sils biros postals a **Cuera, Glion** e **Mustér** e ston dar en sils 15 da december. Tgei uras che la posta dall'**Alpsu** vegn a partir a **Cuera** ed **Ursera**, nua ch'ella vegn a prender il gentar – sil qual ils ustiers dalla **Surselva** ein spanegiai – quei ei aunc nuota fixau, bein aber, che la posta sursilvana duei quels meins, ch'ella va buca sull'**Alpsu**, ir naven da **Cuera** per las 7 enstagl sco sut il present uorden schon las 6 dalla damaun.

Nova Gasetta Romontscha nr.48, 25 da november 1864

### **En 12 uras e 30 minutas da Cuera ad Andermatt**

Per completar e per part era rectificar nossa davosa notizia ariguard la futura posta sull'**Alpsu**, savein nus ussa notificar, che quella parti da **Cuera** allas 7 dalla damaun, arrivi a **Glion** allas 11 e 5, laschi leu 25 minutas temps da gentar, mondi las 11 e 32 a **Trun**, arrivi leu l'ina e 30, a **Mustér** las 15, a **Tschamut** las 17 e 25 ed ad **Ursera** las 19 e 30. Allas 5 dalla damaun banduna ella **Ursera**, vegn a **Tschamut** las 7 e 30, a **Mustér** la 9 e 10, a **Trun** las 10 e 20 ed a **Glion** las 12 e 10, leu stat ella 25 minutas e vegn a **Cuera** las 16 e 35.

Nova Gasetta Romontscha nr.49, 2 da december 1864

### **Seiv viva suenter la via**

La vischnaunca da **Tujetsch** ei intenziunada da schar plantar en seiv viva suenter la via nova, leu nua ch'ina classena ei necessaria per schurmetg dil funs. Tgi che ha tschaffen da sorprender quella lavur, duei tochen ils 20 da december, onn current, dar en alla suttascretta, con ch'el pretendi pella tschuncheisma da quella seiv, la quala el sto garantir. Ulteriur sclariment dat la suprastonza da **Tujetsch**  
Nova Gasetta Romontscha nr.49, 2 da december 1864

### **Ils Uranès a Glion**

... Alla via nova sull'**Alpsu** han ins d'engraziar, ch'era entgins Uranès ein vegni a **Glion** e cumprau si enzatgei vaccas. ...  
Nova Gasetta Romontscha nr.51, 17 da december 1864

### **In stierl brin**

cun ina corda enta culiez, ell'ureglia dretga davon en in vinchelmess, ina ruosna ed in snez davos en ei il davos marcau da **Glion** suentermiezdi ius a piarder. Tgi che sa dar novas da quel ei grondamein supplicaus da schar saver Gion Antoni Curschellas a **Tujetsch (Bugnei)**.  
Nova Gasetta Romontscha nr.51, 17 da december 1864

### **(14) Novitads d'avon 155 onns**

**Vaccas da pauca vaglia - Ils aviuls han gia schamnau e stuschau il matg - Il matg sul Pass Alpsu - Buns marcadonts bavarès - Ina vacca tuatschina per 13 marenghins - Diesch dis neiv il matg - Ina Tuatschina a Minca - Consolaziun entras la Confederaziun**

### **Mintgadi las nuvialas digl entir mund**

Il menar la posta denter **Mustér** e **Rueras** cun ina schesa ni schletra da dus plazs mintgadi, priu ora ils treis meins da stad che la posta va sull'**Alpsu**, ei scret ora en libra concorrenza. Las cundiziuns san ins leger suenter el document deponius el biro postal a **Mustér**, nua ch'ins sa era retrer ils formulars per dar en da menar quella posta, il qual sto daventar entochen ils 4 da fevrer. Gl'accord entscheiva cun calonda mars. Essend che **Tschamut** vegn ussa honoraus cun in depot da posta, sche san ils vischins aspirar sin quella piazza. Per tener leu la posta ed ir treis dis ad jamna a **Rueras** pils effects da posta – quei temps che la posta va buca sull'**Alpsu** – survegnan ei 100 frs. ad onn. Tochen ils 4 da fevrer ston era quels aspirants s'adressar tiel signur postdirector a **Cuera**. Curascha pia vus speculants giudapeis al **Culmatsch** e **Badus**. Vus aber, avdonts dalla venerabla **Putnengia**, che essas stai aschi disgraziai ariguard la via nova e la piazza fiera, seconsolei e fagei fiasta, a vus ei finalmein daventau salit! Vus survegnis ussa mintgadi las nuvialas digl entir mund e veis era oreifra caschun da mintgadi ir en crotscha ni en schletra.  
Nova Gasetta Romontscha nr.4, 27 da schaner 1965

### **Surdada dalla posta sursilvana**

Silla libra concorrenza scretta ora per menar la posta sursilvana e la stad quella dall'**Alpsu** eis ei stau plirs che han dau en e suenter ch'igl ei als aspirants danovamein stau vegniu insinuau dad ir pli bass cun lur pretensiuns, ei la menadira tenor usit vegnida surschada a quels, che han fatg il bienmarcau: da **Cuera** a **Glion** a signur **Kündig** da **Turitg**, che ha avon entgins onns era giu surpriu da menar la posta engiadinesa, da **Glion** tochen **Tschamut** als signurs frars Berther a **Mustér** e sull'**Alpsu** als signurs Meier ad **Ursera** (pli tard surdau a signur dr. Christen d'**Ursera**).

Nova Gasetta Romontscha nr.5, 2 da fevrer 1965

### **A Selva**

el liug classic dallas lavinas, nua che pliras cruschs fan endamen las disgrazias succedidas e la cadicitad dalla veta humana – ei sonda vargada in ferm e curaschus giuven, Florin Venzin, vegnius ella lavina, 4 da fevrer 1865. Malgrad la ruha aura ha el viliu esser ius alla catscha si pellas spundas vi da tschei maun dil **Rein**.

Nunvegnend el la sera a casa, han sia gliedud entschiet a temer e fatg sedar ora per el. Cheu vegn ei lu raquintau, ch'ins hagi entuorn las 4 udiu a vegnend in squatsch lavina vi da tschei maun, duront che la nebula eri en. Spert van lu leu encunter umens cun petgs e palas, vesan la lavina, anflan gl'emprem la buis e lu era il disgraziu, in bratsch sut la neiv en. El era morts ed ord tut quei, ch'ins ha fatg stem dad el, pon ins cumprender, che la lavina seigi rutta ora sur ses peis sin ina teissa spunda. Dieus hagi fatg grazia cun sia olma!

Nova Gasetta Romontscha nr.6, 10 da fevrer 1965

### **In s.h. bov entir**

da bi peil e beinfatgs ei venals a **Tujetsch**. Tier tgi san ins endriescher ella stamparia dalla Nova Gasetta Romontscha.

Nova Gasetta Romontscha nr.6, 10 da fevrer 1965

### **Ina Tuatschina a Minca**

... Ina Tuatschina ch'ei vegnida tarmessa sco pintga buoba tiels Schuobs ed ei leu plaunsiu sedomiciliada a **Minca**, ha nus leu plirasga remarcau: "Ella sappi nunpusseivel capir, co geniturs possien tarmetter lur pigns affons en ina tiara jastra, senza mirar pli lunsch co ei vegnien cavegliai giu damaun; ella hagi zuar giu la ventira da vegnir tier bien patrun, mo ella seigi biaga stada mal, vesend co auters affons seigien vegni tarschinai." ...

Nova Gasetta Romontscha nr.7, 17 da fevrer 1965

### **Diesch dis neiv il matg**

Tochen oz, ils 10 da matg, ha ei en quest meins aunc finadin di neviu pauc ni bia, ed aschia eis ei buca da sesmarvegliar, sche las gasettas raquentan da grondas nevadas e cuflaus da tscheu e leu. **Tujetsch** ha da 15 dis enneu era giu neiv, cuflas e lavinas en abundanza; mo per ventira eis ei succediu neginas disgrazias. Ils Tuatschins sesanflan denton temps da grondas neivs en ina fatala situaziun cun lur via nova, essend che negin vul cheu seschar neu da tener aviert ella. Las vischnuncas da **Mustér** e **Tujetsch** han pervia dil manteniment surpriu neginas autras obligaziuns che da menar la galera, mo era il cantun vul saver pauc da better ora la neiv ed ha leusunter dau sias instrucziuns al viè cantunal a **Tujetsch**. La posta federala ei obligada da far mintgadi siu tur denter **Rueras** e **Mustér**, mo co duei ella passar tras cuflaus da 12 peis altezia, sco igl ei stau quels dis ella **Val Bugnei**? **Tujetsch** less buca sepregiudicar cun porscher memia bia agid; **Mustér** tratga, sch'ils Tuatschins vulan buca vegnir ora, sche san ei star leuen, ed il cantun para da prender si lev pils habitonts da quella tiara dall'empermischun, nau che mèl e latg flessegian en abundanza. Il respectiv protocol dil Cussegl Grond di zuar, che pervia dad arver la via denter **Mustér** e **Tujetsch** temps d'unviern, duei vegnir sentelgiu pli tard, mo sin tgei congress che quella questiuon duei vegnir decidida, san ins aunc nuot. Essend ch'ei setracta cheu per ina via militar, sche savessen ins ad interim liberar la recruta da **Tujetsch** e **Mustér** dil survetsch sil **Rossboden** sut la cundiziun, ch'ella tegni aviert temps d'unviern quella via e retili persunter la schulda dalla Confederaziun.

Nova Gasetta Romontscha nr.10, 10 da mars 1965

### **Consolaziun entras la Confederaziun**



Silla communicada fatalitad pervia da better ora la via silla via dall'**Alpsu** denter **Mustér** e **Tujetsch**, consolescha ussa il Bund quellas duas vischnauncas cun segirar, che la medema questiu vegni era a nescher silla via dalla **Furca**, inaga che quella seigi finida.

Nova Gasetta Romontscha nr.11, 17 da mars 1965

### **Ina vacca tuatschina per 13 marenghins**

Ferton che la fiera da **Trun** dils 20 d.q. ha giu pauca e cara biestga (per ina vacca tuatschina eis ei vegniu pagau 13 marenghins) eis ei stau sil marcau da **Glion** dils 24 in grond biestgam ed ei vegniu vendiu per prezis buc aults. ... Stiarls era ei muntanera e bienmarcau, per 80 – 85 frs. in, eis ei vegniu cumprau si biars bials e grass stiarls; ils da **Tujetsch** e **Medel** vessen perquei bugen fatg si pli gronda roscha, mo ei maunca ad els il pavel. ...

Nova Gasetta Romontscha nr.12, 24 da mars 1965

### **Buns marcadonts bavarès**

Suenter las fieras da **Trun** e **Glion** ei in Bavarès staus tochen **Medel** e **Tujetsch** e cumprau si dabia vaccas per andants prezis. Ferton ch'ils auters marcadonts van il bia mo suenter vaccas giuvnas e bialas, laian ils Bavarès stgisar vaccas veglias e macortas, sche mo ellas ein pleinas vadi e bunas da latg e da peil alv. Aschia pon ins cumprender, che quels marcadonts ein adina fetg beinvegni ella **Surselva**, cunzun uonn ella presenta scartezia da fein. Quellas vaccas van en ina gronda campagna ad **Ebersberg**, nua ch'ei sesanfla circa 200 vaccas – las biaras da razza grischuna – e 12 Sursilvans che miran tier quellas. Quels han lu pli bi far, che nos paupers perveseders, fein e risdiv, sec e verd, malz e frina, rebas e rabas, maunglan ei buca spargnar, els catschan si taluisa las pompeluseras, che nos purs enconuschessen nuota pli lur vaccas, ch'els han vendiu, mo ei dattan era latg persuenter – tochen 16 mesiras a di. Tgei legreibla midada per bia da quellas vaccas veglias, ch'ei quel dis instradadas ad **Ebersberg**; ord nuegls da tgerlentaders vegnan ellas ella tiara dalla cucagna. Possi far bein! Ch'ils Bavarés tscherchan principalmein vaccas che han aunc da far vadi, deriva da cheu, ch'ils vadials giuvens pagan leugiu schi bein; per bialas vadias alvas da 15 dis pagan ils purs bugen 50 frs. ed aunc dapli. Il latg cumpra in Tuatschin giu, e venda lu ora il pieun e caschiel.

Nova Gasetta Romontscha nr.13, 31 da mars 1965

### **Via profiteivla**

... Ils Uranès ein i sulla **Alpsu** cun dabia tiers e muossan cheutras, che quella nova via seigi buca mo profiteivla pella **Cadi**, sonder pil negozi da biestga dall'entira **Surselva**. ...

Nova Gasetta Romontscha nr.19, 12 da matg 1965

### **Il matg sul Pass Alpsu**

Ils 25 da matg ei ina famiglia engiadinesa ida uonn cull'emprema crotscha sull'**Alpsu**, schegie ch'igl ei stau vegniu bess ora negina neiv. Plira signaria passada tras **Ursera**, mo meins curaschusa che l'indicada engiadinesa, vess fatg la medema ruta, sch'ei vessen buca giu tema dalla neiv.

Nova Gasetta Romontscha nr.22, 2 da zercladur 1965

### **Ils aviuls han gia schamnau e stuschau il matg**

Il matg ei stulius, mo ha schau anavos stupenta pareta els aults, duront che sias plievigias han ella **Bassa** buc pudiu restabilir diltut quei ch'ils funs han giu pituu dalla schitgira avrela. Schegie ch'igl ei stau il matg ualti frestg, sch'ei la calira tonaton muntada il davos temps sin 24 grads Reaumur a **Mustér**. Remarcabel, gie darar

s'udiu eis ei ch'ils aviuls han a **Selva**, en ina altezia da 1538 meters, schamnau e stuschau schon il matg.

Nova Gasetta Romontscha nr.22, 2 da zercladur 1965

### **Vaccas da pauca vaglia**

La fiera da **Sedrun** ei uonn buca stada frequentada sco auters onns. Las vaccas cumparidas eran da pauca vaglia ed han perquei era pagau leusunter. Tiella cumpra da stiarls han ils Tudestgs fatg concorrenza als Romontschs e perquei han quels pagau biebein. Tgauram han ils Uranès cumprau si dabia per andants prezis, il mender han las nuorsas pagau. – Cun quella caschun notifichein nus al ludeivel publicum, ch'il pacific vischinadi da **Camischolas** hagi cediù sia fiera digl october al vitg **Rueras** – ton per respectiva correcziun dallas fieras dadas en el Calender Romontsch.

Nova Gasetta Romontscha nr.24, 15 da zercladur 1965

### **(15) A Sedrun ei il Run vegnius in per ga schi ferm, che las casas stremblavan**

**Plievgia lavaga ed ina tempiasta destruescha. – Buna fiera a Ligiaun. – Ina lavina retegnetg dis il Rein a S. Brida. – Tschamut survegn hotel e duana.**

### **Premis per las scolas**

Premis fixs per casas da scola ni alzament dil fondo ei vegniu partiu ora 5240 frs. ... denter auter a **Selva** 400, **Camischolas** 350 ...

Nova Gasetta Romontscha nr. 27, 7 da fenadur 1865

### **En 13 uras e 20 minutas da Cuera ad Andermatt**

La posta dall'**Alpsu** ha entschiet siu cuors da stad sonda vargada, mo aunc ussa era ella il bia ualti vita. Per correcziun dil plan da tur communicaus da nus quest unviern, relatein nus, ch'ella parti dad **Ursera** tenor midada fatga pli tard per las 7 dalla damaun, arrivi a **Tschamut** las 9 e 35, a **Mustér** las 11 e 15, a **Trun** las 12 e 35 e setegni si leu pil gentar tochen l'ina e 40 min ... a **Cuera** vegn ella las 19 e 30. Naven da **Cuera** va ella las 6 e 15 dalla damaun ... vegn a **Mustér** allas 15 e 15, a **Tschamut** las 17 e 35 ed ad **Ursera** las 19 e 35.

Nova Gasetta Romontscha nr.27, 7 da fenadur 1865

### **Lavagau il fein**

Sch'il proverb: "Sco ils dis tgaun van anen, aschia van els ano", duess sevirificar, sche cuoza quell'aura plievusa aunc ditg. Tschella jamna ha ella lavagau bia fein; en **Tujetsch** era ei da quels, che vevan tochen 50 ponns strèsa *fein sil prau*. Schi desiderada sco la plievgia era vivon, ual aschi beinvegnida fuss ussa la bialaura per tut ils fretgs.

Nova Gasetta Romontscha nr.31, 4 d'uost 1865

### **Tempiasta**

In temporal dalla notg dils 29 sils 30 dad uost ei stau in dils pli horribels, ch'ins seregorda a **Mustér**. Il cuntinuau camegiar e tunar, il suffel e la dracca ella snueivla stgiradetgna nocturna fageva veramein sgarschur. En plirs logs ha ei dau tempiasta, a **Tschamut** vesevan ins la damaun entirs mantuns ed a **Danis** e **Tavanasa** duei haver manizzau si bia feglia pumera e rabetscha truffels. ...

Nova Gasetta Romontscha nr.35, 1. da settember 1865

### **La fiera da Rueras**

Ei vegn cheutras fatg da saver ad in ludeivel publicum, che la fiera da **Rueras** vegni tenuta ils 9 d'october, quei ei gliendisdis proxim enstagl per ils 13 d.q.

**Tujetsch**, ils 3 d'october 1865

La suprastonza

Nova Gasetta Romontscha nr.40, 6 d'october 1865

### **Salter cantunal Berther**

Nies cantun ha quels dis piars in fideivel survient, il salter cantunal (Bundsweibel)

Anton Berther da **Tujetsch**, che ha da 1834 enneu surviu ella casa dalla regenza.

Purtond ina depescha el biro telegrafic survegn el la daguota, dat per tiara via e negins remiedis han saviu far revegnir el, - en in per dis er'el ina bara. El ruaussi en pasch!

Nova Gasetta Romontscha nr.44, 3 da november

### **Unviern**

A **Tujetsch** ha ei ier dau 3 quartas neiv ed a **Mustér** circa miez bratsch.

Nova Gasetta Romontscha nr.44, 3 da november 1965

### **1865**

#### **In exempel d'ina biala raccolta**

Il selvadi da **Tujetsch** ei adina staus renomaus per siu bi glin e schegie che quel ei uonn ellas biaras valladas buca gartegiaus, sche ha in pur tuatschin tuttina fatg dad ina curtauna streha semglin 18 curtaunas tgembladas. Sin in sulet glin ha el anflau 105 borlas, ditgel tschien e tschun, glins da 60 e 70 borlas fuv'ei plirs. Il medem econom ha era fatg bials truffels essend che plirs da quels pesavan 1 glivra *fun* in.

Nova Gasetta Romontscha nr.46, 17 da november

### **Annunzia**

La vischnaunca da **Tujetsch** ei intenziunada da schar via da guder l'aschinumnada alp da **Tschamut** per 1 onn ni per 6 onns entschavend 1866.

Per quella fin fa ella enconuschent a tuts amatars da quella alp, che quella vegni a **Sedrun**, ils 15 da mars 1866, dada via da guder a quel che porscha il pli grond tscheins. Quella alp porta 140 – 160 armauls gronds cun in grond diember da nuorsas vitier. Ei meretta da vegnir menziunau, ch'il stradun ad **Ursera** va sper l'alp ora, aschia ch'igl ei zun cumadeivel d'ir e vegnir.

Ulteriur sclariment san ins da tut temps promptamein obtener tras

la suprastonza da **Tujetsch**

**Sedrun**, ils 20 da december 1865

Nova Gasetta Romontscha nr. 51, 22 da december 1865

### **Annunzia e recumandaziun**

Il suttascret ligiacudischs fa cheutras da saver, ch'el seigi setabilius a **Mustér** ella stizun spella stamparia en casa dils signurs Frars Monn e serecamonda cheutras ad in ludeivel publicum per tuttas lavurs da siu mistregn, ch'el vegn a far spert, solid e per in raschuneivel prezi.

En sia stizun ha el era da vender differentes cudischs d'oraziuns, d'uffeci, da ductrina e calenders.

Emanuel Deragisch

Nova Gasetta Romontscha nr. 59, 29 da december 1965

### **Saltè cantunal**

Sco salte cantunal ei signur Anton Berther da **Tujetsch**, feagl dil vegl „Bundesweibel“ Berther, legius ora; igl ei stau varga 20 aspirants per quella plazza.

Nova Gasetta Romontscha, ils 12 da schaner 1866

### **Ina buna fiera**

Ei para che la fiera da **Ligiaun** da quest atun vargau seigi buca curdada ora aschi mal sco ins manegiava, essend ch'ils principals marcadonts da **Tujetsch** e **Medel** han secartiu da far legher tscheiver communabel e zuar alla moda veglia, cun hoppers senza polcas e schottischs.

Nova Gasetta Romontscha nr. 6, 9 da fevrer 1866

### **Lavina**

Malgrad la nevada dils 2 e 3 d'avrel ei ussa puspei terrenau aschi lunsch sco vivon; dad ina nevada luada ora aschi spert seregordan ins buca grad, perquei eis ei era tscheu e leu rut ora boas. Era en **Tujetsch** ei iu silla spunda meridiunala grondas lavinas la notg dils 2 sils 3 d'avrel, che han empleniu en la **Val da s. Brida** tscheu a **Selva** sin ina stermentusa moda ed otg dis reteniu il **Rein**. Fuss ei stau ina lavina da freid enstagl da cauld, sche fuss ei stau finiu cul vitg da **Selva** . . .

Nova Gasetta Romontscha nr. 15, 13 d'avrel 1866

### **Hotel a Tschamut**

Tschamut, quei ei tschema dil mund, entscheiva a secivilisar. Tiella staziun da posta vegn ei leu baghegiu si in hotel e quei vitget duei ussa aunc daventar la residenza d'in schendarm per trer en il dazi da consum sin bubrondas spirituosas che vegnan retratgas dil **Grischun** sur **Ursera**. Mo donn che quei niev emploiau cuosta al cantun dabia e vegn a trer en zun pauc.

Nova Gasetta Romontscha nr. 22, 31 da matg 1866

### **Duana a Tschamut**

Il Fegl official dils 6 da fenadur fa da saver, ch'en consequenza dalla nova via sull'**Alpsu**, seigi ussa ranschau en ina duana a **Tschamut** per trer en il dazi cantunal da consum sigl import da raubas spirituosas e surdau l'incassaziun da quel a stalter Gion Paul Riedi da leu.

### **Tempiasta**

Ils 19 da fenadur, il medem di ch'igl ei dau tempiasta e dau giu il tun egl **Uaul Cavorgia**, ein tenor il Tagblatt era ils habitonts da **Flem** tras in temporal stai en gronda tema. . .

Nova Gasetta Romontscha nr. 30, 27 da fenadur 1866

### **Las casas stremblavan**

Sco onn, aschia ha era uonn, la fin d'uost purtau gronda dracca, sulettamein ei quella vegnida ina notg avon. Las grondas auas dalla notg dils 28 sils 29 d'uost han tscheu e leu fatg considerabels donns. Da **Mustér** ha il **Rein** menau naven 3 – 400 tschuncheismas pledra dalla fabrica da glas a **Domat**. A **Sedrun** ei il **Drun** vegnius in per ga schi ferms, che las casas stremblavan. Nuotatonmeins ha leu la gronda e biala punt pitiu negin donn, bein aber las ustonzas sper la punt da **Camischolas**.

Nova Gasetta Romontscha nr. 35, 31 d'uost 1866

### **Caschiel grass da Tujetsch e Cristallina**

san ins retrer da J. J. Condrau a **Mustér**. Essend che la temperatura da questa stad ei stada favoreivla pellas cascharias, sche vegn ei garantiu pella buna qualidad.

Gasetta Romontscha nr. 36, 7 da settember 1866

### **Fein a pastg**

Schei ha uonn dau pauc fein grass, sche enqueran pliras vischnauncas che han bialas alps e pastiras da trer ton pli bia pavel ord ils cuolms. Aschia ha **Tujetsch** vendiu

uonn fein a pastg per 2000 frs. Mo giu dad in toc pastira ei en sorts ina vid l'otra vegniu segau 80 tschuncheismas fein!  
Gasetta Romontscha nr. 37, 14 da settember 1866

### **Avertura dils pass**

Sin repetida istanza dil ludeivel Cussegl Pign e Cussegl Federal ha il cantun **Tessin** aviert ils 30 d'october il pass aber denton mo quel dalla **Greina**, dil **Lucmagn** e dall'**Alpsu**, aschia che mo la **Surselva** ha cun el liber traffic, ferton ch'il **Bernardin**, respectiv la **Val Mesauc** ei aunc serrada. ... **Uri** vegn ussa era immediat ad arver l'**Alpsu**. Sco nus havein udiu ord buna fontauna, eran ins ad **Altorf** semtgai dad arver encunter la **Surselva**, schi gleiti sco **Tessin** dessi l'iniziativa.  
Gasetta Romontscha nr. 44, 1 da november 1866

### **(16) Tschienedendisch figliols ni figliolas**

Ins vess denton giavischau ch'ei fuss buca vegniu paterlau tut en fin romontsch, sunder era empau dialect tuatschin, silmeins en quella interessanta scena, nua che las femnas sescagnavan e sepitgavan.

### **Tochen ad Aarau e Zofingen**

... Sull'**Alpsu** ei vegniu catschau ina gronda massa vaccas a **Lucerna**, nua ch'ei era scret ora sin tuts mauns ina nova e gronda fiera sils 22 d.q. Schon avon eran marcadonts da **Tujetsch** stai cun da nossas vaccas tochen **Aarau** e **Zofingen**, nua ch'ellas han tratg biebein, per motiv ch'ei vegn cheuora tschercau vaccas da buca gronds prezis. ...  
Gasetta Romontscha nr. 47, 23 da november 1866

### **Cumpra da vaccas**

Marcadonts bavare's ein questa jamna stai pella **Surselva** si tochen **Tschamut** e cumprau si ina biala roscha vaccas per prezis mesauns. ...  
Gasetta Romontscha nr. 48, 30 da november 1866

### **Vendiu 240 vaccas!**

El commers da vaccas ei aunc adina gronda vivacitad en **Surselva**. In marcadont bavare's ha la jamna vargada cumprau si 50 vaccas ella **Cadi**. Schegie che quellas vessen giu pign esit sin auters mauns, devan ellas tuttina 160 frs. intragliauter. Mo la vischnaunca da **Tujetsch** duei haver vendiu ora quest atun circa 240 vaccas e tonaton eis ei aunc dapertut venal vaccas. La davosa fiera da **Ligiaun** ei ida mal, aschia era la fiera d'**Altorf** dils 29 da november. In marcadont da **Medel**, che ha frequentau quella, ha stuiu schar sill'**Alpsu** duas vaccas ella lavina, duas ha el pudiu liberar, mo stuiu schar ventscher ellas la notg sil cuolm. El sez e siu cumpogn da viadi ein dalla lavina vegni fiers vi el lag, mo ein mitschai culla tema e cun schar anavos ella neiv caput e capetscha.  
Gasetta Romontscha nr. 49, 7 da december 1866

### **Pintga concorrenza**

Sil davos marcau a **Glion** ei vegniu marcadau pir che mai. ... Ils marcadonts talians pagavan per stiarls ners e maghers sis marenghins e miez, aschia ch'ils da **Tujetsch** e **Medel**, ch'ein aschi gronds amatur da quei rom, han fatg ad els pintga concorrenza.  
Gasetta Romontscha nr. 50, 14 da december 1866

### **Morts ella vegliadetgna dad 87 onns**

Ils 16 da december ei igl aultreveriu signur canoni Jacob Franz Gieriet, beneficiat a

**Nossadunna** sper **Trun**, il senior digl entir clerus grischun, spartius da quest mund ella aulta vegliadetgna dad 87 onns. El ei naschius a **Tujetsch**, ils 4 da schaner 1780, vegnius benedius ora ils 14 da december 1806 ed ei aschia staus 60 onns spiritual. Gl'emprem ha el surviu 4 onns sco caplon a **Medel**, ei lura vegnius 1811 sco plevon a **Trun**, nua ch'el ha pastorau tochen 1858. Quei onn ha el dau si quella pleiv, nua ch'ei existeva pli neginas letgs buc enzinadas en dad el, ed ei seretratgs el tgeu pelegrinatsch si **Nossadunna**. Schon 1828 eis el vegnius numnaus canoni e vicari episcopal. Pli tard ha el era funcziunau sco inspectur da scola e dau ora in adattau cudisch d'oraziuns per promover la cultivaziun religiosa dils affons. El ha acquistau l'affecziun e carezia da tut ses parochians e la stema da tut ses enconuschents. El ruaussi en pasch!

Gasetta Romontscha nr. 51, 21 da december 1866

### **Tschienedendisch figliols ni figliolas**

Essend ch'igl ei ussa il temps, nua che padrins e madretschas ston muort ils biemauns passar la mostra cun lur figliols e figliolas e ch'in ni l'auter pudess forsa gleiti entscheiver a senuspir sur siu grond diember da cumpars e cumars, sche lein nus consolar els cun allegar, ch'il defunct signur canoni Gieriet vevi 111 figliols ni figliolas.

Gasetta Romontscha nr. 01, 4 da schaner 1867

### **Secunda posta sull'Alpsu**

A motiv che silla stad vegn era ranschau en in cuors postal dil **Valleis** si sulla **Furca**, sche ha il departement postal el senn da sin lu menar en in secund cuors sull'**Alpsu**, aschia, ch'ei passass la stad mintgadi tralla **Surselva** duas postas giuviars e duas siviars.

Gasetta Romontscha nr. 02, 11 da schaner

### **Mo nevadas**

Quest unviern para ei da dar neginas bischas, sunder mo nevadas. Silla nevada dil december, ch'era schon stulida per gronda part, ha ei ils emprems dis da questa jamna puspei dau ina sgarscheivla neiv, aschia ch'ins ha mesirau a **Mustér** el plaun ina altezia neiv da varga 5 peis. Naven dalla renomada nevada dil matg 1858 vulan ins buca seregurdar pli d'ina tala neiv. Igl ei bien ch'il proverb di: "Ina gronda nevada, ina numerusa casada ei gleiti scarsada." Denton ein ins en tema, ch'ei possi tscheu e leu haver dau disgrazias tras lavinas.

Gasetta Romontscha nr. 03, 18 da schaner 1867

### **Lavina**

A **Selva** ha la lavina priu dus mulins e treis clavaus cun dabia pavel.

Nova Gasetta Romontscha nr. 4, 25 da schaner 1867

### **Buns prezis per funs**

Ferton ch'ins auda per l'entira **Svizra** entuorn, ch'ils prezis dils funs seigien ussa memia aults per obtener ina buna rendita, ei quels dis vegniu vendiu en **Tujetsch** ina acla da varga 5000 tschuncheismas per 2.55 frs. la tschuncheisma! – buns funs mo aunc buca dils megliers, ch'ins anfla leu. Avon circa 50 onns han plirs cumprau si en quella medema vischnaunca massa praus grass per 2 – 3 bazs la tschuncheisma. Tgei midada!

Gasetta Romontscha nr. 5, 1 da fevrer 1867

### **Teater dils giuvens**

En preschientscha d'in numerus publicum han ils frestgs giuvens da **Tujetsch** dau ils



25 da fevrer ina legra ed instructiva producziun teatrala a **Sedrun**. „Il fabricant dall'aura“ *translatau da pader Baseli Berther*, ei in tema fetg pratic ed interessant pil pievel. Il versau translatur ha dasperas buca schau muncar da cungir la translaziun cun saladas remarcas per tuts stans e saluteivlas presas per umens e femnas. Ord las vehementas debattas dils umens e dallas femnas ha ei sufficientamein semussau, ch'il vegnir perina tgei aura schar far, seigi ual aschi difficil sco il fabricar l'aura. Ils acturs han per la gronda part giugau lur rolla en uorden, aschia che sez finas actrissas leu presentas, han dau ad els unanim laud. Ins vess denton giavischau ch'ei fuss buca vegniu perorau tut en fin romontsch, sunder era empau dialect tuatschin, silmeins en quella interessanta scena, nua che las femnas sescagnavan e seplitgavan. Ina honorifica menziun mereta era il bi cant producius dils medems giuven.

Gasetta Romontscha nr. 9, 1 da mars 1867

### **Avunda fein**

Il favugn dil fevrer ha ussa il mars stuiu ceder all'aurasut. Il freid retegn la vegnida dalla primavera ed ell'entira **Partsura** para la generala scartezia da fein da vegnir pli prigulusa che mai. Ina excepziun fa uonn la vischnaunca da **Tujetsch**, quella ha savens stuiu tarmetter entirs muvels giuviars, mo uonn ha ella fein per dabia muvels jasters – ina remarcablada dalla quala ils pli vegls san buca seregurdar. Siu cletg ei stau, ch'ella ha gl'onn vargau vendiu fein a pastg per 2000 frs., aschia ch'ils purs han mo ord las pastiras tratg ina fenada da 10'000 frs. valeta.

Gasetta Romontscha nr. 10, 8 da mars 1867

### **In bratsch neiv**

Ferton ch'ils da **Medel** vevan da miez avrel in bi scherm sin bia èrs, eran ils plauns da **Tujetsch** intragliauter aunc cuvretgs cun in bratsch neiv.

Gasetta Romontscha nr. 16, 19 d'avrel 1867

### **Scolast el cantun Glaruna**

Gl'avrel ei miert a **Galgenen**, cantun **Sviz**, il giuven scolast *Giachen Martin Muggli (1842-1867)* da **Tujetsch**, *maridau Catharina Rochs, ed in fegl*, nua ch'el veva dau treis onns scola cun bien success. Sco la gasetta da **Glaruna** scriva, era el leu generalmein stimaus e carezaus sco bien e fideivel instructor e bab da famiglia.

Gasetta Romontscha nr. 18, 3 da matg 1867

### **Emigraziun**

Silla caravana tuatschinèra da 18 persunas ch'ei il davos da mars s'embarcadas pell'**America**, ha ils 28 d'avrel ina tut pli gronda caravana d'emigrants bandunau **Cuera**.

Gasetta Romontscha nr. 18, 3 da matg 1867

### **Elecziuns dils derschaders**

Sco derschaders ord 14 proponi vegniu legiu ora: il president „cass“ Lucas Cavegn da **Tujetsch**, dr. Berther e president J. Condrau da **Mustér**, gerau Martin Pali da **Medel**, gerau Franz Decurtins da **Trun**. Sco suppleants: gerau G. M. Capaul da **Breil**, capitani Fr. Vincens e gerau Al. A. Huonder da **Mustér**, gerau Beeli da **Medel**, capitani *Sep Antoni* Mucli e gerau Gion Andriu Berther da **Tujetsch**.

Gasetta Romontscha nr. 20, 16 da matg 1867

### **Telegrafia**

... Era sull'**Alpsu** duei ei vegnir construiu ina lingia telegrafica cun biros a **Sedrun** e **Tschamut**. Per ils renomai marcadonts da biestga en **Tujetsch** e per quels che meinan la posta sull'**Alpsu** ei quell'interpresa d'impurtonza, ed ins spetga perquei

susteniment pecuniar da quels. Per scadin biro vegn ei pagau per 10 onns 1000 frs. ad onn.

Gasetta Romontscha nr. 20, 16 da matg 1867

### **Taxa alpina**

Tgi che va la stad culla posta da **Mustér** ad **Ursera**, da **Cuera** en **Engiadina** paga la taxa alpina dad 1 fr. per ura.

Gasetta Romontscha nr. 22, 30 da matg 1867

**(17) Nova ustria a Tschamut - Bufs che purtavan naven entirs frusts – El ei fruntaus sin in bastiment da pirats e vegnius sblundergiaus totalmein - Il davos matg schon anflau farbuns madirs a .. - Sch'il zercladur smarschenta la tastga dils pasturs ...**

### **Annunzia**

En l'alp **Tschamut** vegn ei priu si circa 20 – 30 armauls: vaccas, stiarls ni vadials. Tgi che ha tschaffen da metter en quella alp, sto s'adressar tier gerau Paul Schmet a

**Camischolas.**

Gasetta Romontscha nr. 23, 8 da zercladur 1867

### **Publicaziun**

Nossa vischnaunca ei intenziunada da schar via per in ni plirs onns il crap scalegl da **Calmuota Calmut**, sut raschuneivlas cundiziuns; aspirants ein supplicai da s'adressar tochen dumengia proxima, ils 30 da *zercladur* da miezdi, tier la suprastonza da **Tujetsch.**

**Sedrun**, ils 26 da zercladur 1867

Gasetta Romontscha nr. 26, 29 da zercladur 1867

### **Annunzia**

Il suttascrèt fa cheutras enconuschent ad in ludeivel publicum, ch'el hagi baghiau si **Tschamut** ina nova ustria „Zu den Rheinquellen“ e recamondi quella a tut quels, che passan leu atras empermettend in bien e dueivel tractament.

Lucas Cavegn a **Sedrun**

Gasetta Romontscha nr. 26, 29 da zercladur 1867

### **Aunc bia neiv en via**

La posta dall'**Alpsu** va mintga sera tochen **Tschamut**, mo sil cuolm ei aunc bia neiv en via e negin che fiera ora ella. Ils ustiers sursilvans e d'**Ursera** savessen suandar gl'exempel da lur collegas spel **Stelvio**, che han schau far quella lavur sin lur quen e cheutras survegniu schon baul gronda frequenza dad jasters.

Gasetta Romontscha nr. 27, 5 da fenadur 1867

### **Finalmein ei la neiv en via**

sill'**Alpsu** spelada ora e la posta ha ils 8 *da fenadur* entschiet siu tur d'**Ursera** a **Cuera.**

Ei ha duvrau liungas tractativas e la smanatscha da nos deputai a **Berna** da vegnir culla questiuon avon la radunonza federala per perschader il guvern uranès da far quei stradun alpin carregiabels. Spender in miez milliun per ina via e gnanc saver duvrar ella da mesa stad fuss stau enzatgei remarcabel. ...

Gasetta Romontscha nr. 28, 11 da fenadur 1867

### **Annunzia e recumandaziun**

Il suttascrèt fa cheutras da saver ad in ludeivel publicum ch'el hagi midau giu siu depot da vischala a **Mustér** e translocou quel en casa nova da signur gerau Sep

Antoni Maissen, nua ch'ins sa da tut temps cumprar da quella vischala per in dueivel



prezi. Engraziand pella confidanza mussada tochen uss serecamonda per numerusas empustaziuns

Deragisch, hafnermeister a **Tujetsch**

Gasetta Romontscha nr. 30, 26 da fenadur 1867

### **Bufs che purtavan naven entirs frusts**

Suenter ch'il sulegl ha gliendisdis (23 da settember) vargau rut atras il gries nebel e tut selegrava puspei dalla bialaura, ha ei schon la notg sissu viult cassacca, ed il mardis ha ei dau tals bufs d'aria ch'el ha purtau naven dad entirs frusts la stubla ed il glin stemnau entuorn il vitg **Sedrun**. Sch'ils da **Mustér** possedessen vegnas sin lur plauncas, fussen ei vegnidas lavagadas la notg dils 24 sils 25 da settember tras ina bischetta ch'ei seschluitada tochen giu sur il vitg da **Segnas**.

Gasetta Romontscha nr. 39, 27 da settember 1867

### **Disfortuna**

In pauper giuven da **Tujetsch**, Anselm Muggli (1827-1901), ei avon plirs onns emigraus ell' **America** per encurir sia fortuna. Suenter esser staus ditg e liung a **St. Paul** e fadiu giu ils daners pil viadi, eis el ius cun in auter camerat en **California**, e para leu duront entgins onns d'haver fatg bunas fatschentas. Siu camerat ei avon dus onns arrivaus ventireivlamein a casa; el che ha buca saviu vender sia possessiun suenter giavisch, ei perquei restaus anavos. Il settember vargau eis el s'embarcaus per vegnir a casa, ei aber sil viadi per mar ord **California** cumpatg fruntaus sin in bastiment da pirats e vegnius sblundergiaus totalmein; aschia ch'el ei ussa in pauper um, ed ha a **New York** stuiu serender el spital dils paupers. Tenor las smanatschas, las qualas tuts matros e passagiers dalla nav fagevan si per el, sco tons liuns e tighers, cun vuler mazzar, pender, fierer ell' aua el ect., eis ei aunc ina miracla, ch'el ei mo mitschus culla veta. – Quella sventira ei ton pli da deplorar, essend che duas soras dil sventirau *Onna Maria* (1838-1920) ed *Onna Maria Ursula Muggli* (1841-1913) – spitgavan el cun gronda legria, e tuts treis fargliuns fussen forsa per adina stai ord tuttas miserias. Aber il carstgaun propona e Dieus dispona.

Gasetta Romontscha nr. 3, 17 da schaner 1868

### **Teater cuntenteivel**

Las producziuns teatralas, da cant e musica tenidas quest meins a **Laax**, **Glion**, **Ladir**, **Rabius**, **Mustér** e **Sedrun** ein sco ins auda ualti dapertut curdadas ora per cuntentientscha digl auditori. Gasetta Romontscha nr. 9, 28 da fevrer 1868

### **Pli segir d'haver in „wechsel“**

Nus havein tscheidi fatg menziun d'in cert Anselm Mucli (1827-1901) da **Tujetsch**, ch'ei sin siu viadi marin da **California** a **New York** vegnius sblundergiaus e maltractaus. Havend el scret als ses, ch'ei seigi denter auter vegniu priu ad el in «wechsel» da 3200 frs. sin ina casa mercantila dalla **Svizra**, ei nossa regenza s'informada a **Basel** e **Genevra**, ed el davos liug ha ina casa rispundiu, ch'ella hagi da **S.Francisco** survegniu gl'avis, ch'ella duei sin in wechsel mess ora sin Anselm Mucli pagar al presentader da quel 3200 frs. La casa a **Genevra** ha aschia aunc a dretg temps saviu vegnir visada da buca pagar ora, entochen ch'ei arrivi buca in niev wechsel. Mucli survegn ses 3200 frs. anavos, ed ins vesa ord quei exempel, ch'igl ei sin in liung viadi pli segir d'haver in wechsel che daners.

Gasetta Romontscha nr. 12, 19 da mars 1868

### **Navontaquater onns**

... ina femna a **Tujetsch** *Maria Cristina Sievi* a **Selva**, naschida 25-03-1775 ed in um a **Tavau** ein vegni 94 onns. ...

Nova Gasetta Romontscha nr. 15, 10 d'avrel 1868

### **Bien e real vinars d'ansauna**

circa 40 mesiras san ins retrer tier Lezi Antoni Balzart a **Cavorgia (Tujetsch)** per 4 frs. la mesira. Cumpraders, che vulan prender tut ni mo in ton ston far da saver enteifer 15 dis.

Gasetta Romontscha nr. 17, 10 d'avrel 1868

### **Fotos en illustradas tudestgas**

Dacuort duei cumparer ina descripziun dalla **Surselva** en ina dallas empremas gasettas illustradas germanas, concepida da signur professor Theobald, cun fotografias da **Glion, Trun, Mustér e Sedrun**, pridas si da signur pictur Darms. Per giavinar neutier pli bia viandonts ella **Surselva**, ch'ei per biars aunc ina terra incognita, manegian plirs, ch'ins fetschi bia memia pintga canera cun publicaziuns e reclamas, perquei tucca ei da midar proverbi e dir: „Gronda bahaultscha e bia en caultscha“.

Gasetta Romontscha nr. 18, 1. da matg 1868

### **L'alp da Tschamut**

pren si la stad biestga schetga ord vischnaunca (per munconza da tiers en vischnaunca) e zuar per in fetg raschuneivel prezi. Ins sa da quellas varts s'adressar tier il cautegia, genau Sep Antoni Mucli a **Sedrun**.

Gasetta Romontscha nr. 18, 1. da matg/nr.19, 8 da matg 1868

### **Sch'il zercladur smarschenta la tastga dils pasturs ...**

Silla schitgira dil matg ha il zercladur schon purtau entgins buns e zun desiderai radis. Sch'il zercladur smarschenta la tastga giu dil dies als pasturs, sche pudess ei tenor in vegl proverbi aunc dar in bien onn per las cuntradas aultas. Sco remarcablada relatein nus ch'ins hagi il davos matg schon anflau farbuns madirs a **Medel** e ch'il medem di seigi en quest onn era passau gl'emprem carr sur gl'**Oberalp**.

Gasetta Romontscha nr. 23, 5 da zercladur 1868

### **Pauca biestga armentiva**

Silla fiera da **Tujetsch** era catschau pauca biestga armentiva; il pli encurriu eran stiarls e vadias, quels pagavan biebein. Era vaccas vessen ils Uranès tschercau, mo da vaglia eran paucas ed ils prezis tenu fetg ault. Ton mender steva ei cun las cauras, in temps avon pagavan quellas 24 – 30 frs. ina e silla fiera vegnevan las meglieras vendidas per 20 frs., las mendras da 15 frs. ensi; vanzau eis ei ina gronda quantitat. En tut eis ei vegniu vendiu pauc. Certs marcadonts sisum la **Surselva** vevan tras lur concorrenza catschau ensi ils prezis, principalmein dallas nuorsas, mo ils Uranès vevan buca tschaffen da magliar ora la buglia schi ensalada. Sch'ins cumpra rauba, sto ins era mirar ch'ei seigi pusseivel da puspei survegnir ton sco ins dat. Capito?!  
Romontscha nr. 23, 5 da zercladur 1868

### **Idillica excursiun**

Gliendisdis vargau han ils signurs professers e students dalla scola claustrala a **Mustér** sut favoreivla aura fatg ina idillica spassegiada atras la biala e pitoresca val da **Tujetsch**. A **Tschamut** ella nova ustria „Zur Rheinquelle“ ei vegniu surviu ad els per solver in bien caffè cun il renomau aromatic mèl tuatschin. A **Sedrun** el Hotel Cruna ha in gustus gentar cun in bien glas **Vulcliner** legrau ils cors giuvenils e dau faviala alla lieunga. Cuntinuadamein ei il beinpreparau gentar aunc vegnius cungiug emperneivlamein cun bialas melodias canzuns purtadas avon nunschenadamein e cun precisiun en tschun lungatgs. Honor als beinmeriteivels sgnurs professers, che sedattan tonta breigia da mischedar il dulutsch cun il nizeivel e preparar a lur scolars

schì bialas recreaziuns. Ei para senza dubi, che la scola claustrala hagi entras las novas forzas, acquistadas da monsignur avat igl atun vargau, fatg in ludeivel progress e mo da sesmarvegliar eis ei, ch'ìls geniturs en nossas vischnancas romontschas dalla **Cadi** tarmettan buca pli numerusamein lur fegls ella scola da **Mustér**, nua ch'els savessen cun pintgas annualas expensas duront dus tochen quater onns emprender particularmein il lungatg tudestg aschi bein sco en autras scolas ordnies cantun.

Gasetta Romontscha nr. 28, 10 da fenadur 1868

### **(18) Denton dependa tut dalla primavera**

La diversidad da novitads per la secunda mesadad digl onn 1868 e l'entschatta 1869 ei bunamein cumparegliabla cun oz, denton buca el diember. Aschia brischa in mises, ils Engiadines fan renfatschas pertuccont il secuntener viers la via en Surselva, camutschs all'ingonda che pasculeschan il stavel a Nalps, la virola rumpa ora, Ligiaun carmala ils marcadonts cun ina premia, ina secziun locala dalla Societad da Pius nescha ella val e denter aunc bia auter caschuna l'aua gronda da 1868 bravs donnos ella val.

### **Barschament**

La jamna vargada ei da mesanotg barschau giu en in mises da **Tujetsch** ina tegia e dus clavaus, ch'èran naturalmein buca segirai.

Gasetta Romontscha nr. 28, 10 da fenadur 1868

### **Mo plaun vus d'Engiadina**

... Il Fegl d'**Engiadina** renfatscha milsanavon, che la **Surselva** seigi pli baul semussada inimitga dallas vias, la via dall'**Alpsu** hagi 1860 giu bia adversaris a **Mustér** e **Tujetsch**, ed era en **Lumnezia** hagi ei duvrau cumissaris per perschuer quella buna glied d'acceptar ina via cantunala. Cheu encunter remarchein nus, ch'ei vessi dau a **Mustér** negina opposiziun 1860, sch'ei fuss settractau da baghegiar l'impurtonta via dil **Lucmagn** enstagl la via militar sur gl'**Oberalp**.

Gasetta Romontscha nr. 36, 4 da settember 1868

### **Ina roscha da varga 70 camutschs**

La stupenta bialaura favorisescha la catscha sin camutschs, ed ins pudess aschia spitgar sin ina favoreivla raccolta dils numerus catschadurs, ton pli che quella selvaschina ei semultiplicada ualti bein ils davos onns. Il pigrer da **Nalps** ella **Val Tujetsch** ha viu gl'uost pliras ga ina roscha da varga 70 camutschs che vegnevan en siu stavel e litgavan las plattas, nua ch'el deva sal a sias nuorsas. Els eran leu aschi endisai, ch'els fagevan pauc stem dils pasturs, cura che quels vegnevan d'entuorn, setergevan ei empau, mo turnavan lura puspei anavos. ...

Gasetta Romontscha nr. 37,11 da settember 1868

### **Virola**

En **Tujetsch** ei rut ora la virola entras in mattatsch turnaus tscheidi da **Regensburg**. El ei mitschaut, mo ha infectau ina femna da 50 onns *Maria Barbara Rothmund*, ch'ei morta. Entginas casas che han giu communicaziun cun quellas duas persunas, ein ufficialmein serradas giu per far curontina.

Gasetta Romontscha nr. 38, 18 da settember 1868

### **Esser ordavon per saver vender meglier**

Nunditgond la repetida e fundada lamentaschun, ch'ins duessi buc ir aschi baul alla fierà da **Ligiaun**, ein ils marcadonts da **Tujetsch** e **Medel** schon semess ils 20 da

settember sin viadi. Tut che vul esser ordavon per saver vender meglier, buc aber per survegnir ils 200 frs. premi ch'il magistrat fa **Ligiaun** ha destinau per l'emprema roscha da 100 tgaus che arrivi a **Ligiaun** e cumpari schon ils 30 da settember sin piazza fiera. Igl ei quei ina speculaziun dils Luganès da giavinar pli baul la biestga naven da **Sebiastg**, nua ch'ils marcadonts fan per ordinari las meglieras fatschentas e seterglinan leu perquei bien e ditg. La catscha da biestga per quella fiera para da buca esser gronda, cunzun da vart glarunèsa; sch'ei fa uss aunc bialaura, sche pon ils marcadonts selegrar, schegie ch'els han stuiu pagar bials prezis per lur tiers. Gasetta Romontscha nr. 39, 25 da settember 1868

### **Societad da Pius**

Correspondenza dil **Badus**. Per far da saver che la Societad da Pius ella **Cadi** mieri tuttavia buca dalla pleronza, notifichein nus, ch'ei seigi ella ludeivla vischnaunca da **Tujetsch** seconstituuiu ina secziun locala, la quala ha il 27 da settember tenuu sia emprema radunonza a **Sedrun**. Presents ein stai 22 commembers, ils quals ein cun entusiassem sedeclarai pella fundaziun dad ina secziun locala. Auters ein stai impedi da cumparer, ein aber medemamein entrai ella secziun, aschia che quella dumbra schon ussa varga 30 commembers. En ina viva e caulda allocuziun ha il president, signur caplon Casanova, declarau ils statuts generals e particulars dall'Uniun da Pius e fatg attents ton sillas interpresas generalas da quella societad svizra, sco era sin ils quater roms dad operaziun en special, proponi e dilucidai ella radunonza districtuala a **Sumvitg**. Il signur farrer dil liug ha en siu votum encuretge da far l'Uniun da Pius populara, cun bandischar ils spuentegls e pregiudezis, ch'il cumin pievel pudess haver encunter quella societad e quei intent para d'esser reussius ad el, essend ch'ils presents mo deploravan, che la buna tendenza da quell'uniun seigi buca enconuschenta, aunc biars vegnessien schiglioc a prender viva part da quella. Denton vegn ins cul temps a procurar la caschun, nua quei ludeivel offer sa semanifestar nunschenadamein. – Alla fin dalla sessiun ei vegniu legiu ora il respectiv directori local, e concludiu da tarmetter ina numerusa deputaziun silla radunonza da **Sursassiala** a **Mustér**.

Gasetta Romontscha nr. 40, 2 d'october 1868

### **Fiera**

Fiera a **Muster**. ... Ils stiarls vessen pagau bein, mo ei era negins e sinquei ein ils marcadonts da **Tujetsch** e **Medel** serendi giuviars. ...

Gasetta Romontscha nr. 40, 2 d'october 1868

### **Levan buca morder en**

Ferton che las gasettas engiadinèsas rapportan che sin las fieras el **Tirol** ed ella **Valtrina** creschien ils prezis dalla biestga pli e pli, stuein nus relatar il cuntrari dallas fieras en **Surselva**. La fiera da **Trun**, dils 10 d'october, ha ei buca muncau marcadonts, mo priu ora tiella cumpra da stiarls, levan quels buca morder en, ins po dir ch'il prezi dallas vaccas eri naven dalla fiera da **Mustér** sbassaus per in marenghin. La fiera da **Rueras** a **Tujetsch**, nua ch'igl ei cumpariu dabia biestga ed ualti biala, ein ils prezis puspei scurdai per in marenghin. Sin quella moda han in per marcadonts bavarès saviu cumprar si buca car ina roscha vaccas ella **Cadi**.

Gasetta Romontscha nr. 42, 16 d'october 1868

### **Inspecziun dil Grischun.**

Suenter haver conferiu cul guvern e visitau ils terribels donns da **Haldenstein** ein els ils 27 serendi a **Mustér**, han da leu anora visitau **Tujetsch** e **Medel** e van ussa anoragiu. L'observada cunscienciusadad e moderaziun da vart dallas suprastonzas en dar en e stimar il donn, levgiescha considerablamein la missiun da quels signurs.

Gasetta Romontscha nr. 44, 30 d'october 1868

### **Aua gronda**

Il donns dall'aua ella **Cadi** ha la cumissiun federala stimau sco suonda: **Medel** 17'000 frs, **Tujetsch** 9000 frs., **Mustér** 21'000, **Sumvitg** cun **Surrein** 115'000 frs., **Trun** e **Zignau** 50'000 frs., **Breil** 6000 frs., total 218'000 frs.  
Gasetta Romontscha nr. 45, 6 da november 1868

### **Biars purs ein turnai a casa cun lur purschals**

Sil marcau da **Glion** dils 16 da november ei stau grond biestgam cun roschada marcadonts ed ei era vegniu marcadau dabia. Il prezis dallas vaccas eran pli aults che da s. Martin a **Mustér**; in marcadont tudestg, che veva fatg si ina roscha vaccas, ha declarau, ch'ellas stettien ad el circa 11 marenghins ina. Il traffic da stiarls era buca schi vivs sco autras ga, mo ei muncava era lur capomarcadonts da **Tujetsch** e **Medel**. La piazza da fiera da pors era fullanada, mo quels tiers vevan quellaga pign esit e biars purs ein turnai a casa cun lur purschals.  
Gasetta Romontscha nr. 47, 21 da november 1868

### **Introducziun da scolas per la giuventetgna**

... Las novas scolas per la giuventetgna buc obligada pli da frequentar la scola elementara, per las qualas il davos cussegl grond ha decretau in subsidi cantunal, han ils vischinadis da **Rueras**, **Sedrun**, **Segnas**, **Mustér-S.Gions** e **Surrein** entschiet a menar en.  
Gasetta Romontscha nr. 48, 28 da november 1868

### **Libra concorrenza**

Il menar il carr dalla posta sursilvana sillas staziuns da **Glion** a **Trun**, da **Trun** a **Mustér** e da **Mustér** a **Tschamut** ei screts ora en libra concorrenza.  
Gasetta Romontscha nr. 1, 1. da schaner 1869

### **Anflau**

enzatgei daners sin via gronda denter **Mustér** e **Tujetsch**. Pli datier san ins s'informar ella stamparia a **Mustér**.  
Gasetta Romontscha nr. 1, 1. da schaner 1869

### **Tut dependa dalla primavera**

Il fein ei en consequenza dalla stupenta aura, nua ch'ils tiers manedels seviventan cun pauc ni negin pavel, buca cars, denton dependa tut dalla primavera che fa. Tut ch'ei spanegiaus sin quella, cunzun era quels marcadonts, che han tier lur vaccas schon ussa cumprau e pagau varga 20 stiarls sco igl ei il cass en **Tujetsch**.  
Gasetta Romontscha nr. 8, 19 da fevrer 1869

### **Sullas femnas e sul traffic**

La fin dil carnaval passau ei vegniu dau en **Surselva** pliras produenziuns da cant e declamatoricas. La societad da cant dil **Badus** ha Gliendisdis Tscheiver divertiu ils Tuatschins cun sias bialas canzuns e siu legher declamatori cungiug cun bein enqual remarca sullas femnas ed il traffic d'ozildi. ...  
Gasetta Romontscha nr. 8, 19 da fevrer 1869

### **Posta**

Il menar la posta da **Glion** a **Tschamut** ei puspei surdau als signurs frars Berther a **Trun** e **Mustér**.  
Gasetta Romontscha nr. 10, 5 da mars 1869



### (19) Tscheiver dils Romontschs emigrai

Nies stimau American dil **Péz Badus** ha puspei schau vegnir tier a nus ina humoristica correpondenza, nua ch'el scriva denter auter: «Jeu sai buca far cunmeins ch'entras in per lingias schar saver nos cars cumpatriots el **Grischun**, ch'ils emigrants romontschs emblidien buca via las isonzas romontschas ed hagian perquei era celebrau il tscheiver da purs e da signurs, mo culla differenza che quel ei vegnius celebraus en in di. Nunhavend en disposziun il fravi da **Medel**, han ins stuii sesurvir d'ina musica americana, che fageva alzar las combas, schegie ch'enqualina ein ussa empau da veglias. In brav pushegn ha ei buca muncau e cun enqualin eis ei iu cheu sco cun il fumegl dalla claustra da **Mustér**, ch'era ius a mises e magliau memia digl emprem, ch'el ha buca pudiu schigliar diltut. Ils Romontschs eran tier quella biala stiva representai bein da **Tujetsch** tochen **Cazas**.

Appartenet tier ils Romontschs tscheu, va ei bein ed ei ha legrau els da puder beneventar in niev emigrau sursilvan, sgr. scarvon Wieland da **Sumvitg** cun sia biala e numerusa famiglia. Speronza che l'**America** plagi ad els! Culla dretga curascha e bunaveglia sa ei tscheu nuota fallir. Il da viver ei dapresent empau da cars, mo en in per meins semida quei grad entuorn, nua che tut fadigia 7 – 15 frs. a di. – Culla religiun vegn ei era mintga di meglier e meglier. Nus cheu el pign marcau da **Stillwater** havein duas baselgias catolicas, ina irlandèsa ed ina tudestga, ed omisduas ein mintga dumengia pli che pleinas. Nus Romontschs mein el survetsch divin tudestg, mo desiderassen zun fetg in Romontsch. Jeu sai da dir che la schlatteina romontscha va cheu zun bein vinavon, aschia ch'ins vesa, ch'ils vents americans ein tuttavia buca schliats per ils Romontschs, gie in spiritual romontsch vess tscheu gleiti ina biala caplania.

Nus havein in stupent unviern, grad neiv avunda per ina buna via da schletta e buca freid, mesjamna dalla tschendra mavan stellas sco da mesa stad. – Cun grond plascher retschevein nus la Gasetta Romontscha, sulet che nus deplorein ch'ella ei buca pli gronda. Nus recumendassen grondamein a mintgin egl jester e dumiesti da prender quella, lura speronza ch'ella vegness gleiti a s'engrondir ed aunc purtar pli bia novitads da nossa veglia patria. Bein enqual caussa tertgavel menziunar, mo essend cureisma e temps d'urar e gignar vi schar tochen in'autraga. Denton salidein nus l'entira **Surselva**».

Gasetta Romontscha nr. 11, 12 da mars 1869

### Cufla da Pastgas

Il proverb: „Nadal sin gassa e Pastgas sin pegna“ (ni sco tschel scheva „en pegna“) ei uonn severificaus; ella **Val Tujetsch** vul negin seregurdar d'ina semeglianta cufla sco quella dalla fiasta da Pastgas (*28 da mars*). Suenter la stupenta aura dils treis meins d'unviern, december, schaner e fevrer, ha igl entir mars ora neviu e fatg ruh ed ussa da calonda avrel havein nus a **Mustér** aunc tschun quartas neiv els plauns.

Gasetta Romontscha nr. 14, 2 d'avrel 1869

### Tujetsch senza concorrenza

Tier la premiaziun dils taur a **Trun** ein compari 13 bials stiarls. Ils da **Breil** che han quest atun giu cumprau treis distingui taur a **Sviz** per circa 50 marenghins, han era uonn giu la plema. Gl'emprem premi da 70 frs. ha il taur da Cavegn a **Breil** tratg a raschun ch'el possedeva tenor declaronza dil president dall'expertisa tuttas qualitads prescettas per il premi; il secund premi 60 frs. ei vegnius renconuschius ad in stierl da landrehter Alois Latour, il tierz 60 frs. al taur dalla claustra a **Mustér**, il quart 55 frs. ad in stierl da Gion Petschen a **Schlans**, il quint e sisavel als taur d'assistent Caduff a **Breil** e da capitani Placi Rensch a **Zignau**, 50 frs. per in. **Medel** e **Tujetsch**, nua ch'ins metta pli bia peisa sin biestga mascla, che sin bialas vaccas, han tenor solit fatg negina concorrenza tier quella premiaziun.

Gasetta Romontscha nr. 16, 16 d'avrel 1869

### **Metter tiara**

**Tujetsch** ha per tema d'ina tarda primavera giu bess tiara per ses funs entuorn, nua ch'ins leva arar, e quella lavur ei uonn stada coronada d'in stupent effect. Ils funs ch'eran cuvretgs cun ina nevada da 7 quartas, cura ch'ins ha bess tiara, ein en 10 dis stai terreins, aschia ch'ins ha schon entschiet ad arar leu. La tema da gronda scartezia da fein ei stulida, denton havein nus per miez avrel, ed a raschun ch'ins duei buca ludar il di avon la sera, lein nus era buca glorificar memia il discretau avrel, entochen ch'el ei buca finius.

Gasetta Romontscha nr. 16, 16 d'avrel 1869

### **Plontaziun**

Quels dis ha la vischnaunca da **Tujetsch** plantau en in niev uaul silla biala spunda dado **Selva**, nua ch'ella veva gia onn semnau in bi toc uaul. Sut atgna direcziun dil signur inspectur forestal Coaz, ha ella mess ora 5000 larischs, 2000 schiembers, 2000 pegns da duas sorts lenn. Quei ei la medema vischnaunca che ha dau 3400 francs per ranschar tier classenas petgascrap enstagl petgas da lenn, e che ha quels dis puspei vendiu enzatgei plontas veglias per tochen 30 francs l'ina. **Tujetsch** sa preziar e schaniar ses uauls, schegie ch'ina gasetta svizra ha cun caschun dalla davosa malaura columniau quella vischnaunca cun vuler pretender, ch'ella hagi sfraccau giu uauls sin moda devastonta. Cun raschun ei signur inspectur forestal publicamein seschaus si encunter quella totalmein faulsa reproscha, ed ha declarau, ch'ei detti buca ina vischnaunca, che schanegi pli fetg ils uauls e spargni schi fetg lenna sco **Tujetsch**, quella mereti da vegnir ludada e buca blasmada.

Gasetta Romontscha nr. 18, 30 d'avrel 1869

### **Scola da mintgadi**

Sco ins auda ei ranschau en uonn 27 scolas d'unviern per tals ch'ei buca pli obligai d'ir a scola. Da quellas ein 5 che vegnevan dadas mintgadi e che han obteniu 100 frs. ina, ferton che quellas da duasga ad jamna han survegniu 30 – 35 frs. La **Cadi** ha a proporziun giu las pli biaras, ina da mintgadi a **Sedrun** e lu aunc 7 autras. Ils subsidis per quels scolasts, che tegnan scola da repetiziun firaus e dumengias ni in auter di da quei temps, ch'ei buca scola, flessegian per in auter onn primavera. Speranza che quei futur subsidis promovì quei institut, schi necessari per buca schar emblidar via memia ils affons, cunzun per quels dallas classas inferiuras.

Gasetta Romontscha nr. 20, 13 da matg 1869

### **Survesta dils cuosts**

La via sur l'**Alpsu**, da **Mustér** tochen tier ils cunfins uranès ha custau 362'360 frs. Subsidis dalla Confederaziun per l'**Alpsu** 200'000 francs. La via en **Surselva** da Rehanau a **Mustér** ha custau 617'503 francs.

Gasetta Romontscha nr. 21, 21 da matg 1869

### **Dil Badus american**

Ord l'**America** havein nus retschert da **Stillwater**, el stadi **Minnesota**, ina corrispondenza anonima, che setegn si sugl artechel dil schinumnu „American dil **Péz Badus**“ cumpariu en nr. 11 da nossa gasetta. Correspondenzas, nua ch'ils inserents astgan buca dar en lur num alla redacziun, prendein per principi buca si en nies fegl e stuein aschia era enviar anavos quella corrispondenza americana. Nus savein denton segirar al tschelau correspondent, ch'igl American dil **Péz Badus**, hagi tuttavia buca manegiau schi mal cun sia humoristica descripziun dil tscheiver e biala stiva dils Romontschs, e cunzun buca vuliu renfatschar, ch'els seigien cheu buca secunteni „galantamein“.

Gasetta Romontscha nr. 23, 4 da zercladur 1869

### **Fiera**

La fiera d'**Ursera** vegn uonn tenuta ils 9 e 10 d.q., pia il di suenter quella da **Sedrun**.  
Gasetta Romontscha nr. 23, 4 da zercladur 1869

### **Las cauras vevan mo tets e buca iver**

La fiera da **Tujetsch** dils 8 da zercladur ei stada frequentada da bia gliued ed era da bia tiers, e zuar da tuttas sorts, ils Uranès han cumprau la pli part dils tiers ch'eran sin fiera e zuar per enorms prezis, las vaccas per 220 – 340 frs. Ils schinumnai tachis vevan grond esit, marcadonts da **Tujetsch** e **Medel**, che vevan cumprau vaccas il di avon sin il marcau da **Glion**, han saviu vender tuttas e zuar cun in bi bien gudogn e la tschontscha generala era, che sin quellas vaccas ch'ei vendien l'auter di sin la fiera d'**Ursera** gudognan ei aunc in bionton, schegie ch'ellas ein cumpradas carischia, essend sin la fiera da **Tujetsch**, era ein negins marcadonts auter che dad **Uri**. Era vadials tumprivs eis ei vendiu da biars, las cauras havevan uonn generalmein mo tets e buca iver, mo pagavan denton aunc biebein. La sera eis ei aunc dau ina buna plievgia da bunaura e lavau giu las purginas stadas ils dis vargai, ed ha fatg bein, quei tut ei aura pils purs.

Gasetta Romontscha nr. 24, 12 da zercladur 1869

### **A Cuera ein schualmas ventschidas dil freid**

Ils 21 da zercladur ei stau in di dublamein liungs, pigl emprem eis ei il di pli liung tenor la regla dalla natira, e secundo eis el staus in snueivel liung muort l'aura ch'el ha purtau. Perdetga da quella verdad ein bia perveseders, che stuevan star sper lur muvels en nuegl senza haver da dar enzatgei vivonda a quels paupers animals e tedlar sin il burlir da quels tierets, aschia ch'ils tiers stuevan secuntentar cun esser silmeins schurmegiai dalla neiv giu pil dies. Per cletg eran paucas alps cargadas e quels che havevan cargau han stuiu vegnir a casa. Ils biars da quels tiers han stuiu secuntentar cun survegnir in nuegl cauld e sco ei sedi leger gasettas. Per cletg ei la neiv buca stada gronda, aschia ch'il mardis han ins saviu schar magliar la biestga. Il mender ein las nuorsas matei stadas, las qualas eran generalmein cargadas ed eran en ina neiv dad in bratsch ault. Denton para ei, che ariguard tussegadas purginas, mondi ei forsa ora biebein. Lein haver speronza ch'ei vegni ton pli spert a semidar e far ina aura pli fritgeivla da cheu naven, aschiglioc savein nus strusch cargar las alps. La pli pauca neiv eis ei stau a **Mustér** e **Tujetsch**, a **Mustér** era ei terren che a **Sumvitg** era aunc tut alv. Sco ei para, era la neiv vegnida digl aschi malemperneivel **Crap Ner**, sco ei sedi e buca dil maun dil **Lucmagn** ni favugn. A **Cuera** ha ei neviu quater uras senza puder tschentiar sin via. Il donn vid las vegnas, il fein e garnezi ei gronds. Ei era leu ils 21 da zercladur, il pli liung di, schi freid sco ils 21 da december 1868, il pli cuort di, numnadamein 5 grads. La notg dils 21 e 22 ein a **Cuera** pliras schualmas ventschidas dil freid.

Gasetta Romontscha nr. 26, 26 da zercladur 1869

### **(20) Las prestaziuns dils taurs da Tujetsch tier la premiaziun ein insumma buca cuntenteivlas**

Ils emprems hosps fan ina cura d'aria frestga. – Ils aviuls tuatschins ein aschi activs sco en auters cantuns svizzers. – A Bugnei vegn novissimamein ligiau cudischs. – Ils Tuatschins americans s'annunzian bugen ella pressa romontscha. – Tujetsch ha refusau la lescha da rempars cun 61 vusch. – Sul Pass Alpus vegn vin vulclin senza pagar dazi. – La zoppina ei en in mises en Tujetsch.



### **Grischun**

Il til dils jasters entscheiva ad esser ualti fermes en pliras valladas grischunas, oravontut en **Engiadina** ... Ella **Surselva** encuntercomi ei la frequenza da jasters aunc lunsch anavos en cumparegliaziun cullas allegadas cuntradas e quels che passan atras setegnan si pauc, silpli ch'els fan da **Glion** anora ina excursiun sil **Mundaun** ni naven da **Mustér** sil **Muraun** per guder leu ina maiestusa vesta el mund alpin. Sulettamein **Sedrun** ha il cletg d'in diember gasts che fan leu ina cura d'aria frestga. Gasetta Romontscha nr. 30, 23 da fenadur 1869

### **Disgrazia**

In pastur da **Tujetsch** ha sur il lag da **Tuma** sper il **Badus** anflau l'ossa d'in carstgaun, carteivel d'in mistergner che ha avon entgins onns falliu la via sur l'**Alpsu**.

Gasetta Romontscha nr. 33, 13 d'uost 1869

### **Raccolta da mèl**

Sco ei tuna sin tuts mauns para ei che nus haveien en general in bien onn da fretg ed oravontut in oreifer onn per raccolta da mèl. Gasettas tudestgas han el davos riguard cartiu da rapportar in pèr remarcabels exempels. Cun caschun d'ina radunonza d'apiculturs seigi egl **Appenzell** vegniu presentau ina schaumna, che pesavi datier da 100 glivras: in apicultur dil **Toggenburg** hagi giu ina schaumna da 84 glivras ed obteniu da 14 schaumnas 230 glivras mèl. Ei legra nus da saver rapportar dalla cuntrada dil **Badus** aunc pli splendids resultats. In pur da **Tujetsch** veva ina schaumna, che pesava 132 glivras, ed ha da sias duas schaumnas tratg ora 70 glivras mèl. In auter che possedeve 7 schaumnas, ha medemamein fatg questa stad la biala raccolta da 140 glivras flur da mèl. Ins vesa aschia che las flurs dil **Badus** han uonn era giu en mèl e ch'ils aviuls tuatschins stattan en activitad buc anavos als aviuls d'auters cantuns, els rendan bien quen a tgi che tractescha els en uorden. Ins vesa ch'ei maunca buca mèl e latg, sche mo nos marcadonts da fiera vegnan ussa aunc cun bravas buorsas marenghins.

Gasetta Romontscha nr. 39, 24 da settember 1869

### **Annunzia e recumandaziun**

Il suttascret che ha empriu il mistregn da ligiar en cudischs tier il defunct Stehli a **Glion** ed ei silsuentèr sepraticaus en quel cun viagiàr per la **Svizra** entuorn, fa da saver ch'el seigi turnaus a casa e sedetti era giu leu cun ligiar cudischs. El serecamonda cheutras per lavur ad in ludeivel publicum empermettend da survir cun promta e solida lavur e per in dueivel prezi.

Emanuel Deragisch

Ligiacudischs a **Bugnei (Tujetsch)**

Gasetta Romontscha nr. 42, 15 d'october 1869

### **Petiziun da Tujetsch**

Avon che serrar la sessiun ei aunc vegniu mess avon ina petiziun dalla vischnaunca da **Tujetsch**, nua ch'ei vegn detg: ella hagi unitamein acceptau la nova constituziun, buca senuspiu giud ils artechels che perscrivien allas vischnauncas in bien uorden, ina ludeivla indemnizaziun per la gudida dils beins communal, e cristianeivel secuntener visavi ils domiciliai, mo a raschun che la constituziun seigi vegnida fiersa, duegi ins scriver ora ils dretgs dil pievel a partir sco els stattan egl emprem capetel dalla refusada constituziun. Cheutras vegnien las cumpetenzas dil pievel e dil Cussegl Grond determinadas scosauda ed ils cuntinuai cumbats el Cussegl Grond sur tgei che seigi da scriver ora e tgei buc, calien si. Sin proposiziun da Gadmer ei il Cussegl Grond buc entaus en quella petiziun, ferton che A. Condrau veva proponiu da surdar quella petiziun al Cussegl Pign e cumissiun cantunala per schar rapportar

el proxim Cussegl Grond. Sche nus selegrein che la damonda dalla banca ei vegnida scretta ora sil pievel, sche stuein nus da l'autra vart grondamein deplorar che quella impurtonta petiziun da **Tujetsch** ha anflau schi pign susteniment.  
Gasetta Romontscha nr. 50, 11 da december 1869

### Sal

La menadira dil sal da **Mustér** e **Tujetsch** ei el davos Fegl Ufficial scretta ora en libra concorrenza.  
Gasetta Romontscha nr. 50, 11 da december 1869

### Correspondenza americana

Cun plascher legin nus las novitads, che la Gasetta Romontscha porta a nus ord nossa veglia patria grischuna. Cheuencunter vi jeu era comunicar enzatgei ord nossa nova patria americana. Ils Romontschs ein tscheu, ton sco jeu sai, tuts ualti taffers e dil rest va ei era cun ils biars ualti bein, enqual excepziun dat ei segiramein era. Nus havein tscheu in schliet onn pervia dils daners, ch'ei fetg scarts, gie ei vulan 15 – 25 per tschien tscheins, ferton ch'ins deva avon 5 – 8 procent. La vivonda ei buca cara ed ils biars survegnan quella senza daner blut. Ei dat schon era da quels, che han pauc criedi e per igl unviern empau da trit, il bia da quella gliעד, che maglian oz si tut e fan buca cass da damaun. Nus havein tscheu fetg freid ed in pèr zolls neiv; las auas ein tuttas scheladas si 4 zolls gries, aschia ch'ins sa dapertut ir sur las auas ora cun cavals eargas. Buna via da schletta per il tscheiver maunca ei aschia buc, savessen nus sin ina schlittada vegnir ensem cun nos Sursilvans el Grischun, fuss ei per nus fetg emperneivel e materia da conversaziun muncass ei cheu betg per umens e femnas.

Mo nunsavend quei daventar vi jeu raquintar dad in auter viadi, che vegn ussa fatgs bia ell'America, il viadi en **California** silla viafier pacifica. Vivon duvrara ins per ir cun il vapur da posta naven da New York a S. Francisco 25 dis, ussa fan ins quei tur da 4000 miglias en 8 dis per 50 talers tut sin viafier. Dacuort ha nies cumpatriot Tias Decurtins, vivon ustier a **Trun**, fatg quei viadi cun aunc in auter Romontsch. Sco els han quels dis scret a **Minnesota** ein els arrivai saunamein an **California** ed han en quella allontanada tiara anflau dabia Romontschs. Ton per quels che vessen tschaffen d'ir ella tiara d'aur, mo ils biars Romontschs en **Minnesota** han buca grond tschaffen cheutier.

Co stat ei cul stradun sur il **Lucmagn**? Luvrei brav e dei buca suentier! Co stat ei cun nos vegls trochists da **Sursassiala**? Viva il bagat aunc ni ei mo il narr pli en veta? Tscheu veva il bagat era priu in'entschatta, mo el ei gleiti stulius e schau anavos mo il narr e quel ha pauc da far cullas troccas, sonder plitost cun ils daners.

Agurond in legreivel niev onn a tuts Romontschs salida sia veglia cara patria **Stillwater**, ils 6 da december 1869

In nativ dil **Péz Badus**

*Gasetta Romontscha nr. 1, 6 da schaner 1870*

### Gronda rihezia

A **Regensburg** en **Baviera** ei ils 6 da schaner vegniu satrau in stimau um, nua ch'ins ha viu 42 Romontschs el til da sepultura. Ei era la bara da Joseph Deplazes *Deplaz* da **Tujetsch**, ch'ei en sia giuventetgna setratgs ella **Baviera** ed ha leu cun siu negozi da latg acquistau gronda rihezia. Mo el fuva era rehs en bunas ovras encunter ses numerus cumpatriots grischuns, che vegnevan schi savens tier el per encurir survetsch. La cumparsa da varga 40 Romontschs, che han vuliu render la davosa honor a lur benefactor, dat perdetga da sia beneficenzia. El ruaussi en pasch!

*Gasetta Romontscha nr. 3, 21 da schaner 1870*

### **Grischun**

La lescha da rempars ei acceptada dil pievel. ... La **Cadi** ha votau sco suonda: **Medel** 75 pro, 8 contra; **Tujetsch** 61 per refusar e 7 per acceptar (Quella vischnaunca hagi vuliu suandar gl'exempel dil Cussegl Grond, che hagi dacuort era quasi unitamein enviau anavos la petiziun da **Tujetsch** per far scriver ora danovamein ils dretgs dil pievel.), **Mustér** 101 per la lescha e 61 encunter, **Sumvitg** 109 pro e 12 contra, **Trun** encuntercomi ha refusau cun ina vusch, a **Breil** ein 30 stai per acceptar e 60 per enviar anavos.

*Gasetta Romontscha nr. 6, 11 da fevrer 1870*

### **Negina cuntentientscha**

El davos Fegl Ufficial vegn ei communicau extracts ord ils rapports dils experts per la premiaziun dils bos. ... ella **Foppa** e **Lumnezia** seigi il progress ella tratga da biestga medemamein veseivels, ferton ch'ins sappi buca secuntentar cullas prestaziuns da **Tujetsch** e **Medel**.

*Gasetta Romontscha nr. 6, 11 da fevrer 1870*

### **Vin vulclin**

El cussegl grond d'**Uri** ei vegniu signalisau ch'ei vegni sull'**Alpsu** menau en roschada buots vin vulclin senza pagar il dazi da consum e sin quei ei vegniu concludiu da schar intercurir quei pli datier. Il daziè grischun a **Tschamut** vess buna peda d'era trer en il dazi per **Uri**, ton pli che las respectivas entradas d'omisdus cantuns tonschan buc da cuvierer siu salari.

*Gasetta Romontscha nr. 9, 4 da mars 1870*

### **Premiaziun**

Tier l'inspeziun dils tauris dalla **Cadi** a **Trun** ein cumpari 19 da quels armauls. ... Nus considerein per in progress che tuttas siat vischnauncas eran uonn representadas, era **Tujetsch** e **Medel**, che vevan onns ora priu negina part pli da quella premiaziun. ... L'honor che **Medel** ha giu uonn per l'emprema ga, lein nus sperar che **Tujetsch** hagi in auter onn, da ver a returnond dall'inspeziun da **Trun** in da ses tauris corunaus cun flurs e tschupials.

*Gasetta Romontscha nr. 17, 29 d'avrel 1870*

### **Banca**

La banca cantunala ei fetg probabel acceptada dalla maioritad dil pievel **Grischun**. Dumengia vargada ha **Tujetsch** acceptau quella unitamein cun 114 vuschs. ...

*Gasetta Romontscha nr. 21, 28 da matg 1870*

### **Puspei inaga la zoppina**

En **Surselva** fa la zoppina progress. Tras nuorsas jastras eis ella arrivada tochen sil **Lucmagn** e tras ina vacca cumprada sil davos marcau **Glion** eis ella rutta ora en in mises da **Tujetsch**. Sinquei ha **Uri** serrau encunter il **Grischun**, aschia che las proximas fieras da **Trun** e **Tujetsch** piteschan cheutras grond donn.

*Gasetta Romontscha nr. 21, 28 da matg 1870*

### **(21) A Tujetsch/Sedrun in extraordinari fenomen**

Las viasfier dil **Lucmagn** e **Gottard** duessen s'unir ella **Val Tujetsch**. - Las sorts da fein a pastg han furniu alla cassa da vischnaunca varga 2000 frs. - Gleiti anflau la mort.- Vendiu bia vaccas per bials prezis. - **Tujetsch** ha 132 casas ed ei barschau giu en 70 onns 17 casas. - Subsidi per la biblioteca locala.

### **Devastaziuns dil Rein**

L'expertisa federala per repartiziun dils subsidis per ustonzas, consistenta ord sis persunals, ei ils 30 da matg vegnida sull'**Alpsu** tochen **Mustér**. Ils 31 eis ella partida per **Glion** inspectond las devastaziuns dil **Rein** e dils runs.

*Gasetta Romontscha nr. 22, 3 da zercladur 1870*

### **Ina buorsa cun entgins daners**

ei vegnida piarsa denter **Mustér** e **Tujetsch**. Gl'anflader vegn supplicaus da render quella al pot da **Tujetsch**.

*Gasetta Romontscha nr. 22, 3 da zercladur 1870*

### **Brevs che drovan ditg**

Dapi che la posta sursilvana va sull'**Alpsu** drovan las brevs dalla **Cadi**, che van a **Rueun**, **Uors**, **Andiast**, **Pigniu**, **Siat**, **Ruschein**, **Ladir** e **Sevgein** 24 – 72 uras dapli per arrivar el liug da lur destinaziun, e quellas da **Lumnezia** e **Sursaissa** 24 uras. Tgisa sche la Confederaziun pudess buca star ora da dar als respectivs curriers, che fan lur tur mo treis gadas ad jamna, entgins francs dapli pagaglia e far spitgar els a **Glion** entochen che la posta dall'**Alpsu** arriva?

*Gasetta Romontscha nr. 27, 8 da fenadur 1870*

### **Tujetsch el center dalla viafier federala**

Signur colonel La Nicca ha dau ora ina broschura sur la questiuon dalla viafier alpina, nua ch'el dilucidescha siu enconuscent project cun bia tabellas e cartas. Tenor quei duessen las viasfier dil **Lucmagn** e **Gottard** s'unir ella **Val Tujetsch**. Enstagl da construir il colossal tunnel gottardistic, menass ins la viafier dad **Amsteg** naven ella **Val Maderana**, tras il cuolm **Rizli** a **Tujetsch** e da leu ensemblamein culla viafier da **Cuera** sur il **Lucmagn**. Al **Grischun**, che vesa ch'igl ei da far nuot cul **Spligia**, fuss quei plan favoreivels ed ei pudess schabegiar ch'era ils Gottardists, curdond sin fermes incaps tiella construcziun da lur tunnel, schassen plascher quella idea fusionistica.

*Gasetta Romontscha nr. 28, 15 da fenadur 1870*

### **Correspondenza dil Badus**

Silla generala calamitad e lamentaschun d'ina magra raccolta da fein en quellas cuntradas, nua ch'ins ha buca saviu luvrar cull'aua da schuar, savein nus relatar ord il bi selvadi da **Tujetsch** aunc in ualti favoreivel resultat. Segir ch'il fein grass e magher ha era tier nus pitiu zun fetg en consequenza dalla gronda schitgira, schegie buca en quei grad, sco ellas cuntradas enviars giu il **Rein**. Tonaton po ins calcular, ch'ei hagi calau pli ch'ina tiarza visavi ad ina mediocra raccolta. Igl ei stau uonn ina da quellas snueivel raras excepziuns per nossa vallada, ch'il suleagl ei staus stagn caulds, schiglioc buca tgunsch che lez fetschi donn a nus, anzi pil gartetg dil garnezi, sco igl ei uonn il cass, munglassen nus schar barschar empau fein. Pil cal dil fein ha **Tujetsch** ina remedura, ina resursa en ses bials cuolms, pil cal dil garnezi aber sto ins prender il refugi tiels magasins ed arcuns – buca dall'**Egipta** – sunder dils hermès e negoziants.

Enconuscent eis ei en nies **Grischun**, tgei enormas massas fein **Tujetsch** recava mintga onn ord ses cuolms, ord ses beins communal, persesez encunter tutta dueivla indemnisaziun visavi la cassa da vischnaunca. Sil cal general e penuria da fein da casa egl onn present, ha nossa ludeivla suprastonza concediu e stigiou ora els cuolms in'enorma quantitat sorts per il schinumnu fein a pastg. En publica radunonza ha gl'ingant da quellas sorts furniu alla cassa da vischnaunca varga 2000 frs., senza quintar las tschuncheismas fein, ch'ils paupers han saviu segar gratis. Ils particulars han uonn retratg ord las pastiras ina tala massa fein, che biars pretendan da haver en clavau schi bia mesira fein, sco in onn da buna raccolta. Remarcabel fuss ei, da vegnir sissu il diember da blahs u ponns fein, che **Tujetsch** ha uonn runau ord



ses cuolms, e valetar quels tenor carischia, sco il fein sto uonn probabel vegnir. Quei quen vegness a figurar in resultat, il qual giustificass cumpleinamein la sbursada da 2000 frs. en cassa da vischnaunca, tonpli che quels mellis pagan era deivets communal. Intervegnin nus quella rendita, sche vegnin nus medemamein a comunicar ella als lecturs dalla Gasetta Romontscha. – Duess il negozi da tiers quest atun aunc trer mo empau, sche ha **Tujetsch** giu raschun, da celebrar uonn la fiasta federala d'engraziament cun in particular entusiassem. Sur in auter rom d'industria dils Tuatschins vegnin nus cul temps a far nies rapport. *Gasetta Romontscha nr. 38, 22 da settember 1870*

### **Neiv e cufla il davos october**

Ella cufla dils davos dis d'october havess in Cavegn da **Breil** gleiti anflau la mort sill'**Alpsu**. Venderdis vargau ha el bandunau **Ursera** per allas duas suentermiezdi. Vegnend sisum il lag, er'ei stgir ed el veseva buca pli ils parricars sco fastitgs dalla via. Per buca rescar dad ira surengiu ella stgiraglia, seresolva el da restar grad eri. El batta in toc buna via e va cheu a spass en tutta aura dallas sis dalla sera entochen las sis dalla damaun. Lura anfla el il stradun e va in toc vinavon. Nunpudend rumper via po el susentar umens da **Tschamut**, che vegnevan encunter ad el. Ella Rheinquelle a **Tschamut** pren el sin sia aventura in bien solver e dorma lu 24 uras e sededesta viscals e da bunaveglia.

*Gasetta Romontscha nr. 44, 4 da november 1870*

### **Vaccas per bials prezis**

La fiera da s.Martin a **Mustér** ei ida meglier che quei ch'ins spitgava. Ina truppa marcadonts tudestgs e romontschs han fatg concorrenza e plirs ein i in grond toc encunter als tiers, che vegnevan menai sin fiera, giuviars entochen **Sumvitg** e siviars encunter **Tujetsch** e **Medel**. Sin quella moda ei vegniu vendiu bia vaccas per ualti bials prezis, gie ellas han pagau cheu circa 3 marenghins dapli che silla lavagada fiera da **Trun** digl october. ... Ils capomarcadonts da **Tujetsch** e **Medel** han semtgau in per bravas roschas stiarls per la tiarza fiera da **Ligiaun**.

*Gasetta Romontscha nr. 46, 18 da november 1870*

### **1870-1880**

Baghegiau il sontget da **Dieni** entras Duri Battesta Berther da **Dieni**; las duas statuas da s. Giusep e da s. Vendelin ein vegnidas tschentadas en da Vigeli Giusep Berther da **Dieni**. – El sontget sesanflan duas cruschs, ina da fier culla inscripziun Giusep Maria Peder, 53 onns, il matg 1843 vegnius per la veta entras in squatsch lavina enasi sut il **Draus**. Ina crusch lenn si per la preit culs bustabs J. F. C. R. = Giachen Fidel Cavegn da **Rueras**, ch'ei vegnius per la veta da cavar cristallas enasi **Val Giuv** odem la stad 1872.

*Notizia da pader Baseli Berther*

### **Correspondenza dil Badus**

Denter las 10 – 11 dalla notg dils 12 sils 13 da fevrer ei vegniu observau a **Tujetsch** – **Sedrun** in extraordinari fenomen. Dil maun encunter mesanotg, sco nus numnein: **Strem**, **Caschlè** e **Mila**, s'extendeva vid il firmament, schiglioc tut sereins e stellius, ina maiestusa tarlischur semeglionta ad in schinumnu „nordlicht“. Igl observatur, secartend ch'ei seigi zanua el vischinont cantun **Uri** in grond barschament, cloma neutier auters aspectaturs ils quals eran dalla medema opiniun. Mo nunsavend nus novas, ch'ils proxims dis passai seigi stau barschament egl **Uri**, sch'eis ei evident, che quella glisch vegn dil nord, era sch'ella duess derivar mo dacheu, perquei che **Berlin** ha buca daditg sittau victoria sulla curdada da **Paris**. Ils perderts astrologs tscheu a **Sedrun** ein aber aunc en dispeta, schebein quei nimbus derivi da **Berlin** enneu, ni

sch'el fuvi schiglioc schon el contuorn da **Cuolm de Vi** e da **Caschlè**. Pertgei tenor ina veglia detga fussen las strias serimnadas ualti stedi entuorn la platta dil barlot sil **Cuolm Caschlè**, essend cheu in oreifer bi prospect e favoreivel liug da saltar. Surschein pia alla madira ponderaziun da scadin lectur, da lignar sche quella glisch sura allegada seigi naturala ni sch'ei fuss mo stau las scuas da fiug dallas strias, che tenevan da quellas uras lur tscheiver.

*Gasetta Romontscha nr. 7, 17 da fevrer 1871*

### **Assicuranza da fiug**

Naven da 1800 – 1870 vein nus il sequent resultat:

**Tujetsch** cun 132 casas ei barschau en 70 onns 17 casas. ... Il pli grond barschament ein staus: 1822, ils 11 da fenadur, ei igl entir vitg da **Camischolas** a **Tujetsch** barschous giu cun 14 casas.

*Gasetta Romontscha nr. 11, 17 da mars 1871*

### **In asen fa biars asens!**

La jamna vargada ein ils prezis e la tscherca dils stiarls carschi zun fetg tut anetgamein. In marcadont uranès ei vegnius ella **Val Tujetsch** ed ha entschiet a cumprar si stiarls per bials prezis, el medem temps ei lura arrivau brevs dalla **Italia**, ch'ins spetgi leu sin d'atun tscherca da tiers. Quei ha dau fiug, marcadonts dad **Uri**, da **Tujetsch** e **Medel** ein spert dai dalla **Surselva** giu ed han cumprau si sfraccada stiarls e pagau tochen 8 marenghins il tgau, ferton ch'igl ei silla fiera da **Ligiaun** dil davos october vegniu vendiu per 7 marenghins il pèr. Tgei miadada! In marcadont ha denton remarcau: In asen fa biars asens!

*Gasetta Romontscha nr. 14, 7 d'avrel 1871*

### **La fiera da Sedrun**

che curdass uonn silla fiasta da Sontgilcrest vegn tenuta il di avon q.e. mesjamna, ils 7 da zercladur.

*Gasetta Romontscha nr. 20, 18 da matg 1871*

### **Uniun da Pius dalla Cadi**

Ord la cassa dall'uniun vegn ei tenor conclus dau uonn in subsidi per il cant ecclesiastic a **Surrein** ed in per la biblioteca locala da **Tujetsch**.

*Gasetta Romontscha nr. 21, 26 da matg 1871*

### **Sterschau**

sin via orda **Medel** tochen **Tujetsch** sis nuorsas bergamascas. Tgi che anfla quels tiers ei supplicaus da metter a mauns quels a gerau Lucas Cavegn a **Sedrun** encunter ina bonificaziun da 3 frs. il tgau.

*Gasetta Romontscha nr. 24, 16 da zercladur 1871*

## **(22) Tujetsch culla plema dil progress**

**In Englès sparius vegn la finala anflaus. – Smanatschas dils vagabunds. – Bunas nova per la fiera da Ligiaun. – Cun siatonta cavals. - Tujetsch cun bi glin e daried sem. – Ina vacca per vegn marenghins. Il november flurs sill'Alpsu.**

### **Professer Giachen Giusep Hitz**

Ils 10 d'uost 1871 ei miert el **S. Gagl** in spiritual grischun, bein enconuscent ad ina troppa discipels ord tuttas valladas catolicas da nies cantun, igl ei signur professer Jacob Josef Hitz da **Tujetsch**, nevs digl enconuscent erudit decan Hitz p. m. El era naschius ils 6 da matg 1806. Sco bia auters da nos spirituals catolics da sia generaziun

ha el fatg il gimnasi a **S. Pieder** ed ils studis liceals a **Solothurn**, la quala scola gudeva da quei temps tier ils catolics meglier criedi ch'ozildi. La teologia ha el studiau el seminari a **Cuera** ed ei vegnius benedius ora 1834. Gl'onn suenter eis el vegnius numnaus instructor dalla scola cantunala catolica, che flureva da quei temps ella abbazia a **Mustér**. El e siu amitg e collega Martin Durgiai eran denter ils professers da quei institut, quels che levan nuota saver da translocar la scola a **Cuera**, prevedend che quella translocaziun seigi igl empren pass tier l'uniun dallas scolas cantunalas. Da 1842 – 1846 ha el professorau a **Cuera** ed ei in onn vegnius honoraus culla piazza da rector. Igl onn 1846 ha el obteniu ed acceptau in dom ella scola cantunala **S. Gagl**; da leu eis el 1857 setratgs egl institut a **Sviz**. Suenter in professorat da 18 onns, nua ch'el sedestingueva tras diligenza, premura e bien dun da comunicaziun, eis el seretratgs silla caplania a **Kaltbrunn**, cantun **S. Gagl**, nua ch'el era stimaus e carezaus da tut ses parochians. Nunsputgadamein survegn el ina greva malsogna e miera schon il tierz di. El ruasssi en pasch!

*Gasetta Romontscha nr. 33, 18 d'uost 1871*

### **In'aventura per in Engles**

Dacuort vegnan dus Englès giu dal **Badus** el Hotel Rheinquelle a **Tschamut** e spetgan leu sin lur tierz cumpogn, che fuva restaus empau anavos sul **Lag da Tuma** si. Ei vegn notg ed igl Englès selai aunc buca ver. Ses camerats plein tema, ch'el hagi falliu la via, ni ch'ei seigi schabiau zatgei, tarmettan umens cun latiarnas e proviant sil **Cuolm** per encurir el. L'entira notg traverseschan quels plirs cuolms e **Vals**, greschan e schulan, mo anflan negin fastitg dil sepiars. Allas treis arrivian els anavos a **Tschamut** e declaran, che sch'el sesanfli aunc sil cuolm, seigi el buca pli en veta, tschelluisa havessien ei cun dar sinzur stuii anflar el. En mesa desperaziun van allura ils dus Englès culs dus umens sin nova tscherca, ferton ch'ei vegneva a **Sedrun** patertgau vid il cavar fossa per il disgraziu. La nova expediziun ei buca stada s'avanzada ton lunsch, ch'ella entaupa igl Englès cartius morts. Quel di, ch'el vevi falliu la via e nunsavend nua semenar el stgir, seigi el sefiers sin ina meidia fein a pastg e durmiu stagn e bein tochen per la damaun vi. En triumf meinan ei el el hotel, nua ch'el ha dustau siu appetit englès cun in brav solver "alla savetscha" e pagau generusamein ils umens, che vevan encuretge el. Ina tala aventura vala bia marenghins els egls d'in Englès.

*Gasetta Romontscha nr. 35, 1. da settember 1871*

### **Cun vestgadira paradisaica**

Ils 29 d.q. ei arrivau ina banda da 22 zagrenders sur l'**Alpsu** entochen **Tschamut**, en quei plirs affons en vestgadira paradisaica. Mo ina roscha naziunalgardists tuatschins sut commando dil schendarm Hosang, ha la damaun dils 30 turnentau quels gasts danunder ch'els eran vegni. Natural ch'ei ha buca muncau protestas, reclamaziuns e smanatschas da vart dils vagabunds.

*Gasetta Romontscha nr. 35, 1. da settember 1871*

### **Bialas roschas da stiarls**

Sut favoreivla aura ein ils marcadonts da **Tujetsch** e **Medel** ils 22 d.q. semess sin via cun lur bialas roschas per frequentar la fiera da **Ligiaun**. Schon da bia onns enneu han quels buca giu schi numerusas roschas. Essend ch'els han cumprau quels tiers, cunzun la primavera, bienmarcau e che las novas dall'**Italia** ein bunas, pon ins sperar ch'els fetschien uonn ina buna campagna.

*Gasetta Romontscha nr. 38, 22 da settember 1871*

### **Siatonta cavals**

Ils 19 d.q. ei sin ina excursiun militarica sut direcziun da colonel Hofstetter arrivai a **Mustér** sur l'**Alpsu** 60 officiers ed aspirants ord la scola centrala a **Thun** cun 70

cavals. Ils 20 serendan els a **Glion**, ils 21 a **Cuera**, nua che la cumpignia pren sia fin.  
*Gasetta Romontscha nr. 42, 20 d'october 1871*

### **Correspondenza dil Badus**

Essend ussa, entras scuder ora il garnezi, la lavur annuala dil pur finida, resalvond il pagar ils deivets, sche sa igl agricolant far il meglier la bilanza da sia raccolta. Jeu senuspeschel da vuler dumbrar e quintar ora si per la detta a nos purs la rendita d'uonn, quei quen san els sez excellent; jeu riscass mo da far errurs, las qualas els vegnessen buca ad approbar. Dad ina caussa fetschel jeu cheu menziun sin miu agen risico. Igl ei enconuschent daditg, ch'ei dat a **Tujetsch** bi glin e daried sem. Ina vieua cun numerusa famiglia ha questa primavera semnau mesa curtauna semglin e fatg da quei sem gl'atun 16 curtaunas, che ha pia dau 8 curtaunas per minal e vegness 32 curtaunas, ni 8 stèra per curtauna, - ina raccolta aunc mai s'udida! Quella caussa ei aber factum. Speronza ch'ina tala benedicziun vegni buca a schar schigliar en il bried dad ieli da quella vieua, grad sco il profet Elias ha annunziau alla vieua da **Sarepta**, ch'igl ieli vegni buca muncar el vischi, entochen ch'ei detti plievgia.

*Gasetta Romontscha nr. 44, 3 da november 1871*

### **Il november flurs sill'Alpsu**

La stupenta aura gida era empau tier il viv commers da biestga. Buca mo ella **Bassa** era a **Trun** vesan ins in pিরer che flurescha. Sill'**Alpsu** han ins il november anflau flurs ed umens che han dacuort passau quei pass e che audan tuttaviva buca denter ils fermes e robusts, han dil cauld stuiu trer ora geppa e viu a pasculond leu roschada armauls sco da mesa stad. Quei era in di, nua che la nebla alla **Bassa** rendeva leu ualti freid.

*Gasetta Romontscha nr. 45, 10 da november 1871*

### **Prezi da tiers**

A **Tujetsch** ei quels dis vegniu vendiu ina vacca per 20 marenghins – in schi ault prezi ei leu aunc mai vegniu pagau per ina vacca.

*Gasetta Romontscha nr. 1; 5 da schaner 1872*

### **Cuors postal**

Sco ins auda dat ei ina midada cul cuors postal sur l'**Alpsu** pil temps da stad, aschia che la posta dad **Ursera** e quella da **Cuera** arrivan per la sera a **Mustér** e restan leu sur notg per l'otra damaun beinmarvegl partir per **Cuera** ed **Ursera**.

*Gasetta Romontscha nr. 3; 19 da schaner 1872*

### **Correspondenza dil Badus**

La jamna vargada, ils 11 d.q., era scret ora la conferenza parziala dils scolasts per **Sursassiala** a **Tujetsch/Rueras**, la quala ei vegnida frequentada fetg fallombramein. Il signur inspectur, il qual saveva muort sufficientes motivs buca cumparer sez, ha per quei di giu surdau il presidi ad in versau e permurau persunal. Ton pli schliata impressiun ha ei fatg sils presents scolasts ed auters amitgs dalla scola, ch'il signur referent cun auters da ses collegas ord la medema vischnaunca, han quei di vuliu tarlischar entras lur assenza, malgrad ch'ils absents sezs vevan proponiu **Rueras** per liug da conferenza. Nuotatonmeins ha la conferenza giu liug ed ei stada interessanta muort la viva discussiun, sco era muort il collegial tscheiveret suren, il qual ils separatists han buca saviu turbelar. Quella sempla caussa ha zuar negina muntada europeica; aber en in temps, nua ch'ei vegn fatg uiara da tuttas autoritads encunter la scola dil pievel ed era schon fatg la proposiziun da metter tuts garmadis scolasts cantunals sut la bitgetta controlla ed inspecziun dall'omnipotentia ligia, lessan nus per beinmanegiar e beinvuler a tuts educaturs dils affons e schar il quet, l'ambiziun, la schalusia en cucagna, nua ch'ei setracta da luvrar cun forzas unidas



communablamein per ina aschi impurtonta e sontga caussa. E viva pia l'uniun e contralisaziun dils scolasts sursassials!

*Gasetta Romontscha nr. 3; 19 da schaner 1872*

### Tramess en

Sch'il scolast criticau ella corrispondenza dil **Badus**, el nr. 3 dalla Gasetta Romontscha, il qual dueva esser referent tier la conferenza da scolasts a **Rueras**, ei buca cumparius tier quella, sch'ei quei daventau ni per vuler esser separatist, ni per quiet, ni per ambiziun, ni per schalusia, mobein per autras raschuns. El auda denter quels scolasts che han entochen ussa frequentau tuttass conferenzas.

Sch'il correspondent digl ault **Badus** temeiva ch'ils absents, numnai separatists, havessien giu turbelau il collegial tscheiver dils presents, sche stuein nus per ussa gratular ad els ed a nus, che nus essan stai absents.

Era nus schein culla corrispondenza dil **Badus**: Ei vivi il spert d'uniun denter ils scolasts, - e mettein vitier: E pireschi il spert da malfundada critica che metta disuniun!

*Gasetta Romontscha nr. 4; 26 da schaner 1872*

### La plema dil progress

La cumissiun da taglia el district **Reianteriur** ha anflau sequent resultat cun prender si leu la rauba ed industria (*rendita*) suttaposta alla taglia, schend tenor ordinaziun la facultad communal sco quei ch'ella fuvada en vivon.

	Facultad	Carschament	Rendita	Taglia totala
<b>Tujetsch</b>	1 032 200	<b>136 450</b>	9900	1877
Medel	554 000	42 100	1900	1012
Mustér	1 937 100	111 500	40 900	3799
Sumvitg	1 328 100	71 800	6900	2441
Trun	1 141 200	44 000	21 200	2233
Schlans	160 400	-	600	299
Breil	854 400	103 200	6500	1793
	7 152 500	504 550	87 900	13 456

La plema dil progress economic ella **Cadi** auda aschia a **Tujetsch**, nua che latg e mèl flessegian en abuldonza.

*Gasetta Romontscha nr. 5; 2 da fevrer 1872*

### (23) Ils cavacristallas a Tujetsch han uonn fatg buna fadigia

**Fiug en Tgès'Alva – Ventgotg emigrants tuatschins – Buna fiera - Fuorns che han dau ora cristallas per varga melli francs - Vegniu engulau in schambun ord la vanaun - Dad ina schi ferma purgina el settember seregorda negin – Camiadas cun imposanta clarezia**

### Fiug a Sedrun

Tenor ina nosssa corrispondenza dil **Badus** ei era il vitg da **Sedrun**, ils 26 da fevrer, staus en grond prighel da vegnir intschendrus per ina gronda part. Duront in ferm suffel ha suentermiezdi via ella aschinumnada „Casa alva“, in baghetg da quater cussadents, il fiug entschiet a fugar cun vehemenza ord ils quater uni tgamins. Alla curaschusadad d'entgins umens, che han stuppau ils tgamins ordado e cun dar in lavatgau sutsi culla sprezza ei reussiu d'allontanar il prighel, che duess esser in niev spieghel per procurar in bien cundrez da fiug.

*Gasetta Romontscha nr. 9; 1. da mars 1872*

### **Emigraziun**

Questa jamna han puspei circa 120 emigrants bandunau nies cantun per serender ella tiara dalla cucagna americana. Per nies cantun ei quella sperdita da forzas da lavur e da facultad da donn, e che plirs dils emigrants anflan buca la gronda fortuna, ch'els spetgan da tschei maun dalla mar, ei era ualti probabel. Ei legra nus, cura che vivon emigrai Grischuns vegnan puspei ord l'**America** sin viseta tier nus, mo ei displai grondamein, ch'els dattan caschun tier novas emigraziuns. El davos transport era ei 50 dalla **Cadi** ed en quei 28 da **Tujetsch** cun in um da 70 onns, che han intrasglauter purtau naven quasi 1000 francs perin. En 20 onns ha quella vischnaunca, schegie ch'ei flessegia leu latg e mèl en abundanza, furniu 160 emigrants.

*Gasetta Romontscha nr. 15; 12 d'avrel 1872*

### **Act d'engraziament**

Nus suttascrets passagiers da Brown e comp. a **Basel** e **Havre**, tuts ensemen 117, secartein ch'ei seigi nossa obligaziun d'exprimer a signur J. Paul Balzer, agent a **Cuera**, che ha accordau e cumpignau nus entochen tier la mar, nies profund engraziament per il bien quitau ch'el ha giu per nus en scadin riguard, per siu ludeivel tractament e sias sacrificontas breigias duront igl entir viadi, cullas qualas el ha encuretq da levgiar a nus quel. Perquei recumandein nus grondamein signur Balzer a scadin che vegn suenter nus ell' **America**.

**Havre**, ils 12 d'avrel 1872

Jacob Antoni Beer cun famiglia

Vigilius Josef Beer

Gion Venzin

Josef Antoni Muggli

Gion Fidel Muggli

Jacob Martin Beer

Gion Antoni Hendry

*Gasetta Romontscha nr. 17; 28 d'avrel 1872*

### **In bien nurser**

per circa 1300 nuorsas vegn per la proxima stad, encunter buna pagaglia, encuretqs dalla vischnaunca da **Tujetsch**. Ulteriur sclariment dat la suprastonza.

*Gasetta Romontscha nr. 17; 28 d'avrel 1872*

### **Emprema crotscha**

Ils 24 d.q. ei l'emprema crotscha vegnida sull' **Alpsu**, sils 25 veva il viè grischun empustau umens per arver scosauda la via da nies maun. A raschun ch'il cantun ei s'obligaus da pagar la mesadad da quels cuosts, vegn ins a saver s'accordar da procurar per igl avegnir ina pli presta avertura culla speronza ch'ils Uranès porschien maun tier quei progress.

*Gasetta Romontscha nr. 26; 28 da zercladur 1872*

### **Fiera**

Il negozi da stiarls e mutgs per la fiera da **Ligiaun** ei ualti vivs ella **Cadi**. Ils biars marcadonts da **Tujetsch** e **Medel** han schon ussa fatg buna fiera, essend ch'els han vendiu lur roschas - en tut circa 450 armauls, quasi tut mutgs, ad in ferm marcadont dad **Ursera**, s'entelli cun far in bien gudogn.

*Gasetta Romontscha nr. 34; 23 d'uost 1872*

### **Cristallas**

Ils cavacristallas a **Tujetsch**, **Mustér** e **Medel** han uonn fatg buna fadigia. Els ein stai ventireivels egl anflar ed han era saviu vender bia ed ualti car. Igl ei vegniu discuvretg fuorns che han dau ora cristallas per varga melli francs in, in sulet toc vess

ins saviu vender per 250 francs. Ad **Ursera**, nua ch'ei dat bials cabinets da mineralias, per part oriundas dalla **Cadi**, ei vegniu purschiu 800 francs per in cristagl, mo il vendider vul buca dar quel per meins che 1000 francs.

*Gasetta Romontscha nr. 35; 30 d'uost 1872*

### **Vagabunds**

En **Tujetsch** e contuorn han vagabunds selubiu plirs enguladetschs. Ina dumengia durent ch'ils da **Selva** fuvan a messa, ei leu vegniu engulau in schambun ord la vanaun e tier quei aunc fatg ina viseta alla combra da carn. A **Camischolas** veva in milissier semtgau siu resti necessaris ella presenta campagna, turnond el ord baselgia, vevan ei priu ad el las caultschas dall'uniforma ed entginas bunas camischas

*Gasetta Romontscha nr. 36; 6 da settember 1872*

### **Cristallas**

Il cavar cristallas ella pezza ei sco la catscha da camutschs ina pissiun, omisdus han lur emperneivladads, mo era lur prighels. Igl emprem enconuschider e negoziant da cristallas, Giachen Fidel Cavegn da **Rueras**, che steva en relaziun mercantila cun mineralogs da differentas tiaras, ha ils 12 d.q. stuiu schar la veta cun encurir crappa. Semtgau cun siu camerat per turnar a casa, va el aunc vi si per in grep per mirar ina raschera. Strusch ha el entschiet a marclar, rump'ei ora sidault crappa, che vegnan giu sin el, smaccan en las costas ed il tgau e fieran el carteivel schon morts giu denter il glatscher e la greppa, nua ch'el ei l'otra damaun prius siado e purtaus a casa. Siu fegl, ch'era staus tier la concentrasiun dalla truppa a **S. Gagl** ed era sco ses camerats leds da puder turnar tier ses cars da casa, ha tras telegraf retschiert quella trestissima nova tier siu retuorn dil **Rosboden**.

*Gasetta Romontscha nr. 38; 20 da settember 1872*

### **Ferma purgina**

Silla magnifica aura dallas duas empremas jamnas settember ei suandau ina ruha, che ha purtau dumengia vargada ina ferma scheltira. Il termometer da Reaumur, che mussava enzacons dis avon aunc 19 grads calira, era quella damaun sbassaus sin null. Sils cuolms era il tratsch schelaus sco in fier e tschep e leu vesevan ins gronds glatschs vid ils buntadurs. Ils grauns egl ault, ch'eran aunc buca madirs, han pitiu fetg. Dad ina schi ferma purgina el settember seregorda negin, denton ei quella tuttina buca stada schi nuscheivla sco quella ch'ei, tenor igl urbari da **Tujetsch**, stada in settember el 17avel tschentaner ed ha giu ruinau leu tut ils èrs, aschia che 80 persunas, babs da famiglia cun dunna ed affons han stuiu emigrar ell'**Ungaria** per buca murir dalla fom.

*Gasetta Romontscha nr. 39; 27 da settember 1872*

### **Suffels, dracca e neiv**

L'aura ei snueivel variabla. Sin bials dis da stad sogn Martin, ha ei dau tribels suffels, dracca e neiv. Tutteninaga ha ei lura la sera dils 2 da december entschiet a camegiar e tunar e cuntinuau ditg sco da mesa stad. Silla neiv, ch'era a **Tujetsch** e **Medel** in bratsch aulta, rendevan las camiadas imposanta clarezia. Dad enzatgei semegliant san biars buca seregurdar.

*Gasetta Romontscha nr. 49; 6 da december 1872*

### **Zoppina**

A **Tujetsch** ei la zoppina rutta ora cun quei ch'igl ei vegniu turnentau in taur dalla davosa fiera dad **Altorf**.

*Gasetta Romontscha nr. 50; 13 da december 1872*

### **Lavina cuviera ina casa a Selva**

Sin reclamaziuns tuatschineras stuein nus en rectificaziun da nies davos numer rapportar, ch'ei hagi l'entschatta december dau a **Tujetsch** buca mo in bratsch neiv, mobein 7 quartas! Aschia eis ei da capir, ch'igl ei a **Tschamut** e **Selva** vegniu lavinias da tuts mauns, mo per ventira han quellas buca fatg considerabel donn. A **Tschamut** ei il hotel Rheinquelle mitschous cun ina brava pugnada, a **Selva** era ina casa cuvretga en dalla lavina. Particulara ventira ha leu in affon giu, ch'era la sera s'entardaus empau da vegnir ord casa da scola, che schai sin in ault dadens il vitg. Sin siu retuorn vegn el surpris dalla lavina, per ventira ual sper in crest, nua che la lavina sesparta, aschia ch'el fuva sin tuts mauns serraus en da quella sco en in curtinet. In chischner ei vegnius stuschaus dalla lavina in toc tut sidretg. Ils avdents dil pei dil **Badus** ein per quellaga mitschai culla tema.

*Gasetta Romontscha nr. 50; 13 da december 1872*

### **Zoppina**

Sco unfrenda dalla zoppina grassonta en **Tujetsch** ein schon ina troppa vadials giuvens ventschi a **Tujetsch** – in donn da bia mellis en consideraziun da lur caraschia dad uonn. Armauls che han giu la malsogna avon paucs onns, tuornan a pigliar ella danovamein.

*Gasetta Romontscha nr. 51; 20 da december 1872*

### **Dubel cuors postal**

Finalmein para era la **Surselva** da survegnir in dubel cuors postal temps da stad. Tier igl ordinari cuors sull'**Alpsu**, che va la damaun naven da **Cuera** ad **Ursera**, duei aunc vegnir ranschau en in secund che va naven da **Cuera** las 10 ¼, cura ch'igl emprem tren dalla viafier ei leu arrivaus e vegn entuorn las 6 a **Mustèr** per l'otra damaun serender ad **Ursera**.

*Gasetta Romontscha nr. 3; 17 da schaner 1873*

**1873**

### **In bien e fidau spazzatgamin**

vegn encuretgs per la vischnaunca da **Tujetsch**. Aspirants ston esser provedi cun buns attestats e tochen la fin dil present meins da mars tarmetter tier quels alla suttascretta ed era dar en lur cundiziuns en scret ni a bucca.

**Sedrun**, ils 10 da mars 1873

La suprastoza da vischnaunca

*Gasetta Romontscha nr. 11; 14 da mars 1873*

### **(24) Quella saluteivla ordinaziun communal mereta imitaziun.**

**Ina vadiala per 130 frs. – Ina schurnada da 7 - 10 frs. - Cun 300 stiarls fatg in splendid gudogn. – In bab maridaus treis ga cun 20 affons. – Sebarschai cun neolin. - In abnorm stan da sanadad dalla gliued.**

### **Exorbitants prezis**

Sco raritad vegn ei notificau a nus, ch'ei seigi vegniu vendiu a **Peiden** ina vadiala da 10 jamnas per 130 frs., mo a **Tujetsch** ei vegniu pagau 150 frs. per ina vadiala ed a **Mustèr** vess ins aunc pagau dapli per ina, sch'ella fuss stada venala. Sin quels exorbitants prezis e grond esit dils tiers fuss ei da giavischar in carschament da quels, sco ei vegn raquintau dad ina caura a **Zignau** ch'ha fatg onn 5 anseuls ed uonn 4 e dad ina nuorsa en **Tujetsch**, ch'ha 4 tschuts.

*Gasetta Romontscha nr. 13; 28 da mars 1873*

### **La fiera da Tujetsch**

che curdass uonn sin dumengia, vegn tenuta gliendisdis, ils 9 da zercladur.

**Sedrun**, ils 28 da matg 1873

La suprastonza

*Gasetta Romontscha nr. 22; 30 da matg 1873*

### **Cuors dubel sull'Alpsu**

Gl'emprem fenadur entscheiva la posta dall'**Alpsu** cun siu dubel cuors. Gl'emprem parta da **Cuera** la damaun las 5 e 30. ... ed arriva las 6 (18) e 30 ad **Ursera**. Il secund cuors banduna las 11 da miezdi **Cuera** ... e vegn ad **Ursera** allas 9 (21) e 55. ... **Uri** ha fatg uonn pli plaun ch'onnn d'arver l'**Alpsu**, ils umens uranès han giu gronda lavur cun fierer ora la neiv dil **Gottard**, nua ch'ina troppa Tuatschins ein vegni en agid ed han fatg ina schurnada da 7 – 10 frs. sin quen dalla Confederaziun, che sto pagar quellas lavurs.

*Gasetta Romontscha nr. 26; 27 da zercladur 1873*

### **Generus susteniment**

Contribuziun per susteniment dils persecutai spirituals catolics dalla **Svizra**.

Contribuziun da **Tujetsch** en duas ratas tras signur farrer e caplon 100 frs. ...

Il comité dall'Uniun da Pius

*Gasetta Romontscha nr. 30; 25 da fenadur 1873*

### **Reteniu il fiug**

Duront il ferm temporal da venderdis sera ei il tun daus giu en in uaul a **Tujetsch** e mo cun gronda breigia han ins pudiu retenir il serasar dil fiug.

*Gasetta Romontscha nr. 32; 8 d'uost 1873*

### **Fiera**

Ils marcadonts da biestga entscheivan a semetter sin via per la fiera da **Ligiaun**, tgi cun tema e tgi plein speronza e fidonza sils aults prezis e bien esit. Sch'ei paghi sco onn, seigi ei aunc adina da gudignar, schegie ch'ins hagi cheu pagau car. La pli gronda roscha ch'in da nos marcadonts ha enzacuras catschau sur cuolm, ei quella da Paul Schmet da **Tujetsch**. El ei semess sin via cun 270 tgaus e zuar la gronda part mutgs. Sin ses 300 armauls, ch'el ha giu la stad per las alps entuorn ha el piars 11 – in bi capital - , mo aunc adina moderada sperdita sin ina tala massa tiers. Bien viadi e buna fortuna!

*Gasetta Romontscha nr. 38; 19 da settember 1873*

### **La fiera da Rueras**

dils 12 d'october che croda uonn sin ina dumengia, vegn tenuta il di suenten, gliendisdis ils 13 d.q.

*Gasetta Romontscha nr. 41; 10 d'october 1873*

### **Speronza sin buna fiera**

Il renomau marcadont da **Ligiaun**, il qual ha cun ses 300 tgaus giu fatg in splendid gudogn sill'emprema fiera da **Ligiaun**, ei quella ga puspei semess sin via cun circa 280 armauls. Duess la gronda catschada da tiers buca lavegiar il giug, sche speresch'ins muort la gronda tscherca da tiers e la gronda abuldonza da pavel, sin ina buna fiera. Denton bien viadi!

*Gasetta Romontscha nr. 42; 16 d'october 1873*

### **Cadi.**

Tuts quens dil defunct Placi *Sigisbert Monn* da (**Rueras**) **Tujetsch**, che seteneva si a **Lyon** (*morts el spital ils 9 da fevrer; 35 onns*), ein da consignar a siu curatur Tumaisch



Huonder da **Rueras**.

*Gasetta Romontscha nr. 47; 21 da november 1873*

### Ils uauls

... aschia ch'ina tschuncheisma lenna en **Tujetsch** ha bia meins valeta ch'ina ellas **Pardialas d'Uors**. Taxaziuns dils uauls communal: **Tujetsch** 37'000 frs., **Medel** 25'000 frs., **Mustér** 80'000 frs., **Sumvitg** 168'000 frs. **Trun** 50'000 frs, **Schlans** 20'000 frs., vischnaunca da **Breil** 101'000 frs., vischinadi da **Breil** 6600 frs. ...

*Gasetta Romontscha nr. 48; 27 da november 1873*

### Vegn affons

Sin nossa davosa nova da **Tavanasa** vegn ei communicau a nus, ch'ei vivi sisum la val **Tujetsch a Tschamut** ina lètg che seigi onn (*ils 24 da zercladur 1872 in Gion Battesta ed in baret*) ed uonn (*ils 8 da december 1873 in Gion Battesta ed ina Maria Giuseppa*) vegnida benedida cun schumellins, ils emprems seigien morts, mo ils davos sauns e viscals. Lur bab (*Gion Martin Peder*) ei 53 onns vegls, maridau per la tiarzaga, da ses 20 affons ein 13 aunc en veta. Sia davosa dunna (*Anna Maria Riedi*), ch'ha en aschi cuort temps survegniu 4 affons ei 43 onns veglia. «Non erit statim finis!»

*Gasetta Romontscha nr. 51; 17 da december 1873*

### 1874

La votaziun suls 3 pugns da recapitulaziun (I lescha pils domiciliai, II lescha d'ingant, III lescha riguard pagar giu grevezias perpetnas) ha dau sequent resultat ella **Cadi**:

	I		II		III	
	pro	contra	pro	contra	pro	contra
<b>Tujetsch</b>	47	27		86		80
Medel	14	92		106	1	105
Mustér	122	19		138	9	113
Sumvitg	137			132	113	
Trun	91			91		91
Schlans	16	1		17		16
Breil	52			51	1	46
Total	479	139		621	124	451

*Gasetta Romontscha, nr. 5, 30 da schaner 1874*

### In Bavarès

Sco raritad relatein nus ch'in marcadont bavarès hagi a **Tujetsch** perfin cumprau si vadias giuvnas per saver catschar quellas ton pli bein e cheutras survegnir ton meglieras vaccas da nossa razza. Per destinguidas vadias ual zavradas seigi vegniu purschiu tochen 8 marenghins.

*Gasetta Romontscha, nr. 12, 21 da mars 1874*

### Neolin

En consequenza ch'ina dunna ed in giuven da **Tujetsch** ein dacuort sebarschai zun fetg cun ir entuorn cun neolin (*ina sort d'ieli*), ha quella vischnaunca anflau per bien da totalmein scumandar da barschar neolin. Quella saluteivla ordinaziun communal mereta imitaziun.

*Gasetta Romontscha, nr. 17, 23 d'avrel 1874*

### Facultad

Quei onn haveva **Tujetsch**: rauba communal 173'500 frs.; rauba privata 980'200 frs.; entrada d'industria 9200 frs.; taglia virila 216 frs.

*Gasetta Romontscha, nr. 20; 16 da matg 1874*

### **Posta**

Il secund cuors postal sur l'**Alpsu**, menaus en onn, para muort schliata rendita d'anflar difficultads tier il departement postal a **Berna**, che less supplir quel tras in cuors postal denter **Mustér** e **Cuera**. Denton ei vegniu fatg reclamaziuns. Cuors postals pauc rendabels dat ei aunc biars.

*Gasetta Romontscha, nr. 21; 22 da matg 1874*

### **Ei vegn tschercau**

da prender si per la proxima stad sut favoreivlas cundiziuns in s.h. cavagl mascial per l'alp da cavals dalla vischnaunca da **Tujetsch**. Da s'adressar tir la tit. suprastanza da leu.

*Gasetta Romontscha, nr. 22; 30 da matg 1874*

### **Sanadad**

Ella vischnaunca da **Tujetsch** regia dad in grond temps enneu in abnorm stan da sanadad dalla glieud. Ils spirituals dil liug ed ils miedis da **Mustér** han cuntinuadamein stuiu esser sin via, per porscher agid als malsauns. Ei ha dau el medem temps 16 – 18 malsauns, e da quels fuvan 11 mo en in vischinadi, el qual igl ei era el decuors da strusch in meins stau 4 baras en casas grad ina sper l'autra, aschia che la fama ni plitost tema u superstiziun dil pievel leva far esser quei ina malsogna contigiusa. La malsogna principala, priu ora enqual cass, para dad esser stau il malcostas e la febra dils gnarvs. A proporziun dil diember dils malsauns ein aunc ussa ils mortoris buca numerus, mo ils allegai miedis han tier quei favoreivel resultat contribuìu zun bia tras lur promptadad, premura e savida, e merettan perquei nossa engrazieivladad e recumandaziun. Igl ei zuar aunc adina da biars malsauns en nossa pleiv, aber speronza ch'il prighel grond seigi removius e dustaus. Curaschusadad enten il pigliar la malsogna e perseveronza e speronza el decuors da quella quentel jeu era sco facturs tiellas medischnas dils miedis, per forza ad interim mitschar dalla faultsch dalla mort.

*Gasetta Romontscha, nr. 25, 19 da zercladur 1874*

### **(25) In temporal cun ina tempiasta aunc mai sudida**

**Dus mattatschs dai ell'aua. – Tujetsch cul bien exempel. - Stupenta aura sereina e caulda. – Strapazs per rumper via. - Vendita per 10'000 frs. – Cun 134 vuschs per mantener il cumin. - La tempiasta veva denter en garnials sco bialas nuschs.**

### **Disgrazia**

Dacuort ein dus pigns mattatschs da **Tujetsch** dai ell'aua en dus differents loghens e fussen stai ventschi senza spert agid. In da quels ei daus ell'aua si mises ed ei vegnius liberaus da siu resolut e curaschus camerat da 15 onns. Duri Huonder da **Sedrun**, che ha buca mo liberau la veta, mobein era tgirau il blessau cun tut pusseivel quitau entochen che siu bab ei arrivaus la sera.

*Gasetta Romontscha, nr. 29; 17 da fenadur 1874*

### **In tgaun**

da grondezia mesauna, spezia da pudel, cun pelegna liunga tschuora nera, giudem las toppas alv, ei fugius tschella jamna naven da siu proprietari. Tgi che sa dar novas da quel survegn in commensurau „trinkgeld“ da Calleger, nurser a **Tujetsch**.

*Gasetta Romontscha, nr. 30; 25 da fenadur 1874*

### **Classena**

En ina vischnaunca dalla **Cadi** ei vegniu claus 44 tschuncheismas lunghezia culla lenna fendida ord classena dus lenns; da far cun lattas vessien ins duvrau 100 da quellas. Speronza ch'ei vegni gleiti dapertut da quella da buca dar ora pli lattas per clauder, sco la vischnaunca da **Tujetsch** ei schon avon decennis ida ordavon cul bien exempel.

*Gasetta Romontscha, nr. 32; 7 d'uost 1874*

### **Vendiu tschien vaccas**

Igl ei aunc massa tiers da vender; mo la vischnaunca da **Tujetsch**, che ha schon vendiu 100 vaccas, vess aunc da vender 100. Muort ils aults prezis d'onn ei igl unviern vargau vegniu tratg tut pli bia tiers ch'igl ordinari. Per ventira ha ei tochen ussa fatg stupenta aura sereina e caulda, aschia ch'il termometer mussava quels dis 18 grads Reaumur. Quei spargna bia fein, ch'ei schon ussa fetg cars.

*Gasetta Romontscha, nr. 43; 23 d'october 1874*

### **Scamond da neolin**

La jamna vargada ein a **Danis** treis personas sebarschadas malamein cun dar ora neolin da cazzola. **Tujetsch** e **Mustér** han scumandau da barschar quei prigulus ieli, speronza ch'era autras vischnauncas suondien quei bien exempel.

*Gasetta Romontscha, nr. 44; 30 d'october 1874*

### **Tschun grads freid**

La stupenta aura da quest atun para d'haver priu sia fin cun s. Martin, nua ch'igl ei tuttenina vegniu ina ferdaglia da 4 grads Reaumur (5 grads C). ... Il pli remarcabel eis ei che a **Tujetsch** catschavan ils truffels novs schon in bi cagl en tschaler!

*Gasetta Romontscha, nr. 46; 13 da november 1874*

### **Cun tschien stiarls**

Entgins marcadonts da **Tujetsch** e **Medel** ein malgrad la gronda nevada semess ils 18 d.q. a **Mustér** sin viadi cun circa 100 stiarls per serender sur il **Lucmagn** silla tiarza fiera da **Ligiaun**. (Quels paran d'haver pli gronda curascha ch'ils signurs conducturs dalla posta sursilvana.)

*Gasetta Romontscha, nr. 47; 21 da november 1874*

### **Prighel da lavina**

Finalmein ha ei calau da never ils 21 suentermiezdi. ... **Tujetsch** e **Medel**, nua ch'ei era il pli grond prighel da lavina, han persunter survegniu in vehement suffel e cufla, ch'ei temeivan ch'ei mass cullas casas. Ils umens han giu da far bia strapazz quels dis per rumper via si els mises, nua che glied e tiers eran nevi en. ...

*Gasetta Romontscha, nr. 48; 29 da november 1874*

### **Nevadas**

Odem il november ed all'entschatta da december ha ei dau duas grondas nevadas. A **Selva** e **Rueras** ella **Val Tujetsch**, eran plirs fugi ord casa per la lavina, mo per ventira ein els mitschai culla tema.

*Gasetta Romontscha, nr. 51; 18 da december 1874*

### **Tiara dalla cucagna**

Tgei che selai reussir entras in bienmanipulau public ingant, quei ha semussau la jamna vargada a **Tujetsch**, nua ch'igl ei ella capitala vegniu vendiu ina pintga e schliata mesacasa, mo bein situada cun 1500 tschuncheismas prau grass ed in magher (il qual po dar 3 tschuncheismas fein) per la summa da buca meins che 10'000 frs. Cun quintar la casa caraschia vegn quei prau grass aunc adina sin 4 frs. la



tschuncheisma! Ei quei buca la tiara dalla cucagna, nua che latg e mèl flessegian en abuldonza.

*Gasetta Romontscha nr. 10; 5 da mars 1875*

### **Maturitad**

Igl examen da maturitad ei dacuort vegnius mess giu da sequents students grischuns: ... Berther da **Tujetsch**. Ses studis ha el fatg a **Nossadunnaun** ed ei staus gl'unviern a **Cuera** per ton meglier saver sepreparar tier siu examen, ch'el ha fatg cun tutta honur. ...

*Gasetta Romontscha nr. 13; 24 da mars 1875*

### **Votaziun per mantener il cumin**

La votaziun fatga ella **Cadi** pervia dalla moda co las elecziuns circuitalas duein vegnir fatgas, ha giu sequent resultat: per tener cumin sco tochen encheu han votau unanimamein **Medel** cun 109, **Tujetsch** cun 134, **Mustèr** cun 165, **Sumvitg** cun 120, **Trun** cun 120. A **Breil** eran 29 votants per tener cumin, 39 levan far las elecziuns sin vischnaunca, per il qual modus era **Schlans** ha sedeclarau unitamein cun 34 vuschs. Aschia ei pia cun 677 vuschs encunter 73 concludiu da far cumin sco vivon. **Trun** ha en sia risposta schau sentir il giavisch, ch'ei fussi forsa buca malfatg da midar giu u alternar il liug da tener cumin denter las treis vischnauncas **Mustér**, **Sumvitg** e **Trun**.

*Gasetta Romontscha nr. 16; 16 d'avrel 1875*

### **La posta va mo inaga**

A raschun ch'il secund cuors postal da stad sur l'**Alpsura** rendeva buca bia, e che negin sehanava fetg da sorprender quel dil maun d'**Uri**, vegn quel buca menaus en uonn. La posta va la stad mo inaga per di ad **Ursera**, da **Cuera** a **Mustér** e viceversa aber duasga. Per la comunicaziun locala dalla **Surselva** ei quella midada buca disavantagiusa.

*Gasetta Romontscha nr. 17; 23 d'avrel 1875*

### **1875**

Sco deputai ein eligi: il mistral regent, mistral Arpagaus, cusseglier guvernativ Condrau, professor Johann Baptista Cariget ed assistent Schmid da **Tujetsch**. ... La dertgira circuitala ei vegnida cumponida ord ils derschaders: mistral Arpagaus, gerau Bundi, **Medel**, assistent Schmet da **Tujetsch**, derschader Al. Huonder **Mustér**, gerau Martin Demont e gerau Tumaisch Fidel Decurtins, omisdus dalla vischnaunca da **Trun**. Sco suppleant vegn gerau *Lurenz Jagmet* da **Tujetsch** eligius cun tschun auters.

*Gasetta Romontscha nr. 19; 6 da matg 1875*

### **Il pass**

digl **Oberalp** ei ussa aviarts per carrs.

*Gasetta Romontscha nr. 2; 28 da matg 1875*

### **Creisma**

Ils 13 d.q. ei monsignur uestg Willi arrivaus a **Mustér** sin siu viadi da Creisma en **Surselva** e leu vegnius retschards dad ina gronda processiuin. Ils 15 eis el, suenter haver cresmau a **Medel** e **Tujetsch**, puspei semess sin viadi da retuorn. Speronza ch'el hagi obteniu ina buna impressiuin da ses diocesans sursilvans.

*Gasetta Romontscha nr. 25; 18 da zercladur 1875*

### **Turissem**

Il til dils jasters sur l'**Alpsu** ha uonn entschiet pli baul ch'antruras; a **Mustér** passan mintgadi crotschas ed ils admiraturs dalla biala natira pon buca ludar avunda il

present magnific colorit dils bials funs.  
*Gasetta Romontscha nr. 26; 22 da zercladur 1875*

### **Tempiasta**

La sera dils 7 da fenadur ei vegniu sur **Mustèr e Tujetsch** dil maun digl **Oberalpstock** in temporal cun ina tempiasta aunc mai sudida en quellas cuntradas. Il termometer a **Mustér** era quei di sesalzaus sin 26 grads Celsius e tier la tempiasta, che ha cuzzau in quart d'ura, sbassaus giu sin 15. Sut in horrent tunar e camegiar deva ei garniala che las vias ed ils cuolms eran tut alvs, ins ha anflau garnials dad in zoll e duas lingias grondezia! Mo a **Sedrun e Camischolas** par'ei d'esser stau ina aura aunc bia pli stermentusa. La tempiasta veva denter en garnials sco bialas nuschs, che han totalmein manizau si ils bials segals e glins e sfracchau tetgs e finiastras. Il tetg da guotas dalla casa dil depot da posta a **Camischolas** ves'ora sco in dratg; ella casa da caplania a **Sedrun** ei buc'ina schiba da finiastra restada entira, ed ella sala dalla Cruna era ei dau en ina tempiasta che cuvrevla il plantschium en ina altezia da dua detta. Tier tut quei ei il tun aunc daus giu quaterga egl uaul e vess sut il stermentus suffel dau fiug quel, sche la dracca e tempiasta vess buca stizzentau la flomma. Duront quella stermentusa aura a **Sedrun e Camischolas** ei la squadra da **Rueras** mitschada ualti bein ed a **Selva e Tschamut** ha ei gnanc pluiu.

*Gasetta Romontscha nr. 28; 9 da fenadur 1875*

### **(26) Mo treis quarts d'ura han sturniu e terrau las bialas e splendidas speronzas.**

**Garniala dad 1 – 2 zolls (1-2 polichs) diameter. - Dus umens han piars disgraziadamein lur veta ella Val Curnera. - Refusau la constituziun cantunala. - Dus cuors postals a di. - Il depot da posta a Rueras cun 100 frs. salari annual.**

### **Correspondenza dil Badus**

La sera dils 7 da fenadur ei stada terribla pella gronda part dalla magnifica val **Tujetsch**. In temporal cun grossa garniala dad 1 – 2 zolls diameter ei sesbuccaus oragiu dils pézs **Crispalt e Giuv** e serasaus entroma sillas bein situadas squadras da praus ed èrs sur **Rueras, Zarcuns, Camischolas, Gonda, Salins e Sedrun**, sfraccond giu e manizzond si pli u meins tut ils fretgs dil bi funs. Mitschai cun tema orasut il ruh unviern cun sia gigantica nevada senza considerablas sventiras, steva dapresent nossa cultira, muort la favoreivla primavera, ch'ei ha fatg, en in stan zun bein avanzau, ch'empermetteva biala pareta e reha raccolta per tuts fretgs. Mo treis quarts ura da quei ominus di han sturniu e terrau las bialas e splendidas speronzas da nos premurai agricolants. Ils bials segals ellas squadras sura numnadas (grad las principalas da graun), ein totalmein destrui e vegnan dapresent segai giu. D'atun e gl'unviern vegn ins a sentir la munconza da sternem bunamein ton sco quella dil graun. Pils dumiecs e truffels eis ei aunc grond dubi, sch'els pon dar ina tut mesauna raccolta; il renomau glin da **Tujetsch**, ch'era ussa ella fluriziun, sa dar aunc empau teglia, mo pauc sem. In donn quasi nunspitgau encorscha ins per ussa vid il fein, essend il zart e bien da feglia tut manizau giun plaun e formalmein catschau el tratsch, aschia ch'ina part mises vegnan schon ussa fenai, avon che l'auter fein, ed in per alps han buca saviu vegnir cargadas ad interim, essend il bi pastg entir da quellas spazzaus giu. – Il donn actual en general sin pastiras ed alps dalla communitad, sin praus ed èrs dils particulars astg'ins gagliardamein taxar sin 40 – 50'000 frs., senza quintar il donn che nescha pli tard ord las consequenzas da quella catastrofa. La devastaziun els uauls (nua ch'ei ha pigliau fiug en quater loghens) ei gronda. Igl ei ver, che beinenqual beinstont dils donnegiai po vertir il manco per quest onn, ed era ils veramein paupers han lur medem regress visavi als fondos pauperils da

vischnaunca; mo il pli fetg piteschan senza dubi quels dalla classa mesauna (e leutier auda la gronda part), ils quals ston cun breigia e lavur vegnir atras cun lur famiglia ord la rendita dils tiers e dil funs, forsa hipotecaus. – Dil donn succedius vid tetgs e baghetgs, vid finiastras e habitaziuns vi jeu buca far detagliada menziun. Sut talas trestas e deplorablas circumstanzias tertgass il suttascret correspondent bunamein, che nosa ludeivla vischnaunca astgass motivadamein spluntar per in subsidis, u tiella cassa d'agid cantunala, ni tier la caritad beinvulenta da sias vischinonzas, tonpli ch'ils subsidis stuessen buca vegnir dai ussa ed immediat, sonder plitost sin d'atun e sil proxim unviern.

Sco ins ha schon udiu, ha nies ludeivel magistrat dalla **Cadi** designau in pèr delegai per inspectar e calcular pressapauc il donn en nosa vischnaunca. Quei conclus ei ludeivels e corrects e nus essan schon oravon engrazieivels persunter, perschudi, che nuot ei meglier ch'ina nunpartischonta persunala inspecziun, ton per far constatar il donn sez, sco era per promover a siu temps il sura indicau subsidis.

*Maurus Desax, plevon a Sedrun*

*Gasetta Romontscha nr. 29; 16 da fenadur 1875*

### **Fieras**

Marcadonts da **Tujetsch** e **Medel** han malgrad la schliata fiera da **Ligiaun**, tuttina ughegiu d'instradar leu novas roschas. ... Silla fiera dad **Altorf** dalla jamna vargada era ei catschau sull'**Alpsu** da marcadonts dalla **Cadi** circa 100 vaccas, mo muort il grond biestgam ei quella fiera ida mal, damai ch'ils Tessinès han turnentau sul **Gottard** lur vaccas. Era las vaccas da maz erien beinmarcau ad **Altorf**.

*Gasetta Romontscha nr. 43; 20 d'october 1875*

### **Marcadont bavarès**

In signur bavarès d'**Ebersberg** ei staus tochen **Tujetsch** ed ha turnau a cumprar si ina roschada stiarlas per 80 – 120 frs. il tgau.

*Gasetta Romontscha nr. 44; 28 d'october 1875*

### **Correspondenza dil Badus**

La vischnaunca da **Tujetsch** ha da registrar da temps en temps en sias annalas zun trestas catastrofes. Gliendisdis vargau, ils 10 d.q., han dus umens piars disgraziadamein lur veta ella **Val Curnera** dadens l'alp **Cavradi** da **Trun**. Els fuvan occupai da far via atras la neiv entochen tiellas meidias da fein a pastg, ch'els levon l'auter di menar a casa. Quater umens eran allas 10 avonmiezdi s'avanzai ordavon cun spelar ora la neiv entochen ualti datier dallas meidias, duont che plirs auters reparavan la via circa duas uras pli anora ella val. L'auter di duevan circa 50 umens dumandai gidar a vegnir ora cul fein. Ils 4 umens ordavon ein gleiti vegni ella lavina cun tagliar atras in cuflau da neiv e mo in ha cun gronda breigia pudiu sefar libers dalla neiv ed arrivar en brauncas entochen tiels auters umens, per dar avis dalla disgrazia (el sa aunc ussa buca traversar la stiva, igl ei in giuven da circa 17 onns). Arrivond suenter circa 2 uras gl'agid dils auters, han quels aunc cavau ord la neiv in mat da 18 onns vivs, mo anflau ils dus auters schon morts. La disgrazia ei ton pli gronda e sensibla essend ch'in dils morts, stalter Stiafen Schmet – in brav e survetscheivel um, ei bab da casa da 9 affons en veta, denter ils quals siu fegl, che vess gleiti sez piars la veta, ei il pli vegl e dumbrava mo 17 onns. L'auter miert ei Gion Fidel Peder, fegl da Gion Martin Peder, ei in giuven da strusch 21 onn, fargliun d'ina vart cun 8 da sia madregna e 2 agens fargliuns, dils quals tuts el er' il pli vegl e fuss staus la petga dalla famiglia, ton pli che siu bab ei avon dus onns vegnius disgraziaus egl uaul, ha rut in bratsch ed ei aunc ussa buca bein habels tiella lavur. Il pli trest ei stau il transport dils cadavers ord quella macorta val entochen **Tschamut**, che ha cuzzau tochen las duas suentermiezdi; mo zun tresta ei era la sepultura dils 13 d.q. stada, nua ch'ins veseva tons orfans ed ina cumbrigiada vieua bargend spella

freida fossa da lur pli cars da casa, ils quals eran 3 dis avon schon vegni cavai ord ina quasi medema freida fossa, nua che la mort veva provisoricamein satrau els igl empren. – Dieus, il bab dils orfans, dallas vieuas da tuts sfortunai consoleschi quels ch'ein restai anavos e detti als morts il perpeten ruaus.

*Gasetta Romontscha nr. 2; 13 da schaner 1876*

### **Collecta**

La collecta fatga ella **Cadi** per ils Franzos disgraziai entras las inundaziuns e per ils basignus vischins dil cumin, che han pitiu grond donn dalla tempiasta, ha giu sequent resultat. La vischnaunca da **Mustér** ha contribuiu 280 frs., **Tujetsch** 184, **Medel** 142, **Sumvitg** 104 frs 12 ct., **Trun** 180, **Schlans** 15, fa ensemen 905 frs. 12 ct. **Breil** ha giu collectau pli baul 50 frs. per la **Frontscha** e tarmess quei direct a **Cuera**.

*Gasetta Romontscha nr. 3; 20 da schaner 1876*

### **Refusau la constituziun**

Suenter che **Tujetsch** ha refusau la nova constituziun cantunala cun 176 vuschs e **Medel** cun 126 ha l'entira **Cadi** 980 refusonts e mo 4 acceptonts.

*Gasetta Romontscha nr. 15; 14 d'avrel 1876*

### **Pass Alpsu**

Finalmein eis ei tuttina vegniu decidiu a **Berna**, ch'il frequentau pass dall'**Alpsu** duei per la stad haver dus cuors postals a di. Plirs temeivan, ch'enstagl dil secund cuors, dessi ei mo in cuors **Cuera** – **Glion**.

*Gasetta Romontscha nr. 16; 20 d'avrel 1876*

Ils cuors postals sull'**Alpsu** ein definitivamein ranschai en sco suonda: il cuors annual va naven da **Cuera** las 5 e 30 dalla damaun ed arriva ad **Ursera** las 6 e 35.

*Gasetta Romontscha nr. 19; 12 da matg 1876*

### **Inspecziun**

Signur Oberbauinspector Salis ha quels dis inspectau la strada militar sur l'**Alpsu**, e sco ins auda eis el staus bein cuntents cul manteniment da quella.

*Gasetta Romontscha nr. 33; 18 d'uost 1876*

### **Plazzas postalas**

Ei vegn cheutras scret ora en libra concorrenza:

Il depot da posta a **Rueras** cun 100 frs. salari annual.

Ils aspirants ston sin la fin da quest meins dar en al suttascet, metter vitier in attestat da conduita, notificar igl onn da naschientscha ed il num da lur liug nativ, descriver la situaziun da lur casa e dil local da biro.

Il dierctur circuital da posta:

Stäger

*Gasetta Romontscha nr. 34; 25 d'uost 1876*

### **La fiera da Rueras**

vegn cun approbaziun dil davos Cussegl Grond tenuta ils 7 d'october d.q. e la sonda avon la fiera d'**Altorf** digl october.

La suprastonza da **Tujetsch**

*Gasetta Romontscha nr. 39; 29 da settember 1876*

### **Annunzia e recumandaziun**

Tier l'avertura dallas scolas fa il suttascet enconuschent, ch'el vendi material da scola, pupi, hefts, tenta e plemas per in fetg raschuneivel prezi.

E. Deragisch, ligiacudischs a **Mustér**

*Gasetta Romontscha nr. 41; 13 d'october 1876*

### **Annunzia da mort**

En profunda dolor fagein nus dalunsch da nossa veglia patria enconuschent a nos stimai parents, amitgs ed enconuschents ella **Cadi**, ch'ei hagi plaschiu agl Altissim da clamar naven da questa speronza tier ina meglia veta nossa preziada consorta e cara mumma

### **Maria Ursula Gieriet, nata Genelin da Sumvitg**

Ella ei spartida ils 31 d'october vargau provedida cun tuts perduns e sacraments dils moribunds ella vegliadetgna da 35 onns e 10 meins.

Nus recumandain nossa carissima defuncta alla pia memoria da tuts nos parents ed amitgs.

Il combrigiau mariu

**Stillwater, America**, 4 da november 1876

Gion Antoni Gieriet e ses treis affons

*Gasetta Romontscha nr. 48; 1. da december 1876*

### **Piars**

ina patenta (*Hausierpatent*) per rauba da bratsch, sut il num Carl Cavegn a **Sedrun**.

Igl anflader ei supplicaus da remetter quella al proprietari encunter ina commensurada bonificaziun

*Gasetta Romontscha nr. 1; 5 da schaner 1877*

### **(27) A Rueras grassescha la difteria quasi en tuttas casas**

**In sulet bostger per Sursassiala.** – Ei ha plitost pareta da vegnir unviern che primavera. - Ils dis canins han purtau gronda steppadad e fermes stempraus. - **Sedrun** tema ils druns. - In grond laud als cantadurs da **Sedrun**. - Igl ei miert leu dabia affons.

### **Strihau il secund cuors**

Cun caschun ch'il Cussegl Federal ha strihau il secund cuors postal sull'**Alpsu** muort memia pintga frequenza da quel, ei il magistrat dalla **Cadi** s'adressaus tier la direcziun postala a **Cuera** culla supplica da procurar ch'ei vegni persunter egl interess dall'entira **Surselva** ranschau en silla stad in cuors local da **Cuera** a **Mustér**, enstagl sco vivon mo da **Cuera** a **Glion**.

*Gasetta Romontscha nr. 5; 2 da fevrer 1877*

### **La patenta alla scolasta**

En dus particulars cass, nua che cussegls da scola ein passai si sco petents e susteniu da buns attestats digl inspektorat da scola, ha el fatg in'exceptiun e dau la patenta alla scolasta Onna Maria Caplazi da **Surrein**, che ha schon dau 17 onns scola ed ils davos onns quella da **Sedrun** cun 50 – 60 scolars en otg classas e zuar cun generala cuntentientscha.

*Gasetta Romontscha nr. 9; 2 da mars 1877*

### **Bostger**

Sin giavisch digl inspektorat cantunal han las vischnauncas da **Mustér**, **Tujetsch** e **Medel** seschau en da formar ensemen in revier forestal ed emploiar in bostger cun 1100 francs paga.

*Gasetta Romontscha nr. 14, 5 d'avrel 1877*

### **Stuiu better tiara**

Ils marcadonts da stiarls entscheivan a sereghegljar ella **Cadi** e spendan ludeivels prezis. Era ils vadials tumprivs pagan bein. Fein maunca ei buc, malgrad la schliat'aura dil mars ed avrel. Quella entarda las lavurs dalla cumpignia. En **Tujetsch** han ei stuiu better tiara per saver arar buca memia tard; entuorn quels englars terrenai era ei aunc massa neiv sils praus. Mo ils Tuatschins han per moda d'arar gl'emprem e per suenter better "ad jarva".

*Gasetta Romontscha nr. 17, 26 d'avrel 1877*

### **Avrel freid e bletsch**

Gl'avrel cun sia aura bletscha e freida ei vargaus; il proverbial "Claras calondas e stgir meins" ei cheu severificaus. Calonda matg sei stada stgira e freida, lein ussa mirar, sch'il meins matg croda ora bials sco in desiderass zun fetg; mo oz, ils 2, ha ei plitost pareta da vegnir unviern che primavera. Il termometer muossa 2 grads freid. En **Tujetsch** ein ils funs aunc cuvretgs cun neiv ed ier cuflava leu sco da miez unviern.

*Gasetta Romontscha nr. 18, 3 da matg 1877*

### **Publicaziuns**

Josef Anton e Martina Jacomet da **Sedrun** van ell'America. Lur quens ein da dar en enteifer 3 jamnas ad assistent Schmet.

*Gasetta Romontscha nr. 19, 10 da matg 1877*

### **In Tuatschin**

Dumengia vargada ha monsignur uestg Willi benediù ora 11 spirituals en quei era in Tuatschin, signur Thomas Beer da **Sedrun**. La primizia ei dumengia, ils 19 d'uost.

*Gasetta Romontscha nr. 32, 10 d'uost 1877*

### **Messa nuviala**

L'indicada messa nuviala a **Sedrun**, ils 19 d.q., ei vegnida tenuta a **Sedrun** cun biala solemnitad e sut gronda participaziun dil pievel. La respectabla cumpignia da students tuatschins ha legrau la sera ses convischins cun in fiug artificial – ina caussa aunc mai s'udida en quella val -, nua ch'ei flessegia latg e mèl en abuldonza.

*Gasetta Romontscha nr. 34, 24 d'uost 1877*

### **Alpsu**

En **Surselva** ein ils dus hotels digl uaul da **Flem** stai emplenì ualti bein, duront che **Breil** e **Mustér** han uonn buca giu schi bia currants sco onn, persunter ei stau ton pli bia passants per l'**Alpsu**.

*Gasetta Romontscha nr. 32, 10 d'uost 1877*

### **Tema dil Drun**

Ils dis canins han purtau questa jamna gronda steppadad e ferms stempraus. Ils tribels uradis cun ferm suffel, tunar e camegiar dalla notg dils 21 sils 22 han mess en alarm entirs vischinadis sco **Sedrun** e **Zignau** che temeivan ils druns.

*Gasetta Romontscha nr. 34, 24 d'uost 1877*

### **Meglier ch'il "Domchor"**

Tier la messa nuviala a **Sedrun** dils 19 d'uost, havein nus giu caschun d'admirar il bi cant ecclesiastic da leu. Per nies grond plascher porta ussa la Allgemeine Schweizerzeitung da **Basel** ina corrispondenza d'in viandont, ch'ha udiu quei cant ina dumengia, in grond laud als cantadurs da **Sedrun** ed a lur premurau instructor signur caplon *Giachen Antoni Augustin, Alvaschein*. Schegie che quella giuventetgna hagi negina cultivaziun musicala, hagi ella cantau meglier ch'igl aschignumna "domchor" da **Berlin** a **Basel**.

*Gasetta Romontscha nr. 38, 21 da settember 1877*



### **La fiera da Rueras**

Vegn tenuta la sonda avon la fiera d'Altorf, ch'ei sonda proxima, ils 6 d'october.

**Camischolas**, igl 1. d'october 1877

La suprastonza da **Tujetsch**

*Gasetta Romontscha nr. 40, 5 d'october 1877*

### **Annunzia da mort**

En profunda dolor fagein nus da saver a nos stimai parents ed enconuschents, ch'ei hagi plaschiu agl Altissim da clamar ord questa speranza tier ina megliera veta nossa cara sora ed onda

**Rosa Martina Berther**

Ella ei spartida ils 23 d'october en ina vegliadetgna da 61 onns, provediada cun ils sogns sacraments e perduns.

Nus recumandain l'olma dalla cara defuncta alla pia memoria da tuts nos enconuschents.

Gion Andriu Berther, frar

er'en num dils auters parents

**Tujetsch**, ils 26 d'october 1877

*Gasetta Romontscha nr. 44, 1. da november 1877*

### **Ferventa donatura**

Cun plascher notificein nus, che la respectada matta Rosa Martina Berther da **Sedrun**, ch'ei stada leu circa 40 onns cantadura ed ei morta buca daditg, hagi fatg si per caussas pias datier da 2000 frs. Denter auter ha ella en siu testament era seregurdau digl institut orfanil a **Schluain**. Quel sco era il spital dalla S. Crusch a **Cuera**, ina dallas principalas ovras da nies nunemblideivel pader Teodosi, lessen nus cheutras haver recumandau cauldamein alla beneficenzia d'in ludeivel publicum.

*Gasetta Romontscha nr. 46, 16 da november 1877*

### **Annunzia da mort**

Nus purtein cheutras a parents ed enconuschents tresta nova, ch'ei hagi plaschiu agl Altissim da clamar ord questa veta nossa cara mumma, sira e tatta

**dunna Bundsweibel**

**Teresa Berther**

Ell'ei morta ils 8 da november suenter ina liunga malsogna, provedida cun tuttas consolaziuns da nossa religiun en ina vegliadetgna da 65 onns.

Nus recumandain la preziada defuncta alla pia memoria da tuts parents ed enconuschents.

**Cuera**, ils 10 da november 1877

Anton Berther, fegl, salter cantunal

Carolina Berther, nata Vimermann

brit, beadis e beadias

*Gasetta Romontscha nr. 47, 23 da november 1877*

### **Duas cauras**

Dapi entgins dis ei vegniu naven duas cauras cun noda en fuorma da tardent en omisduas ureglias. Tgi che sa da novas da quels dus tiers, ei supplicaus da schar saver Duri Berther a **Tujetsch**.

*Gasetta Romontscha nr. 49, 7 da december 1877*

### **Annunzia da mort**

Nus fagein cheutras da saver a nos parents ed enconuschents, ch'ei hagi plaschiu agl Altissim da clamar ord questa veta temporala tier la perpetna beadad nies car bab



### **Vigeli Josef Monn**

El ei spartius ils 17 da december suenter ina cuorta e leva malsogna ella biala vegliadetgna da 84 onns.

Nus recumandain sia olma alla pia memoria da tuts nos enconuschents.

Ils combrigiai affons:

Gion Antoni e Vigeli Josef Monn

Maria Librata e Barla Monn

**Tujetsch**, ils 26 da december 1877

*Gasetta Romontscha nr. 1; 3 da schaner 1878*

### **Difteria**

A **Rueras/Tujetsch**, grassescha la difteria quasi en tuttas casas. Igl ei miert leu dabia affons ed auters ein aunc buca ametsch.

*Gasetta Romontscha nr. 3; 18 da schaner 1878*

### **Il senior dils spirituals**

Cul niev onn ei cumpariu in niev schematismus dil clerus dalla diocesa curiensa ch'ins sa retrer. Il present nonsignur uestg Caspar Willi ei il 94 avel, siu capetelatedral consista ord 6 canonis residenzials e 18 extraridenzials, siu seminari a s. Leci dumbra dapresent 27 alums cun 5 professers. Egl uestgiu da **Cuera** sesanflan 321 spirituals seculars, il senior da quels ei signur Vigeli Wenzin a **Tujetsch** naschius 1792.

*Gasetta Romontscha nr. 5; 1. da fevrer 1878*

### **(28) Il mèl da Tujetsch seigi enzatgei "non plus ultra".**

**Uri ha selamentau tscheidiatsch.** - Tras in'explosiun ein las flommas serasadas sin tuts mauns. - **Sull'Alpsu cun 130 umens e 60 cavals.** - **Il mèl da Tujetsch (ni il mèl alpin) porta dapertut la plema e stat per prender en gl'emprem rang.**

### **Fatg il cuolm sur notg ed arrivai cun peis schelentai**

Tenor il Tagblatt ha **Uri** selamentau tscheidiatsch, che dus viagionts mistergners, che hagian buca giu survegniu quater a **Tschamut**, hagian stuiu far il cuolm la notg e seigien arrivai ad **Ursera** cun peis schelentai. Quella gasetta remarca, ch'els hagian buca giu dumandau da star sur notg en quella casa, nua ch'ei vegni per ordinari dau quater, sonder mo tier duas paupras famiglias. Ella cussegia denton, ch'ins duessi procurar sin quei pass alpin per quater a paupers viandonts sco ei seigi il cass sil **Lucmagn**. Cheuencunter remarchein nus, ch'ins hagi vuliu far in'emprova da quellas varts e dumandau persuenter in pign subsidi dil ludeivel Cussegl Pign ord igl annual subsidi cantunal pil pauperesser, ch'en tals cass vegni sigl avegnir negin pauper viandont enviaus pli ord casa a **Tschamut**.

*Gasetta Romontscha nr. 9; 1. da mars 1878*

### **Barschament a Trun**

Resultat dalla collecta ella **Cadi** pils donnegiai entras il barschament a **Trun**: dalla vischnaunca da **Tujetsch** 50 frs. ... En num dils donnegiai vegn ei cheutras mess giu in public engraziament

La suprastonza da **Trun**

*Gasetta Romontscha nr.11; 15 da mars 1878*

### **Legendas**

Cudisch da legendas dalla secunda part san ins haver mo per 3 frs. il toc, sco era cudischs da quens, a vendiders vegn dau in rabat.

Emanuel Deragisch, ligiacudischs

*Gasetta Romontscha nr. 16; 19 d'avrel 1878*

### **Nurser**

La vischnaunca da **Tujetsch** enquera per la proxima stad in bien nurser. Aspirants san s'adressar enteifer 10 dis tier la suprastonza.

*Gasetta Romontscha nr. 24; 14 da zercladur 1878*

### **Tragic cass**

Sill' **Alpsu** ei ils 8 d.q. succediu in trest cass. Dumengia sera era ei vegniu si leu circa 30 persunas dad **Ursera** per entscheiver a cavar «torf» gliendisdis cull'alva dil di. Ellas ein manidas en ina casetta da duas alzadas, ils biars giu bass ed ils auters si sut il tetg, nua ch'ei era empau fein. Giusut vevan ei cazzola ed encunter catschar dis ha ina persuna vuliu derscher ell'ampla aunc empau neolin, mo l'entira butteglia ha pigliau fiug e tras in'explosiun ein las flommas serasadas sin tuts mauns. La gliעד giusut ei fugida ed ha era susentau quels sisura; mo per cura che l'entira casetta era en fiug e flomma han ins observau ch'ei muncava aunc treis persunas che vevan durmiu si suren: in spus ed ina spusa cun in auter um, ch'ei pli tard vegni tratgs ora sut las ruinas barschai e sfigurai schi fetg, ch'ins vess buca enconuschiu pli els, in pèr umens ein blessai malamein. In crotschier, ch'era dumengia sera passaus leu speras ora, ha raquintau a nus, ch'el hagi viu leu sin esch ina biala e frestga giuvna e l'autra damaun, cura ch'el seigi turnaus dad **Ursera** sil cuolm, eri sia bara nera e macorta exponida sur la via sper la bara da siu spus. La gliעד leu d'entuorn bargevien sco affons. Oz en possa, damaun en fossa!

*Gasetta Romontscha nr. 28; 11 da fenadur 1878*

### **Ingant per schar via per tscheins l'Alp da Nalps en Val Tujetsch.**

Ils 26 d'uost las 9 avonmiezdi vegn ei en claustra da **Mustér** sin via d'ingant schau via per tscheins sin 5 onns l'alp, che quella posseda ella **Val Nalps**. Ils onns vargai vegneva quella alp cargada cun 1000 – 1200 nuorsas bergamascas e 20 - 30 armauls. Ulteriur sclariment dat sin damondas fatgas l'administraziun claustrala.

**Mustér**, ils 6 d'uost 1878

*Gasetta Romontscha nr. 32; 9 d'uost 1878*

### **Viseta americana**

Sechelmeister *Gion Benedetg Deragisch (1811–1901)*, oriunds da **Tujetsch** e domiciliaus a **Stillwater** en **Minnesota**, fa cheutras da saver a ses parents ed enconuschents ell'**America**, ch'el seigi suenter in'absenza da 18 onns puspei arrivaus cun sia consorta (*vieua Barla Turtè Livers-Beer (1835–1914)*, *secunda dunna*) saunamein e da buna veglia en sia veglia patria per star leu sin viseta in per meins e silsuenter turnar en sia nova patria americana.

*Gasetta Romontscha nr. 36; 6 da settember 1878*

### **Annunzia da mort**

A parents ed enconuschents purtein nus cheutras la tresta nova che nossa cara mumma

**Margreta Nescha Cavegn, nata Monn (\*29-12-1796)**

seigi questa notg spartida da quest mund speronza tier ina megliera veta en ina vegliadetgna da 82 onns suenter ina cuorta malsogna ed haver retschiert ils sogns sacraments dils moribunds. Ella vegn satrada sonda, ils 28 d.q.

Nus recumandein sia olma allas oraziuns da parents ed amitgs.

En num dils affons en malencurada:

Vigeli Cavegn, fegl

**Sedrun**, ils 26 da settember 1878

*Gasetta Romontscha nr. 39; 27 da settember 1878*

### Annunzia da mort

En profunda dolor notifichein nus a parents ed amitgs, ch'ei hagi plaschiu agl Altissim da clamar tiella perpetnada nies car feagl, frar e quinau

**Pieder Paul Wenzin** (19-07-1839)

El ei morts ils 24 d.q. provedius cun tuts sogns sacraments dils moribunds en ina vegliadetgna da 39 onns suenter liunga e dolorusa malsogna.

Alla pia memoria recamondan sia olma

La combrigiada mumma:

*Maria Mengia Wenzin-Condrau.*

En num dils fargliuns:

Flurin Wenzin, frar

Vigeli Cavegn, quinau

**Selva**, ils 25 da settember 1878

*Gassetta Romontscha nr. 39; 27 da settember 1878*

### Militar sugl Alpsu

Allas duas battarias montanas **Grischun** e **Valleis** che han fatg in cuors a **Thun** sut major Zuan, vegn ei dau grond laud per lur bien secuntener ed oreifer sittar. La grischuna vegn sonda sull'**Alpsu** cun 130 umens e 60 cavals, che prendan lur quartier ella vischnaunca da **Mustér** che ha quest atun schon giu treisga schuldada a quartier. Stagn gronda mulesta en in meins.

*Gassetta Romontscha nr. 41; 10 d'october 1878*

### Sur dil mèl da Tujetsch.

(Correspondenza dil **Badus**) ... Quels signurs han intercuretg denter auter mèl svizzer, cristallisau, vegls da dus onns; quel da **Tujetsch** nr. IV era totalmein alvs, ferm cristallisau, ord la regiun dallas alps 4650 peis sur mar. Quel da **Tumein**, medemamein fetg cristallisau, pli mellens, 2000 peis sur mar.

Denter 100 parts mèl da quellas sorts cuntegnan:

	substanzia	aua
Il mèl da <b>Tujetsch</b> , nr. IV	82.48	17.52
<b>Tumein</b>	81.39	18.61

Plinavon han els intercuretg ils medems mèls rars ni flessegionts, mo da ½ onn vegls, lur resultat ei sequentamein stabilius. Da 100 parts mèl cuntegnan:

	substanzia	aua
quel da <b>Tujetsch</b>	79.59	20.41
quel da <b>Tumein</b>	78.53	21.47

Ord quellas cefras vesa mintgin ch'il mèl da **Tujetsch** (ni il mèl alpin) porta dapertut la plema e stat sco l'emproma per prender en gl'emprom rang. Jeu sun perschadius, che nies mèl fagess aunc ina pli eclatanta cumparsa ella statistica, sch'ins intercress el immediat el liug d'origin, enstagl per a **Vienna**. Fins gastronoms e lojals turists che gaudan nies mèl ella vallada sezza en siu cumplein aroma, san buca selamentar avunda sulla nunperdunabla sfalsificaziun dil mèl alpin, sco ella daventa dapertut dils maligns speculants. Leider ei la raccolta da mèl schon ver 2 – 3 onns stada fetg magra tier nus, en consequenza dallas tardivas e schliatas primaveras; aber ina pintga reserva da mèl exquisit per transport, ni enqual biala patgna mèl en natira grad ord magasins temps da stad, per schigiar ad enqual diletant, ei mintg'onni da survegnir. Talas queidas e marveglias ston ins per sesez pagar empau da car; aber la

chemia, ni il process, ch'il magun fa tier mintgin, dat gl'equivalent, ch'il mèl da **Tujetsch** seigi tonaton enzatgei "non plus ultra".

*Maurus Desax, plevon a Sedrun*

*Gasetta Romontscha, nr. 9, ils 27 da fevrer 1879*

### **Pader Gallus**

Suenter ina liunga malsogna ei ils 2 d.q. miert a **Rumein** il beneficiat da leu signur pader Gallus Riedi oriunds da **Tujetsch** ella biala vegliadetgna dad 81 onn. RIP.

*Gasetta Romontscha, nr. 10, ils 5 da mars 1879*

### **Clom d'emigraziun**

Per vegnir suenter l'ordinaziun dil Cussegl Grond, vegn ei cheutras fatg da saver che Gion Michel Derungs e sia sora Emilia Derungs da **Tujetsch** seigien intenziunai d'emigrar ell'America. Signur genau Lucas Cavegn ei retschevider da quens dils numai emigrants.

**Trun**, ils 10 da mars 1879

Igl Uffeci circuital dalla **Cadi**.

Fegl Ufficial dil Cantun Grischun, ils 14 da mars 1879

### **Straduns alpins**

dallas vias da comunicaziun ein: a) l'**Alpsu** da **Sedrun** tochen ils cunfins uranès (vicon schon naven dil vitg da **Mustér**). ...

*Gasetta Romontscha, nr.11, ils 13 da mars 1879*

### **(29) Aventura cugl uors, fier a barschament a Bugnei**

**Riedi** cuchegia dalla tauna en ed encorscha ils egl digl uors, che tarlichavan el stgir sco duas cazzolas. El tacca sia buis, metta si in capsel, fa ina s. crusch e sieta, mo la buis disdescha per l'emprema e secunda ga; cun metter si il tierz capsel va il siet. - Nos tiers manedels ed armentivs pagassen in bien ton pli bia, sch'ei vegnessen teni empau meglier. – Dau fiug in clavau cun far termagls cun zulprins fosforics.

### **Pasculaiun, pescaria e manteniment da vias**

Sco nus havein profetisau ei il secund pugn da recapitulaziun sulla pasculaziun dils tiers manedels vegnius fiers cun splendida maioritad, il tierz sulla pescaria ei probabel era refusaus, sulla sort digl emprem pugn, sul niev uorden dil manteniment dallas stradas, san ins aunc nuota rapportar enzatgei definitiv. .... **Mustér**, **Medel** e **Tujetsch** han fiers tut quasi unitamein, ferton che **Sumvitg**, **Trun** e **Breil** han acceptau igl I. pugn.

*Gasetta Romontscha, nr.14, ils 3 d'avrel 1879*

### **Cumin 1879.**

.... sco derschaders ein numnai: ils presidents communal da **Tujetsch** e **Medel**, Luregn Jacomet e S. Beeli .... ufficial civil a **Tujetsch**: Soliva ...

*Gasetta Romontscha, nr.19, ils 8 da matg 1879*

### **Premiaziun**

Per s.h. taur han obteniu premi: .... genau Gion Andriu Berther da **Tujetsch** ...

*Gasetta Romontscha, nr.17, ils 24 d'avrel 1879*

### **Catschadur Riedi**

Il catschadur Gion Clemens Riedi da **Mustér** ch'ei morts ils 8 da matg 1879 en casa pauperila a **Mustér**, ei tras siu cumbat cugl uors vegnius eternisau el renomau cudisch: *Das Thierleben der Alpenwelt* da Fr. Tschudi, mo ual aschi remarcabla ei stada

sia aventura ella lavina. Sco necrolog da quei valerus fegl dalla natira alpina, suonda cheu ina raquintaziun da quels dus aventurus schabetgs.

Naschius 1797 a **Selva** giudapeis dil majestus **Badus** eis el leu en ses giuvens onns vegnius ella lavina la stermentusa notg dils 12 sils 13 da december 1808, la medema notg, nua che pliras famiglias els cantuns **Berna, Uri, Sviz e Glaruna** ein vegnidas satradas cun casa e clavau confirmond il proverb: "amiez la veta la mort seschluetta".

Sils cuolms era gronda nevada, la marschauna fuva rutta en ed in ferm suffel era levas. Prevedend il grond prighel fa il caplon da **Selva** la sera suenter rusari aunc recitar ils vischins in paternies, che Dieus vegli pertgirar els dalla lavina. Avon baselgia secusseglan els lura sin tgei maun fugir, tgi temeiva la lavina dil maun dretg e tgi quella dil maun seniester. Dividi en lur supposiziuns prendan els trestamein cumiau in da l'auter, sco la davosa gada ch'els sevesessen sin quest mund. Entgins enqueran lur refugi ellas casas dadens, ed ils auters ellas casas dado. Recumandond lur veta els mauns da Diu, semettan els a ruaus – biars en fossa per mai levar pli.

Entuorn mesanotg ramplunan las vals stermentusamein, ina sgarscheivla lavina vegn dalla **Val Ruinatsch** giu, neu sul **Rein** e sur in grond rieven si el vitg da **Selva**, sfraccond ensemen las casas dadens e tuts ils clavaus deno in sulet. 25 persunas han anflau cheu ina tresta mort e 17 ein vegnidas liberadas ord lur peinas ed anguoschas; era tschien tiers ein ventschi ella lavina. La glied mitschada vegnan spert neutier cun pètg e palas per cavar si ils sventirai, il venerabel caplon, cumpignaus dil caluster cun ina latiarna e provedius cul s. ieli, va pruamein entuorn per porscher agid e consolaziun als moribunds cavai si. Denter ils liberai sesanflava la famiglia Riedi, ch'era la sera restada graderi en sia casa. Ils geniturs durmevan en stebli, sper lur letg sesanflava lur pli pign affon en tgina, il grond, Gion Clemens, era semess sin pegna stiva, cun siu frar pli giuven. Entuorn mesanotg bragia igl affon pign, la mumma pren el en siu letg, e beingleiti suenter aud'ella ina sgarscheivla canera e grescha: "Jesus! La lavina vegn!" In stausch - la casa ei sfraccada! Il plantschiu en stebli vegn giu sil letg, mo al lennplantschiu han ils geniturs d'engraziar, ch'els ein buca vegni smaccai cun lur affon. Igl uvierchel dalla pegna en stiva vegn spert fiers sin dus mauns e Gion Clemens e siu far dattan giu silla lenna stuppada en pegna. Vargaus il fraccass enqueran ils geniturs da susentar ils dus buobs en stiva. "Nus essan en pegna, havein cauld e bien", rispundan quels dus frestgamein.

En bucca alla crudeivla mort, seconselond che tuts da casa seigien aunc vivs ed implond gl'agid da Diu cun caudas oraziuns, vegn la famiglia Riedi la sera sissu finalmein liberada ord sia horribla perschun. Ella auda lu a mond umens sulla neiv via, semptgai da turnar a casa schend: "Cheu savein nus far nuot, cheu sut ei tut ventschiu." "Udis buobs, tgei quels dian!", cloma la mumma, "ussa gri quei che vus pudeis!"

Clemens grescha e cloma cull'entira famiglia. La glied suravi auda enzatgei ed entscheiva a cavar. Ventireivlamein vegn l'entira casada liberada ord fossa, ed en tgina anflan ei il giatcasa smaccaus dalla neiv, havend quel encuretge in bien igniv en tgina suenter che la mumma ha giu priu gl'affon en letg, che fuss tschelluisa era daventaus in'unfrenda dalla mort. Ils morts cavai si duront treis dis ein vegni zugliai en blahs, transportai sin sliusas a Sedrun e leu sutterai en ina fossa comunabla. Clemens Riedi ei plaunsiu setratgs a **Mustér** e cheu ei lu succedi il november 1838 la renomada catscha sigl uors, il qual ha ina stad ora giu mazzau ina troppa stiarls. Adumbatten ha la vischnaunca da **Mustér** giu ordinau per s. Barclamiu ina generala catscha sin quella bestia, catschadurs eran postai pils cuolms entuorn, ferton che la glied encurevan da leventar gl'uors cun grir, schumbrar e stgalinar, mo el ha buca schau seveser e silsuenter cuntinuau sias spassegiadas da rapina.

L'entschatta november ein lura ils dus catschadurs e vischins a **Madernal**, Clemens Riedi ed Augustin Biscuolm vegni perina da far flucs cun quei malvugliu schani.



Gl'emprem di da catscha era Biscuolm sentardaus e Riedi semetta en siu ardiment tut persuls sin viadi. Ellas graufilas dalla **Val Barcuns** anfl'el fastitgs digl uors, el vegn en rocla e senza schientscha seretegn el sin ina platè. Revegnius continuescha el sia campagna, arriva tier in grep, nua ch'igl uors veva sia tauna. El cuchegia da quella en ed encorscha ils eglis dalla bestia, che tarlichavan el stgir sco duas cazzolas. Riedi ei spert seresolvius, el tacca sia buis, metta si in capsel, fa ina s. crusch e tila, mo la buis disdescha per l'emprema e secunda ga. Cun metter si il tierz capsel va il siet, las vals ramplunan dil ferm plum ed igl uors dat si in terribel sgregn. Il catschadur seglia spert d'ina vart, prepara in niev siet, tuorna anavos, cuchegia dalla tauna en, mo encorscha negin uors. Nunsefidond da tut persuls irritar danovamein la bestia, va el per quella sera a casa e raquenta sia catscha a siu camerat Biscuolm.

L'otra damaun semettan omisdus sin viadi per far giu gl'uors. Biscuolm mava ordavon e tier in malpass sto Riedi star anavos entochen ch'il camerat va giu ordavon. Tuttenina audan ei in terribel sgregn ed igl uors seglia si dies a Biscuolm, che sederscha e rocla culla bestia d'ina pala giu. Vegnend giu encunter in pigniel vegnan els da part in da l'auter ed en in fiep ual sut reussescha ei a Biscuolm da catschar il calcogn da sia buis en bucca agl uors e cheutras tener el empau d'ina vart. Riedi seprofitescha da quella favoreivla posiziuin, sieta sigl uors, quel pren la fuigia, mo vegn terraus dad ina secunda balla tarmessa da Biscuolm. La ventira per quel ei staus che Riedi veva il di avon sittau ellas missialas agl uors, aschia saveva quel buca ruir e Biscuolm ei en quella famosa cambrolla mitschhaus cun enzacons sgreffels en fatscha.

Quella catscha d'uors ha 1838 fatg la runda en tuttas gasettas ed ei silsuenter vegnida prida si sco remarcablada egl allegau renomau cudisch da Tschudi, aschia ch'il mund posteriur vegn aunc a plidar dil catschadur Clemens Riedi. Possi el denton era haver anflau grazia sin l'auter mund!

*Gasetta Romontscha nr. 22, 29 da matg 1879 (Feuilleton)*

### **Piars**

denter **Cavorgia** e **Mustér** in cudisch cun in summa ed ina brev da marcau. Da remetter alla stamparia encunter ina bonificaziun.

*Gasetta Romontscha, nr. 23, ils 6 da zercladur 1879*

### **Emprems signurs**

Il 17 d.q. ei uonn gl'emprem signeradi passaus sull'**Alpsu** – ina famiglia englesa, vegnida en crotscha tochen sur **Tschamut** si e da leu naven serendida a pei frestg - e legramein sulla neiv - suenter ils umens che purtavon la bagascha. Las damas han schau plascher quell'emperneivla aventuretta, coronada cun in stupent appetit ed oreifer sien ad **Ursera**.

### **Fiera**

Il negozi da nuorsas ha uonn buca giu la vivacitad d'onn. Ellas han l'entschatta pagau pli pauc e tier quei dueien quels che han cumprau si ellas, haver fatg pign gudogn, cun turnar a vender. Pli legreivel eis ei d'udir, ch'ina roscha purschals, catschai sulla **Alpsu** pella fiera d'**Ursera**, hagian leu pagau biebein, aschia che la **Cadi** ha aspects da saver vender ils tiers-casa pli bein egl **Uri** che giuviars. La fiera d'**Ursera** dalla jamna vargada ha danovamein mussau che nos tiers manedels ed armentivs pagassen in bien ton pli bia, sch'ei vegnessen teni empau meglier.

*Gasetta Romontscha, nr. 25, ils 20 da zercladur 1879*

### **Posta**

Ils 29 da zercladur ei vegniu l'emprema posta sulla **Alpsu**, da nossa vart era la neiv fiers ora schon entgins dis avon, mo ils Uranès, ch'eran fatschentai pli fetg cun quellas lavurs sil **Gottard** e silla **Furca**, han retardau l'avertura. Il **Lucmagn** ch'era uonn surcargaus cun neiv, ei ruts atras per ier ed oz passa l'emprema posta quei



pass.

*Gasetta Romontscha, nr. 27, ils 4 da fenadur 1879*

### **Annunzia da mort**

En profunda dolor fan ils suttascrets da saver a parents ed enconuschents, ch'ei hagi plaschiu agl Altissim da clamar ord questa tiella veta perpetna nossa cara consorta e mumma

### **Barla Catrina Decurtins, nata Cavegn**

Ell'ei spartida ils 22 da zercladur suenter ina liunga malsogna e provedida cun ils s. sacraments e perduns pils moribunds ed ina vegliadetgna da 78 ½ onns.

Nus recumandain sia olma alla pia memoria dils stimai parents ed enconuschents.

**Rueras**, ils 26 da zercladur 1879

Il mariu en malencurada

Giachen Decurtins

En num dils combrigiai affons

Hans Giachen, fegl

*Gasetta Romontscha, nr. 27, ils 4 da fenadur 1879*

### **Fiug a Bugnei**

Sonda vargada han in per affons a **Bugnei/Tujetsch**, dau fiug in clavau cun far termagls cun zulprins fosforics; cun spert dar neutier glioud han ins pudiu riscuder ils baghetgs d'entuorn. In niev avis da metter meglier giudamaun quels prigulus zulprins.

*Gasetta Romontscha nr. 31; 1. d'uost 1879*

### **(30) A Sedrun, nua ch'ei flessegia rehamein latg e mèl, vegn construiu in local per ina cascharia comunabla.**

Scumandau da cavegliar carrs ni autras caussas ellas chinettas, ni silla strada. - Viu in marighel da 40 camutschs. - 76 nuorsas ein vegnidas en ina lavina. - Buca surcargar las alps e pastiras. - Amateurs dil delicias magnuc caura tuatschin fagein nus attents, ch'ei vegni la stad fatg magnuc caura.

### **Cadi**

En consequenza d'in concediu beneficium inventari dueien tuts quens cul defunct pader Gallus Riedi da **Mustér** vegni dai en al president Franz Decurtins a **Trun**.

*Gasetta Romontscha nr. 33; 15 d'uost 1879*

### **Avis**

Sin ina disgrazia, che vess maneivlamein saviu schabegiar cun ina crotscha ils 14 d.q. silla strada dall'**Alpsu**, sesanfla il suttascret necessitau da visar publicamein ils avdents da quella da cavegliar negins carrs ni autras caussas ellas chinettas, ni silla strada per schar leu per pli ditg, cunzun temps da notg. Per tals surpassaments ha gl'uorden polizial da vias fixau in castitg da 2 – 10 frs.

Gion Poltera a **Tujetsch**, viè dall'**Alpsu**

*Gasetta Romontscha nr. 34; 2 d'uost 1879*

### **Catscha**

Il davos d'uost ei ella **Val Nalps (Tujetsch)** vegniu viu in marighel da 40 camutschs, e l'emprema jamna dalla catscha han plirs catschadurs fatg buna raccolta, in da **Medel** ha sittau 14 muntanialas, dus quinaus da **Mustér** 7 camutschs, in da **Sumvitg** ha fatg giu egl uaul dadens la punt **Russein** in buc da camutschs che ha dau 70 glivras carn!

*Gasetta Romontscha nr. 37; 12 da settember 1879*

### **A piarder**

Duas cauras da razza italiana ein idas a piarder da **Platta** tochen **Sedrun**. Tgi che sa novas da quellas ei supplicaus da schar saver gerau Lucas Caveng a **Sedrun**  
*Gasetta Romontscha nr. 38; 19 da settember 1879*

### **Neiv**

La jamna vargada ha ei en **Surselva** neviu giu tochen **Trun**, e las davosas alps han stuiu vegnir descargadas. Sils cuolms era ei nevada, e perquei ha la posta sull'**Alpsu** calau si avon l'entschatta d'october, ed ins ha giu gronda breigia da rabbitschar neu ils 29 e 30 da settember ils 60 – 70 cavals, ch'ils ustiers dad **Ursera** vevan priu si a tscheins per la stad en **Surselva**. A **Tujetsch** ein 76 nuorsas vegnidas en ina lavina e ventschidas. Ils èrs che eran aunc buca medi dapertut els aults, han leu danovamein pitiu dalla neiv e purgina.

*Gasetta Romontscha nr. 40; 3 d'october 1879*

### **Scumandar il caffè**

Sin quels miserabels prezis dils stiarls pudess ins tuttina dumandar si **Tujetsch** ni **Medel**, nua ch'ei vegn a proporziun tratg ils pli biars stiarls, schebein ei fussi buca pli profiteivel da trer empau pli paucs e buca surcargar las alps e pastiras, mo persunter buca cumprar ina tala massa pieun e caschiel jester? Quei patratg ei vegnius tscheidiatsch, cu ins udeva las schliatas novas da **Ligiaun** e veseva el medem temps in marcadont jester da pieun e caschiel, che mava en crotscha a **Medel** ed in vitturin tuatschin, che semudergiava dad ir a casa cun ina carga pieun e caschiel jester. Denton maniava in marcadont da stiarls, ch'il pli radical remiedi encunter il consumar ton pieun e caschiel fussi – piglei buca tema stimadas lecturas – da scumandar il caffè. Basta, sur quei tema naziunal-economic lein nus arver la discussiun pli tard.

*Gasetta Romontscha nr. 42; 17 d'october 1879*

### **Plazzas en Baviera**

Dus ni treis schinumnai „Schweizers“ che han da gidar a perver, vegn ei encuretge per ina possessiun en **Baviera**, umens da 18 – 35 onns. Els han cuost e quartier e lura aunc 6 marcs (7.50 frs.) pagaglia per jamna. Aspirants per quellas plazzas dueien ton pli spert s'adressar tier

Gion Antoni Monn, il giuven a **Sedrun**

*Gasetta Romontscha nr. 44; 31 d'october 1879*

Il suttascrèt fa cheutras da saver ch'ils „Schweizers“ per la **Baviera** seigien schon pladi.

Gion Antoni Monn a **Sedrun**

*Gasetta Romontscha nr. 45; 7 da november 1879*

### **Cauras**

Sis cauras ein fugidas neu dad **Ursera**, ellas eran cumpradas ed han differentas nodas, 5 han denter auter ell'ureglia seniastra in snez davon enagiu entraviers e la sisavla, nera, ha giu miez l'ureglia seniastra. Denter las empremas ei ina gaglia, ina nera muota, ina cotschna cun tgiern uiersch, ina che tila sil grisch ed ina nera cun alv da mintga maun. Tgi che sa novas ei supplicaus da schar saver Martin Peder a **Tschamut**.

*Gasetta Romontscha nr. 45; 7 da november 1879*

### **Clom d'emigraziun**

D'emigrar ell'**America** ein intenziunai Giachen Franzestg Berther, cun sia famiglia e

Condrau Anton Derungs, cun dunna ed affons, omisdus da **Rueras**, sco retschevider da quens ei numnaus assistent J. Antoni Schmit da **Sedrun**; pli il giuven Gion Giusep Giossi da **Bugnei**, che ha Sep Antoni Deragisch sco retschevider da quens; pli la giuvna Barbla Cathrina Geriet da **Rueras**, che ha gerau Stoffel Riedi da **Rueras** sco retschevider da quens. Tgi che ha quens cun ils sura numani emigrants duei dar en quels als sura retscheviders da quens el termin da 3 jamnas.

**Mustér**, ils 12 da schaner 1880

Igl Uffeci circuital dalla **Cadi**

Fegl Ufficial nr. 3 dils 16 da schaner 1880

### **America**

Il suttascret fa cheutras da saver, ch'el seigi intenziunaus dad ir ell' **America** per la secunda ga e tgi che ha quen encunter el duei dar en el termin da 3 jamnas.

Hans **Tujetsch** (*da Falera*)

*Gasetta Romontscha nr. 5; 30 da schaner 1880*

### **Venal**

Ina possessiun per in pur ei venala a **Rueras**, **Tujetsch**, consistenta ord:

- 1) ina mesa casa, clavau, truaisch ed iert, dasperas
- 2) 2750 tschuncheismas prau grass a **Dieni** cun dus maghers,
- 3) 1200 tschuncheismas prau a **Flurin Dadens** cun in toc magher, che sepeglia vid il grass. Quellas duas aclas schaian mo 5 minutas sul vitg da **Rueras**.
- 3) in bien mises.

Ulteriur sclariment dat Toni Derungs a **Rueras**.

*Gasetta Romontscha nr. 6; 6 da fevrer 1880*

### **Cadi**

Pils suandonts emigrants da **Tujetsch** ei vegniu numnau sequents retscheviders da quen da leu:

- 1) assistent Schmet per las famiglias emigrantas da Giachen Franzestg Berther e da Condrau Anton Derungs.
- 2) Sep Antoni Deragisch per Gion Giusep Giossi
- 3) gerau Stoffel Riedi per Barla Catrina Geriet

*Gasetta Romontscha nr. 6; 6 da fevrer 1880*

### **Plevon Vigeli Venzin**

Ils 6 d.q. ei igl aultreveri signur Vigeli Wenzin da **Tujetsch**, il senior dil clerus dalla diocesa **Cuera**, vegnius surdaus al ruaus dalla fossa. Il defunct ei spartius ils 4 da quest (*fevrer*) ell' aulta vegliadetgna dad 87 onns e 10 meins, suenter ina dolorosa malsogna da 15 dis, la quala el ha surpurtau cun tutta pazienza e resignaziun. Naschius a **Tujetsch** ils 3 d'avrel 1792, ha il defunct fatg siu gimnasium e liceum ella venerabla claustra da **Mustér**, sedecidius da leger ora il stan spiritual, ha el entschiet il studium dalla teologia tier igl erudit sur decan Hitz, da gliez temps farrer a **Sedrun**, e lura finiu quel el seminari clerical a **Cuera**. Ils 17 d'october 1817 eis el vegnius benedius ora sco spiritual, beingleiti suenter tarmess da ses superius a **Razen**, all'entschatta sco provisur, e suenter eis el dalla pleiv vegnius legius ora sco farrer. Sco fideivel e nunstunclenteivel pastur dallas olmas ha el pastorau cheu 36 onns, aschiditg sco sias forzas corporalas han ad el quei lubiu. Sco farrer a **Razen** era sur Wenzin respectaus e carezaus, e quei aschibein da sia entira pleiv sco era da ses signurs confrars, ils quals han legiu ora el sco secretari da lur capetel, enten il qual uffeci el ha funcziunau 32 onns. Essend la pastoraziun dalla gronda pleiv a **Razen** vegnida memia greva per sia avanzada vegliadetgna, ha el resignau quella ed ei seretratgs en sia vischnaunca nativa a **Tujetsch** e surviu a **Sedrun** ed a **Rueras** sco caplon entochen 1867. Havend el cheu piars totalmein sia vesida, eis el staus

necessitaus da dar giu la caplania e seretrer anavos sin sia possessiun el pign vischinadi da **Bugnei**, nua ch'el ei aunc vivius 13 onns. Per sia gronda consolaziun ha el cheu aunc mintgadi saviu celebrar la s. messa, e quei entochen tier sia davosa malsogna. Era aunc en sia retratgadam a **Bugnei** ha sur Wenzin prestau bia buns survetschs a ses vischins. Entras sia gronda esperienza era el el cass da gidar cun plaid e cussegl tut tgi che vegneva tier el, ed igl ei aschia buca da sesmarvegljar, che l'entira vischnaunca ha dau al venerabel defunct la davosa honor cun cumpignar el tiel ruaus dalla fossa. E nus tuts clamein suenter al defunct: «sin seveser ella perpetnadad». R.I.P.

*Gasetta Romontscha nr. 7; 13 da fevrer 1880*

### **Cascharia a Sedrun**

Sche nus havein cun caschun dalla schliata fiera da **Ligiaun** digl atun vargau giu selubiu da cussegljar als da **Tujetsch** da trer empau pli pauc vadials e persuerter cumprar negin pieun e caschiel jester, sche legr'ei ussa nus da saver notificar, ch'ei vegni ussa ella capitala da quella vallada, nua ch'ei flessegia rehomein latg e mèl, construiu in local per ina communabla cascharia. Amaturs dil delicius magnuc caura tuatschin fagein nus attents, ch'en quella cascharia vegni la stad fatg magnuc caura, che vegn ad haver bien esit.

*Gasetta Romontscha nr. 12; 19 da mars 1880*

## **(31) Auters onns vegneva cheu vendiu in grond diember cauras per bials prezis**

### **Dazier per Tschamut**

La piazza da dazier cantunal a Tschamut cun 100 frs. paga, la quala sa vegnir alzada, sch'il traffic sull'Alpsu crescha tras la viafier gottardista, ei scrett'ora en concorrenza. Aspirants ston dar en silla fin da quest meins alla administraziun dallas finanzas cantunalas.

*Gasetta Romontscha nr. 17; 23 d'avrel 1880*

### **Pass Alpsu**

Era gl'ault pass dalla Bernina ei cun pintga breigia vegnius fatgs carregiabels ils 6 da matg. Cun 50 frs. vegness era il pass dall'Alpsu aviarts da nies maun.

*Gasetta Romontscha nr. 20; 14 da matg 1880*

Ils 18 d.q. ei il stradun sull'Alpsu vegnius aviarts per carrs e crotschas.

*Gasetta Romontscha nr. 21; 21 da matg 1880*

### **Piars**

In terschiel cun la noda T ed ina fuortga ei vegnius piars denter Mustér e Tujetsch la davosa fiera a Mustér. Igl anflader ei supplicaus da remetter el a Camischolas tier Paul Schmet, ni ella Cruna a Mustér.

*Gasetta Romontscha nr. 22; 29 da matg 1880*

### **Posta**

Per cuntentar las reclamaziuns ed ils differents interess dalla Surselva ha il departement postal concediu a quella tiella posta dall'Alpsu aunc dus cuors locals. La posta dall'Alpsu va naven da Cuera las 4 e 35 min dalla damaun, gentar a Mustér ed arriva las 6 dalla sera ad Ursera; en siu retuorn vegn ella las 10 e mesa avonmiezdi a Mustér ed arriva a Cuera las 6 e 20 min dalla sera. Il cuors local denter Cuera e Mustér va las 10 e mesa avonmiezdi naven da Cuera, vegn a Mustér las 7 e 15 min dalla sera, la damaun allas 5 parta quella posta da Mustér ed ei allas 12 e 20 min da

miezdi a Cuera. ...

*Gasetta Romontscha nr. 23; 4 da zercladur 1880*

### **Manteniment dallas vias**

Discussiun generala el Cussegl grond sur il niev project per manteniment dallas vias. Il paragraf 3 sulla cunfinaziun dils pass alpins dallas vias da communicaziun: Alpsu, Lucmagn, Albula, Bernina, Fuorn e Flüela ha dau bia da far e cun 31 vusch encunter 30 ei sin proposiziun da Peterelli e Manatschal stabiliu, che per regla duei vegnir considerau, ch' il pass alpin sestendi mo dalla davosa vischnaunca da quest maun dil cuolm tochen tier l'emprema vischnaunca da tschei maun dil cuolm.

Condrau ha garegiu, ch'ei duei vegnir quintau, ch' ils pass Alpsu e Lucmagn entscheivien buca per a Sedrun e Platta, mobein el vitg da Mustér e quei tenor cunvenziun fatga cul cantun 1861. Il Cantun hagi quasi sfurzau si a Mustér e Tujetsch la strada dall'Alpsu e sulettamein garegiu, che quellas duas vischnauncas sorprendien l'expropriaziun, il dar il material, menar la gera, mo ussa vegli ins far sorprendier ellas gl'entir manteniment. Ella cunvenziun dil cantun, serrada giu culla Confederaziun, hagi il Cussegl grond claramain declarau da sorprendier il manteniment naven dil vitg da Mustér tochen sils cunfins uranès. Per far la segira hagi la vischnaunca da Tujetsch aunc giu fatg dar il cumissari guvernativ in agen revers, ch'ella seigi mai e pli mai obligada da purtar pli grondas grevezias pil manteniment dalla strada dall'Alpsu ed ussa duei tut vegnir fiers dad ina vart. 1840 hagi Tujetsch dau en cullas autras vischnauncas sursilvanas sia scartira da mantener la via nova e garegiu che quella vegni baghegiada tochen Rueras, mo la cumissiun cantunala hagi 1841 declarau, che la strada sursilvana mondi mo tochen Mustér. Uss denton veglien ins far ir ella tochen Sedrun e quei en contradicziun cun cunvenziuns cul Cussegl Grond e culla Confederaziun. Quei seigi in agen dretg statistic, che la dertgira federala vegni ualvess ad approbar pil cass d'in recuors. Dad aunc far mantener Mustér la strada dall'Alpsu tochen sils cunfins da Tujetsch e quella dil Lucmagn entochen la punt sper l'uniun dil Reinsu e Reinmiez, vegni ei cargau si a quella vischnaunca il manteniment d'ina tenda vias ella lunghezia dad endisch kilometers! Cheu encunter ei vegniu allegau, ch'ins hagi a siu temps concediu memia bia a quellas duas vischnauncas, ins stoppi tractar ellas sco las autras, da Mustér a Sedrun seigi negin cuolm, mobein ina biala vallada. Il davos ei vegniu, che la strada dil Lucmagn duei il cantun muort siu difficultus terren mantener naven dil vitg Mustér, l'Alpsu denton per naven da Sedrun.

*Gasetta Romontscha nr. 24; 11 da zercladur 1880*

### **Manteniment dalla via**

Il niev project stabilisescha che tiels pass alpins dallas stradas da communicaziun, hagian las vischnauncas territorialas da prestar l'expropriaziun, schar prender il material, menar la gera e dar ils necessaris umens per gidar a rumper via ni nua che la communicaziun vegn interrutta en cass extraordinaris. Gl'ulteriur manteniment ha il cantun.

*Gasetta Romontscha nr. 24; 11 da zercladur 1880*

### **Fiera**

Sil marcau da Glion dils 7 d.q. (*zercladur*) ei cumpariu negins marcadonts tudestgs da sutsi e muort la pintga tscherca ein ils prezis dalla biestga sbassai considerablamein. Quei ha lu animau ils marcadonts da Tujetsch e Medel da cumprar si roschada armauls. Era ils pors eran quella ga bienmarcau. Sin quei fuva ei da preveder, che la fiera da Tujetsch (Sedrun) dils 8 d.q. (*zercladur*) vegni ad haver pintga vivacità. Auters onns vegneva cheu vendiu in grond diember cauras per bials prezis, mo uonn pagavan quellas mo 18 – 20 frs. – Il negozi da nuorsas ei uonn era buca staus schi vivs sco auters onns, nuotatonmeins han ellas pagau andants prezis.



*Gasetta Romontscha nr. 24; 11 da zercladur 1880*

### **Piars**

Ina bancnota da 20 frs., probabel zugliada en ina brev, ei vegnida piarsa denter Tujetsch e Cumpadials. Il reclì anflader ei supplicaus da metter amauns quella alla stamparia a Mustér.

*Gasetta Romontscha nr. 27; 1. da fenadur 1880*

### **America**

In emigrau Tuatschin, che sesanfla gia varga diesch onns ell'America, ha dacuort notificau a nus, ch'ei seigi tras la Ligia Grischa da Stillwater, vegniu fundau ina nova colonia cul num Badus el territori da Dakota. Scadin commember dall'unìun grischuna ha stuiu pagar 15 dollars daner d'entrada e lu aunc in dollar per meins pil cuoz da 15 onns. Cun quels mettels han ins acquistau in adattau plaz per secollocar leu tuts ensemen. Quel ei vegnius anflaus ellas prerias da Dakota (*dil Sid*), 300 miglias el vest da Stillwater. Il mars 1879 ei lu setratg leu ina gronda partida, che ha entschiet a baghegiar casas amiez ils praus entuorn in lag. Igl ei cheu ranschau en in'ustria, ina stizun ed ina posta jamnila. Badus sesanfla denter duas novas viasfier en, ella distanza da treis tochen tschun uras. Las casas ein baghegiadas si cun aissas e biaras mo da tschespets, ch'ei leu fetg qualificai per material da baghegiar. En munconza da lenna vegn ei barschau fein e cotgla da crap. Igl ei vegniu construiu ina casa da scola, che survescha ad interim era per baselgia inagada il meins. Il liug Badus s'ingrondescha di per di e la Ligia Grischa ei renconuschida sco corporaziun, che ha ils dretgs da vender e cumprar tiara. Ils gronds e bials èrs han leu stupenta pareta. Possi il Badus american crescher e flurir pli e pli!

*Gasetta Romontscha nr. 31; 29 da fenadur 1880*

### **Spirituals**

Dumengia vargada ha monsignur uestg benediu ora dus novs spirituals grischuns: signur Fidel Deflorin da Mustér e signur Thomas Berther da Tujetsch.

*Gasetta Romontscha nr. 32; 6 d'uost 1880*

### **Messa nuviala**

Cun gronda solemnitad e bialas significontas decoraziuns ei ils 8 e 15 d.q. vegniu celebrau messa nuviala a Mustér e Tujetsch (*sur Tumaisch Giusep Berther 1853-1931*).

*Gasetta Romontscha nr. 34; 19 d'uost 1880*

### **Dieschma**

En ina questiuon denter ils vischins e la vischnaunca da Tujetsch pervia dil modus co cumprar ora la dieschma, fatga pendentia tiel Cussegl Pign, ei president districtual Tuor a **Rabius** eligius sco cumissari guvernativ.

*Gasetta Romontscha nr. 36; 2 da settember 1880*

### **Amiez la veta la ....**

L'annunzia da mort cuntenida en quest numer fa puspei endamen a nus il vegl proverbì: amiez la veta la mort seschluetta. Sauns e fretgs ha Gion Antoni Deragisch a **Sedrun** assistiu ils 9 d'october allas funcziuns ed oraziuns fatgas leu quei di en sufragi da sia quinada morta a Stillwater ell'America; el tuorna lu a casa, mida vestgadira e va tiella lavur sils funs, cumpignaus dad in affon da 3 onns e miez.

Havend el purtau il secund buordi risdiv, sesa el giu e sederscha tutteninaga.

Gl'affon peglia tema, cuora tier las proximas casas, bragia e di: il bab ei sederschius e morts. E leider han ins anflau quel morts. R.I.P.

*Gasetta Romontscha nr. 43; 21 d'october 1880*



### **Prefect**

Signur Thomas Berther da Tujetsch, che ha fatg messa nuviala questa stad, ei numnaus prefect el seminari clerical da s. Leci.

*Gasetta Romontscha nr. 47; 18 da november 1880*

### **Ligiaun**

La tiarza fiera da Ligiaun duei era esser ida mal per munconza da cumpraders. Sco raritad remarchein nus aunc, che malgrad ils bass prezis, hagi Tumaisch Monn da Tujetsch vendiu in stupent stierl da siu tratg per 190 frs., ferton ch'ei era il di avon vegniu vendiu in bov, in mutg da dus onns, per 60 frs. Tgei letga da tiers!

*Gasetta Romontscha nr. 49; 2 da december 1880*

### **(32) Muort la scartezia da fein han biars teniu uonn ad honor la rabetscha da truffels cun sechentar ella**

**Ils tiers manedels, che pasculavan gl'entir di ora, han spargnau bia fein. - Tujetsch para dad esser la val dalla cucagna. - Ils Tuatschins han per quel obteniu circa 27 frs. enstagl mo 5 frs. - Fastitgs dad in uors. - Il mender ei stau, ch'igl ei sin via rut ora la zoppina en ina roscha da Tujetsch. -**

### **Stupents dis suleglivs**

Enstagl d'ina ferdaglia da 20 grads sco onn, ha l'emprema terzina dil december cuntinuau culla stad s. Martin dalla secunda mesadad november. Ei era stupents dis suleglivs, la damaun sil pli in ni dus grads freid e da miezdi cauld e bien. Ils tiers manedels, che pasculavan gl'entir di ora, han spargnau bia fein, aschia che quel ei uonn bienmarcau. Per midar nuegl sin plauncas era ei denton pli malsegir, che da neiv, ed ella **Cadi** han cheutras plirs armauls piars la veta. Ad in beinstont pur da **Sumvitg** ein enten midar nuegl e passar sur in glatsch sgargliau sias duas principalas vaccas idas surengiu, a **Mustér** ei era ruclau ina ed en **Tujetsch** duas.

*Gasetta Romontscha nr. 51; 16 da december 1880*

### **Val dalla cucagna**

**Tujetsch** para dad esser la val dalla cucagna. Ferton ch'ils funs ein ils davos onns en consequenza dils sbassai prezis dalla biestga e da bia scussiuns quasi dapertut curdai en prezi, ei leu quels dis aunc vegniu vendiu entiras tschaveras prau per 3 frs. 40 ct. la tschuncheisma vedra (circa 4 meters quadrats).

*Gasetta Romontscha nr. 8; 24 da fevorer 1881*

### **Elegiu plevon**

La pleiv da **Tujetsch** ha unanimamein elegiu sco plevon signur Giachen Antoni Beer, caplon a **Sedrun**, ed ha surdau la caplania a signur Tumaisch Berther da **Rueras**, che banduna da Pastgas il seminar clerical.

*Gasetta Romontscha nr. 15; 11 d'avrel 1881*

### **Cumpra da stiarls**

Sperond ch'ils prezis dalla biestga sesaulzien gl'atun proxim, entscheivan ils marcadonts dalla fiera da **Ligiaun** a cumprar si stiarls e vadials. Il grond e beinvesiu Furrer d'**Ursera** ha la jamna vargada cumprau si mo ella vischnaunca da **Tujetsch** 115 stiarls e pagau 15 – 17 marenghins il pèr. Bravo!

*Gasetta Romontscha nr. 17; 28 d'avrel 1881*

### **Cumin 1881**

Dertgira circuitala: Luregn Jacomet, **Tujetsch**; suppleant da mediatur: assistent

Schmed; supplenat per la dertgira circuitala: Christian Muggli da **Tujetsch**  
*Gasetta Romontscha nr. 18; 4 da matg 1881*

### **Tarmess en**

Als aultreveri signurs spirituals ed als signurs ugaus baselgia, che vulan metter tier paramenta ni vischala da baselgia, savein nus culla megliera perschasiun recumandar il negozi da signur J. J. Deplazes (*Deplaz*) a **Regensburg** en **Baviera**. Quel ha ina gronda elecziun da tuts artechels, furnescha quels en biala lavur artistica ed el stil ecclesiastic e quei tut per fetg raschuneivels prezis. Quei signur ei nies cumpatriot, burgheis dalla vischnaunca da **Tujetsch**, e tier empustaziuns ord siu cantun nativ, pren el ton sco pusseivel particular risguard.

*Gasetta Romontscha nr. 20; 19 da matg 1881*

### **L'ustria Rheinquelle a Tschamut**

ei da miez matg puspei vegnid'aviarta. Engraziund pella confidanza demussada encunter quella ils onns vargai, serecamonda danovamein ad in ludeivel publicum il proprietari da quella

Lucas Cavegn

*Gasetta Romontscha nr. 21; 25 da matg 1881*

### **Pass**

L'**Alpsu** ei vegnida aviarta schon ils 28 da matg e da lu enneu ein schon pliras crotschas idas da **Cuera** ad **Ursera** cun jasters.

*Gasetta Romontscha nr. 22; 3 da zercladur 1881*

### **Ina buis ei vegnida brattada giu**

tiella davosa inspezziun dallas armas a **Mustér**, ell'ustria dalla Cruna. La buis, ch'ei vegnida prida leu naven e che vegn cheutras reclamada, ha il numer 2137 dallas buis dil landwehr.

Quel che ha brattau giu ei supplicaus da schar saver Cristian Valentin Monn a **Sedrun**.

*Gasetta Romontscha nr. 22; 3 da zercladur 1881*

### **Dertgira**

Suppleant dalla dertgira districtuala: capitani Muggli da **Tujetsch**.

*Gasetta Romontscha nr. 23; 9 da zercladur 1881*

### **Resultat**

Tenor ufficiala publicaziun ei il niev project pervia dil manteniment dallas vias vegnius refusaus cun 5810 encunter 5782, aschia cun ina majoritad da mo 28 vuschs.

*Gasetta Romontscha nr. 25; 23 da zercladur 1881*

### **1881**

Suenter in bien examen han treis gimnasiasts dalla scola cantunala ed il seminarist, Martin Berther a s. Leci da **Tujetsch**, obteniu gl'attestat da maturitad. Ils 9 d.q. vegn la scola cantunala serrada.

*Gasetta Romontscha nr. 27; 7 da fenadur 1881*

### **Recruts**

Suenter haver fatg ina campagna sul **Pass Cunchels** per prender en la **Partsura Sognaglièsa**, nua che plievgia e suffel han leider impediù ils solits manevers, ein ils recruts a **Cuera** vegni relaschai. Ils Sursilvans eran fetg cuntents d'haver survegniu uonn la taxa montana per daner da viadi, aschia ch'ils Tuatschins han per quel obteniu circa 27 frs. enstagl mo 5 frs. Speranza che bein enqual spargnus recrut hagi

aschia saviu purtar daners a casa. Deplorabel eis ei mo, che aschi bia recruts vulan tier la partenza sefa gronds cun haver in stumbel cigara en bucca. Tresta parada!  
*Gasetta Romontscha nr. 27; 7 da fenadur 1881*

### **Verduras**

Tenor conclus guvernativ duei uonn puspei vegnir teniu in diember referats da viadi ed entgins cuors per mussar la cultivaziun da legums (verduras). Ils referats tracteschans dall'economia dallas alps e dil latg, dalla tratga da biestga, dall'agricultura, cultivaziun da pumera, da cultems etc. ed ins ha el senn da schar tener quels a Trin, Sagogn, Breil, Trun, Mustér, Sedrun, Tavanasa, Pitasch, Versomi, Razen, Urmein e Ziraun. ...

*Gasetta Romontscha nr. 31; 4 d'uost 1881*

### **Uors**

En Tujetsch vulan ins haver fastitgs dad in uors che duei haver scarpau nuorsas en in per loghens. Quella vischnaunca ha vendiu uonn fein a pastg per circa 2000 francs.

*Gasetta Romontscha nr. 37; 15 da settember 1881*

### **Fiera**

En rectificaziun dil davos numer da nossa gasetta relatein nus posteriuramein, ch'ils Glarunès seigien serendi sul cuolm **Pigniu** e **Lucmagn** cun pliras roschas biestga per la fiera da **Ligiaun**, resp. **Giubiasco**, essend ch'els passan buc il **Monte-Ceneri** cun lur vaccas. Persuenter eis ei uonn iu zun negina biestga glarunèsa sul **S. Bernardin**. Ils marcadonts da **Tujetsch** e **Medel** han giu uonn gronda furtina d'empruar lur fortuna ed ein gia semess sin via ils 19 d.q. A **Giubiasco**, nua ch'ei paga per ordinari il meglier, han ei uonn vendiu pauca biestga ed han lura instradau lur roschas per **Ligiaun**.

*Gasetta Romontscha nr. 39; 29 da settember 1881*

### **Fiera**

La fiera da **Ligiaun** ei ida mal, schegie che negin seregorda, ch'ei seigi iu sul **Monte-Ceneri** schi pauca biestga sco uonn. Il mender ei stau, ch'igl ei sin via rut ora la zoppina en ina roscha da **Tujetsch**, che negin sa co igl ei iu tier. Quella ei lu vegnida serrada giu damaneivel da **Ligiaun**. Per ventira ei la malsogna buca seresada pli lunsch, mo la tema che quei savessi daventar, ha fatg dar giu ils tiers pli bienmarcau. A **Sebiastg** era aunc vegniu vendiu stiarls per andants prezis; il meglier pagavan leu las grondas e bialas vaccas glarunèsas, fittaders han pagau per quellas tochen 50 marenghins il pèr ed aunc dapli, ferton che las mugias pagavien a proporziun mender. Ils purs talians vevien stuiu vender lur biestga gronda bienmarcau e levien a **Ligiaun** pagar pauc pils stiarls. Il davos seigi vegniu vendiu mo per 8 - 9 marenghins il pèr. Entgins marcadonts ein vargai giu per buca dar giu schi bienmarcau.

*Gasetta Romontscha nr. 40; 6 d'october 1881*

### **Ursera**

La nova fiera d'**Ursera**, nua ch'ei fuva era vegniu catschau biestga da **Mustér**, **Tujetsch** e **Medel**, ei stada fetg viva, mo ils prezis erien permiezvi. Cull'avertura dalla viafier gottardista han ins speronza da survegnir ad **Ursera** ina gronda fiera centrala pil commers da biestga denter l'**Italia** e la **Svizra**.

*Gasetta Romontscha nr. 41; 13 d'october 1881*

### **Secunda fiera**

Cun quei che la secunda fiera da **Ligiaun** ei il davos puspei ida mal, aschia ch'ins ha stuiu vargar giu cun bia biestga e ch'ils marcadonts, che han cumprau si vaccas per catschar quellas giuviars e sull'**Alpsu** pellas fieras luzernèsas, han tenor lur

gudignau pauc ni nuot malgrad ils bass prezis, ch'els han pagau, va ei plaun vinavon cun alzar empau ils prezis. - Denton ei schon vegniu vendiu ina tala massa biestga, ch'ins sto buca far naven pli biara per munconza da fein. Quel vegn ussa vendius ella **Cadi** per circa 40 frs. la veglia tschuncheisma gronda da circa 8 meters cubics. Il medem prezi ha era il fein a pastg en **Tujetsch**. Muort la scartezia da fein han biars teniu uonn ad honor la rabetscha da truffels cun sechentar ella, far flucs ord la feglia e dar ils stumbels allas cauras, che maglian quels pli bugen che fein.

*Gasetta Romontscha nr. 45; 10 da november 1881*

### **Vinars**

Vinars d'ansauna bien e real, niev e veder, magari 100 liters, venda per in raschuneivel prezi Leci Balzart a **Tujetsch (Cavorgia)**.

*Gasetta Romontscha nr. 46; 17 da november 1881*

**(33) Il Rein mava fetg ault ed ha priu naven las punts da Sedrun Lubientscha d'astgar far la catscha. - Passau tras Turitg circa 60 personas dalla Surselva, las biaras da Tujetsch. - Da 5 cauras survegniu 11 anseuls e tuts sauns e frestgs. - En Tujetsch han ins stuiu rischlar risdiv la sera cun latiarnas. - Ins ha leu numnadamein anflau per bien da buca sittar pli tier nozzas.**

### **Uolps**

Muort il grond donn dallas uolps vid ils tschuts ha la val Tujetsch obteniu la lubientscha d'astgar far la catscha sin quellas tochen calonda mars. Cun quella caschun ha capitani Felix Vincens da Mustér, per gronda legria dils Tuatschins, sittau leu in stupent tschess rojal (Steinadler), che mesira cullas alas biabein 7 peis.

*Gasetta Romontscha nr. 8; 23 da fevrer 1882*

### **Tschess**

En Tujetsch han dus tschess rojals quest unviern sfraccau si bia tschuts, tschancs e tgisigs; il grond da quels ei, sco schon relatau el davos numer, vegnius fatgs giu leu ils 18 da fevrer e l'auter ei ussa era vegnius sittaus ils 27 da fevrer dil catschadur Stiafen Fry da Sumvitg. En Valrein ei era dacuort vegniu sittau in grond e bi tschess rojal, che miseravi 16 peis (??) cullas alas stendidas ora.

*Gasetta Romontscha nr. 9; 2 da mars 1882*

### **Emigraziun**

Buca ver! La Nova Gasetta da Turitg e suenter quella era il Rätier e Tagblatt raquentan, che mesjamna, ils 29 da mars, seigi passau tras Turitg circa 60 personas dalla Surselva Grischuna, las biaras da Tujetsch, per serender ell'America. Ils 28 seigien leu ir ordavon 20 auters Sursilvans, per la gronda part da Sursaissa, e sco quels hagien sincerau, vegnien questa primavera aunc biars a vegnir suenter els e l'emigraziun ord il Grischun vegni a prender ina extraordinaria extensiun. Quasi schi nunverdads sco lingias! Da Tujetsch van mo 6 personas ell'America, e quels ein semess sin viadi per ils 31 da mars. Da Sursaissa era ei stau iu in triep ordavon, mo sch'in per da quels, supponend forsa che ins laschi encrescher per els, han dau da crer, ch'aunc roschas Sursilvans vegnien a vegnir suenter els ell'America, sche pudessen ei secuglienar. Dad ina emigraziun en massa audan ins nuot ed ils vegls proverbis: «stai a casa e setila via undreivlamein» e «negliu sgolan utschals barsai en bucca», han aunc adina lur valor. Denton lein nus haver agurau bien viadi e tutta ventira a nos cumpatriots emigrai.

*Gasetta Romontscha nr. 14; 6 d'avrel 1882*

### **Pials**

Las pials ansiel pagan mal uonn, da biars onns enneu ein ils prezis da quellas buca stai pli aschi bass. Ei vegn plidau da 2 - 3 frs 50 ct. Cheu ei surviu sche ina caura fa dus anseuls ed aunc dapli, sco igl ei a nus vegniu raquintau dad in pur en **Tujetsch**, che ha da 5 cauras survegniu 11 anseuls e tuts sauns e frestgs. – Dil negozi da nuorsas audan ins aunc nuot, ferton che onn da quei temps era gia cumprau si biaras.  
*Gasetta Romontscha nr. 15; 13 d'avrel 1882*

### **Fein a pastg**

Diesch viertels fein a pastg ein venals tier Vigeli Werth a Selva.  
*Gasetta Romontscha nr. 15; 13 d'avrel 1882*

### **Cuors postal**

Sin remonstraziuns da vart d'**Uri** ei il planisau secund cuors da posta sull'Alpsu vegnius strihaus.  
*Gasetta Romontscha nr. 19; 11 da matg 1882*

### **Pass**

Cun quei ch'ils pass dall'Alpsu e dil Lucmagn ein stai aviarts schi baul, ei gia il matg schon passau dabia jasters tras la Surselva, che vegn speranza tras la viafier gottardista a survegnir pli numerosa frequenza da quels e pli gronda vivacitad.  
*Gasetta Romontscha nr. 23; 7 da zercladur 1882*

### **La fiera da Sedrun**

dils 8 da zercladur, che curdass uonn silla fiasta da s. Sontgilcrest, vegn perquei tenuta il di avon, mesjamna ils 7 da zercladur.  
La suprastonza da Tujetsch  
*Gasetta Romontscha nr. 22; 1. da zercladur 1882*

### **Fieras**

Las fieras dad **Ursera** e **Sedrun**, che han uonn fatg concorrenza ina a l'otra, ei vegniu marcadau pauc. ...  
*Gasetta Romontscha nr. 24; 15 da zercladur 1882*

### **Dracca**

Dumengia vargada suentermiezdi ha ella Cadi draccau zun fetg, il Rein mava fetg ault ed ha priu naven las punts da Sedrun a Surrein. ...  
*Gasetta Romontscha nr. 28; 13 da fenadurs 1882*

### **Anflada**

Capitani Mucli da Tujetsch ha quels dis fatg sillas alps ina rara anflada – ina cavazza camutsch cun corns bein conservai.  
*Gasetta Romontscha nr. 33; 17 d'uost 1882*

### **Glin**

Ch'ei vegneva tratg ora glin en Tujetsch per igl october, ei ina remarcablada che mereta da vegnir nudada si.  
*Gasetta Romontscha nr. 40; 5 d'october 1882*

### **Bletsch**

L'emprema mesadad digl october ha cuntinuau cul sbletschergnem ed ins ha giu tribla miseria da ventscher si ils fretgs. En Tujetsch han ins stuiu rischlar risdiv la sera cun latiarnas. Tuts fretgs empermettevan la stad ina reha raccolta, mo las



plievlias e neivs digl atun han destruiu la biala speronza.  
*Gasetta Romontscha nr. 42; 19 d'october 1882*

### **Secund cuors**

Sch'il Tagblatt fa attents sils avantatgs, che Mustér vegni a retrer la stad ord in dubel cuors da posta sull'Alpsu, sche savein nus notificar ad el ch'ils Uranès hagian schon ussa instanziau tier lur regenza per far luvrar ora, che quei secund cuors vegni da **Berna** ano puspei strihaus, ual sco igl ei stau onn il cass. Vediamo!  
*Gasetta Romontscha nr. 52; 28 da december 1882*

### **Lavina**

Ils 26 allas 4 dalla damaun ei a Selva vegniu giu ina ferma lavina, che ha fatg tremblar las casas, mo ins ei mitschaus culla sgarschur e tema.  
*Gasetta Romontscha nr. 52; 28 da december 1882*

### **Traffic**

Per promover il traffic sull'Alpsu ed il Lucmagn vul il departement postal schar entscheiver ad ir la posta sur quels dus pass schon ils 15 da zercladur, enstagl per calonda fenadur ed ha perquei dumandau si nossa regenza, schebein ella vegli procurar, che quels dus cuolms seigien sin lura aviarts per carrs. Quella ha exprimiu prontadad cheutier, ed ei perquei semessa en corrispondenza culla regenza d'**Uri**.  
*Gasetta Romontscha nr. 2; 11 da schaner 1883*

### **Nurser**

La vischnaunca da Tujetsch enquera suenter in taffer e bein versau nurser, sco pastur da sia entira muntanera nuorsas per il temps dalla proxima stad. – Aspirants han da s'adressar persunalmein tier la suprastanza da Tujetsch.  
*Gasetta Romontscha nr. 7; 15 da fevver 1883*

### **Marcadonts**

Bavare's ein stai tochen Tujetsch e cumprau si leu vaccas, vadials giuvens e taurs per bials prezis, aschia ch'ils marcadonts da leu han saviu seperschuader, ch'ei seigi stau dad els ina schliata speculaziun da sez vuler serender cun vaccas silla fiera bavare'sa a Sonthofen enstagl schar vegnir si tier nus ils Bavare's a cumprar si vaccas.  
*Gasetta Romontscha nr. 12; 22 da mars 1883*

### **Fotografia a Sedrun**

Cheutras notificateschel jeu, che jeu vegni ad esser sonda, ils 14 d'avrel a Sedrun, sch'igl ei favoreivla aura per far purtrets fotografics. Ei vegn exponiu sco musters pliras bialas fotografias. Per numerusas empustaziuns serecamonda cun tutta stema, J. B. Poetter, fotograf a **Glion**  
*Gasetta Romontscha nr. 14; 5 d'avrel 1883*

### **Annunzia e recumandaziun**

Il sottascret fa cheutras da saver ad in ludeivel publicum dalla **Cadi** e da siu contuorn, ch'el cuntinueschi culla industria da hafner, che siu defunct bab ha giu mess si a Bugnei (Tujetsch) e furneschi la medema vischala da tiaracotga per tuts basegns da casa, seigi per duvrar vid il fiug, en cuschina, vid latgiras, caffetieras, ruogs da flurs etc.

El engrazia per la gronda confidonza, ch'il publicum ha duront 50 onns mussau visavi a siu bab p.m., e supplichescha d'era schenghegiar quella ad el. El serecamonda perquei a negoziants ed a particulars e vegn a sespruar da survir cun buna rauba e bienmarcau.



Josef Anton Deragisch, fegl, hafner a Bugnei (Tujetsch)  
*Gasetta Romontscha nr. 14; 5 d'avrel 1883*

### **Sittar da nozzas**

Cun caschun ch'il far nozzas solemnas ei culla fin dil temps pascal ecclesiasticamein puspei lubius, fagein nus attents sin in progress dalla vischnaunca da **Tujetsch**, culla speranza ch'era en auters loghens vegni quei bi exempel da surengiu immitaus. Ins ha leu numnadamein anflau per bien da buca sittar pli tier nozzas. Contas sventiras ha ei schon dau cun quei terribel sittem. En bia vischnauncas ein ils giuvens aschi perderts da sittar, mo cura ch'il til da nozzas serenda en baselgia, mo en autras vegn ei per gronda mulesta da glieud malsauna ramplunau la sera fagessen in nizeivel schenghetg als spusai, enstagl far spesas cun sittar ora tonta puorla per far ramplunar las vals. All'emprema vischnaunca che suonda gl'exempel da **Tujetsch** clamein nus tier in honorific vivat!

*Gasetta Romontscha nr. 17, 26 d'avrel 1883*

### **(34) Ins tema pil negozi da biestga dil proxim atun**

**Segirau fadigia per plirs onns. - In blah cun in pac nittas. - Siu armaul era ussa malsauns dalla zoppina. - Beiba brav ed ha muort eivradad stuiiu durmir en nuegls. - Sedrun ha survegniu la nota fetg bien. - Catschau roschada vaccas silla fiera d'Altorf.**

### **In bien pegliatalpas**

vegn encuretgs dalla squadra Rueras e Zarcuns en Tujetsch. Quel sto esser provedius cun buns attestats e stuess permanentamein setener si en Tujetsch, quei temps che selai pigliar talpas. Cheuencunter vegn segirau fadigia per plirs onns, sch'el fa sia lavur en uorden. El sto sorprendere quella ton pli gleiti. Aspirants dueien s'adressar tier genau Cristian Muggli a Rueras ni tier Gion Paul Berther a Camischolas.

*Gasetta Romontscha nr. 18, 2 da matg 1883*

### **Cuors dall'Alpsu**

Il secund cuors dalla posta sull'Alpsu parta da Cuera suenter ch'igl emprem tren dalla viafier ei leu arrivaus da S. Gagl a Turitg, va sur Versomi ed arriva la sera a Mustér. La damaun va el lura a Göschenen e stat en connexiun culs tils express dil di dalla viafier gottardista. Schi gleiti che quellas arrivon a Göschenen tuorna la posta a Mustér, nua ch'ella stat sur notg e parta la damaun per Cuera, aschia che ses passagiers san da miezdi ir a Turitg e S. Gagl.

*Gasetta Romontscha nr. 23, 7 da zercladur 1883*

### **Piars**

denter Mustér e Sedrun in blah cun in pac nittas lien. Igl anflader ei supplicaus da schar saver Giachen Antoni Beer a Sedrun.

*Gasetta Romontscha nr. 28, 13 da fenadur 1883*

### **Zoppina**

Ad Ursera ei quels dis rut ora la zoppina denter las „vaccas da caffè“, u da casa. Malgrad las precauziuns pridas cun serrar giu quella biestga, po quella malsogna tgunschamein vegnir sur l'Alpsu. ...

*Gasetta Romontscha nr. 30, 26 da fenadur 1883*

### **Pli recent**

Tras biestga d'in marcadont talian, che ha priu si l'alp Curnera en Tujetsch, ei en quella vischnaunca rut ora la zoppina. Quel veva schau urentar ses armauls ad

Ursera avon in nuegl da vaccas malsaunas dalla zoppina e survegniu sin quei in scret da sanadad. Sin viadi a Curnera ha el schau maner ses tiers en ina alp sur Tschamut, bandunada dallas vaccas il di avon. L'auter di vegn leu in pur da Rueras cun sia mugia per trer giu purment. Turnaus a casa ha el observau che siu armaul era ussa malsauns dalla zoppina, ch'ei ussa serasada el vischinadi da Rueras.

*Gasetta Romontscha nr. 31, 2 d'uost 1883*

### **Serrar en**

Tucond tier la zoppina rutta ora en Tujetsch supponan plirs, che quella seigi vegnida runada neu dad Ursera dil spazzatgamin Stoffel, che va savens da Sedrun ad Ursera cun cristallas, beiba brav ed ha muort eivradad stuii durmir en nuegls da biestga infectada. Cun quella caschun lessen nus dumandar ils capogiurists, schebein ei fussi falliu, sch'ins serassi en per 24 uras babs da famiglia, che van pellas ustrias entuorn, duront che dunna ed affons ston endirar fom, e cura che quels van silsuenter eivers pils vitgs entuorn dend scandal a pigns e gronds.

*Gasetta Romontscha nr. 32, 9 d'uost 1883*

### **Scolas dalla Cadi**

Tujetsch alimentescha 5 scolas elementaras, quella da Sedrun ha survegniu la nota fetg bien, las scolas da Camischolas e Rueras han la nota bien, quella da Selva e Cavorgia ualti bien. La scola tudestga a Sedrun ha la nota bien

*Gasetta Romontscha nr. 34, 23 d'uost 1883*

### **Buc aschi nausch**

La zoppina fa progress ella Cadi, da Tujetsch ano eis ella sepropagada ella vischinonta alp da Nalps, che auda a Mustér, era l'alp Soliva ella val Medel ei infectada. Denton vegn ei pretendiu ch'ella seigi uonn buca aschi nauscha sco auters onns. Ins tema pil negozi da biestga dil proxim atun. Breil e Danis hagian era la malsogna, medemamein a Glion

*Gasetta Romontscha nr. 34, 23 d'uost 1883*

### **Tuttas vischanuncas**

La zoppina ei ussa serasada pauc ni bia en tuttas vischnauncas dalla Cadi, bia alps sedattan tutta breigia da tener schuber las caschadas. Marcadonts da Tujetsch e Medel han schon spediù sur cuolm entiras marcanzas schubras per mitschar cun quella avon ch'ils pass vegnan serrai. Marcadonts tudestgs ein la jamna vargada stai tochen en Val s. Pieder ed han catschau ord Lumnezia 60 bialas genetschas, per las qualas els han pagau pli bials prezis che onn.

*Gasetta Romontscha nr. 35, 30 d'uost 1883*

### **Dadens Rueras schuber**

Tujetsch sedosta da schar liber tut (muort la zoppina). Quella vischnaunca ei dadens e sur Rueras, aunc schubra ed ellas alps da quei intsches sesanflan 70 armauls, dils quals ins ha speranza da saver vender ina gronda part sillas proximas fieras el Tessin, Uri etc.

*Gasetta Romontscha nr. 36, 6 da settember 1883*

### **Mèl alpin**

Nus deplerein vivamein, ch'ei sesanfla en quella roscha premis buca in Sursilvan. Il renomau mèl alpin da Tujetsch e Medel ei schon vegnius premiaus silla esposiziun internaziunala a Paris dil temps dils renomai apiculturs plevons Durgiai e Huonder da buna memoria.

*Gasetta Romontscha nr. 37, 13 da settember 1883*

### **Bunas fatschentas**

Il negozi da biestga selai en biebein. Ils marcadonts da Tujetsch, serendi digl Uri giu cun vaccas e genetschas en Baviera han fatg bunas fatschentas e dapresent traverseschan marcadonts tudestgs e romontschs las cuntradas sursilvanas, ch' ein buc infectadas dalla zoppina.

*Gasetta Romontscha nr. 38, 20 da settember 1883*

### **Raccolta admirabla**

Il glin da Tujetsch ei da vegl enneu renomaus e la raccolta da sem glin ei leu savens admirabla; uonn ha in vischin da Rueras en siu stupent glin anflau plontas glin, che vevan tochen 187 borlas, ditgel tschienotgontasiat borlas per ina.

*Gasetta Romontscha nr. 38, 20 da settember 1883*

### **Tscharva**

En Tujetsch vulan ei haver viu in tschierv (carteivel mo in buc-cavriel).

*Gasetta Romontscha nr. 41, 11 d'october 1883*

### **Neiv**

Silla bialaura ha in ferm suffel purtau ils 22 d.q. (october) ina bischa tochen Rein (a Mustér), aschia che certas vischnauncas che senuspevan da tener serrau en il tiers infectai dalla zoppina per ton pli gleiti vegnir libers da quella, ston ussa far quei tras ordinaziun da surengiu. El Tessin ha la gronda dracca lavagau empau la fiera da Giubiasca. Il Lucmagn ha quasi negina neiv e l'Alpsu pauca.

*Gasetta Romontscha nr. 43, 25 d'october 1883*

### **Roschada**

Marcadonts da Tujetsch e Medel han catschau roschada vaccas silla fiera d'Altorf dils 7 ed 8 d.q. Per tener sidretg ella Cadi ils presents aults prezis, munglass quella gronda fiera ir bein.

*Gasetta Romontscha nr. 45, 5 da november 1883*

### **Zoppina**

La Cadi ei ussa totalmein libra da quella calamitad.

*Gasetta Romontscha nr. 47, 22 da november 1883*

### **Il pass cun schletra**

Igl ei uonn gl'emprem unviern che signurs e damas han da buna tempronza passau l'Alpsu en schletra. Tgi sa con ditg ch'ei va aunc avon ch'ei vegni ranschau en in direct cuors postal pli che per 3 meins denter la populada Surselva e la viafier gottardista.

*Gasetta Romontscha nr. 48, 29 da november 1883*

### **Noviz en claustra**

Dumengia vargada ha era in beinaccreditau giuven grischun, che ha schon fatg ses studis teologics en Germania, seschau vestgir en sco noviz dalla claustra. Igl ei il signur premlitinent Giachen Martin Berther da Tujetsch (*pader Baseli Berther da Dieni*), il pli proxim vischin dil vegl casti da Putnengia, che ha dau alla claustra da Mustér il renomau avat Pieder *de Putnengia*, fundatur dalla Ligia Grischa. Nus gratulein dacormein.

*Gasetta Romontscha nr. 51, 20 da december 1883*

### **Aura**

Il mars ha purtau la pli stupenta bialaura e terrenau tochen tiels aults selvadis da

## **Tujetsch e Medel.**

*Gasetta Romontscha nr. 12, 20 da mars 1884*

## **Tgaun**

In bien tgaun da nuorsas enquera il suttascet da prender si per la stad. Alois Curschellas a **Rueras (Tujetsch)**

*Gasetta Romontscha nr. 16, 17 d'avrel 1884*

## **Arver il pass**

Sin istanza dil Cussegl Pign tiel Cussegl Federal d'obligar **Uri** d'arver l'**Alpsu** sils 15 da zercladur, sco ei daventi da nossa vart, ha il Cussegl Federal rispundiu, ch'**Uri** levi absolut buc arver quei cuolm avon gl'emprem fenadur, mo el hagi constrenschiu da far quella lavur sils 21 da zercladur.

*Gasetta Romontscha nr. 18, 1. da matg 1884*

## **(35) Tras el ed auters premurai umens survescha Tujetsch sco muster d'in spargnus tenercasa communal**

**Per sia vischnaunca eis el sco gerau e president communal sefatgs meriteivels cun promover ina bun'administraziun. - Ils Uranès han muncau e perquei ei quella buca stada viva. - Marcadonts tuatschins ein serendi cun ina roscha genetschas silla fiera. - Sul Lucmagn ei vegniu instradau 7 - 800 armauls ord la Cadi. -**

## **Sur Giachen Lorenz Riedi**

Ils 24 d'avrel ha la vischnaunca da Tujetsch cumpignau tiella fossa cun tutta honor igl aultreveriu signur Giachen Lorenz Riedi, beneficiat a Rueras. Naschiu leu 1820, ils 30 da december, era il defunct il giuven denter 8 fargliuns, e mussond el schon baul talent e buna veglia tiels studis, eis el da ses geniturs vegnius surdaus alla scola cantunala catolica ella venerabla claustra da Mustér. Il gimnasi ha el finiu a Friburg el flurend institut dils Gesuits ed ha lura obteniu in plaz liber el collegium da s. Carl Borromeus a Milaun per far ses studis filosofics e teologics. Ils 24 d'uost 1847 eis el vegnius benedius ora a Cuera sco sacerdot e suenter haver celebrau sia messa nuviala en sia baselgia parochiala da s. Vigeli a Sedrun, eis el vegnius eligius sco beneficiat da Rueras. Da leu eis el vegnius 1849 sco plevon a Surcasti e 1860 a Vrin, nua ch'el ha puspei operau sco fideivel pastur dallas olmas tochen 1871. Lura ha el encuretgi ina pli leva lavur ed anflau ina tala silla caplania a Trun. Mo la divina provedientscha ha giu ordinau, che nua ch'el hagi entschiet sia pastoraziun, dueigi el era finir quella. 1877 ha el puspei surpriu la vacanta caplania da Rueras. Vegnend malsauns la davosa cureisma ha el sentiu, che sia fin vegni gleiti neutier, el ha fatg siu testament, recumandau en quel siu tgierp ed olma a Diu e fatg si 2000 frs. per caussas pias. Malgrad siu viv desideri da puder murir e s'unir cun Cristus, ha el aunc stuiu endirar ditg tochen ch'il zenn grond ha ils 22 d'avrel allas 10 avonmiezdi annunziu als habitonts da Tujetsch che lur preziau beneficiat da Rueras seigi spartius da quest mund. El ruaussi en pasch. A nos stimai vischins da Rueras agurein nus in bien successur.

*Gasetta Romontscha nr. 18, 1. da matg 1884*

## **Lucas Cavegn, Sedrun**

Ils 13 d.q. ei miert a Tujetsch gerau Lucas Caveng sco ustier dalla Cruna a Sedrun e dalla Fontauna dil Rein a Tschamut, bein enconuschents e bein accreditaus tiel publicum viagiont. Mellis da puels seregordan dil bien tractament, dall'emperneivla conversaziun e digl oreifer humor e viz dil vegl ustier dalla Cruna a Sedrun, recumandaus honorificamein en tuts cudischs da viadi pella Svizra. El era ual aschi

renomaus sco il famus mel da Tujetsch che ha d'engraziar ad el siu renome'. Bia students vegnan engrazieivlamein a seregurdar con bienmarcau, ch'els vegnevan ora en sia renomada uustria. Per sia vischnaunca eis el sco genau e president communal sefatgs meriteivels cun promover ina bun'administraziun, saluteivel spargn da lenna, ina commensurada indemnisaziun pella gudida dils rehs beins comunals, per promoziun da bunas scolas, da meglieras vias e sco amitg da scadin saluteivel progress. Tras el ed auters premurai umens survescha Tujetsch sco muster d'in spargnus tenercasa communal e dalla vertit patriotica da pagar prompt ed exactamein il dabien dalla vischnaunca. Il stalter communal ei gl'emprem deivet, ch'ils Tuatschins pagan, ferton ch'en biars auters logs han ils cassiers comunals gronda breigia da trer en lur dabien pella vischnaunca. Lucas Caveng ei staus in diember onns el magistrat dil cumin e plirasga deputau sil Cussegl Grond. Gl'uffeci da mistral, d'in temps schi tschercaus, ha el mai vuliu sorprendere.

Arrivaus sin ina vegliadetgna datier da 70 onns eis el staus perdetga dallas grondas midadas en Surselva dapli in miez tschentaner e ses raschienis sul temps vegl eran interessants da tedlar tier. Nus lein sulettamein allegar las midadas ella veta dils vitturins. Havend schon siu bab in negozi, menava Lucas da giuven sia necessaria rauba naven da Glion ni Cuera, dad in temps ch'ei era aunc negins straduns en Surselva. La veta ch'in vitturin stueva da quei temps far, pon ins cumprender ord quei, ch'els stuevan ellas ruinas da Danis, nua che la via vedra vegneva savens sgurdinada, descargar, prender il carr in ord l'auter e sez purtar sulla via ruinada il carr e la rauba. Mo ils vitturins duvravan era buca ton sco ozildi, da magliar per um e cavagl predevan ei cun els. Sco Lucas raquintava, deva siu bab 5 bazs (circa miez franc) per far il viadi da Sedrun a Glion e turnar anavos e sin quei daner da viadi spargnava el aunc adina enzacons bluzchers, ch'el vessi da cumprar ina ni l'otra ga enqual caussa. A Glion marendavan ils vitturins ord lur sitget e buevan comunablamein cun lur cavals. Il loschi predevan ei fetg savens ellas Pardialas sut tschiel aviert. Sulet cura ch'ei mavan a Cuera vevan ei ina stupenta tscheina e bien quartier tiella renomada Crusch Alva a Domat e quei tut mo per miez rensch ni 85 cts. e per ordinari arrivavan leu ils vitturins sursilvans cun particular appetit. Lucas fuva fetg discussius e perquei semegliava ei adina cuort en sia casa. El vegn aunc a restar ditg en buna memoria tier jasters e dumiastis. El ruaussi en pasch!

*Gasetta Romontscha nr. 21, 21 da matg 1884*

### **Tagliacrappa**

anflan ton pli gleiti biala e buna lavur tier Vigeli Berther, ugau baselgia a Sedrun.

*Gasetta Romontscha nr. 22, 29 da matg 1884*

### **Elecziun**

Dertgira districtuala per 1885-1887: ... suppliants: ... assistent Schmed da Tujetsch.

*Gasetta Romontscha nr. 23, 5 da zercladur 1884*

### **La fiera a Sedrun**

che curdass sin dumengia proxima vegn tenuta gliendisdis ils 9 d.q. Tuts tiers che vegnan quei di catschai en Tujetsch sin quella fiera, ston esser provedi cullas prescrettas bullettas.

La suprastonza da Tujetsch

*Gasetta Romontscha nr. 23, 5 da zercladur 1884*

### **Cuors postals**

Ils 15 d.q. entscheivan ils novs cuors postals sur nos pass alpins. Sull'Alpsu van puspei 2 cuors, in che va direct a Cuera, parta da Mustér las 3 suentermiezdi e l'auter las 7 e 35 minutas dalla damaun ...



... Il cuors principal sull'Alpsu entscheiva per ils 21 da zercladur e finescha ils 21 da settember. ...

*Gasetta Romontscha nr. 24, 11 da zercladur 1884*

### **Fiera**

La fiera da Sedrun dils 9 han ils Uranès muncau e perquei ei quella buca stada viva ed ils prezis dallas cauras eran sbassai empau. Las nuorsas ch'eran stadas cumpradas si per 24 – 34 frs. il però, han ils marcadonts stuiu vender senza gudogn.

*Gasetta Romontscha nr. 24, 11 da zercladur 1884*

### **Cuors postals**

Sil publicau niev plan dils cuors postals pella stad steva quei ner sin alv e perfin il postbureau a Cuera ha pils 15 da zercladur dau ora ad in jester passagier in bigliet da Cuera tochen Ursera, e quel ha cun raschun sesmervegliu d'udir tier sia arrivada a Mustér, ch'ei mondi aunc 8 dis negina posta sull'Alpsu! Ins giavischass sclariment sur quella malemperneivla muncada. *Gasetta Romontscha nr. 25, 19 da zercladur 1884*

Per rectificaziun da nies artechel postal el davos numer, remarchein nus, ch'igl jester setrumpaus pervia dil cuors sull'Alpsu, vevi priu a Flem e buc a Cuera siu bigliet per quel. *Gasetta Romontscha nr. 26, 26 da zercladur 1884*

### **Redactur**

Signur Florin Berther da Tujetsch, che ha plirs onns studiau sillas universitads tudestgas, e meina ina zun versada plema, entra cugl emprem october ella redacziun dil Basler Volksblatt, che cumpara en grond format, treisga ad jamna ed ei per ses decisivs principis conservativs- catolics bein accreditaus ell'entira **Svizra** catolica. Nus gratulein tier quella acquisiziun. *Gasetta Romontscha nr. 27, 3 da fenadur 1884*

### **Anflau**

El vitg Sedrun, vischnaunca da Tujetsch, seigi vegniu anflau zatgei daners da pupi, il qual vegn conform § 192 dil dretg privat cheutras fatg enconuscent.

Il respectiv proprietari ha, cun en medem temps sco tal selegitimar, da s'adressar el termin da treis meins a dato tier il suttascret uffeci.

Per igl Uffeci circuital dalla Cadi  
il president A. Tuor

**Rabius**, ils 14 da fenadur 1884

*Gasetta Romontscha nr. 29, 17 da fenadur 1884*

### **Fiera a Sonthofen**

Marcadonts tuatschins ein serendi cun ina roscha genetschas silla fiera bavaresa a Sonthofen (200 km da Tujetsch), nua che quels mavan pli da vegl per comprar si biestga per catschar alla fiera da Ligiun. Ils temps semidan e nus semidein cun els.

*Gasetta Romontscha nr. 37, 11 da settember 1884*

### **Ligiun**

Silla fiera da Ligiun paress da buca vegnir gronda catscha. Sul Lucmagn ei vegniu instradau 7 - 800 armauls ord la Cadi, 200 glarunès e sulla Greina po esser passau circa 300 tgaus. Ils davos dis ei da marcadonts talians en cumpignia cun Furrer vegniu cumprau giu entiras roschas cun schar in bi gudogn als vendiders. Ils Tuatschins, ch'eran stai serendi a Sonthofen, han leu buca saviu vender tut lur genetschas, mo han ussa aunc catschau giu leu in triep per dar meglier esit allas restadas anavos.

*Gasetta Romontscha nr. 39, 25 da settember 1884*



### **Secunda fiera**

La secunda fiera da Ligiaun ei buc ida schi bein sco l'emprema, e per excepziun han ils marcadonts quellaga fatg meglier giu Ligiaun che si Giubiasco. Il meglier esit vevan ils stiarls, las vaccas tergevan meins ed il mender pagavan a proporziun las mugias, ch'ins vess a Ligiaun saviu cumprar pli bienmarcau ch'el Grischn. Cun dabia biestga han ins stuiu vargar giu silla fiera da Vareis. Ils marcadonts, principalmein da Tujetsch, che han puspei vuliu empruar lur fortuna sillas renomadas fieras bavaresas a Sonthofen, han malgrad las repetidas fieras buca saviu dar giu tut lur biestga. Aschia eis ei da capir ch'ils stravagants prezis tschessan. Per ventira ei lunsch ora la gronda part biestga venala vendida. ...

*Gasetta Romontscha nr. 44, 30 d'october 1884*

### **(36) Quei cass ei in niev e serius avis pils tubacheders.**

**Piars quest unviern ina massa vadials giuvens. - Tujetsch baghegia uonn ina nova casa da scola. - Vegniu anflau in um miert. - Il tratsch ei staus schelaus ed era il latg els tschalers. - La zoppina smanatscha danovamein alla Cadi. - El Grischn ei vegniu teniu 15 scolas realas, denter auter er'en Tujetsch.**

### **Caschunar gronda sventira**

Il far maluardau dils tubacheders vess sonda vargada saviu caschunar gronda sventira allas vischnaucas da Tujetsch e Mustér. In tubacheder tuatschin fuva quei di ad uaul cun entgins camerats sils cunfins da quellas duas vischnaucas. Envidond ina pipa, fiera el il zulprin ardent pli lunsch, ella gronda schitgira ha quel dau fiug il pastg e silsunter in pluna roma. Serasond il fiug pli e pli han ins stuiu clamar agid, mo per l'auter di, la dumengia, han ins pudiu stizzar diltut. Ins ha giu grond cletg da buca stuer schar barschar bia plontas, mo quei cass ei in niev e serius avis pils tubacheders, ed igl § 35 dalla lescha da polizia plaيدا clar avunda sulla censura da talas «negligentschas».

*Gasetta Romontscha nr. 46, 13 da november 1884*

### **Curants engles**

Tut che selegra giud la biala stad s. Martin. ... Enzatgei resch niev fuv'ei era da ver il november a Mustér crotschas cun curants engles d'Ursera, che fagevan excursiuns sull'Alpsu il meins dad unviern.

*Gasetta Romontscha nr. 46, 13 da november 1884*

### **Iu a piarder**

Tgi che sa novas da duas cauras jastras, ina mesalva ed ina nera cun in F ed ina crusch sils corns (la noda dallas ureglias san ins buc) ei supplicaus da schar saver Gion Fidel Wenzin a Selva (Tujetsch).

*Gasetta Romontscha nr. 49, 5 da december 1884*

### **Piars vadials**

La vischnaunca da Tujetsch ha piars quest unviern ina massa vadials giuvens, biars da quels ein ventschi 2 – 3 dis suenter esser naschi senza ch'ins fuss vegnius sissu danunder che quei derivi.

*Gasetta Romontscha nr. 4, 23 da schaner 1885*

### **Concurrenza per meisters da lenna**

La vischnaunca da Tujetsch baghegia uonn ina nova casa da scola a Sedrun ed ha schon tratg la lenna sil plaz. Essend che quella vegn pella gronda part construida da lenn, sche vegn ei cheutras aviert la concurrenza per quella lavur, che sto vegnir

fatga en uorden. Meisters che aspireschan sin quella lavur ston tochen ils 25 da mars s'adressar tier la cumissiun da baghegiar.  
*Gasetta Romontscha nr. 9, 26 da fevrer 1885*

### **Process**

Cul process instradaus da quels dallas vias commercialas (ed era dalla vischnaunca da Tujetsch) encunter il cantun avon la dertgira federala pervia dil manteniment dallas vias, ei tochen ussa iu plaun vinavon, finalmein aud'ins, ch'igl avrel vegni da quellas varts priu en perdetgas a Cuera e silsunter vegni il tribunal immediat a prender amauns il process, sil qual ins ei fetg spanegiaus.  
*Gasetta Romontscha nr. 12, 19 da mars 1885*

### **Plevon**

Unanimamein ha la pleiv da Tujetsch eligiu plevon igl aultreveri signur Adalbert Baselgia da Sumvitg, dapresent plevon a Vrin. Igl aultreveri plevon Berther a Pigniu vegn ad Andiast.  
*Gasetta Romontscha nr. 13, 26 da mars 1885*

### **Legreivel impuls**

Ella Cadi ha il traffic da biestga tut anetgamein survegniu in legreivel impuls tras la cumparsa da marcadont Russy d'Ursera, che ha en Tujetsch, Mustér e Medel, cumprau si varga 140 vadials e stiarls per fetg bials prezis. Sin quei ein era nos marcadonts spert semess en moviment ed han stuiu alzar ils prezis. Tuttas bunas caussas ein treis, e perquei ei lu aunc cumpariu in marcadont bavare's per cumprar vaccas da vadi e da bials ivers. Quei ei stau aura pils purs e nus lein sperar, ch'era ils marcadonts seigien buca vegni menai egl avrel.  
*Gasetta Romontscha nr. 14, 2 d'avrel 1885*

### **Premiaziun**

da taur a Trun: II. Classa: ... 7) in mutg da Joseph Berther a Rueras, 70 frs.; ... 12) quel da Bruno Soliva a Tujetsch 40 frs.  
*Gasetta Romontscha nr. 15, 9 d'avrel 1885*

### **Cumin**

Ella dertgira circuitala ein eligi: ... president communal Soliva da Tujetsch. Il candidat ch'ils Tuatschins vevan semtgau pil Cussegl Grond, che vess segiramein giu bials aspects, Florin Berther, redactur dil Basler Volksblatt, han ins, essend buca habitonts el cantun, costituzionalmein buca saviu leger ora.  
*Gasetta Romontscha nr. 19, 7 da matg 1885*

### **Um miert**

La jamna vargada ei spel lag dall'Alpsu sin intsches uranès vegniu anflau in um miert, ch'ei tenor sias blessuras ed il cunti leu speras semazzaus ni vegnius mazzaus. Vid las scartiras anfladas tier el duei ei esser in cumiss sogngagliès.  
*Gasetta Romontscha nr. 19, 7 da matg 1885*

### **Crius suffels, neivs e purginas**

Il matg ei in bi meins pils poets, mo als purs fa el savens in streh tras lur quens. Uonn ha el puspei purtau crius suffels, neivs e purginas, il tratsch ei staus schelaus ed era il latg els tschalers sils cuolms, nua ch'igl ei en logs munconza da fein e pastg. ... Els marcaus da Berna e Turitg neveva ei zuar ils 15 d.q. (*matg*), ferton ch'ei cuflava ella Val Tujetsch sco il pli ruh unviern.  
*Gasetta Romontscha nr. 21, 22 da matg 1885*

### **Avertura**

Il pass dall'Alpsu ei vegnius aviarts ils 29 ed il Lucmagn ils 31 da matg. Uri e Tessin han priu l'iniziativa, feton ch'il Grischun ha giu pintga lavur e mess maun per avon che schar finir las lavurs da tschei maun dil cuolm. ... Tenor rapport uffical ha il cantun dau ora 1884 pell'Alpsu mo 2894 frs. ... Conclusivamein dein nus bugen tier, ch'era la letargia sursilvana seigi empau la cuolpa, che ses dus pass alpins vegnan buca aviarts pli baul e che l'aula Surselva sa buca seprofitar pli bia dalla vischinonta viafier gottardista.

*Gasetta Romontscha nr. 23, 3 da zercladur 1885*

### **Plevon**

A raschun ch'il signur plevon Baselia ha buca vuliu bandunar **Vrin**, ha la pleiv da Tujetsch elgiu signur plevon *Francestg Eduard Muoth da Breil* a Surrein per siu niev plevon, e la pleiv da Surrein ei vegnida surdada a signur caplon Thomas Berther a Sedrun. ...

*Gasetta Romontscha nr. 24, 11 da zercladur 1885*

### **Marcadau pauc**

Alla fiera da Tujetsch dils 8 d.q. (*zercladur*) ei vegniu marcadau pauc, cauras ein vegnidadas vendidas per 18 – 22 frs., las nuorsas eran buca fetg tschercadas. La fiera d'Ursera ei aunc stada mendra, paucs tiers, pauca glied e bass prezis.

*Gasetta Romontscha nr. 24, 11 da zercladur 1885*

### **Zoppina**

La zoppina (*Maul- und Klauenseuche*) smanatscha danovamein alla Cadi. Ina roscha nuorsas pigureras, ch'ei il matg vegnida catschada a Chiasso suls cunfins svizzers ed arrivada tochen Aquacalda sil Lucmagn, ha runau en quella malsogna ed infectau l'entira Val Blegno. ... La vischnaunca da Medel ha gia daditg postau ina guardia sil Lucmagn, mo ei vegn raquintau, ch'ei seigi era sefultschau el Grischun nuorsas pigureras dil maun dall'Alpsu ed ins spetga ina rigurusa inquisiziun. Nuorsas pigureras han era runau la zoppina a Realp en Val Ursera.

*Gasetta Romontscha nr. 25, 18 da zercladur 1885*

### **Scola**

Gl'unviern vargau ei vegniu teniu el Grischun 15 scolas da cuntinuaziun (Fortbildungsschulen) u realas, denter auter er'en Tujetsch, ch'ha obteniu 200 frs. subsidi cantunal. ...

*Gasetta Romontscha nr. 26, 25 da zercladur 1885*

### **La zoppina**

Sco enonuschent smanatscha quella malsogna contigua danovamein alla Cadi dad omisdus pass alpins (Lucmagn ed Alpsu). La Val Blegno, principalmein dad Olivone tochen sin nos cunfins, ei totalmein impestada. La malsogna ha leu quellaga in fetg nuscheivel character. Egl Uri ei la malsogna a Realp, ed era ussa ad Ursera e sin in'alp dall'Alpsu. Sin camond da Berna han quels pass stuiu vegnir aviarts e dau liber pass a tuts tiers cun bulletta, ch'ei ni paran sauns.

*Gasetta Romontscha nr. 27, 2 da fenadur 1885*

### **Sur Gion Antoni Venzin**

Ils 19 d.q. vegn monsignur uestg F. C. Rampa a benedir ora 6 teologs en il seminari da s. Leci a **Cuera**. Denter quels sesanflan 3 Romontschs: ... da **Tujetsch** signur Gion Antoni Venzin che celebrescha sia messa nuviala ils 15 d'uost a **Sedrun**.

*Gasetta Romontscha nr. 29, 16 da fenadur 1885*

## Zoppina

La zoppina fa progress el Grischun ed ei dapresent en 50 nuegls e sin 43 pascalaziuns. La Cadi ei malgrad la malsogna sill'Alpsu e Lucmagn aunc intacta. *Gasetta Romontscha nr. 33, 13 d'uost 1885*

## (37) Ils Tuatschins vulan pli bugen luvrar cun stenta e strapazs caras pastiras, che sedar vi ad in «dolce far niente».

Ei dat purs che han pagau tochen endisch marenghins per saver segar. - Anflau en Tujetsch in glin che vevi si 190 borlas. - La dertgira federala ha unitamein enviau anavos il recuors da Tujetsch. - La vischnaunca stoppi surpender tuttas spesas giudizialas e pagar al cantun 1000 frs. - Il pli car fein ei tscheidiatsch vegnius vendius a Tschamut.

## Fein a pastg

Ella miseria da pavel vegn ei uonn fatg ton pli bia fein a pastg. Alla vischnaunca da Tujetsch ha quel purtau en uonn datier da 5000 frs., igl ei purs che han tiegl ingant pagau tochen 11 marenghins per saver segar tscheu e leu sin pastiras e cuolms. Biars han fatg leu blahs e blahs bi e verd muot (matun) e runeida. Era dalla feglia vegn ei seprofitau ton sco ins sa e po.

*Gasetta Romontscha nr. 36, 3 da settember 1885*

## Fiera

Ils marcadonts da Tujetsch ch'ei stai ils 2 da settember silla fiera da Lucerna, telegrafeschan a nus, ch'ei hagien fatg atras 2 fieras e saviu vender mo 3 armauls.

*Gasetta Romontscha nr. 36, 3 da settember 1885*

## Fein a pastg

En rectificaziun d'ina notizia purtada en nies davos numer relatein nus, ch'ei seigi a nus ufficialmein vegniu scret, che Tujetsch hagi uonn buca tratg 5000 frs. ord il fein a pastg e las pastiras vendidas, sonder mo 2 – 3000 frs. Il reclamond scriva denter auter: «Ver eis ei denton, che Tujetsch fa uonn dabia fein dapli ord ils aults ch'igl ordinari, ver eis ei era, ch'in sulet pur ha cumprau per 220 frs., ver eis ei aber era, che l'activitad dils endiri Tuatschins, ils quals vulan pli bugen luvrar cun stenta e strapazs caras pastiras, che sedar vi ad in «dolce far niente», preferescha la lavur adina cun pign interess ad in cumadeivel ruaus senza negin interess. Evident eis ei era che bia pastiras ein vegnidas pagadas caramein, denton san ils cumpraders seconsolar empau cul patratg ch'els hagien era aunc art e part dalla cassa communal, schiglioc pudess forsa bein enqualin clamar si cun Benjamin Franklin: «Ti pupratsch has quella gada pagau memia car tia fiffa.» Havessen ils Tuatschins saviu comprar fein a pastg per 20 – 25 ct. il buordi, sco igl ei stau il cass en vischinontas vischnauncas, sche havessen els aunc cumprau bia tocs da segar dapli, enstagl stuer pagar entochen 2 frs. il buordi, etc.»

*Gasetta Romontscha nr. 37, 10 da settember 1885*

## Cuors postal sull'Alpsu

Cullas midadas dils cuors postals dils 16 da settember han las postas sul Lucmagn ed Alpsu totalmein calau si, aschia che la Cadi ha per 9 meins zun negina communicaziun postala culla viafier gottardista. Ei fuss zun da giavischar, ch'in cuors da quella mass silmeins sur quei frequentau pass schiditg ch'il cuolm fuss aviarts e buca mo ils solits 3 meins, in tal accord savess la Confederaziun tgunsch serrar giu culs furniders dils cavals da posta. Quei fuss gl'emprem pass per vegnir tier in annual cuors postal sull'Alpsu. Duess Uri buca porscher maun leutier, sch'ei

dapresent el **Tessin** fetg bials aspects per arranschar in tal sul **Lucmagn**.  
*Gasetta Romontscha nr. 38, 17 da settember 1885*

### **Fiera**

La biestga dalla **Cadi** pella fiera da **Ligiaun** ha entschiet a semetter sin viadi ils 16 d.q. (*settember*) ...

*Gasetta Romontscha nr. 38, 17 da settember 1885*

### **Tschiennavonta borlas**

Sco gronda raritad ha in um dalla barba grischa raquintau a nus, ch'el hagi anflau en **Tujetsch** in glin che vevi si 190 borlas, ditgel tschien e navonta!

*Gasetta Romontscha nr. 38, 17 da settember 1885*

### **Process**

Ins spetga, ch'il process fatgs pendants tier la dertgira cantunala dils avdents dallas stradas commercialas e da **Tujetsch** encunter la nova lescha pervia dil manteniment dallas vias, vegni aunc uonn decidius. Quel dalla vischnaunca da **Tujetsch** ei fixaus sils 13 da november. *Gasetta Romontscha nr. 43, 22 d'october 1885*

### **Dertgira federala**

La pli impurtonta nova pil **Grischun** ei, che la dertgira federala ha unitamein enviaiu anavos il recuors da **Tujetsch** e vegn consequentamein a far il medem culs recuors, ch'ils avdents dallas stradas commercialas han da quellas varts dau en encunter il cantun. La vischnaunca da **Tujetsch** ha tras siu advocat, cusseglier dils stans P. C. Planta, garegiau tiella dertgira federala, che nossa nova lescha sul manteniment dallas stradas, duei, aschi lunsch ch'ella stetti en contradicziun cullas obligaziuns, ch'ella hagi surpriu 1861 per manteniment dalla strada sull'**Alpsu**, buc esser ligionta per ella, eventual ch'il cantun seigi obligaus da bonificar ad ella pellas prestaziuns, ch'el garegi ussa dapli dad ella. Suenten ina liunga tractaziun, principalmein fetg impurtonta, ein omisdus plogns vegni enviai anavos, perquei ch'il stadi renconuschi per el neginas obligaziuns dil dretg privat e sappi cun **Tujetsch** far negina excepziun. Ch'il stadi sco tal seigi buca obligaus da tener sias empermischuns fatgas, quei sa il saun giudezi d'in sempel pur buca capir. Denton temevan schon 1861 bein enqual vischin da **Tujetsch**, ch'il cantun pudessi ina biala damaun rumper sia empermischun fatga pervia dil manteniment, e levan perquei far star neu persunalmein il cumissari guvernativ, che ha lura per quietar ils malcartents giu schau anavos en scret ina vaga declaronza.

*Gasetta Romontscha nr. 47, 19 da november 1885*

### **Sentenzia**

Per completar l'allegada sentenza dalla dertgira federala el process denter **Tujetsch** ed il cantun, relatein nus aunc, che quella vischnaunca stoppi surprender tuttas spesas giudizialas e pagar al cantun 1000 frs. per spesas extrajudizialas. Quei vegn a parer als Tuatschins stagn bia, denton pudess ei maneivel fruntar, ch'igl advocat dil cantun (**Niggeler da Berna**) fagess pagar siu client pli che melli francs per sias breigias ed expensas en quei process. Sco ei va las tunas, vegni il cantun en quels heiclis process pervia dil manteniment dallas vias, staus surprius inaga dad el, a secuntener cugl acquistau dretg e generusamein schenghegiar tuttas spesas extrajudizialas, che vegnan fatgas ora en sia favur.

*Gasetta Romontscha nr. 48, 26 da november 1885*

### **Process**

Sco ei era da spitgar silla sentenza per **Tujetsch**, ha la dertgira federala enviaiu



anavos il plogn dils avdents dalla **Via-sura, Via-sut e Via-tudestga** e dau raschun al cantun cun 6 vuschs encunter ina. **Maiavila, Zezras, Cazas, Schons, Mesauc** etc. dueien survegnir anavos lur summas, stadas pagadas al cantun per vegnir libers da lavurs vid il manteniment da lur stradun. Ils avdents da quellas stradas commercialas, che han ussa piars lur anteriura impurtonza, garegiavan ch'il cantun duei tener las veglias convenziuns, ni silmeins pagar els per lur lavurs, ch'els stoppien ussa sorprendere dapli che quei, ch'era stau stabiliu tiella construcziun da quellas vias. La dertgira federala ha aber tschaffau si, che las convenziuns denter las vischnauncas suveranas ed il cantun suveran, hagian in caracter public e buca tenor dretg privat, e ch'il cantun sappi per quei mo dad el anora midar giu quellas convenziuns. Avon 20 – 30 onns füss quella questiuon fetg probabel vegnida decidida autruisa, denton san las vischnauncas pigl avegnir tgei peisa ins sappi metter sin semegliantas convenziuns.

*Gasetta Romontscha nr. 50, 10 da december 1885*

### **Engulau duas uras**

Ils dis vargai ha la dertgira poliziala dalla **Cadi** nunspitgadamein giu da truar sur dad in mistergner tirolès, che veva engulau duas uras a **Dardin** ed era mitschus tochen **Tschamut**. Udend da quei enguladetsch, ei polizist Berni daus suenter e vesend el quel ha el senistrua sia geppa, purtau in sac resti si dies e clamau al lader da spitgar empau. Quel ha mirau anavos e spitgau, nunsmind ord la cumparsa dil clamond, che la polizia seigi a dies ad el. Mo Berni ha fatg spert da cargar e menar il lader a **Mustér**.

*Gasetta Romontscha nr. 50, 10 da december 1885*

### **Teater a Sedrun**

(ella aula dalla Cruna)

Dumengia, ils 7 da mars allas 2 suentermiezdi Gliendisdis, ils 8 da mars a l'ina suentermiezdi

I. La villa spel stradun, cumedia en dus acts

II. La mustra dils recruts, cumedia en dus acts

1. piazza 80 cts., 2. piazza 50 cts.

Per numerosa frequenza serecamondan gentilmein ils mats da **Sedrun**

*Gasetta Romontscha nr. 11, 4 da mars 1886*

### **Schenghegiar**

Quell'autorità (dertgira cantunala) ha entschiet sias deliberaziuns cun enviar anavos, muort las consequenzas la supplica dalla vischnaunca da **Tujetsch**, da schenghegiar ils 1000 francs, ch'ella sto tenor sentenza dalla dertgira federala pagar al cantun sco spensas extragiudizialas per siu process piars pervia dil manteniment dalla strada **Alpsu**.

*Gasetta Romontscha nr. 13, 24 da mars 1886*

### **Taurs**

L'exposiziun da s.h. taurs, tenuta ils 24 da mars a **Trun**, ei stada ina dallas pli bialas da plirs onns enneu. Igl ei stau cumpariu 27 tgaus, tuts bein envernai, malgrad la generala munconza da pavel. Sequentes persunals han obteniu premis per lur bos: ... Ella 3. classa: ... Florin Huonder da **Sedrun**, Jos. Berther da **Rueras**, ...

*Gasetta Romontscha nr. 14, 1 d'avrel 1886*

### **Carischia fein**

Il pli car fein ei tscheidiatsch vegnius vendius a **Tschamut** egl ingant, quel ha pagau il maisudiu prezi da 86 frs. la tschuncheisma ni 21.50 frs. il fiertel. A **Mustér** ei vegniu



empruau da schar vegnir fein da **Cuera** che vegn franco **Mustér** 8 1/2 la glivra, mo vegn ualvess ad esser schi buns sco il nies.  
*Gasetta Romontscha nr. 15, 8 d'avrel 1886*

### **(38) Stau in terribel temporal sill'Alpsu che ha ruinau in toc la via e reteniu il carr da posta. Pli horribels ei staus igl urezi da dumengia notg. Per ventira ha el cuzzau mo mes'ura e fatg negin donn.**

Nova colonia els Stadis Uni cun famiglias romontschas. – Tujetsch ha obteniu 190 frs. per la scola reala. - Mustér, Tujetsch e Medel han cheutras stuii spiarder varga 20'000 francs. - Concludiu da far ils necessaris pass per far tener igl Alpsu aviarts gl'entir onn. - Dolurs dils dents calan immediat si tras siu renomau remiedi. Ei vegn garantiu il success.

### **Correspondenza americana.**

La Gasetta Romontscha ha a siu temps rapportau ch'ei seigi sil territori dil **Dacota dil Sid** ella republica dils **Stadis Uni** vegniu fundau da famiglias romontschas ina nova colonia, alla quala ei seigi en honor da nossa veglia patria vegniu dau il num **Badus**. Ussa savein nus relatar, ch'ei seigi uonn vegniu baghegiu cheu ina baselgia catolica tras las unfrendas dallas 70 famiglias romontschas, tudestgas ed englesas, che sesanflan en quei niev liug. Pliras han dau 100 dollars perina e pagan aunc annual 10 dollars ina, per salarisar lur plevon engles, che ha era empriu empau romontsch, per saver conversar ton meglier cun glied veglia romontscha, alla quala ei va vess d'emprender igl engles. Ella libra **America** han tuttas confessiuns e tuttas uisas scolas cumpleina libertad, il stadi ha neginas marveglias da semischedar en fatgs da religiun, sco quei che biars prepotents signurs dalla Svizra han per moda da far.  
*Gasetta Romontscha nr. 15, 8 d'avrel 1886*

### **Subsidis**

La repartiziun dils subsidis per las scolas da lavur ei daventada sco onn. Las 16 scolas realas ni d'ulteriura cultivaziun a **Cuera, Glion, Trun, Tujetsch, Trin, Flem, Almens, Tusaun, Ziraun** etc. han obteniu 190 frs. ina, sis han aunc obteniu in supplement da 150 frs. ord il legat Valentinic.  
*Gasetta Romontscha nr. 23, 2 da zercladur 1886*

### **S. Martin**

S. Martin ei a **Mustér** buca circulau tons daners sco auters onns, ins senteva l'absenza dil capomarcadont da buna memoria. Las miserablas vias han reteniu la solita processiu da **Tujetsch**, buc aber ils negoziants e capitalists siviars.  
*Gasetta Romontscha nr. 47, 18 da november 1886*

### **50% pli pauc**

Sillas miserablas fieras da **Ligiaun** da quest atun era ei da temer, ch'ils artavels dil defunct marcadont uranès Furrer vegnessien muort sia surcargada cun tiers e sias anteriuras sperditas ad empruar da far far in rabatt ses crediturs. Quels dis ei lur agent cumparius en **Surselva** ed ha schau a quels, che vevan dau tiers al Furrer, las letgas da secuntentar cun 50 %, ni ch'ins laschi ir il concuors sulla relaschada facultad dil defunct, e lura sappien ei mirar tgei ch'ei survegnien. Denter dus mals han ils crediturs unitamen legiu ora il pign, enstagl spitgar aunc in onn e per lu riscar da survegnir pauc, han ei fatg la segira e priu ils 50 %, ch'ei vegni pagai ora grad leu.

Particulars da **Mustér, Tujetsch e Medel** han cheutras stuii spiarder varga 20'000 francs. *Gasetta Romontscha nr. 51, 16 da december 1886*

### **Tener quei cuolm aviarts gl'entir onn**

Igl ei gia daditg vegniu seteniu si, che l'**Alpsu** che metta la **Surselva** en communicaziun cull'impurontissima viafier gottardista, hagi mo treis meins in cuors postal e seigi gl'entir unviern serrada. Finalmein ha il magistrat dalla **Cadi** concludiu da far ils necessaris pass per far tener quei cuolm aviarts gl'entir onn. Gl'onn vargau ha nies cantun dau ora 10'417 frs. per tener aviert ils cuolms. Da quei ha la **Surselva**, culla quarta part dalla populaziun cantunala, obteniu pauc ni nuot, aschia ch'ins po spitgar da vart dil **Grischun** pintg'opposiziun, ed **Uri** vegn sin maniera ni l'autra speronza era porscher maun. Hariar ei quei che munta.

*Gasetta Romontscha nr. 4, 27 da schaner 1887*

### **Teater a Sedrun**

Ei vegn menau si a **Sedrun** ella Cruna Dumengia proxima, ils 13 d.q. allas 2 Gievgia grassa, ils 17 d.q. allas 12 1/2 Gliendisdis Tscheiver, ils 21 d.q. allas 12 1/2

**I. Gion Caldar**, drama en 4 acts

**II. Ils Cavasczis**, cumedia en 2 acts

Prezis d'entrada:

Ina piazza reservada 2 frs.

1. piazza: 1 fr.

2. piazza: 70 rps.

Affons da scola: 30 rps.

Tier numerosa frequenza envida en gentilmein Il comite dils mats da **Sedrun**

*Gasetta Romontscha nr. 6, 10 da fevrer 1887*

### **Schar vi l'alp**

L'alp **Cavradi** en **Tujetsch**, appartenenta alla pervenda da **Trun**, vegn sin primavera schada vi per in ni plirs onns.

Da s'adressar tier

La suprastonza da **Trun**

*Gasetta Romontscha nr. 8, 24 da fevrer 1887*

### **Annunzia**

Il sottascret selubescha da far enconuscent ad in ludeivel publicum, ch'el seigi provedius en sia stizun cun da tuttas sorts ferradiras, material da baghegiar, glas, uaffens etc.

Empermettend da survir cun tutta atenziun e per fetg moderai prezis serecamonda gentilmein Anselm Capeder-Cavegn

*Gasetta Romontscha nr. 10, 9 da mars 1887*

### **Uaffens d'in urer**

Il sottascret venda per in raschuneivel prezi in bi sortiment d'uaffens per in uhrenmacher, appartenent ad in client vegnius ord **Germania**. El ha schau ver quels uaffens in bien uhrenmacher, che ha declarau quels per buns uaffens e sufficientis.

Aspirants san s'adressar tier Gion Antoni Soliva, scolast a **Tujetsch**

*Gasetta Romontscha nr. 11, 17 da mars 1887*

### **Dolurs dils dents**

calan immediat si tras siu renomau remiedi, ch'ei aunc danovamein vegnius remediaus. Ei vegn garantiu il success. Ins sa haver quel en guoterets da 80 ct. e dad 1 fr.

Ei vegn encuretg depots.

Distel, miedi da dents a **Schaffusa**.

Ins sa retrer quei remiedi da frars Cavegn ella Cruna a **Sedrun**

*Gasetta Romontscha nr. 12, 24 da mars 1887*

### **Exposiziun**

A **Trun** ein stai 28 taur. ... Igl ei vegniu anflau gronda amegliuraziun e progress tiers las vischnauncas da **Breil, Trun, Sumvitg** e **Mustér**, era tier **Tujetsch** e **Medel**, ed exprimiu la speranza, ch'ei vegni cuntinuau sin quei pei.

Premis han obteniu:

I. classa

9) in mutg da genau Gion Andriu Berther a **Tujetsch** 70 frs.

Premis d'honor ei vegniu dau ... ed a genau Bruno Soliva a **Tujetsch**.

*Gasetta Romontscha nr. 13, 31 da mars 1887*

### **President communal**

Per amur dalla verdad stuein nus visavi allas malfundadas tschontschas, ch'il president communal da **Tujetsch** seigi igl inserant digl inserat sul tscheiver en nr. 7 dalla Gasetta Romontscha declarar, che quei seigi tuttavia buc il cass; quei signur ha mai tarmess ni plidau cun nus enzatgei sur da quei.

*Gasetta Romontscha nr. 16, 21 d'avrel 1887*

### **Ligiacadischs**

Tuts cudischs ch'ins vul confidar a mi per schar ligiar en, san ins deponer e turnar a retscheiver anavos cun pagar la ligiadira tier ils dus sequents depots: a **Sumvitg** tier la Crusch Alva ed a **Trun** tier marcadont Anton Pajarola da Francestg. Segirond ina buna lavur e dueivel prezi serecamonda

Emanuel Deragisch, ligiacudischs a **Tujetsch**

*Gasetta Romontscha nr. 16, 21 d'avrel 1887*

### **Fravia**

Il suttascret fa enconuscent al ludeivel publicum dil contuorn, ch'el seigi secolocaus a **Sedrun** ed hagi tschentau si cheu ina fravia. El ei prompts da retscheiver scadina empustaziun da siu mistregn, empermettend buna lavur per in raschuneivel prezi.

Per numerusas empustaziuns serecamonda

Sebastian Beer, fravi a **Sedrun**

*Gasetta Romontscha nr. 19, 21 da matg 1887*

### **Nominaziun**

Nominas dalla dertgira districtuala **Reinanterior**: ... genau Vigeli Berther, **Sedrun**.

*Gasetta Romontscha nr. 23, 8 da zercladur 1887*

### **Pass Alpsu**

Ins tertgass tuttina che la Confederaziun che ha dau ad **Uri** in bi subsidi pella construcziun dil stradun dall'**Alpsu**, savess zaccuder si e constrenscher il guvern uranès da procurar, ch'el arvi quel sigl emprem zercladur. Tras premura privata han denton las empremas croschas saviu passar quei pass ils 16 d.q. La posta ha refretg l'avertura da siu cuors sils 20 d.q.

*Gasetta Romontscha nr. 24, 16 da zercladur 1887*

### **Stemprou**

Sonda sera ei stau in terribel temporal sill'**Alpsu** che ha ruinau in toc la via e reteniu il carr da posta per quella sera. Pli horribels ei staus igl urezi da dumengia notg sin

gliendisdis. Il terribel tunar e camegiar da mesanotg ha fatg sterment a bia glied, mo per ventira ha el cuzzau mo mes'ura e fatg negin donn.  
*Gasetta Romontscha nr. 31, 4 d'uost 1887*

### **(39) Reussiu all'admirabla e ludeivla luvrusadad e curascha dalla glied da constrenscher il fiug**

Igl incendi duei esser staus l'imprecauziun d'affons ni tubacheders vid glin. - Il pli prigulus liug ella val Tujetsch. - Quei liung e ruh unviern cun sia scartezia da fein vegn a restar ditg en memoria. - Mo el ei buca levas si pli.

#### **Cass straordinari**

Sco igl ei a nus vegniu raquintau posteriuramein ha il tun tiels temporals da tscheidi mazzau sil cuolm Tgom en Tujetsch treis vadials ch'eran sut in pegn – negin vul seregurdar leu d'in semegliont cass.

*Gasetta Romontscha nr. 34, 25 d'uost 1887*

#### **Barschament a Cavorgia**

Gliendisdis vargau, ils 3 d'october, ha in barschament egl uclaun S. Leci (*Cavorgia*) visvi **Sedrun** mess l'entira vallada da Tujetsch en alarm. Dus gronds clavaus, emplen cun nov ladretschs pavel, ein en paucas uras stai preda da furiusas flommas. Il fretg da liunga stentusa lavur e da biars suadetschs da paupra glied ei en cuort svanius en stgiras neblas. Il suffel freva per ventira las flommas naven dallas treis casas grad dasperas, ed igl ei perquei reussiu all'admirabla e ludeivla luvrusadad e curascha dalla glied da constrenscher il fiug sin quels dus baghetgs. La caschun digl incendi duei esser stau l'imprecauziun d'affons ni tubacheders vid glin, cavegliaus silla punt nuegl. Sigl emprem clom d'agid ein ina massa habitonts da Mustér serendi silla piazza da fiug. Cun quella caschun han ins experimentau con avantagius in telegraf ni telefon fuss per quell'isolada vischnaunca.

*Gasetta Romontscha nr. 40, 6 d'october 1887*

#### **Engraziament**

A Tut quels che han tiel barschament dils 3 d.q. a Cavorgia gidau ni vuliu gidar a supprimer il fiug, seigi cheutras mess giu in cordial engraziament. Vegli Dieus remunerar tuts e pertgirar in e scadin da semegliontas disgrazias.

La suprastonza da Tujetsch

Rueras, ils 4 d'october 1887

*Gasetta Romontscha nr. 40, 6 d'october 1887*

#### **Fiera**

Suenter la fiera da Tusaun ein roschada marcadonts tudestgs vegni pella Surselva si tochen Tujetsch e Medel e cumprau si vaccas e genetschas mo per prezis fetg mediochers.

*Gasetta Romontscha nr. 41, 13 d'october 1887*

#### **Scola**

Voluntarias scolas dalla sera ei stau mo treis: a Mustér, Grono e Rueras, che han obteniu in pign subsidi dalla societad da cuminetel.

*Gasetta Romontscha nr. 44, 2 da november 1887*

#### **1887**

En benefeci dils donnegiai tras il barschament da Cavorgia ei concludiu da schar

prender si ina collecta el cumin.

Mira protocol da cumin nr. 18, pag. 138 sut datum dils 21 da november 1887.

*Notizia da pader Baseli Berther*

**1887**

Signur *Duri Vigeli Biart* (1859-1918) da Tujetsch ha suenter haver giu finiu ses studis teologics surpriu la caplania da Rabiis (1887-1889). Signur Alig ha puspei bandunau Tujetsch ed ei seretratgs sin sia anteriura caplania a Sursaissa.

*Gassetta Romontscha nr. 47, 24 da november 1887*

### **Lavina**

A Selva, il pli prigus liug ella val Tujetsch pellas lavinas, ein gia Mardis Tscheiver dus frars Peder, in da 18 ed in da 15 onns, che levan ir per lenna, stuli ella lavina. Sil clom d'agid ein umens da Rueras spert serendi silla piazza dalla sventira, mo muort las stradas serradas giu, han ins a Mustér neginas novas, schebein ils disgraziai seigien vegni liberai ni buc.

*Gassetta Romontscha nr. 7, 16 da fevrer 1888*

Dils dus disgraziai da Selva han ins malgrad tutta tscherca negins fastitgs. *Gassetta Romontscha nr. 8, 23 da fevrer 1888*

Sulla davosa disgrazia vegn ei scret a nus: Igl allegau trest cass ha provocau en l'entira vischnaunca da Tujetsch gronda consternaziun e tema, denton ei cheu era semanifestau legreibla carezia proximala entras la promptadad, cun la quala tut ei dau neutier per prestar agid, sche quei fuss stau pusseivel. Honorifica menziun meretan nos aultreveri signurs spirituals plevon Eduard Muoth e caplon Antoni Wenzin, ils quals ein malgrad la schliata via ed igl aunc existent prighel da lavina sin via, cumpari spertamein sil plaz da sfortuna, e quel buca bandunau aschi ditg sco ins saveva aunc haver la minima speranza d'anflar ils disgraziai en veta.

*Gassetta Romontscha nr. 8, 23 da fevrer 1888*

Il giuven dils dus disgraziai frars Wenzin (*Peder Barclamiu \*1872 e Peder Vigeli Giusep \*1870*) da Selva, ch'eran vegni Mardis Tscheiver (*ils 14 da fevrer 1888*) ella lavina, ei quels dis vegnius anflaus el risti fatgs el Rein per retener lur cadavers, sch'els duessen enten terrenar ir per l'aua ora. Ord siu tgau triblamein sbantunaus po ins era tier quei disgraziu concluder, ch'el hagi anflau ina sperta mort.

*Gassetta Romontscha nr. 22, 30 da matg 1888*

Per correcziun d'ina notizia en nies davos numer, che ha fatg la runda en bia gassetas, remarchein nus, ch'ils dus frars disgraziai ella lavina da Selva eran dalla schlatta Peder e buca Wenzin. Malgrad la progressonta terrenaziun fa la massa neiv da quella lavina aunc ussa sterment als consideraders da quella.

*Gassetta Romontscha nr. 23, 7 da zercladur 1888*

Il secund dils frars Peder (*Barclamiu 1872*), disgraziu tras la lavina a **Selva**, ei quels dis vegnius anflaus ell'aua.

*Gassetta Romontscha nr. 24, 14 da zercladur 1888*

### **Tard primavera e scartezia da fein**

En Surselva tut che plira e selamenta giud il tardament dalla primavera e la gronda scartezia da fein, cunzun tiella classa pauperila, che tegn mo cauras e nuorsas, che han quasi gl'entir unviern giu arrest e semagliu si sesez. Ins segida cun dascha, barbapegn, terc e frina. A motiv dalla trittadad vegnan bia tiers manedels a ventscher. Mo era ils perveseders dalla biestga ston serrar il bratsch stagn fetg, cheutras vegnan era las vaccas serradas e pon per uonn buca si cul latg. A Tujetsch ei els plauns aunc 2 bratscha neiv, a Mustér 5 quartas e tier quei ha ei aunc neviu ils 10 d'avrel tochen Cuera. Quei liung e ruh unviern cun sia scartezia da fein vegn a restar ditg en memoria, mo sepronza era dar gl'impuls, che bia casadas tegnan sigl avegnir



pli paucs tiers sur unviern, mo san envernar quels ton meglier e far megliera economia. Detti Dieus, che quels schliats onns pils purs prendien ton pli gleiti ina fin!  
Oz ils 12 d'avrel neiva ei puspei pir che mai!  
*Gasetta Romontscha nr. 15, 12 d'avrel 1888*

### **Miez bratsch neiv**

Il matg ei arrivaus e cun el speronza la bialaura. Tochen sur Mustér si ei tut terren ed ins entscheiva cullas lavurs dils funs. Tujetsch ha aunc 1/2 bratsch neiv.  
*Gasetta Romontscha nr. 18, 2 da matg 1888*

### **Alpsu**

L'Alpsu ed il Lucmagn han dil maun grischun pauca neiv, aschia ch'els san sils 15 da zercladur vegnir fatgs carregiabels cun pintga breigia. Tut outra lavur dat ei d'arver gl'emprem pass sil territori uranès. Fertion ch'il vie' grischun ha fiers tiara tscheidiatsch e che quella ha magliau giuaden la neiv in bien meter pli a funs, che nua ch'igl ei buca fiers, ei quella avantagiusa lavur daventada pér dacuort dil maun d'Uri. L'uniun ch'ei seformada leu per promover la frequenza dils jasters, duess era schenghegiar empau atenziun alla Alpsura. – Ils vie's han giu uonn breigia da survegnir tratsch muort la nevada e la tiara schelada, mo els duessen gia igl atun metter ensemen quel e nudar cun in signal.  
*Gasetta Romontscha nr. 22, 30 da matg 1888*

### **1888**

Sil **Lucmagn** e sill'**Alpsu** vegn luvrau cun tutta forza per arver il pass. Essend ils umens dalla val d'**Ursera** fatschentai culla **Furca** e garegiond stagn grondas schurnadas, ha il vie' Poltera procurau al delegau uranès S. Christen ina roscha umens da **Tujetsch**, per fierer ora la neiv dil maun d'**Uri**, aschia ch'ins ha sepronza ch'il stradun vegni aviarts gia avon mezz zercladur.  
*Gasetta Romontscha nr. 23, 7 da zercladur 1888*

### **Turists**

L'Alpsu ei vegnida aviarta per crotschas ils 12 d.q. e gia ils emprems dis ei passau dabia crotschas e turists. Il Lucmagn vegn aviarts questa sera. Sul Bernina han ils carrs saviu passar ils 8.  
*Gasetta Romontscha nr. 24, 14 da zercladur 1888*

### **Sventira**

Amiez la veta la mort seschlueta! Il caverer *Giachen Antoni* Curschellas (1872) da Camischolas, in giuven da circa 17 onns, ei sin ina plaunca semess giu per durmir, la capiala sut il tgau ed il fest enta maun, mo el ei buca levas si pli. Vegnend las cauras la sera persulas a casa, han ils vischins sminau ina sventira, ein spert i silla tscherca da lur caverer ed anflau quel morts ella descretta posiziun. Cumpatg ch'ei era vegniu giu in crap ch'ha sturniu el.  
*Gasetta Romontscha nr. 25, 21 da zercladur 1888*

### **Posta**

Oz, ils dus d'uost da miezdi, ei la posta dall'Alpsu arrivada a Mustér cun ina grossa cozza neiv sin tetg; egl ault neiv'ei, ella bassa tun'ei e dracca, denton ein las auas tschessadas empau.  
*Gasetta Romontscha nr. 31, 2 d'uost 1888*